



清乾隆十二年汉阳府疆域图

汉阳历史文化丛书编纂委员会

主 任	曹裕江			
副 主 任	徐洪兰	缪 军	张本满	陈小安
	李 蓉	李艳明	杜健梅	
委 员	胡 勇	冯 辉	刘明祥	方东平
	钟贤超	柯昌伟	肖建桥	余启才
	裴 菲	鲍斌桥	张 彪	
顾 问	章开沅	严昌洪	文坤斗	陈章华
	王建槐	舒 炼	程涛平	

《乾隆汉阳府志》整理人员

主 编	冯 辉	
副 主 编	熊 婕	
点 校	彭忠德	彭善德
校 对	林 波	
审 订	严昌洪	



总序

武汉是国家历史文化名城，武汉三镇历史文化各具特色，精彩纷呈。汉阳作为武汉三镇一方，历史文化源远流长，与中华民族悠久的文明史同步，出现过许多改变武汉、影响中国、震惊世界的壮举。

距今4亿至2亿年前的“汉阳鱼”见证武汉地貌沧海变桑田，距今5万至1万年前的“汉阳人”跻身中华民族古人类，汉南新石器和青铜器文化遗址昭示汉阳古老土地上文明硕果；大禹治水在汉阳完成“江汉朝宗于海”的壮举，两江交汇成为孕育武汉三镇、滋生城市文明的本源，东汉时出现在汉阳的郢月城成为武汉中心城区演进的开端；发源于汉阳的知音文化作为中华民族的国粹飘扬环宇，屈原行吟、关羽洗马、李白游湖、岳飞驻军，无数历史名人积淀了汉阳丰厚的人文资源；张之洞创立“汉阳造”竖起中国近代化的标杆，客观上催生了一个推翻帝制的新时代；毛泽东指点江山“一桥飞架南北，天堑变通途”，从汉阳掀开中国社会主义建设跨越长江、贯通南北的开篇宏图。总而言之，汉阳历史文化底蕴深厚，绚丽多彩。

挖掘整理汉阳历史文化很有必要，借用汉阳区委书记曹裕江的话说，就是激励80万汉阳人民追梦的动力。武汉市政府已经提出武汉三镇协调发展，建设“三镇三城”，这为发展相对滞后的汉阳描绘出了一个更好更快发展、追赶汉口和武昌的愿景，也是大家多年期盼的“汉阳梦”。历史文化是城市吸引力的内核，是城市绽放精彩的不竭源泉。在武汉三镇中，汉阳最值得夸耀的是历史悠久、璀璨厚重的文化。挖掘整理汉阳历史文化、编纂出版《汉阳历史文化丛书》，不仅对汉阳和武汉人民，而且对所有关心汉阳以至武汉发展的人士，都会给予一份信心、一份动力、一份荣誉感。

汉阳地区早在汉代就设有沌阳县、沙羡县以及江夏郡，唐代以后汉阳城历设州、郡、军、府和县级机构，形成相对稳定的区域文化。中华民族传统的区域文化认同以“县”为单元，武汉三镇城市格局形成后，汉口从汉阳县析出独立成镇，今天的汉阳按地缘划分，只是原汉阳县的部分区域，包括长江与汉江相夹的武汉市西南地域，即汉阳区、蔡甸区、汉南区及武汉经济技术开发区，这





也应是武汉“三镇三城”展望的汉阳城的区域。《汉阳历史文化丛书》主要展示以古汉阳县城为核心、包括大汉阳层面的历史文化，形成新的区域文化认同，打造汉阳文化品牌。

《汉阳历史文化丛书》设置方志篇、诗文篇、典故篇、山水篇、人物篇、民俗篇、特色文化篇，组织一批教授、作家、编辑和地方志专家整理编撰，聘请武汉地区著名学者、专家成立丛书编审委员会，计划今年及今后几年内陆续出书，让武汉市民和外来客人通过丛书了解汉阳、阅读汉阳、游历汉阳。

改革开放以来，特别是共同呼吁推进汉阳工业遗址利用并筹建张之洞与近代工业博物馆过程中，我与汉阳区众多有识之士已形成深厚友谊。现今《汉阳历史文化丛书》即将出版，编者索序，义不容辞。但暑热思滞，略缀数语，即以此短文为序，敬祈各界先进指正。

著名历史学家、教育家

癸巳仲夏于桂子山



重刊乾隆《汉阳府志》序

以史为鉴,鉴古知今、鉴古明理,是中华民族生生不息、与时俱进的优良传统。

鉴古首先要知古。汉阳自古盛名楚天,远播华夏,是武汉地区历史文化的源头之一。汉阳从东汉末期至清末均有相当于“府”这一级的机构(历史上不同时期有郡、州、军、府等称谓),汉阳地区郡、州、军、府以及县级机构延续了一千七百余年。

东汉年间,汉阳龟山和月湖附近的郢月城,是一座军事城堡。汉建安二年(197年),东吴孙策进攻江夏郡,郡太守黄祖由沙羡(今武汉市江夏区金口)进守郢月城。郢月城作为江夏郡治,同时为沙羡县治。江夏郡辖范围,大致相当于今武汉城市圈。汉建安十三年春,郢月城被孙权屠城,不久,在今汉阳凤凰山(时与龟山统称大别山)南新筑江夏城,继为江夏郡治。三国时,吴国改大别山名为鲁山,江夏城改称鲁山城,为吴国江夏郡,且设鲁山县。隋朝统一后设汉津县,更名汉阳县。唐武德四年(621年),鄂州刺史雷长颢在鲁山城降唐。唐朝随即将临漳城中的沔州州治移至鲁山城,并设汉阳郡,下辖汉阳县、汉川(后改汉川)县。从此,鲁山城更名为汉阳城,虽有行政机构设置变化,仍然是较为稳定的地方政治、经济、军事和文化中心。唐宝应二年(762年)至唐元和年间(806—820年),汉阳郡增辖孝昌县。后周显德五年(958年)设置汉阳军,宋代沿袭军制,元代至元十四年(1277年)汉阳军改称汉阳府,仍辖汉阳、汉川二县。清雍正七年(1729年),黄陂县、孝感县划属汉阳府。乾隆二十八年(1763年),沔阳州划属汉阳府。光绪二十五年(1899年),汉阳县所属的汉口镇升为夏口厅,汉阳府管辖四县、一州、一厅,直至中华民国才将府这一级机构废除。

史书是人们鉴古知今明理的重要工具。诸多史籍中,国史与方志是记载古代社会历史的主体。清代史学理论大家章学诚说:“州县有志,国有史,其义一也。……县志有征,则国史取焉。”同为史书,方志可谓一身而二任:既方便人们鉴古观今,又为国史提供丰富的原始材料。汉阳地区人杰地灵,文风浓郁,很早就已形成了以行政区划为范围修纂地方志的优良传统。乾隆《汉阳府志》是“康乾盛世”的志书佳作,它全面、系统地记述了当时汉阳府及所辖汉阳、汉川、





黄陂、孝感四县的自然、经济、政治和社会等各方面的情况，同时也在客观上反映了汉阳在武汉乃至湖北历史上的重要地位和作用，具有独特的历史价值和文化价值。

鉴古知道明理的意义是启迪未来。今日之汉阳雄踞武汉三镇之一镇，在武汉打造“三镇三城”、建设国家中心城市的时代进程中，汉阳理应弘扬古近代汉阳引领武汉建设发展的辉煌历史，更多地承载彰显武汉历史文化名城魅力的荣耀和责任，在经济、社会、文化和生态文明建设中加速崛起，以更加强烈的历史自觉和文化责任，努力把汉阳建设成为武汉这座国家中心城市的核心区，续写汉阳发展历史的辉煌。

是为序。

中共武汉市汉阳区委书记

曹站江

2013年10月31日



凡 例

一、此次《汉阳府志》的整理工作，以国家图书馆收藏的清人陶士傑修、刘湘烱纂的乾隆十二年（1747）《汉阳府志》为底本，以武汉大学图书馆所藏乾隆《汉阳府志》手抄本、中国地方志集成影印乾隆《汉阳府志》手抄本为校本，同时参考了明代嘉靖、万历两朝《汉阳府志》（校记中简称嘉靖《志》、万历《志》）。

二、全书整理贯彻保持原貌的原则，施加现代标点符号。原书正文和夹注文字的标点，各为系统；同时为了保持版面的美观和层次清楚，少数正文和夹注放在一起施加标点。长文均按文意划分段落，以便阅读。原书目录层次保持不变，同时完整保留原书插图。

三、原文竖排改为横排，双行夹注改为单行小楷，以区别于正文。

四、针对原书的讹误脱漏情况，整理时作了以下处理：原书衍、脱、误、倒，均加校改，用圆括号（）标明者为误字，方括号〔〕标明者为正字；原书漫漶缺字，如无他证，用虚缺号“□”标明，且一字一“□”，如缺损字数不详，连用若干“□”，而不用省略号“……”；点校者根据原书体例补入的篇题、作者名称等相关文字，亦用方括号〔〕标明。校勘的成果，均出校记说明，以示郑重。

五、原文中通假字不改；繁体字改为简体字；异体字、俗体字、雕版工人习用字等非规范字，一概改为现代汉语通用字，均不出校记。

六、原书中的避讳字，如禛、玄，或改为正、元，或缺笔，现一律改回原字。

七、表示尊敬的空格和另行跳出者，径改接排，不出校记。



总目

清乾隆十二年汉阳府疆域图

总序..... 章开沅（1—2）

重刊乾隆《汉阳府志》序..... 曹裕江（3—4）

凡例..... （5）

清乾隆《汉阳府志》详目..... （1—9）

清乾隆《汉阳府志》卷之首..... （1—8）

清乾隆《汉阳府志》正文..... （1—668）

后记..... （669）





清乾隆《汉阳府志》详目

《汉阳府志》卷之首	1
《汉阳府志》序	1
修志姓氏	3
凡 例	5
目 录	7
《汉阳府志》卷之一 天官〔一〕	1
分野志	1
《汉阳府志》卷之二 天官〔二〕	4
极度志	4
《汉阳府志》卷之三 天官〔三〕	10
五行志	10
恤政附	20
《汉阳府志》卷之四 地輿〔一〕	25
疆域志	25
汉阳府	25
汉阳县	25
汉川县	25
黄陂县	26
孝感县	26
《汉阳府志》卷之五 地輿〔二〕	27
沿革志	27
汉阳府沿革	27
汉阳县沿革	28
汉川县沿革	29
黄陂县沿革	29





孝感县沿革	29
沿革表	30
《汉阳府志》卷之六上 地輿〔三〕	40
城池志	40
汉阳府汉阳县附郭	40
汉川县	43
黄陂县	43
孝感县	44
《汉阳府志》卷之六下 地輿〔四〕	47
公署志	47
汉阳府	47
汉阳县	49
汉川县	50
黄陂县	51
孝感县	53
《汉阳府志》卷之七 地輿〔五〕	57
輿图	57
《汉阳府志》卷之八 地輿〔六〕	112
山川志	112
汉阳县	112
《汉阳府志》卷之九 地輿〔六〕	124
山川志	124
汉川县	124
黄陂县	134
《汉阳府志》卷之十 地輿〔六〕	139
山川志	139
孝感县	139
《汉阳府志》卷之十一 地輿〔七〕	146
形势志 关隘 津渡 桥梁	146



汉阳县	146
汉川县	149
黄陂县	150
孝感县	151
《汉阳府志》卷之十二 地輿〔七〕	154
形势志 城郭坊镇 乡里村镇	154
汉阳县	154
《汉阳府志》卷之十三 地輿〔七〕	162
形势志 城郭坊镇 乡里村镇	162
汉川县	162
《汉阳府志》卷之十四 地輿〔七〕	169
形势志 城郭坊镇 乡里村镇	169
黄陂县	169
孝感县	171
《汉阳府志》卷之十五 地輿〔七〕	173
形势志 堤防	173
汉阳县堤防	173
汉川县堤防	176
黄陂县堤防	180
孝感县堤防	181
《汉阳府志》卷之十六 地輿〔七〕	184
形势志 风俗	184
汉阳县风俗	184
汉川县风俗	185
黄陂县风俗	185
孝感县风俗	186
《汉阳府志》卷之十七 地輿〔七〕	187
形势志 古迹	187
汉阳县古迹	187





《汉阳府志》卷之十八 地輿〔七〕	201
形势志 古迹	201
汉川县古迹	201
黄陂县古迹	204
孝感县古迹	206
《汉阳府志》卷之十九 地輿〔八〕	211
兵防志	211
汉阳府	211
汉阳县	216
汉川县	217
黄陂县	217
孝感县	218
《汉阳府志》卷之二十 典礼〔一〕	220
典礼志	220
《汉阳府志》卷之二十一 典礼〔二〕	225
禋祀志	225
汉阳府	225
汉阳县	229
汉川县	231
黄陂县	232
孝感县	233
《汉阳府志》卷之二十二上 典礼〔三〕	235
学校志	235
汉阳府学	235
汉阳县学	247
汉川县学	248
黄陂县学	250
孝感县学	251
《汉阳府志》卷之二十二下 典礼〔三〕	253
学校表	253



《汉阳府志》卷之二十三 食货〔一〕	265
食货志	265
汉阳府赋税	265
汉阳县	267
《汉阳府志》卷之二十四 食货〔一〕	276
食货志	276
汉川县	276
《汉阳府志》卷之二十五 食货〔一〕	281
食货志	281
黄陂县	281
《汉阳府志》卷之二十六 食货〔一〕	287
食货志	287
孝感县	287
《汉阳府志》卷之二十七 食货〔二〕	293
户口志	293
汉阳县保甲烟户丁口	293
汉川县保甲烟户丁口	293
黄陂县保甲烟户丁口	294
孝感县保甲烟户丁口	294
《汉阳府志》卷之二十八 食货〔三〕	296
物产志	296
汉阳县	296
汉川县	297
黄陂县	298
孝感县	300
《汉阳府志》卷之二十九 人物〔一〕	301
秩官通表卷上	301
秩官通表卷下	316





《汉阳府志》卷之三十 人物〔一〕	320
四县秩官表	320
《汉阳府志》卷之三十一 人物〔二〕	331
名宦志	331
《汉阳府志》卷之三十二 人物〔三〕	338
良吏志	339
《汉阳府志》卷之三十三 人物〔四〕	347
乡贤志	347
汉阳县	347
汉川县	351
黄陂县	352
孝感县	357
《汉阳府志》卷之三十四 人物〔五〕	362
仕迹志	362
汉阳县	362
汉川县	374
黄陂县	376
孝感县	380
《汉阳府志》卷之三十五 人物〔六〕	386
忠臣志	386
《汉阳府志》卷之三十六 人物〔七〕	392
孝子志	392
汉阳县	392
汉川县	393
黄陂县	394
孝感县	395
悌弟附	398
忠义仆附	398



《汉阳府志》卷之三十七 人物〔八〕	400
选举表	400
朝代附取士制	400
进士	401
乡试·举人	412
《汉阳府志》卷之三十八 人物〔八〕	439
选举表	439
贡士	439
《汉阳府志》卷之三十九 人物〔八〕	465
选举表	465
辟举	465
武进士	466
武乡科	469
《汉阳府志》卷之四十 人物〔九〕	479
笃行志	479
汉阳县	479
汉川县	482
黄陂县	483
孝感县	484
《汉阳府志》卷之四十一 人物〔十〕	486
文苑志	486
汉阳县	486
汉川县	493
黄陂县	494
孝感县	496
《汉阳府志》卷之四十二 人物〔十一〕	500
隐逸志	500
汉阳县	500
汉川县	502
黄陂县	503





孝感县	504
《汉阳府志》卷之四十三 人物〔十二〕	506
方技志	506
汉阳县	506
汉川县	507
黄陂县	507
孝感县	507
《汉阳府志》卷之四十四 人物〔十三〕	508
方外志	508
汉阳县	508
汉川县	509
黄陂县	510
孝感县	510
寺观附	511
汉阳县	511
汉川县	514
黄陂县	515
孝感县	517
《汉阳府志》卷之四十五上 人物〔十四〕	519
列女志·汉阳县	519
《汉阳府志》卷之四十五下 人物〔十四〕	533
列女志·汉川县	533
《汉阳府志》卷之四十六上 人物〔十四〕	538
列女志·黄陂县	538
《汉阳府志》卷之四十六下 人物〔十四〕	547
列女志·孝感县	547
《汉阳府志》卷之四十七 艺文	561
艺文目录	561
艺文志·汉阳县	565

《汉阳府志》卷之四十八 艺文·····	609
艺文志·汉川县 ·····	609
《汉阳府志》卷之四十九 艺文·····	620
艺文志·黄陂县 ·····	620
《汉阳府志》卷之五十 艺文·····	636
艺文志·孝感县 ·····	636





《汉阳府志》卷之首

《汉阳府志》序

修志之事，与国史为表里。史以纲维一代，志则一郡一邑必委曲详尽以待辘轩之至，而补石渠、天禄所未备。虽远近巨细各殊，要其援古证今、准情据义，不敢意为予夺去取，其法均也。

汉阳于楚北为名郡，而志乘缺如。自国初陈公国儒后，鲜留意者。前守胡公学成及钟公昭，始置馆授餐，鸠诸老宿为撰辑，陈公文言继之，费近千缗，积十余岁，仍未卒业。迨士饔承乏，郡绅士亟以为请，乃索观前后所纂录，亦既斐然成集矣，而询问不即授梓之故，则曰：“诸儒持议，各不相下，前使君亦遂诿之，无可如何耳。”噫嘻，筑室道谋，是用不集。夫将聚千百年郡邑之风土人物，损益成书，以信今传后，固无患搜罗之不广，而患见闻之不确；无患文词之不赡，而患是非之不公。若体裁既辨，惟断乃成。彼老吏决狱，彝人嗅金，平反高下，诘假纷纷者旁挠哉。爰是取新旧诸稿，悉归署斋，鞅掌之暇，丹黄僭涉。又得江夏刘君湘燊助予编次讨论，不辍寒暑七阅月，繁者荆之，遗者补之，讹者正之，凡所为历象星文，可按图而索也；山川风景，若聚米而谈也；赋役人民，类比户而计也；秩官选举、节义文章，悉稽典故、参舆论，而棋布星罗也。岂曰尽善，亦但就其斐然者为之经纬综核，而无敢矜情作意，形移步换，有如光弼入子仪军，旌旗一变，要非于卒伍加多、兵革加利也已。

且余观宇内郡邑之书汗牛充栋，而今昔所传，独《景定建康》一志，群宝如拱璧，近日陆稼书所撰《灵寿志》，亦啧啧称善，得非崇议高识，有参酌古今、吻合情义者，而其地其人亦藉以传不朽乎。然则景行仰止，二书不独为志乘准的，即以为列史中班、马、荀、袁，可也。予何人哉，虽不能至，心窃向往之。或曰：“自公操笔后，外论已不能赞一词。”则余滋赧然愧矣，惶然惧矣。

时皇清乾隆十二年，岁次丁卯，仲冬月谷旦
赐进士出身、知湖北汉阳府事，长沙陶士楔谨序





修志姓氏

鉴定

兵部侍郎兼都察院右副都御史、总督湖广等处地方军务兼理粮饷加一级塞楞额

总督仓场、户部右侍郎署湖北巡抚事加一级彭树葵

前任巡抚湖北等处地方、提督军务兼理粮饷、兵部侍郎兼都察院右副都御史加三级、今调巡抚西安陈弘谋

日讲官起居注、提督湖北等处地方学政、翰林院侍读加二级宋邦绥

湖北等处承宣布政使司布政使加三级严瑞龙

湖北等处提刑按察使司按察使加三级刘芳霭

分巡湖北督粮道、按察使司副使加三级李治运

前任督理湖北全省驿传盐法道按察使司副使加一级公泰

分守武、汉、黄、德道，驻扎黄州府按察使司副使加三级姜顺龙

主修

汉阳府知府、前翰林院庶吉士陶士俔

同修

汉阳府同知王云翔

汉阳府通判冯士章

汉阳县知县刘嗣孔

汉川县知县吴元统

黄陂县知县杨洛

孝感县知县方嵎

前任主修

原任汉阳府知府胡学成





升任汉阳府知府钟昭
原任汉阳府知府陈文言
原任汉阳县知县沈孟坚

分校

汉阳府学教授卢恺
汉阳府学训导彭子瑜
原任韩阳县学教谕陈文源
汉阳县学教谕晏嘉德
汉阳县学训导郭星垣

编辑

江夏县贡生刘湘燊

分修

原任竹溪县知县陆峻
原任昭文县知县劳必达
原任罗田县教谕张坦含
原任长阳县教谕方璿
汉阳府贡生江祚崑
汉阳府贡生崔文元
汉阳府贡生徐聪
汉阳县贡生彭湘怀



凡 例

一、兹志书凡五十卷，分为六类，以为之纲。一曰天官，一曰地舆，一曰典礼，一曰食货，一曰人物，一曰艺文。每条各有序文以弁其首，其一条之精神命脉皆在其中，使观者预知作意，其未尽者，载在凡例。

一、兹编分类序次，如分野、极度，固是天官本类，而五行变异，亦天之垂象，以示吉凶，故亦附于天官。地以博而职载，故曰地舆。今志汉阳，必先明汉阳经界，而后可考上下古今之事，故先疆域而后沿革，又次城池、公署而先于山川者，辨方定位，以建民极，民极建而后可察山川、相形势，著关隘、津梁、乡里、村镇、堤防、风俗、古迹，以见古今区画之是非损益，以示将来也。建城设险而兵防在焉，羽书传命，置邮为先，故驿递附之。列史诸志，必修礼乐，盖所纪者，一代所制之礼、所作之乐，以彰示典常，今志内即纪，现遵《会典》所定一切仪注乐章，为《典礼》三卷，至泮宫礼乐，天下之所同也，而详志之者，因各省庙制木主塑像、佾舞多寡，祭品全缺，甚有异同，故特志之，以见汉阳之学校所遵犹如是耳。食货、人物、艺文，另有凡例。

一、天文历法，因传习者稀，是以象纬之学，竟成秘密之藏，列史是非，无敢过而问者。一切志书，每至天官一卷，末后总归以俟后之知天者为之正订。今《历象考成》一出，如日月之悬象著明，千百年来之疑窦，竟可涣然而冰释矣。故略序大端，并列北极出地图表，亦俟知者。

一、赋役一事，不但各邑之科则不同，一邑之中，而各乡科则尚有同异，至于各乡赋役小总之数、丁粮石斗折银之则，旧《志》多厌其繁而删之不载，不知胥吏豪民舞文弄法，乃甚乐其简削，所谓“恶害己”也。今故悉载诸项，犹惜其未详，固不能词尚简劲矣。

一、人物一志，所贵显微阐幽，以表先贤、风后世也。若但假名人以增此地之荣，或党其所不必存者，而曲为之说，是秽史矣，兹编则痛除此弊。

一、乡贤于明末国初，邑志有以明代之官而载为本朝卿亚者，今特查诸君生卒年月，载明本传之内。

一、名宦祠中木主寥寥，陈《志》、钟《稿》俱只二十余人，各县之名次，又间有同异，吊取案卷，无可稽考，殊费斟酌，因念省《志》乃系曾经御览之书，





岂不可代具题之案，故(郎)[即]将省《志》名宦载于志中^①。

一、节妇一条，难容滥载，固宜以奉旌者方可入志，然岂无穷乡僻壤忍冻含饥、苦节终身而莫之表扬者，若一概以奉旌者而后入志，是又非所以彰潜德幽光矣。今自钟守以来所采节烈之妇、贞孝之媛，及旧《志》所载者，不敢删去一人，间有采访确实者，尚在有增无减也。

一、艺文一志，《前汉书》因值秦火焚书之后，汉代未二百年，而所集之书又已多至五百九十余家，万有三千二百余卷，故特志之，以见旁搜广集之盛。然有经、史、子、集四种，亦只载书名卷数，而书内之文辞不载焉。后之修史者遂仿之以为例。今郡邑之志并无所为经史以及诸子之书，惟载数帙诗歌赋记，而即统名之曰艺文，无乃与古人所谓艺文之志有间欤？时贤佳什，自有专函，固无俟此片羽班毛之足为专集增重，且载亦不胜载也。今惟取有关汉阳政治民生之奏疏文移，地方利弊书序，各学校公署修建碑记，载于简端，以俟考订。

一、户口人丁，即天下人民之数，乾隆五年，皇上特颁上谕，勅取天下谷数民数，而重宣古圣王拜受民数之文，告诫谆谆，诚圣主惠养元元之至意。今将《全书》、《奏册》所载人丁之数循例载于赋役之末，又查取各邑保甲户口之数，特为烟民户口一志，载于赋役之外。

一、古人左图右史，图之不明者，系之以说，说之难陈者，表之以图，聚米画沙，而山川了了于目。列朝图绘，多属荒唐。朱思本以里至开方，颇从理道。至本朝之《皇舆全览》，以经纬里至开方。图出，则九州之向背远迩，无不一一与山川吻合，亦亘古未有之图经也。今一郡四邑，悉以其法为之，往复正订者数四，虽不能仿效万一，然较之一切志书所绘，差傍绳墨，或不致颠倒东西也。

一、凡古迹，世远年湮、名存而实亡者有之，或讹以传讹、好奇而傅会者有之，且陵谷变迁，世更代易，汉晋之城垣公署，今为麦陇瓜畦，郎官之湖，尽作居民住宅，其始作者谁耶？转而授受者又谁耶？今已千百年矣，故修古迹，第存其名，其地、其事，不敢轻作断语。

一、八景、十景，志多例载。夫烟雨晓钟、晴岚夕照，何处蔑有？各地山川，自有本色，偶然胜概，以供才人韵士之兴会者，悉可作陈言务去，旧《志》凡规，概从删削。

^①“郎”，当为“即”字之误。



目录

天官

分野
极度
五行 恤政附

地輿

疆域
沿革 表附
城池
公署 仓储 育婴 普济 禁狱
輿图
山川
形势 关隘 津渡 桥梁 乡里村镇 堤防 风俗 古迹
兵防 兵制 武官姓氏 四县塘汛 驿递

典礼

礼仪 上任开印、封印附 万寿 元旦 冬至 朔望 迎春土牛 祈祷 救护
迎诏哀诏附 朝觐 乡饮 科举 新生 阅城 阅操 霜降
裡祀 先农 社稷 风云雷雨山川城隍 厉坛 忠义孝弟祠 六先生祠
仙官土地祠 关帝庙 城隍庙 八蜡庙 旗纛庙 四县坛祠
释奠 庙制学基 学田 学地 弟子员缺 祭仪 祭品 仪注 祝文 乐章
乐器 舞谱 四县庙制学基 学田 学地 书院 射圃 弟子员缺 列代尊崇
先圣年表

食货

本府征解 商税 牙税 当税 官地租 鱼厂地税 房船税 渔课又在府治





地方征收，而非府县职官经管，有税课二项为船料、盐税 四县正杂银米总数

四县征解 田赋 更名 漕米 南米 芦课 渔课 税课 丁徭

四县烟民户口

物产

人物

秩官通表

名宦

良吏

乡贤

仕迹

忠臣

孝子 悌弟 义仆附

选举表

懿行

文苑

隐逸

流寓

方

方外 寺观附

列女 节妇 烈妇 烈女 贞女 孝女

艺文

汉阳县

汉川县

黄陂县

孝感县



《汉阳府志》卷之一 天官〔一〕

《分野志》序

宇内旧志，例皆首载分星，盖体“二典”“钦若昊天”之意也。顾考轩辕造盖天，颡项造浑天，尧命羲氏、和氏分宅四方，舜以璇玑、玉衡齐七政，周公营洛，测表景以定日躔，圣圣相承，首重钦若之事者，皆为敬授人时而作，无所谓分野也。

《春秋》书灾异而不言事应，至裨灶始论分星，子产已谓灶为多言。司马子长作《史记》，既修《历书》，又修《天官书》以别之，并存不废，拟《周礼》之有冯相、又有保章之义而已。班孟坚修律历为一志，其事已难相通，而汉、晋史志且有日食不在朔者，天学之疏略若是，则其所作《天文志》与所分野，信能确切为千古之定论欤？

至本朝《时宪经纬》与《历象考成》诸书，其于天学最为精矣、备矣，而俱不言分野，盖深知非轩辕、尧、舜之相承，悉后人之附会耳，且历代所载，为说人人各殊，而后世习于旧闻，每崇往论，固不能尽去其说而不存。今仍将列史各志与诸家之说并载异同，以存旧例，以待来兹，在好学深思者自能辨其是非矣。

为《分野志》。

分野志

诸家之说

《尔雅》云：荆属衡星。

《史记·天官书》谓“翼、轸荆州”，又曰：“翼为羽翮，主远客。”正〔翼〕〔义〕曰^①：“翼二十二星，轸四星，长沙一星，左辖右辖二星，皆为鹑尾，于辰在巳，

^①“翼”，当为“义”之误。





楚之分野。”其说已不同于《尔雅》。

汉张衡以五帝座东南中一星为司空，主镇星，为荆州。此说又不同于《尔雅》、《史记》。

班固取刘歆，以十二次配十二野，遂以鹑尾配荆州。班说又与《史记》、张衡不同。

《春秋纬》云：大别以东至雷泽、九江、荆州，属衡星。与前四说又不同。

《春秋文耀》云：北斗分野，荆属衡星。

《春秋元命苞》云：轸星散为荆州。又不同于前五说。

蔡邕《月令章句》云：起张十二度，至轸六度，为荆州。又不同于上六说。

皇甫谧《帝王世纪》云：自张十八度至轸十度曰鹑尾之次，于辰在巳，谓之大荒落，斗建在申，为楚分野。又不同于上说。

《星经》则为玉衡第四星主荆州。

《统论》谓太乙第二星主荆州。以太乙分野，又不同于翼、轸、斗、衡之说。又考《古今星图》、丹元子《步天歌》、《灵台志》及今西法星歌，太乙只有一星在右枢、少尉之间，与太乙并列，古歌曰：“左右四星是四辅，太乙太乙当门路。”西歌曰：“右边右枢与左对，太乙天乙显微精。”太乙并无二星，而《星经》又谓太乙第二星主荆州，其说盖未足据。

三国魏陈卓《郡国疆次》云：自张十七度至轸十一度鹑尾，楚分。此又不同于前之以翼、轸为楚分之度。

《晋书·天文志》云：翼轸楚荆州，南阳入翼六度，南郡入翼十度，江夏入翼十二度。此又不同于以张翼轸之分度。

《唐书·天文志》曰：翼轸，鹑尾也，起张十五度，中翼十二度，终轸七度。此与起张十二度、十八度，终轸六度、轸十度者不同，又不但以斗分、以太乙分、五帝座分矣。

一行分南纪、北纪，由汉水之阴趋均州、光化、谷城、枣阳，折而随州，抵应山，于汉阳为南郡，入翼十度，汉川、汉阳逾武昌、樊口入黄州，括二郡全境，以至德安之安陆、云梦、孝感，其地为江夏郡，入翼十二度。地方二千余里，而只分翼之两度，其又不同于前一切所分之法矣，论具后幅。

《宋〔史〕·天文志》曰^①：“北斗第二星曰璇，其分为楚。”又与以斗分野，第五星曰衡，为楚者不同。

论曰：考天市垣所载各国之星，有星名楚。丹元子《步天歌》之略曰：“十一

^①“宋”下宜补“史”字，以下引文字出自《宋史》，以别于《宋书》。



星属十一国，梁楚韩邦在尽头，魏赵九河与中山，齐越吴徐青海间。”此犹一国一星。至女虚之间，又有散星十六，而属十二国。《步天歌》又曰：“楚之一国魏西屯，楚城南畔独燕军，燕西一郡与齐邻，齐北两邑平原君。欲知郑在越下存，十六黄星细区分。”

今志汉阳，固不当概论其余，然辨分星，不得不连类以相比证。楚南何为而当驻燕军，郑宿又何以应存越下也？夫星昴星虚之世，天无楚、魏、中山、韩、赵之星，地无九河、周代、梁蜀之号，而天星地野之吉凶，又何所依据耶？且天行至健，运动无方，有此全体之天，自必应此全体之地，古人鸟卵之喻，不我欺也。依黄赤之周天者，自必与大地吻合，八夤九垓之外，无不缕缕相承，岂得有周天二十八舍之宿，尽属于十五省之中，而十五省以外之地，数十倍于十五省之幅员，同在此一天之内，而与周天之度遂毫无干涉耶？

今《历象考成》与《时宪书》皆核以地之二百五十里而天差一度，谓之里差。东西为经，辨各地节气之早晚；南北为纬，辨各地昼夜之短长，此乃推交食，验各省见食之先后，与见食浅深分数之所以然也。今翼宿二十二星在天之经度一十九度，轸宿四星在天之经度一十七度，起鹑尾一十九度十三分，至寿星之十九度十六分。二宿共隶于天之经度三十六度矣，而纬度自北极至南极之一百八十二度有奇者不问欤？若以二百五十里实据之度计之，今天下之纵横不过七千余里，使尽属于翼轸之经度而且不足，又将何地以分于二十六宿与斗衡各国之星乎？又不必论其分之是与非矣。





《汉阳府志》卷之二 天官〔二〕

北极出地之度序

旧《志》知载分野，而不知载北极出地之度。夫北极在天，如磨之有脐、车之有轴。谈天者使但知轮、磨，而不知轮、磨之有脐、轴，虽隶首、容成又何从而识其纲维、辨其条贯也哉！诚以北极出地之度为一地经纬之宗，昼夜之永短由此分，寒暑之分数由此变，七政伏见之方位由此定，诚天学之权舆，最有关于岁功，可无纪载以前民用乎？

世宗颁发《历象考成》，乃圣祖钦命修明以嘉惠后世之书，皇皇典则，江汉名区，岂无一二愿为讲求其说者耶？是以特修江汉北极出地之度一帙，载于书首。

极度〔志〕

汉阳府 北极出地三十一度。

汉阳县 北极出地与府同。

汉川县 北极出地与府同。汉川虽距府治一百二十里，然系东西相去，于在天纬度无差，是故当日分测之时，绘图亦在三十一度表下。

黄陂县 北极出地三十一度二十分。

孝感县 北极出地三十一度三十分弱。



汉阳府北极出地、昼夜长短、日出入时刻表

矇眊影乃日未出朏明之时、日已入黄昏之时，谓之矇眊影。

北极出地 三十一度		日出	日入	昼长	夜长	矇眊影
冬至	刻分	卯 正四刻一分	申 正三刻十四分	长 三十九刻 十三分	长 五十六刻二 分	六刻三分
小寒	刻分	卯 正三刻十三分	申 正四刻二分	长 四十刻四分	长 五十五刻 十一分	六刻三分
大寒	刻分	卯 正三刻六分	申 正四刻九分	长 四十一刻三 分	长 五十四刻 十二分	五刻十四分
立春	刻分	卯 正二刻十一分	酉 初一刻四分	长 四十二刻八 分	长 五十三刻七 分	五刻十二分
雨水	刻分	卯 正一刻十四分	酉 初二刻一分	长 四十四刻二 分	长 五十一刻 十三分	五刻十分
惊蛰	刻分	卯 初四刻十四分	酉 初三刻一分	长 四十六刻二 分	长 四十九刻 十三分	五刻十分
春分	刻分	卯 初四刻〇〇分	酉 初四刻〇〇分	长 四十八刻 〇〇分	长 四十八刻 〇〇分	五刻九分
清明	刻分	卯 初三刻一分	酉 初四刻十四分	长 四十九刻 十三分	长 四十六刻二 分	五刻十二分
谷雨	刻分	卯 初二刻一分	酉 正一刻十四分	长 五十一刻 十三分	长 四十四刻二 分	六刻一分
立夏	刻分	卯 初一刻四分	酉 正二刻十一分	长 五十三刻七 分	长 四十二刻八 分	六刻五分



〔续表〕

北极出地 三十一度		日出	日入	昼长	夜长	曦曛影
小满	刻分	寅 正四刻九分	酉 正三刻六分	长 五十四刻 十二分	长 四十一刻三 分	六刻八分
芒种	刻分	寅 正四刻二分	酉 正三刻十三 分	长 五十五刻 十一分	长 四十刻四分	六刻十一分
夏至	刻分	寅 正三刻十四 分	酉 正四刻一分	长 五十六刻一 分	长 三十九刻 十三分	六刻十一分
小暑	刻分	寅 正四刻二分	酉 正三刻十三 分	长 五十五刻 十一分	长 四十刻四分	六刻十一分
大暑	刻分	寅 正四刻九分	酉 正三刻六分	长 五十四刻 十二分	长 四十一刻三 分	六刻八分
立秋	刻分	卯 初一刻四分	酉 正二刻十一 分	长 五十三刻七 分	长 四十二刻八 分	六刻五分
处暑	刻分	卯 初二刻一分	酉 正一刻十四 分	长 五十一刻 十三分	长 四十四刻二 分	六刻一分
白露	刻分	卯 初三刻一分	酉 初四刻十四 分	长 四十九刻 十三分	长 四十六刻二 分	五刻十二分
秋分	刻分	卯 初四刻〇〇 分	酉 初四刻〇〇 分	长 四十八刻 〇〇分	长 四十八刻 〇〇分	五刻九分
寒露	刻分	卯 初四刻十四 分	酉 初三刻一分	长 四十六刻二 分	长 四十九刻 十三分	五刻十分





〔续表〕

北极出地 三十一度		日出	日入	昼长	夜长	矇眊影
霜降	刻分	卯 正一刻十四分	酉 初二刻一分	长 四十四刻二分	长 五十一刻十三分	五刻十分
立冬	刻分	卯 正二刻十一分	酉 正二刻一分	长 四十二刻八分	长 五十三刻七分	五刻十二分
小雪	刻分	卯 正三刻六分	申 正四刻九分	长 四十一刻三分	长 五十四刻十二分	五刻十四分
大雪	刻分	卯 正三刻十三分。	申 正四刻二分	长 四十刻四分	长 五十五刻十一分	六刻三分
		日出	日入	昼长	夜长	矇眊影

汉阳府各节气太阳高度表


日高	十度			十分		
冬至	三	五		三	一	冬至
小寒	三	六		二	一	大雪
大寒	三	八		四	八	小雪
立春	四	二		三	八	立冬
雨水	四	七		三	一	霜降
惊蛰	五	三			六	寒露
春分	五	九			一	秋分
清明	六	四		五	六	白露
谷雨	七	〇		三	一	处暑
立夏	七	五		二	四	立秋
小满	七	九		一	四	大暑
芒种	八	一		四	一	小暑
夏至	八	二		三	二	夏至
	十度			十分		





汉阳府北极出地考并载浑仪以明测验之法

欲知北极出地之度，须先知测验之法。欲知测验之法，又先须明测验之器。器者，浑仪也。浑仪者，圣人鉴天体之至圆，遂为圆物以肖之，实其体，载恒星于上者，谓之天球，亦曰浑球，亦曰浑天球，总一物也。但存南北二极、黄赤二道黄道为黄道圈，赤道为赤道圈。与二道之经度，而过二极成一线者，谓之过极圈。存此数圈，余俱缕而去之者，谓之浑天仪，又谓之浑象。测天之器甚多，惟浑天仪显而易明，故古今天台赖之以明天道者，惟此而已。浑天仪即舜之璇玑、玉衡。



浑天仪即舜璇玑玉衡之图

如图：方而如案，中凿一圈，与浑天仪等大。南北惟开一渠，以安置浑仪者为地平规。仪器上凡有圈者，皆呼为规，下仿此。北极、天顶、南极外之镌刻四象限九十度之大圈，谓之子午规。子午规三百六十度，分而为二，各半周之最中而安南北二极，如西瓜之有脐与蒂，为不动之枢，而后二道可以旋转矣。于两极最中、极大之腰围一线，而分浑圆之形为两半圆，腰围之线即赤道也。而太阳行于天上，不尽循乎赤道，乃自春分而夏至而秋

分之半年行于赤道之北，其自秋分至冬至而复至春分之半年行于赤道之南，其冬至出赤道南之纬度二十三度半，夏至出于赤道北之纬度亦二十三度半，终古无毫厘之差。按其所行之迹，仅如一线斜络天体，交于赤道，是为黄道。因天左旋，终日东升西没，乃南北二极与赤道之行，而太阳之行则每日不及天之一度，其太阳之东升西没者，乃附于天，为天之所带而成此东升西没之行。而太阳在天，一日东行一度，如今日躔角宿一度，明日则在角宿二度，如此三百六十五日有奇，则在天上自角宿行至轸宿未度，而始行于天之一周也。自今岁冬至至来岁冬至，而始行满天之一周，



是为一岁。

古人所以有蚁行磨上之喻，言东升西没者，磨之转也，不及天之一度，或亦谓之东行一度者，乃蚁于磨上逆磨之转而自行之度也。且二至出入于赤道之纬度齐均，二分交赤道半周之经度无爽，亘万古而有恒，经千秋而不变，岂非另有枢轴以主持之而能若是乎！是以逆知黄道之必另有黄极，其离赤道南北二极之度，亦必与二至出入于赤道纬度之数相等，而为黄道之极矣，而亦必在极至交圈一线之上矣。

如图内第二层为极至交圈外之子午规，乃安于地平规之架内，不可旋转，极至交圈乃资南北二极之枢，可以旋转左右，图上有度分而无节气者，赤道圈也；有宫分而有节气者，黄道圈也。置一圈于黄极轴上而可旋转者，为定太阳躔度求日影以定时刻者也。

此器测天惟视北极出地之度，而一地之经纬一变。黄道经纬，赤道经纬，地平经纬，故《时宪书》首各省直节气、时刻、昼夜各有不同者，此故也。北京北极出地四十度，南极入地四十度，为十五省最高之省，则夏至之昼长于各省，而冬至之昼短于各省。广东北极出地二十三度，南极入地二十三度，而夏至之昼短于各省，冬至之昼又长于各省。故各省北极出地之度不同，而各省节气、时刻之长短不同矣。

今监中所载极表，湖广北极出地三十一度，指武昌省会而言，汉阳府治与武昌府治东西恰正相平，在天之纬度则一，而北极出地之度数相等。





《汉阳府志》卷之三 天官〔三〕

《五行志》序

世之言天道者，过信占书，即流为术士之怪诞，否则傲然无忌，谓天变为不足畏，二者胥失之矣。古者日食修德，月食修刑。夫德与刑，固不待日月之食而始修也。《洪范》休征、咎征为王者言也，然忠孝格天，休征立见，反风灭火，史册详书，跃鲤陨霜，有时为匹夫匹妇之所感召，故曰：“俊民用章，家用平康。”是天人感召之理，自天子至于庶人之所同也，又岂专为王者言乎！

为《五行志》。

五行〔志〕

唐

尧即位七十载，德政清平，景星出翼、轸。

夏

禹南巡狩，济江中流，有两黄龙负舟。

周

孝王十三年，江汉水。

敬王三十一年，楚子渡江，得萍实如斗。

汉

灵帝时，人化为鼃。江夏黄氏之母浴而化为鼃，入于深渊，其后时见。初浴簪一银钗，见犹在其首。《后汉书·五行志》专立一条，谓之人化云。

献帝建安二年九月，汉水溢。



二十四年，汉水溢。

后帝建兴七年，夏口言黄龙见；夏四月，夏口言凤凰见。吴大帝于是年改元为黄龙元年。

十年冬十月，有星孛于翼。

延熙十一年，彗星见翼，进轸。

十八年，彗星见于楚。

晋

武帝泰始四年正月，彗星见翼，青白色，自西北行，又转东行。是年十月，吴寇襄阳。

十年十二月，有星孛于轸。

咸宁二年八月，有星孛于太微，至翼、北斗、三台。

四年，木生连理。

太康二年，江夏大水，伤人。

惠帝元康元年，孝昌败屖自聚于道。

永宁元年，孝昌霖雨，杀麦。

光熙元年，太白失行，自翼入尾、箕。

怀帝永嘉三年，大旱，江汉可涉。

元帝大兴二年，太白犯岁星，会于翼。

三年，枉矢出虚、危，浸翼、轸。

明帝大宁元年十一月，白虹贯日。

穆帝升平五年四月己未，凤凰集沔北，至于辛酉，百姓聚观之。

废帝太和元年冬十月，奔星自东南经翼、轸。

孝武帝宁康初，南郡〔州〕陵女唐氏渐化为丈夫^①。

太元六年，有奔星东南经翼、轸，声如雷。

十四年，太白昼见于翼。

安帝义熙元年，太白昼见翼、轸。

七年，太白昼见在翼。

^①“南郡”下，原书留空，据《晋书·五行志》补“州”字。





刘宋

文帝元嘉二十七年八月，江夏安陆今林嶂山获白鹿。

梁

世祖大宝元年正月，大雨沙。明日，魏陷孝昌。

陈

宣帝大建十一年，岁星守翼。

十二年，流星入翼。

十四年，江水赤如血。

北周

武帝建德二年，大旱，涇水绝流。

隋

文帝开皇二年七月，江水赤如血。

唐

宪宗元和三年、四年，皆旱，饥。

穆宗长庆元年正月，有星孛于翼。

四年，汉水溢。

文宗太和四年夏，大水。

六年十一月，有星孛于翼。

武宗会昌元年七月，汉水溢。

宋

太祖建隆三年，有象至黄陂，匿林中，食稼。

开宝六年，汉阳军献蛤，有文隐起成龙，长五寸许，金色鳞甲皎然。

太宗太平兴国七年六月，江水涨，高五丈。



真宗咸平元年，荆湖旱。

大中祥符四年四月，流星出柳，没于翼。

天禧元年，太平兴国寺异竹一本二茎，节皆相对。

三年，芝草生。

四年，芝草生，凡一百五十余本。

仁宗天圣七年二月，苍黑云长二十丈，贯弧矢、翼、轸。

景祐元年八月，有星孛于张、翼，长七尺阔五寸，十三日伏。

四年九月，火犯土，在翼十五度。

庆历三年闰八月，太白犯辰星，见轸四度。

英宗治平二年，兴国寺放生池瑞莲一葩两房而同跗。十月，火犯土，在翼二度。

神宗熙宁三年，孝感天雨土，春产瑞麦。七月癸未，黑气长一丈，斜指东南，在轸度中；丙戌，向西北方行，在翼度中。

八年十月，彗星出东南轸度中。

哲宗绍圣元年，汉阳军麦秀两岐。

高宗建炎三年，有象自黄陂至复州践民田，遣使捕之。

绍兴三年，江涨累月。

孝宗淳熙三年、八年皆旱，饥。十月，臣僚奏减复州等处增税。

十二年，鄂州自夏徂冬水浸民庐。十月，鄂州大火，燔万余家，江风暴作，结庐堤上、泊船岸下者焚溺无遗。旧《志》载：诏郡守赈恤之。

十三年闰七月，五星聚于轸；八月，日月五星俱聚轸。

十五年，汉阳水。八月，日食于翼。

光宗绍熙三年，连雨。

四年，霖雨两月，坏圩田，害蚕、麦、蔬种。

宁宗庆元二年，金、木、火三星合于翼。

三年七月望，日食于翼，既。

开禧二年，孝感旱，民聚为盗。

三年，孝感旱。

八年、九年，孝感皆旱，大饥。

嘉定六年，旱。

十年，孝感霖雨伤禾。

十四年正月，地震，大雷。





十六年五月，霖雨江涨，城市沉没，累月不泄，沿江民庐漂没殆尽。九月朔，日食于轸。

理宗端平二年，大水。

元

世祖至元四年，汉阳地震。

二十一年，太阴犯轸。

成宗大德九年，汉阳、汉川旱。

十年，汉阳饥。

仁宗延(佑)[祐]二年^①，汉阳饥。

文宗天历二年，汉阳饥。

顺帝元统二年，汉阳三月不雨，至八月。

至正四年，汉阳地震。

十二年，雨粉针，民家门户柱壁有粉痕如针无数。

十三年，月食太白，时徐寿辉乱汉阳。

十五年冬，雨黑雪。

二十一年，荧惑、岁星、太白聚于翼。

明

太祖洪武二十三年，汉水溢。

成祖永乐二年，湖广大水。

宣宗宣德八年，汉阳大旱。

英宗正统元年二月，湖广饥，后免税粮籽粒六十余万石。

二年，孝感淫雨，大饥。

三年，孝感五月不雨，至十月。

六年、十一年，俱大旱，饥。

十四年，汉水冰。

景帝景泰元年，孝感大旱，饥，民多流。

英宗天顺二年，汉阳、汉川大旱，人相食。

^①“佑”，当为“祐”字之误。



四年、五年，孝感、黄陂俱大水，民多流徙。

宪宗成化元年五月，孝感雨雹，大旱。

四年，孝感大水，黄陂饥。

五年，汉阳地震，孝感旱。

六年，孝感旱。

七年，汉阳水，孝感旱。

八年，孝感旱。

十年，孝感水，舟入市，饥。

十一年，汉阳水。

十四年，夏，大旱；秋，大水。

二十三年，旱，孝感地震，产白乌。

孝宗弘治元年，汉阳、黄陂大旱，人相食。

二年春，雨小豆，种之，蔓生不实。

六年，汉阳大雪，冰厚三尺。

七年，汉阳大水。

十三年，秋，大水，泛舟县前。

十五年，大水。

十六年，旱，孝感大水。

十七年，汉阳群鼠害稼。

武宗正德元年，庆云见于翼、轸。孝感旱，饥。

二年，庆云见于翼、轸，占者谓世宗起于兴邸，此其符瑞。汉阳水，田鼠食稼，民大饥。

三年，大旱，夏、秋不雨，井泉竭，汉阳尤甚。孝感斗米八千钱。

四年，汉阳五月不雨，至八月。孝感雹，杀稼。

五年，汉阳田鼠害稼。

十一年，汉川大水。

十二年、十三年，大水，饥。

十四年六月，江汉水。

世宗嘉靖元年，孝感旱，黄陂地震。

二年，大旱，流殍无算。

三年，黄陂地震。





四年，孝感雹杀稼。

六年，汉阳大水；孝感四月大雪，六月不雨，冬震电。

七年，汉阳、汉川、孝感、黄陂皆大旱，饥。

九年，汉阳大水，黄陂大蝗。

十一年，西北蝗来蔽天。

十四年，旱，孝感雨豆、麦。

十六年，大水，春夏大疫，民多流，孝感鬻一少妇仅半金。

十七年，汉阳大旱。

十九年七月，黄陂大水。

二十三年，汉阳、汉川、黄陂、孝感皆大旱。汉川民死者众，汉阳火。

二十五年正月，汉阳火。

二十六年，孝感旱。

二十九年，汉阳大水，舟入市。

三十一年，孝感大疫。

三十二年，黄陂大水。

三十三年，孝感春大雪，旱。黄陂大旱。

三十四年，孝感春大饥，十二月地震。

三十五年，孝感九峻山多狼食人。

三十九年，汉阳、汉川、黄陂、孝感皆大水，舟入市。

四十年，汉川饥。

四十一年，汉川旱。

四十二年，大旱，孝感陡冈埠民居壁间有声，言吉凶，或信。

四十三年，孝感会真观马一产二骡。

四十五年，大水，冬大雪，民多僵毙。

穆宗隆庆元年正月，雨木冰，汉川、孝感大水。

四年，孝感旱。

五年，汉阳大水；汉川异鼠害稼，民大饥；孝感讹言兵到，民奔窜，旬日乃定。

六年春，汉川雨雹伤麦，复有虫如蚕食麦，秋旱。

神宗万历元年，汉阳南纪楼火，汉川大水，秋大旱。

三年二月，孝感北城获铜鼎一，知府马文炜上其状，巡抚赵贤命推官梁柱臣作《宝鼎篇》纪之。大水。



四年，孝感旱。

五年，南纪楼又火。

六年，孝感雨雹。

九年，黄陂大水，蝗，大饥。

十年，孝感旱。

十一年、十二年，汉阳、孝感皆旱，饥，民食木叶草根殆尽。

十五年、十六年，连旱，汉阳斗米一钱六分，多饿人。

十七年，大旱，饥，汉川人相食，孝感民食木绵子。

十九年，汉川水。

二十年，汉阳大水，孝感大旱，田出黑鼠遍原隰，人多掘食之，寻为鲫。

二十一年，汉阳大水。

二十三年三月，孝感雨雪，苗槁。

二十五年，孝感学宫产并头莲。

二十七年，汉阳大水。

二十九年三月，孝感大雪，夏大雨，无麦。

三十年，汉阳大水，孝感大雪连月，夏多雨，无麦。

三十一年三月，孝感新店大雨雹，杀鸟兽，无麦。四月，孝感地震，自春至秋大疫。

三十二年，汉川地震。

三十四年，汉川大水。

三十六年正旦，汉阳崇信坊火起，延烧莲花堤东阳坊，入城毁朝宗楼及城内人户。是年水大涨，城内行舟，天水相连，仅存大别山阜，民复疫疠。汉川、黄陂、孝感大水浸山，田地尽没，市镇屋舍倾圮无算，流离饿殍以数万计。

三十八年，汉川水。

三十九年、四十年，至四十二年，汉阳皆大水，谷贵。孝感旱。

四十五年，汉阳飞蝗害稼。

四十六年，汉阳蝗，大旱，盐贵。

熹宗天启二年，汉阳大水。

三年正月，汉口大火，伤人无数。

四年春，汉阳淫雨，二麦不熟，谷贵。

五年六月，荧惑入南斗；十月，桃李华。





七年，孝感暴雨。

庄烈帝崇禎元年，汉阳大水。

二年，汉阳大水，秋大旱；孝感雨木冰，盗起，白鼠遍邑。

五年，汉阳大水，漂溺庐舍畜产殆尽。

六年，汉川阳台山芝草生。

八年二月，孝感地震。

九年、十年，孝感蝥贼、螟螣俱盛，黄陂大旱。

十一年三月，孝感大风雨雹，杀麦；秋，狐鼠食麦几尽。

十三年三月，孝感霾，大旱，民多殍。

十四年，汉阳蝗飞蔽天，大饥。孝感蝗遍入宅及釜灶，大疫。

十五年，汉阳大旱，有虎。

十六年五月晦，汉阳大雨雹。是日，张献忠陷武、汉。

国朝

世祖章皇帝顺治二年，汉阳麦大熟。民逃贼者，多伏于麦中以免。大水，谷种石至四两。

三年三月五日，孝感大风拔木，十三日尤甚。

四年，汉阳讹言鸡翅生爪，久将飞啄人，一时杀鸡殆尽。

五年，汉阳大风拔木倾舍，昼晦。

六年，大水。

七年，汉阳九真山大雷雨，蛟龙出。孝感雨木冰，多虎患。新店胡家塘水面苔文结成龙凤花草形，民罢市聚观，竟日乃散。

九年，汉阳旱，大饥，谷贵。四月，雨黑米，味如枯禾。黄陂、孝感大旱，民饥，多盗。

十年，汉阳大寒，冰冻，诸湖上走马。

十二年四月，汉阳雨雹，汉川大水。

十三年春，汉阳雨雹，大风拔木，昼晦。五月，雨冰。九月，有光自东射西南，如彗。

十五年，汉阳、汉川、黄陂、孝感大水。

十六年，汉川大水。

十八年，汉阳旱，有虎灾。孝感旱，七月，淫雨杀莽。



圣祖仁皇帝康熙元年，汉阳属邑俱彩云见。
 二年，汉阳、汉川、黄陂、孝感大水。
 六年，黄陂旱。
 七年，汉阳水，孝感地震。
 八年，汉阳大风拔屋。
 十年，汉阳、孝感旱。
 十三年，汉阳、孝感旱。
 十四年，孝感城陴出小虾蟆，自东南隅起至西门，络绎鳞砌，经二日，不知所之。
 十五年，黄陂、孝感水。
 十八年，黄陂、孝感大旱，饥。
 十九年，汉川阳台山产芝数十本。
 二十四年，黄陂水，孝感旱。
 二十五年，孝感旱。
 二十七年，汉阳、汉川、黄陂、孝感大有年。
 二十八年，孝感旱。
 二十九年，汉阳、汉川、黄陂、孝感皆旱，饥。
 三十五年，汉阳大水。
 三十七年，汉阳汉口镇火，延烧数千家。
 四十三年，汉阳、汉川水。
 四十四年，汉阳、汉川水。
 四十五年，汉阳、汉川饥。
 四十六年，黄陂旱。
 四十七年，汉阳饥。
 四十八年，汉阳、汉川、孝感水。
 五十三年，汉阳、汉川、孝感饥。黄陂水。
 五十四年，汉阳、汉川水。
 五十五年，汉阳、汉川、黄陂水。
 五十七年，黄陂水、旱，孝感旱。
 五十九年，汉阳、汉川水。
 世宗宪皇帝雍正三年，汉阳府属大有年，黄陂天鼓鸣。





四年，汉阳、汉川、黄陂大水。

五年，汉阳大水，疫。

六年，麦大熟，水。

七年，麦熟。

九年，有年。

十年，大有年。

今上皇帝乾隆二年，汉阳麦大熟。秋，蝗不为灾。黄陂蛟水发。

七年，汉阳、汉川、黄陂、孝感大水。

恤政附

汉

文帝二年，赐天下今年田租之半。

十三年，诏除田之税租。

和帝永元九年，除田租及山泽税。

殇帝延平元年，诏实核伤害，除其田租。

晋

惠帝元康八年，遣侍御史李毖慰劳汉川流民。

唐

太宗贞观元年，诏所在赈恤，蠲其租税。

玄宗开元二十九年，立赈饥法，制曰：承前饥馑皆待奏报，然后开仓，道路悠远，何救倒悬？自今委州县及采访使给讫奏闻。

宋

太宗淳化三年，置常平仓。先是，旱、蝗，遣使决诸州狱而雨，蝗尽死。谷贱，帝遣使增价籴贮之，俟岁饥则减价粜，遂为定制。

真宗咸平元年，遣使按诸路逋负，悉除之，共除天下逋负一千余万。



仁宗嘉祐二年，诏诸州置广惠仓。

元

仁宗延祐二年，遣使巡行天下，问民疾苦，黜陟官吏。

明

太祖洪武二十六年，孝感奏请贷仓粮一万一千石。上命行人乘驿往给之。

英宗正统三年，免税粮籽粒六十余万石。

六年，巡按张鏞奏武、汉、德安等郡连年旱涝，人民缺食，已散预备仓并官仓粮，验口赈贷，俟秋收还官。从之。

十三年，免无征秋粮屯粮。

景帝景泰二年，免税粮籽粒十八万八千四百七十石。

六年，户部奏湖广欠运南京粮数多，宜治官吏罪。上曰：累岁旱伤民饥，俱从宽宥，令续完纳。

英宗天顺四年，巡抚白圭奏地方灾伤，公私匮乏，愿将金沙洲见收船钞改收米赈饥，每钞五贯折收米三升。从之。八月，都布按三司奏武昌、汉阳、德安等郡江水泛滥，淹没禾麦，民多流徙。上命所司加意安抚赈济，除其租税。

宪宗成化四年，给事中奏湖广灾伤，免户口盐钞。巡抚杨浚请以湖广官库所贮银十万一千两余赈，从之。又发附近仓粮及免秋粮二十八万有奇。

六年，免去年秋粮，诏拨淮盐五万引运至湖广赈济灾伤。

十一年，免秋粮籽粒。

十五年，免秋粮米麻豆。巡抚刘敷奏湖广水灾，请免所派南京、贵州、广西、庐州、安庆京库本色折色粮，以苏民困。户部议从之。

十六年，免去年秋粮籽粒豆。

二十二年，免秋粮。

孝宗弘治元年，免本年夏税。

二年三月，巡按梁璟奏免征岁运两京、安庆、庐州、贵州等处折色粮，并免漕运粮，以纾民困，从之。

十年，发浙江银十万两赈济湖广，又发九江钞关银五万余两并明年应收者，俱送湖广赈济，以所免军粮米六万石留本处支用。又从巡按姜洪请，停征上供药材。





十四年正月，免征十三年税粮籽粒有差。七月，暂免岁办牛皮、银硃、竹木等物料。

十六年十月，发预备仓粮，并在库官钱及赃罚抵赎盐引等银。自今冬至来年麦熟止，按月验口给赈，仍停止远年逋欠、不急物料，以苏民困。

十七年，免十六年粮草籽粒有差。

武宗正德三年，诏于各项纳银内留十万两赈济。又本年漕运粮储已准留济，但恐岁荒不能征完，另借以赈，其一应不急工程杂派、差徭，尽行停止。

五年，诏留湖广起运米十万石，取贵州银十万两，及侍郎毕亨奏留余银八万四千两，易谷赈济。其拖欠旧粮并运京物料俱暂停征。又诏免正德三年逋税。

六年，诏用兵残落地方正额粮草通免一年，以苏民困。其去年分岁办杂派军需诸物料拖欠未完者，悉行蠲免。

十一年，免税粮。

十二年，遣御史吴廷举赈济。

十五年，免税粮。

世宗嘉靖三年，发太和山香银赈济湖广饥民。

五年，湖广漕米俱征折色，发太和山香银赈济。

七年，御史张祿献饥民图请内帑数万缗赈济，从之。

九年，免所派内府巾帽局物料；冬免秋粮有差。

十年，免湖广各府及卫所秋粮。

十一年，免税粮有差。

十三年，诏停征是年物料及南京折布之半，免南京仓米五分，以军折银及山香银与各仓库无碍赃赎钱谷悉出之，以贍贫民。

十五年，诏发事例银两及预备仓银谷赈济。

二十三年，留云南支剩及本省赃罚、缺官薪柴、吏农事例银、太和山香银及预备仓赈济。

三十三年，免田租，及改折屯田籽粒有差。

三十九年，以灾伤准改漕粮之半，免追三十二年至三十六年积欠兵壮银，仍蠲本年留存粮有差。

穆宗隆庆四年秋，免税粮，令起运南粮改折其半，仍发赃赎银及仓粮赈济。

神宗万历十七年，以灾蠲秋粮，仍发预备仓粮赈饥。



熹宗天启四年，免灾伤田租。

庄烈帝崇祯十一年，湖广兵荒，诏蠲旧欠秋粮、本年夏税，俟麦熟时开征。

十三年，诏减田税。

十五年，诏蠲去年秋粮。

国朝

世祖章皇帝顺治元年十月，恩诏：地亩钱粮自顺治元年五月初一日起按亩征解，凡加派辽饷、新饷、练饷、召买等项，悉行蠲免。其大兵经过地方，仍免正粮一半，归顺地方不系大兵经过者免三分之一。各省起存拖欠本折钱粮，如金花、夏税、秋粮、马草、人丁、盐钞、民屯、牧地、灶课、富户、门摊、商税、渔课、马价、柴直、枣株、钞贯、果品及内供颜料、蜡茶、芝麻、棉花、绢布、丝绵等项，自顺治元年五月初一日以前，凡未经征收者，尽行蠲免。

九年，旱，饥，发赈。

十一年，凡顺治六、七两年地亩人丁本折钱粮拖欠在民者，悉与蠲免。

十五年，免淤洲水租银二百四十两。

十七年，查蠲十二年至十五年钱粮之实欠在民者。

圣祖仁皇帝康熙元年，令有司赈恤旱灾。

二年，赈恤如元年。

十年，免征本年地亩人丁钱粮十分之三。

十三年，奉文照各地方受灾轻重分数蠲免，又奉文停征，于后三年补完。

十四年，动支节年积谷赈饥民万余。

十五年，奉文照分数蠲免，又动支积谷赈济。

十八年，旱，奉文照分数蠲免其驴脚，南粮亦照分数蠲免。

二十三年，免漕粮三分之一。

二十四年，赈水灾谷一万三千十五石。孝感民欠钱粮概与豁免。

二十五年，蠲免各项钱粮一半。

二十八年，免征地丁钱粮，其驴脚、南米蠲免十分之三。

二十九年，蠲免上半年钱粮，又湖北赈谷共八万二百二十八石、米九万五千八百五十六石。

三十一年，蠲免漕粮。

四十三年，汉川等县水，蠲赋共四万一千七百八十四两，赈谷共七万





五千八百四石零。

四十四年，汉阳等州县卫水，蠲赋共三万七千六百六十七两零，赈谷共十八万二千一百八十七石零。

五十一年，全免湖北、湖南地丁钱粮，并历年旧欠共银一百万九千六百八十三两零。

五十三年，汉阳等各州县卫灾，蠲赋共二万六千四百九两零，赈谷共八万七千五百石零。

五十四年，汉阳等各州县卫灾，蠲赋共一万六千九百七十六两零，赈谷共五万二千二百二十七石零。

五十五年，汉阳、汉川、黄陂等各州县卫灾，蠲赋共五万三千八百三十二两零，赈谷共二十一万二千八百一十二石零。

五十七年，孝感等处灾，蠲赋共五万六百二十一两零，赈谷共十三万七千五百石零。

五十九年，汉川等处灾，蠲赋共一万八千七百两零，赈谷共六万六千三百二十四石零。

世宗宪皇帝雍正四年，汉阳等处灾，蠲赋共五万三千七十一两零，赈米共三万九千七百二十六石零。

五年，全省共蠲免银四十三万一千四百六两零。

今上皇帝乾隆二年，黄陂等县蛟水发，俱经赈恤米谷有差。

一、乾隆七年秋，大水，江水泛涨入城，自朝宗门至府署止，深五寸至一尺不等，各乡多被水患，经知县刘嗣孔勘报实被灾五分，详请，蒙皇恩蠲免钱粮一分，共免钱粮一千四百六十七两七钱一分三厘零，免南米二百三十一石六斗六升一合零。

一、乾隆七年秋，水，偏灾。次年春正月，又值大雪连旬，贫民裹足，不能贸易，以致乏食。一时绅商衿士好善乐输，捐济银米，先后共捐米二千五百石、银七千七百二十五两，经知县刘嗣孔酌量经理，每户贫民赈米二斗为率，银自一钱五分至三钱不等，共济过贫民四万七千零八户，共用过捐米二千五百石，银七千四百九十七两四钱五分，余银二百二十七两五钱五分，报明存库。嗣于乾隆九十两年因汉镇贫民被火，详请动支赈恤。

按：历代恤典无关本郡者不书，至国朝蠲赈汉郡四属邑沾膏泽者，皆备载，不敢遗也。



《汉阳府志》卷之四 地輿〔一〕

《疆域志》〔序〕

列史所载地理郡国诸志，皆载郡国之名而不载疆域，故论沿革者，莫得而考焉。夫论山川、考古今以论政治，而不先正疆域，又何异论弈法于几案而不置之以局乎？爰核一郡四邑之疆域于书首，为绘家之素壁云。作《疆域志》。

疆域〔志〕

汉阳府

至省治七里，至京师三千一百五十里，水路五千四百八十五里。总系湖北布政使司之域，故至省不书界、不书向，言府之四面犹皆湖北布政之地也。京师则更王者无外矣。县之于府亦然。下仿此。东南界江至武昌府治七里。以大江中与武昌分界。东北至黄州府治，水陆俱一百八十里。西北至德安府治，三百二十里，水路三百八十里。西南至安陆府沔阳州，四百里，水路四百七十里。

汉阳县

附郭，不载距府治，至省治与府同。东南至大江中，与武昌府江夏县分界。北至黄陂县界，四十里，又五十里至黄陂县治。西至汉川县界，九十里，又三十里至汉川县治。西北至孝感县界，八十里，又四十里至孝感县治。

汉川县

至府治一百二十里，省治一百二十七里。东至汉阳县界三十里，又九十里至汉阳县治。东北至孝感县界五十里，又五十里至孝感县治。北至云梦县界四十里，又五十里至云梦县治。西北至应城县界六十里，又六十里至应城县治。西至天门县界九十里，又七十里至天门县治。南至沔阳州界一百里，又





一百八十里至州治。

黄陂县

广一百一十里，袤二百里。据《县志》。至府治九十里，至省治八十五里，水路一百一十里。南至汉阳界五十里，地名牛湖，又四十里至汉阳县治。东南五十里至黄冈县界，地名界埠，又七十里至黄冈县之阳逻驿。东五十里至黄冈县界，地名界牌，又一百九十里至黄州府治。东北八十里至黄安县界。北一百八十里至河南罗山县界，地名黄陂站，又一百八十里至罗山县治。西北八十五里至孝感县界，又一百五十里至德安府府治。西六十里至孝感县界，地名界牌，又六十里至孝感县治。

孝感县

至府治一百二十里，至省治一百二十五里，水路二百四十里。东南至汉阳县界四十里，又八十里至汉阳县治。东六十里至黄陂县界旧镇铺，过界河又六十里，至黄陂县治。东北一百五十里至邓店，接应山界。北二百四十里至三里城。接河南罗山县界，又十里至罗山县治。西北九十里至安陆县界新添铺，又三十里至德安府安陆县治。西十里至新建铺，接云梦县界，又三十里至云梦县治。西南五十里至汉川县界，又五十里至汉川县治。



《汉阳府志》卷之五 地輿〔二〕

《建置沿革》序

自黄帝画四海之内为九州，而山川始有封域之界，地之得名，应自兹起。顾唐虞以前，远莫可考，禹会诸侯于涂山，执玉帛者万国，其间文献无征，未能纪载，故载封域之沿革者，皆自《舜典》之肇有十二州，与《禹贡》之复为九州始耳。

圣人之分九州与十二州者，皆为岳牧之便于摄隶以治斯民，非若后世之自为谋也。成周封建承唐虞之旧，以五服论者，其去镐京皆不过二千余里，故荆州之地悉在荒服，然其封鬻熊者，如以朝鲜之封箕子，非曰远之，实欲尊之。盖鬻熊为文考师，箕子授武王范，示以不敢等于臣庶之列，岁岁入朝，致劳往复也。乃春秋会盟不与，亦后世苗裔之薄，岂当日先王始封之意欤？吾楚人固不当以箝辘篮缕而自让于雍〔翼〕〔冀〕之乡矣^①。

夫春秋之世，强者并弱，战国尤甚，其疆域之时易岁更，无复有先王画野治民之义。至秦一四海、郡天下，为宇宙一大变局。楚汉以降，九州之地，列朝之所更置，必各有所为，或因其纠分而割裂，或因一事而变通，或因改姓易号而更为建置，不一其由，要不可不纪其改置之年与改置之故，以征国家治乱之久暂、世道之盛衰，为鉴古者之一证也。

作《沿革志》。

沿革志

〔汉阳府沿革〕

《禹贡》为荆州之域，商治因夏，周初易为九畿，后仍名九州。正南曰荆州，

^①“雍翼”，当为“雍冀”之误。





其山曰衡山，川曰江、汉。

成王封熊绎于荆，至春秋时更号曰楚。定王二年，楚子灭若敖氏，封子斗辛为郢公。郢即今府治。敬王十四年，吴入郢，楚子奔郢，与郢公斗辛同奔随。

秦王政二十四年，秦灭楚，分为四郡，此地属南郡。

西汉分荆州为七郡，此属江夏郡沙羡县。

东汉改沙羡为沌阳，以其在沌水之阳也。后废入沙羡。季汉初属魏，后属吴，俱为江夏郡石阳县地。

晋分荆州为二十一郡，江夏郡移治安陆，改石阳为曲阳。

刘宋隶司州安陆郡。齐隶郢州江夏郡。梁分置梁安郡，仍属郢州。西魏置魏安郡，寻改汉川郡，属江州。北周为甑山郡，隶复州，又改沔州。

隋置司隶刺史以纠郡守，地属沔阳郡；开皇十七年，置汉津县，隶沔州沔阳郡；大业初，改汉津为汉阳。

唐兴，高祖改郡为州，太守为刺史，又署都督府以治之；武德四年，以沔阳郡之汉阳、汉川二县置沔州。汉阳郡郡称“汉阳”始此；贞观初，分天下为十道，沔州汉阳郡隶淮南道；肃宗宝应二年，以安州之孝昌隶之；建中二年，复为汉阳郡，四年，郡废，又立沔州；元和中，省孝昌；敬宗宝历二年，废沔州，以汉阳二县入鄂州。

五代，先为吴杨行密所据，后属南唐李升。周世宗平淮南，以汉阳置军，领汉阳、汉川二县。

宋熙宁中，废汉阳为县，汉川为镇，属鄂州；元祐中，复置军；绍兴五年又废为县，七年复为军。

元至元十四年，升汉阳为散府，隶湖北道宣慰司湖广行中书省。

明洪武九年，府废，以二县隶武昌府。十三年，还为汉阳府属，汉阳、汉川二县隶湖广布政使司。

国朝因之，康熙三年以武昌、汉阳等八府为湖北，隶湖北布政使司。雍正七年，割黄州府之黄陂县、德安府之孝感县来属，郡领县四。

汉阳县沿革

三代以前属荆州；春秋属楚；及秦郡天下，属南郡；汉为江夏郡沙羡县；东汉改沌阳；季汉吴为石阳县；晋改石阳为曲阳；宋省曲陵入安陆；隋置汉津县，隶复州，大业初改“津”为“阳”，隶沔州；唐武德四年为汉阳郡，后废郡为



县，隶鄂州江夏郡；周显德中置汉阳军，领汉阳、汉川二县；宋熙宁中改军为县，汉川为镇，属鄂州，元祐复置军，绍兴又废为县，七年复军；元至元中升散府，领县如旧；明初仍以为县，与汉川隶武昌府，十三年复汉阳府。国朝因之，编户一十九里。

汉川县沿革

汉江夏郡地；南北朝梁置梁安郡，西魏改魏安郡，置江州，寻改郡曰汉川，后周置甑山县，建德二年州废；隋开皇初郡废，县省入汉阳；唐武德四年复析置汉川县；五代周隶安州；宋初曰义川，太平兴国二年避太宗名改汉川，还隶汉阳军。熙宁四年废为镇，入汉阳，属鄂州。元祐元年复置。绍兴五年又废，七年复。元、明俱仍旧。国朝因之，编户八里。

黄陂县沿革

春秋隶黄国，鲁僖三年黄人同江人盟于贯，后楚子(代)[伐]黄^①，国属楚，秦分楚为四郡，以黄属南郡；汉改称西陵，刘表使黄祖城石阳，为镇以拒吴，即今西城子地；北齐以镇改置黄陂县及南司州，治名黄陂，盖由此始。据《县志》。北周改曰黄州，置总管府；又有安昌郡；后齐置产州；陈废县，隶永安郡。据旧《志》。隋南司州废，以县属永安郡；唐武德三年复置南司州，七年州废为县，隶黄州齐安郡，陂隶黄郡自此始；宋仍旧；元改属河南，寻复旧治；明编黄陂属黄州府；国朝因之，雍正七年改属汉阳府，编户四十里。

孝感县沿革

西汉江夏郡安陆、郢二县地；后汉分置新市县，为安陆、郢三县地；魏文帝立义阳郡，后省；晋武帝又立；宋孝武孝建初分安陆东境置孝昌县，属江夏郡；齐属南义阳郡；梁置安陆郡，又置义州；西魏大统六年置岳州岳山郡；后周武成初州郡并废，又有潯岳郡；隋开皇初废，三年复置孝昌县，属荊州郡，大业初仍省孝昌入安州；唐武德四年以县置潯州，并置潯阳县，八年州废，省潯阳，以孝昌属安州安陆郡，宝应元年以孝昌属沔州，后复属安州，元和三年省入云梦，咸通中复置；五代后唐同光二年改县曰孝感；宋太祖建隆元年以安州复置安远军，

^①“代”，当为“伐”之误。





领孝感等六县，徽宗以神宗潜邸升为德安郡；讫元皆属德安府；明洪武九年降德安为州，县省入焉，属武昌府，十三年复升德安州为府，复孝感县；国朝因之，雍正七年改属汉阳府，编户二十九里。

沿革表

世次	总隶	郡府	县
夏 帝禹元岁丙子	荆州 合虞十二州为九州，楚荆州。		
商 成汤元祀乙未	荆州 九州如旧，楚为荆州。		
周 武王十有三年己卯	荆州 初为九畿，后为九州，南曰荆州。		
成王	楚 封熊绎于荆，更名曰楚。		
定王二年	楚	郢 楚子封斗辛为郢公。	吴子伐楚，囊瓦济汉而陈，由小别至于大别。《元和志》：鲁山一名大别山，在汉阳县东北一百步。
敬王十四年		吴入郢，楚子奔郢，与郢公辛奔随。	
赧王三十七年		南郡 秦白起拔楚郢都，置南郡。	
秦 始皇二十六年庚辰	虏荆王，分楚为四郡。	南郡 改郢都为郢县。	
汉 高祖五年己亥六年	荆州 分楚为七郡。	江夏郡	沙羡县



〔续表〕

世次	总隶	郡府	县
东汉 世祖建武元年乙酉	荆州	江夏郡	沌阳县 《水经》曰：又东迳沌阳县北，注处沌水之阳也。后废入沙羨。
献帝建安十三年			刘表使黄祖为江夏太守，守沙羨、（却）〔郤〕月二城 ^① 。孙权遣董袭、凌统攻而擒之，遂屠其城。是年魏军南下，昭烈自樊城奔夏口，遂合周瑜破曹。
季汉 昭烈帝章武元年辛丑	初魏地 后吴地	江夏郡	石阳县 刘表守荆州，使黄祖城石阳，为镇以拒吴，即今黄陂县西子城地。
晋 武帝太始元年乙酉	荆州	江夏郡	石阳县 旧《志》作沌阳。《地理志》、《文献通考》皆无。
太康元年庚子			曲阳县 改石阳为之。
怀帝永嘉六年 壬申			王敦表陶侃为荆州刺史，屯沌口。明年徙林鄣。《水经注》曰：又东过林鄣故城北，在县西六十里。
愍帝建兴二年 甲戌			太尉陶侃为荆州刺史，镇林鄣。
元帝建武元年丁丑			王廙刺荆州，留长史刘俊镇阳口垒，杜曾攻陷之，乘胜遂造（污）〔沔〕口 ^② ，廙使豫章太守周访击之，进至沌阳，选精锐，亲督战，曾大溃。

①汉阳古代地名“郤月城”之“郤”，嘉靖、万历及乾隆《汉阳府志》中或作“郤”、或作“却”、或作“郤”，乾隆《汉阳府志》一书亦前后不一，有的地方为“却月城”，有的地方为“郤月城”。据本书“汉阳县古迹”之“郤月城……以形如郤月，故名。《水经注》：沔左有郤月城，亦曰偃月垒”，偃月，指横卧形的半弦月，或泛称半月形之物。可知，此城名当作“郤月城”。据此，本书“却月城”统一改为“郤月城”。

②“污”，当为“沔”字之误。





〔续表〕

世次	总隶	郡府	县
宋 武帝永初元年庚申	司州 司隶校尉所隶为司州。	江夏郡	曲陵县 《宋书·州郡志》曰：江夏有曲陵县，本名石阳。又以汉末孝子董永，故析安陆县东境置孝昌县，属江夏郡。
明帝泰始六年庚戌		安陆郡	安陆公相 省曲陵并之。时县为公封爵，令曰相。
齐 高帝建元元年己未	郢州	江夏郡	沌阳子相 分安陆立。高帝封周盘龙为沌阳侯，见《南史》。
和帝中兴元年辛巳			二月，萧衍命王茂、曹景宗为前军，至汉口。郢州刺史张冲遣兵迎战茂等，击破之。衍筑汉口城以守鲁山。七月，王茂、曹景宗乘水涨袭加湖，郢、鲁二城，相视夺气。鲁山粮乏，将奔夏口，衍断其走路，孙乐祖时守鲁山，以城降。
梁 武帝天监元年壬午	郢州	梁安郡	安陆 省沌阳并之。
简文帝大宝元年庚午			邵陵王纶起兵讨侯景，湘东王绎恶之，遣王僧辩、鲍泉等帅舟师袭之，至鸚(武)[鵞]洲 ^① 。
二年辛未			五月，王僧辩引兵东下至汉口，攻鲁山，擒贼将支化仁。
敬帝太平二年丁丑			陈侯安都帅兵至武昌，梁王琳将樊猛弃城走，军至郢州，围之未克，而王琳至安都乃悉众诣沌口，合战，大败。

①“武”，为“鵞”之误。



〔续表〕

世次	总隶	郡府	县
西魏 孝武帝永熙元年壬子	江州	魏安郡 寻改汉川郡。	
文帝大统十六年庚午			改孝昌为岳山郡，置岳州。
北周 武帝保定元年辛巳	复州 后改沔州。	甑山郡 见《地理直音》。	
北齐			以石阳镇改置黄陂县，此县治之始，属南司州。
陈 武帝永定元年丁丑	沔州		沌阳县 武帝诛王僧辩，以周铁虎封沌阳侯，见《陈书》。
废帝光大元年丁亥			梁司空华皎、柱国王操、周卫公直侵陈，与吴明彻战于沌口，败绩，陈遂袭周沔州，执其刺史裴宽。
隋 文帝开皇元年辛丑	复州 唐《地理志》曰：隋置司隶刺史，以纠郡守。	沔阳郡 《地理直音》曰：隋各郡部分，史无明文。	
三年癸卯	废南司州，废岳州。	罢天下诸郡守，以州统县。	以黄陂属永安郡，复置孝昌县，属荆州。
九年己酉			秦王俊督诸军屯汉口，陈以周罗睺督诸军拒之。
十七年丁巳	复州		汉津县 省沌阳置，始在今治。
炀帝大业元年乙丑	沔州	沔阳郡 领县五。	汉阳县 改津为阳，邑名之始。省孝昌入安州。
十一年乙亥			城父朱粲聚众为盗，僭号楚，自称迦陵楼罗王，引兵转掠汉、沔。



〔续表〕

世次	总隶	郡府	县
唐 高祖武德元年戊寅		沔阳郡	汉阳县
二年己卯			朱粲有众二十万，掠掠汉、沔。淮安土豪杨士林起兵攻之。相传秦王遣尉迟敬德败之于县治尉武山。
四年辛巳	沔州	汉阳郡 割沔阳之汉阳、汉川置郡，郡称汉阳始此，领县二。	汉阳县 析汉阳置汉川。 汉川县
太宗贞观元年丁亥	淮南道 时分天下为十道。	沔州 改汉阳郡为之，领县二。	汉阳县 汉川县
玄宗二十一年癸酉	分天下为十五道。		
肃宗宝应元年		沔州 领县三。	汉阳县 汉川县 孝昌县 以安州之孝昌隶之。
德宗建中二年辛酉		汉阳郡 改沔州为之。	汉阳县 汉川县 孝昌县 李希烈反。嗣曹王皋拔蕲州，遣伊慎、王锬围安州。希烈以刘戒虚援之，皋命将迎击于应山，俘戒虚。凡战大小三十二，未尝败北。时朝廷仰食江淮，而西道出九江至大别。皋转战数千里，餉路遂通，江汉倚皋为固。





〔续表〕

世次	总隶	郡府	县
四年癸亥	沔州 复废汉阳郡，立沔州。		汉阳县 汉川县 孝昌县
宪宗元和二年丁亥	沔州 领县二。		汉阳县 汉川县 省孝昌，入云梦。
敬宗宝历二年丙午	鄂州	江夏郡 牛僧孺奏废沔州，以汉阳二县属鄂。	汉阳县 汉川县
僖宗乾符四年丁酉			黄巢陷孝昌诸县。
昭宗光化元年戊午			朱全忠陷安州孝昌，诸县皆溃。
后唐 明宗天成二年丁亥			汉阳县 为吴杨行密所据。
晋 高祖天福元年丙申			汉阳县 为南唐李昇所据。
周 太祖广顺元年辛亥			
世宗显德五年戊午		汉阳军 世宗平淮南置，领县二。	汉阳县 汉川县
宋 太祖建隆元年庚申			
开宝七年甲戌			遣曹彬下江南，伐南唐。十一月，知汉阳军李恕败江南水军于鄂。



〔续表〕

世次	总隶	郡府	县
太宗至道三年癸巳	荆湖北路 时分天下为十五路。	汉阳军	汉阳县
神宗熙宁四年辛亥			
哲宗元祐元年丙寅		汉阳军 复置。	
高宗建炎四年庚戌			徙孝感县治于紫资寨。
绍兴元年辛亥			盗曹成陷汉阳,制置使岳飞败之。
五年乙卯			复废军为县。
七年丁巳		汉阳军 复置。	
宁宗开禧元年乙丑			金兵掠孝感、汉川诸县。
理宗宝庆元年乙酉			元忽必烈围鄂州。冬十月,以贾似道为右丞相兼枢密使,进师汉阳以援之。
端平二年乙未			黄陂为元兵所逼,侨治鄂州青山矶。
度宗咸淳七年辛未			德安府为元兵所逼,侨治汉阳城头山,即古临嶂山,在府城西五十里。孝感诸县尽入元。
十年甲戌			元伯颜至蔡店,大会诸将,刻期渡江。时淮西阉臣夏贵以汉鄂舟师分据要害,弥亘三十余里。兵不得进,乃围汉阳,声言取汉口渡江。贵移兵来援,不胜,知汉阳军王仪以城降。
元 世祖至元十二年乙亥			黄陂归附,仍还旧治。





〔续表〕

世次	总隶	郡府	县
十三年丙子	湖北道宣慰司	汉阳军 升为散府。领县二，德安府仍还旧治。	汉阳县 汉川县
十六年己卯			孝感县自紫资寨还旧治。
十八年辛巳	湖广行中书省	宣慰司 徙治汉阳。	
顺帝至正十一年辛卯			颍蔡贼聂兴宗、许成据应山，其党据孝感。
十六年丙申			天完伪主徐寿辉遣其将丁普郎、徐明远陷汉阳。元守将遁，寿辉据而都之。
十九年己亥			陈友谅迎寿辉徙江州，袭杀之，僭国号曰汉，遂有汉阳，戍于城之西隅。及战，死鄱阳。子理退据武昌。明太祖驻师汉阳，遣徐达等屯兵沌口，理降。
明 太祖洪武元年戊申			聂兴宗、许成来归。以德安府领安陆、云梦、孝感、应城四县，隶湖广行省。
八年乙卯	湖广布政使司 罢中书省，以天下为十三省。	汉阳府	汉阳县 汉川县
九年丙辰		武昌府 废汉阳府。	汉阳县 汉川县 以二县隶武昌府。降德安府为州，省孝感入德安州，属武昌府隶之。
十三年庚申		汉阳府 复。升德安州为府，置孝感县。	汉阳县 汉川县





〔续表〕

世次	总隶	郡府	县
武宗正德六年辛未			流盗刘六、刘七等往来江上，自汉口来犯东门。通判徐弼集木为架，登城哨守。土舍张贵帅兵来救，战于沙岸，盗大败，刘六死，余党散。
十三年戊寅			都御史秦金以沔阳来属，添设府同知一员。
世宗嘉靖二十二年癸卯			景陵知县李濂奏罢沔阳属并裁同知。
庄烈帝崇祯八年乙亥			正月，河北贼满天星、张大受等自麻城抵汉口，杀掠殊甚。五月，猷贼破汉阳，左良玉屡与贼战郢、沔间，旋扑旋起。
十六年癸未			李自成陷德安。义兵复孝感，未几复陷。
国朝 世祖章皇帝顺治元年甲申、二年乙酉	湖广布政司	汉阳府 领县二。	汉阳县 汉川县 英藩靖远大将军逐贼至汉口，汉阳土民迎顺恐后，咸鼓舞悦服，黄、德诸郡皆望风归诚。
圣祖仁皇帝康熙元年壬寅	湖广布政司	汉阳府 领县二。	汉阳县 汉川县
十三年甲寅			复设同知。
二十三年甲子			复裁同知。
二十七年戊辰			五月裁卒，夏逢龙叛，陷武、汉、黄、德诸郡。湖广提督徐治都等败贼于蔡店，七月复追败于赤矶山，执逢龙磔之，余党平。
世宗宪皇帝雍正元年癸卯	湖北布政司 分湖广为北、南二省。	汉阳府	汉阳县 汉川县



〔续表〕

世次	总隶	郡府	县
七年己酉	湖北布政司	汉阳府 领县四。以黄州府之黄陂县、德安府之孝感县来属。	汉阳县 汉川县 黄陂县 孝感县
今上皇帝乾隆元年丙辰	湖北布政司	汉阳府	汉阳县 汉川县 黄陂县 孝感县

论曰：昔孔子生春秋时，夏殷之礼，皆能言其精蕴，而文献无征，叹其湮泯。顾欲从百世后遥溯数千载以上之分合广狭，了如指掌，不綦大难哉！然子輿氏有言，苟求其故，虽天之高、星辰之远，可坐而致。矧关河如旧，列史灿然，博心揖志，而稽夫变易离合之由起，亦未始不可得其大概也。

汉阳一郡，自春秋历魏晋，率为用武之场，如大军、小军诸山，说者往往以三国争斗事实之，而桑钦《水经》已载其名，则固不始于汉末也。至息妫不言，而凤山北建桃花之庙；钟期同调，而大别尾峙伯牙之台。昭明食采于湖滨，尉迟勒勋于山畔。考之载籍，讵无明文，而习俗相传，由来已久，至有形之篇什，流连唱叹者，无乃依稀仿佛，难辞附会矣乎！然此皆无关于建置，可以存而不论。若萧公之垒无存，土昶之基安在？八门之恢廓，何地堪容；朝元之轨辙，何时堙塞。此亦不须置喙耶？又况汉津名县，邑先于郡，汉川为镇，统辖于鄂，孝昌原隶版章，西陵实相唇齿，前何以判？兹何以一？此其故，诚不可不一寻究也。

我国家久道化成，食其糈而若其训者，垂百有余年矣。圣天子鼓舞作兴于上，贤公卿承流布化于下，而官斯土、蒞斯民者，进苍黎而衽席之，既富方谷，则闾阎乐利之余，手此志而批阅之，其可以张楚者，应自此一方民始也，谁其瞻楚幕有乌，而谓南风不竞者乎？当知其必不然矣。





《汉阳府志》卷之六上 地輿〔三〕

《城池志》序

《诗》曰：“公侯干城。”子舆氏曰：“固国不以山溪之险。”王介甫记桂州新城，亦谓“城郭者，先王有之，而非所以恃而为固也”。然文王之兴也，城朔方则命南仲；宣王之起也，城东方则命仲山甫。其事皆载于《雅》什。《周礼》有掌固，专司城郭，属在地官，责綦重矣。楚国方城以为城，汉水以为池，素擅雄图，而汉阳为楚望郡，牧民者可不一思击柝重关之义，为金汤永固之谋欤？

作《城池志》。

〔城池志〕

汉阳府汉阳县附郭

城

周七百五十六丈，为门三。

朝宗门

为府治东门，明洪武中，知府陈瑞创建。正统十三年，千户密福等重建。正德以后，知府孔凤、千户朱凤、陶震重修。嘉靖二十二年，巡按史褒善重建。万历初增修，丁未毁于火，知府舒体震重建。崇祯十五年，知府王燮元重修。皇清顺治十八年重建，康熙三十七年重修。

南纪门

为府治南门，明知府程瑞创建，后毁。嘉靖二十四年，知府贾应春重建。万历庚戌，知府舒体震修。崇祯十五年，知府王燮元重修，后毁。皇清顺治十八年重建，康熙三十七年再修。

凤山门又名白云楼

为府治西门，明知府程瑞创建。嘉靖初，知府孔凤、千户密福、朱凤、陶震、



李鹤重修。知府刘本用重建。崇祯十五年，知府王燮元重修，后毁于贼。皇清顺治十八年重建，康熙三十七年再修。

季汉吴立石阳县于沔左，治石阳城，在今黄陂县北十五里，土人谓之西城子。晋初，改石阳为曲陵，徙治郢月城，距今治十里许，旧襄河北。宋泰始六年，并曲陵入安陆而城废，其工筑近远、城垣丈尺，纪载缺如无考。隋开皇十八年，立汉津县。大业初改汉阳。唐武德四年，于县置汉阳郡，始徙今治，枕鲁山而城之，在汉之阴而曰汉阳，本《穀梁传》水北曰阳而名也。赵《志》云：汉阳古城东南枕大江，北控月湖，为门八：东迎春，西孝感，南沙洲，北广汉，东南朝天，东北庆贺，西南汉南，西北下议，环一千七十二丈。宋宣和三年四月，水涨城圯，郡守具奏修筑，不报。嘉定初，知汉阳军事黄幹申两司总帅，屡请筑城，竟未施行。咸淳十年正月壬午，城鄂州汉口堡，即汉阳军城，規制如黄幹所请。元季复圯。明洪武初重筑，跨凤栖山东南，临江，周七百五十六丈，为门四，门各有楼，东曰朝宗，南曰南纪，西曰凤山，北曰朝元。朝元旋塞。嘉靖三年，致仕千户朱凤奏筑里城，下工部尚书赵璜题覆得旨。时巡抚张琮、巡按王秀、参议王栋、佥事陈燧、知府孔凤估计修筑。天启元年，知府周三锡以郡城无内附，乃伐禹梁山石，督义民胡遵义等周砌陴墙。崇祯十五年，知府王燮元捐资重修。

皇清顺治十八年，知县曲圣凝、守备董朝栋各分南北修饰里城，增高数尺。康熙六年，知府杨必达详请院司动支颜料银三百八十二两七钱七分，又捐银四十两，委照磨施承谦督工，共修江岸城脚一十七处，计长七十九丈六尺五寸、高十七丈八尺、宽十五丈四尺。康熙三十七年，知县张时雍重修。雍正四年，知县阎炳增修东南一隅。乾隆五年，知县沈孟坚详准修筑在案。乾隆六年，朝宗、南纪二楼，知府陈文言、知县刘嗣孔鼎建。

池

汉阳东南二面临大江，西阻湖，北枕大别山，汉水绕其后，天然規制，以江为池，无濠。旧《志》朱衣曰：少时见朝宗门外去江岸数十丈，沿岸有短墙横亘数丈，迤北迤南，民居深者屋二层，民居后旧有瓮井二，南井在今水闸东北七丈〔计〕〔许〕^①，井傍有古墓，北井去民居二丈许，居民屋后可驰马，即前此江岸去城远矣。王光裕曰：武昌为会城，汉阳称接壤为右臂，无事则唇齿相依，有事则首尾相应，两郡对峙在形胜，而设险在城池。汉阳南纪门外原有南坛，

^①“计”，当为“许”之误。





自江岸至城计五百余丈，江中有大洲，上多芦荻，内有大江套，客舟蚁集，两岸贸易者相聚为市，民乐其利，城亦赖以巩固。自嘉靖以来洪水泛涨，江岸崩卸，城去水不满丈余，故今修理江岸为第一义。

按：二公皆嘉、隆时人，其言如此，今又百余年矣，南纪门外迤西一带为江水所逼，渐及城根。乾隆三年四月内知县沈孟坚详称：郡城与省会隔江对峙，数省通衢，东南一带城垣滨临江渚，从前筑有石堤以为城墉保障，历年久远，未及加修，以致日就倾颓。其自东门上马头起至西城外小马头底一带，堤岸面临大江，正当受冲之地，昔有沙洲稍为砥柱，自沙洲湮而外无捍御，劲流直洗江岸，兼以南城外张王矶水激如射，冲洗更甚，自东门而上沿江石岸坍塌殆尽。水距城根，为地无几，每遇夏秋水涨，城亦宛在水中，若不亟请修筑，则岸不可复，城亦难完，一郡人民均无捍卫，关系非轻。

查自西关外小马头起，至东门上马头底，应筑正岸二百六十七丈，应加筑护岸二百六十七丈，再张王矶前更属险要，须增二层护岸三十丈，统计正护岸共五百六十四丈，各高一丈二尺，其进深随地势酌量宽窄，所需工料按照武昌江岸册估价二万一千二百八十八两八钱四分。又东门外大马头共估工料银五百七十三两三钱五分。动项建修，当经详准，两院具题准行。于乾隆四年冬兴工，檄委知府钟昭、通判段烜明、知县沈孟坚分理督修。次年，知县刘嗣孔接任修理工竣。

一、城垣。乾隆五年二月内知县沈孟坚详请修理。乾隆七年十一月内蒙批允，奉督宪孙、抚宪范题请动项，共估工料银七千八十三两八钱一分五厘二毫三丝五忽。乾隆八年五月十二日，知县刘嗣孔兴工，至乾隆九年二月初十日报竣。又于乾隆九年内知县刘嗣孔详请将城内古沟废洫彻底清查，深通疏浚，于西南积水尤深之处补建新濠，浚以深沟，砌以石磅，俾城中山水得寻古沟入新濠，由石池归水瓮而达大江，共估工料银五百八十九两七分一厘。乾隆九年六月初八日兴工，九月二十八日工竣，除知县刘嗣孔捐凑银二百八十二两六钱七分六厘外，详请奉拨臬库收存高维礼入官田、房租息银三百六两三钱九分三厘。

一、乾隆七年秋大水，江水泛涨入城，自朝宗门至府署止，深五寸至一尺不等。各乡多被水患，经知县刘嗣孔勘报，实被灾五分详请，蒙皇恩蠲免钱粮一分，共免钱粮一千四百六十七两七钱一分三厘零，免南米二百三十一石六斗六升一合零。建中、东阳、西阳、崇信四坊在汉城，居仁、由义、循礼、大智四坊在汉镇。



汉川县

城

汉川，宋初治刘家隔，四迁治长城乡。元迁大赤，至元时自大赤迁今治。旧无城，明崇祯九年丙子，知县孙光祚创建，周围八百八十丈约七里三分，为门五，门各有楼：东曰云鹤，南曰绣豸，西南曰欢乐，西曰伏龙，北曰承德。西峙仙山，东翼小别，阳台踞其后，汉水绕其前。按县故无城，嘉靖末年剧盗崔二、唐四等哨聚，白昼入县。知县昌应会率兵力拒，被贼割其耳而去。此后时以筑隍为言，莫之应也。及崇祯丙子张献忠寇黄府，陷云梦，孙令率乡兵拒之于杨子港，贼始去，意未尝忘汉川也，号曰无城县。孙乃竭力修筑，贼竟不能犯境云。

池

三面阻山，近城有濠，深五尺，宽窄不等，一面临汉水，即以汉水为池。

黄陂县

城

旧惟土城，明初管军总制王兴守御本县重修，高一丈二尺，周二千七百六十步。洪武二年，调德安守御，城因坍塌，止存土堦。正德十一年，县令周昂建营房于后以卫之。万历癸酉，诏天下城郡县，巡抚赵贤、巡按舒鳌奏建砖城，檄郡司李程正谊经始，州同陈汶督筑，三月竣功，周九百八十三丈九尺，高一丈八尺，设六门，门各有楼：东曰昭明，南曰景福，小南曰康阜，大西曰豫泰，小西曰丰亨，北门因碍学宫，县令萧胤儒塞之，后于城之巽域复开一门曰文昌，仍共六门。明末流寇迫城，雉堞遭毁。

皇清顺治二年，县令张尚忠重修，杨廷蕴继之增筑完固。雍正四五年，叠遭水患，城复圯。雍正九年，各宪题请檄委武昌府知府张淑郾捐资修理。乾隆二年，复被蛟水冲塌城东南隅。知县邵大业详准各宪动帑修筑，知县沈孟坚竣其事。

池

城南潏水相抱，城西北有池，东南俱有濠，久塞。知县杨廷蕴重浚，约宽三丈、深二丈。



附明王霁《修城记》

皇建极二年，岁在甲戌，冬十月朔。黄陂县城成，周九百八十三丈九尺有奇，高一丈八尺，横一丈二尺。六门有楼，楼各有郭，水闸四座，冷铺十座。昼夜侦逻，铃柝是节。外奸潜夺，内犬靡聒，巍然一巨镇也。士民欣欣，奠厥居邑。

大夫刘侯命予纪事，昭实以垂远。余间旷日久，诚惧不文，继思父老相传，正德六年刘贼南驱越关，直略陂邑。陂无城，不攻自陷，民以之荼。当时官民莫不仰天切叹，以为无险可守，信无城无县，无县无民，不能苟安于一日也。及事平，上之人安于无事，下之人恐其劳已，城工之议遂寝。

然陂邑虽微，去中州界不出百里，南至会城止八十里，诚为楚之北门。有识者谓陂邑无城，盗贼之入，直驱江汉，是楚无门户，楚不克全矣。惜太平日久，无以是议上言者。兹当圣天子嗣统之初，纪元万历，相臣极臯、夔、伊、傅之选，以天下为己任，简贤进良，敷求治理。环海内外，罔非正人，兴废补敝，百度维贞。维时我大中丞赵公奉命来抚吾楚，怀经国远虑，以楚北空虚，欲筑城以保障，与天地相为悠久，国运其永清矣，岂止保障一二世已哉。

是役也，纲纪于上，昭宪酌情，务得民心。又我大中丞汝泉赵公、先巡按监察御史念庭舒公、后巡按监察御史石龙李公、清理我政巡按监察御史梅岩李公，皆讎谟定命、远猷辰告者也。综理于中，酌权应务，随宜处分，求不拂乎民情者，分守武昌道文冈郑公，分巡武昌道大梁刘公，江防兵备道金溪戢公，皆深切民隐，赞画多劳者也。至于错综斟酌，动中机宜，不苛不弛，俾费罔官损、役匪农妨，则我太公祖潘公、邑大夫刘侯尤为劳瘁。潘公讳允哲，直隶上海人。刘侯讳起鹏，江西太和人。其宽明仁恕、德洽人心者，俱难尽述，兹因纪其悦以使民之一端云。其忠爱勤事，夙夜匪懈，则署印蕲州同知陈汶、县丞吴崇义、主簿陈生春、典史黄朝正，于例得书，以纪劳焉。若夫给发区处钱粮一毫无预于民，悉饒诸碑阴，以俟考云尔。

是为记。

孝感县

城

县旧无城，明正德间，流寇起，知县王贤筑土城，知县翁素继之，为门四，各建楼。嘉靖十九年，西湖水涨城圯，知县汪克思筑堤障之，称汪公堤，湖水





渚于城内者，称汪公池。二十一年，知县邬志皋新建小东门于东南隅。三十年，矿贼起，知县龙兴重筑土城，高丈有奇，厚半之，基以石，架木覆砖。嘉靖三十九年，南门圯于水。隆庆六年，知县刘琨重建城楼，甃以石。万历元年，巡抚赵贤、巡按舒鳌议建郡邑城，城始甃，属通判施继述、知县易元董其役。寻各迁去。明年，巡抚李栻委经历任梦榛、同知县任商扈督修，城乃竣，高一丈，周七里有奇，计八百三十丈。增文昌门于文庙之前际西南隅。门凡六：大东曰朝阳，小东曰复旦，南曰时薰、曰文昌，西曰迎祥，北曰拱辰。明季寇扰，城圯，东门、文昌门皆窒。

皇清顺治四年，知县郜炳元莅任，启东门。入十六年，知县张擢士鸠工庀材授以资，三月，城复尽甃。民居栉比，渐复旧观。城各有楼，惟文昌门无楼，绕以菱花垣，形家言不宜楼也。按孝昌县故城距今县治一百里，南齐分义阳，郡分南北，而南义阳郡治孝昌。隋大业二年，于此置义州，张《志》谓今黄云步有废城址，周数里，土名义州城是也。其规制代远莫考，不知何时始迁今治。

池

城下马道广五尺，道外为池，自北门绕大东门，径万寿桥，俱浚深五尺、广一丈，西北因湖为池，自西门至小东门因河为池，邑龙脉自北来，池小浅。

附邑人程正揆《朝阳楼记》

《易》曰“王公设险”，《诗》曰“崇墉仡仡”，则国必有城，由来尚已。而《周礼》地官所掌，复有司门、司关以掌授管键，以联门市，相其要害，酌其远近，而为之伺启闭出入，所系非眇小也。门之上，则又建之丽谯，庶足壮一方之观瞻焉。

孝邑旧有门六，各修楼。再查居东者曰朝阳，跨阜临湖，形势巍焕，内瞰则重衢复屋，阊阖鳞次而睥睨洪卫；外眺则崇郭广阡，涑流潏汇而桑麻葱蒨，固胜区杰构也。

自明季以来，毁于寇者将二十年矣。以荒僻故，堙而不启。海陵张侯下车之三曰，集耆民询濫所利病，有言城东门王气所由来□不宜者。侯登陴循览，曰：“诚如言。”于是鸠工庀材，岌然而楼之，三阅月楼成。庐于斯者数百家，侯尽蠲其徭役以劳之，来者日益众，靡弗得其所。盖邑治西南濒于河，薪水之所入，北又孔道，例不得闭。

先是，令兹土者值羽书旁午，供亿萧条之日，利多窒塞，以省守望。至于





谈创建、议修筑，率相顾动色，视为五城十二楼不易举之业，曰：“此不急，姑俟之俟之耳。”侯甫下车，毅然为之，无再计，不请于上，不谋于下，贫民且得食力，以佣取其直，即其胆识，可不谓超绝者乎！且夫苟有利于民，可以出意创革而不肯即为者，为其始则厉民耳。即不肯厉民，岂非盛德事，独不曰愚民难与虑始乎！冒盛德之声，而阴循其姑待苟且之利，留心国计民瘼者，断不出此。彼醉翁、雪堂、竹楼、滕阁，亦游览胜概耳，后人过之犹低回不能去，以今视昔，何足当厘举之俶务哉。

侯于是放衙人静，以一琴一鹤自随，轩窗洞开，光影毕合，双峰峻岭，耸峙于前，白云徘徊，终日不去。侯顾而乐之，胸中澄渟，眼底空旷，浮白挥毫，摅写其浩浩落落之趣，不知形骸之累、利欲之萌为何物也。卓哉！张侯亦足以自豪矣，何待百世之下始与文忠诸公同其不朽也哉。

论曰：高垒深沟，处常固足以御侮；凿池坚壁，应变亦可以却戎，斯固守土者之责也。顾世际升平，民生安堵，司牧者多忽而不讲，即大邑剧郡，因循废弛而弗治，所在多有，抑知屹屹言言，见称于《风》什；即城洙浚，特笔于《春秋》，讵可视为末务乎？柳子厚于全义复北门也，谓贤者之兴而愚者之废，废而复之为是，习而循之为非，以是归美于卢遵。荆公之称余靖也，谓信于民也，久而费之以卫其财，劳之以休其力，有大费与大劳，而人不以为勤也。毋谓何伤，狡焉启疆；毋狃平岁，勇夫重闭，晋阳之事，其明征已。黄直卿之守汉阳也，上筑城方略，至再至三，迄今读之，委曲周详，犹令人往复不置云。



《汉阳府志》卷之六下 地輿〔四〕

《公署志》序

朝廷设官置署，堂皇巨丽，岂徒以饰观美哉。乃居上临下，庄以莅之之义也。《七月》之章曰：“跻彼公堂，称彼兕觥。”盖养成于上，义亲乎下。羔羊朋酒，百姓于是属观瞻焉。《周礼》辨方正位，以建民极，为主国之大经。治署宣猷所系，民瘼攸关，乌可略而不加诸意乎。凡一切营建，亦以类从，故得附见云。

作《公署志》。

公署志

〔汉阳府〕

府署在城内凤栖山南麓，明洪武二十三年建，正统中重修。嘉靖十五年，知府樊景麟重建后堂，庆历间增修。明季兵毁。

皇清顺治初，知府王宗儒于东门民居寄治。宗儒去任，傅应星迁治西门尹中丞故宅，而通判仍寄治宗儒所借之民房，推官亦借秦京兆第居焉。康熙元年，知府杨必达始即旧址鼎建大堂、六房、仪门、大门、内宅。康熙七年，知府陈国儒建高明堂、内书房，规制始备。

头门一座、门外照墙一座、东西牌坊二座、门内左家庙三间、号房三间、右班房二间、仪门一座、门内班房二间、吏书科房东西共二十三间、中为甬道、上有戒石亭、大堂一座三间、库房三间，在大堂侧、二堂一座五间，即高明堂、后山亭一座五间，名豁然亭，亭左右耳房各三间、亭后最高处又山亭一座，今废、凤鸣堂三间，在大堂东侧、左右厢房各三间、堂后内舍五间、书屋三间，在二堂东侧、又书屋二重各三间，亦在东书屋后、太乙楼在大堂东，久废、乾隆十二年，知府陶士俔重建。

同知旧无衙署，雍正十年新设，即旧巡司署改建，驻汉口镇。头门一座、门外昭壁一座、仪门一座、门内书吏科房二间、大堂一座三间、二堂一座三间、堂侧耳





房二间、堂后内舍二重各三间。

通判署旧在府治西，后移驻汉口镇巡司衙署，雍正十二年移在城内府治东，系民房改建。头门一座、门内班房二间、仪门一座、门内吏书房二间、大堂一座三间、二堂一座三间、堂侧耳房四间、书屋二间、内舍三间、左右耳房四间。

府教授训导署在府学宫内、府经历司署在府治右、府照磨司署旧在府治东，今裁，署废、府司狱司署在府治南、学院行署在城内建中坊。雍正三年，知县闫炳合汉阳、汉川众绅士崔文元等捐建考场、头门一座、照墙一座、左右鼓棚二座、门内朝东官厅一重、龙门一座、东西号舍三十大间、桌凳二千四百余座、大堂三间、穿堂一间、内住宅一重五间、左书房二重、右书房二重、两旁班房、耳房共□□间。□□年，汉阳邑绅徐潞重修号舍、龙门、鼓棚，添置桌凳。

分守武昌道署在府治东朝宗门内，今废、分巡武昌道署在府治东，与守道署连，后改北院，今废、北察院署即巡道署改，康熙□□年缺裁，今废。

国朝李赞元《北察院碑记》

古者天子使其大夫为监，监于方伯之国，后分置三司，岁遣御史按部中修行庆让，事毕反命。楚衡岳，古南巡处也。保界三苗，比邻百粤，江汉当四渎之半，九溪七泽，囊括其中。云梦、洞庭，易滋盗藪。辑和镇静，维楚最难。特命分巡南北，诚重之也。

余不得读书中秘，方愧影西园。丁酉，忽奉纶音，为天子纪纲湖北诸郡。入境来，见城郭仅存，士民庐舍半冷荒烟，有司公署与民居相错，甚者学官茂草，督学使者亦侨寓武昌，无可为诸生礼教地。触目心怆，简书是畏，上之未能修复泮宫，弘敷德造，次之未能照临蔀屋，散作广厦万间。惟是率庶司百职星冠露冕，勤宣德意，土阶数尺，便是霜台，何敢率作劳民，隆兹堂构。但闻署者位之表也，一方之所属目焉。故古者诸侯路寝成则考之，兵燹之余，淅淅环堵，安民察吏，体统未严，飧士接宾，礼容不称，毋乃轻朝廷而褻王命乎？余兹惧矣。爰询故址，捐俸更新。相高卑、度广狭，规圆矩折，鸠材庀工，谕以宁朴无华。工成不日，始于是年之孟夏，不三月而用以足、役以成。

望其门，轩如也、廊如也，足以布法。入门而历驰道、登露台，虚明爽垲。升其堂，翼如也、隆如也、森如也，足以观民而咨諏，省方而考俗。垣墉之内，列以周庐高台，燕寝无事，缕斫因之。毖飭关防，狐兔潜踪，鲸鲵息浪。时晋庶事百职事，问兵民疾苦，小民亦得以时晋见，劝相农桑。暇则晋多士讲学课艺。维楚有材，固泱泱大观也哉。



是役也，力出于工，财资于官，地褻于故址之西，未尝纤毫累之民间。采诸民有若谣若歌者，歌曰：“堂隆隆，维侯之功，江汉朝宗；堂翼翼，维侯之德，衡岳表极。”余闻之惧，以歌为刺也。日莅斯堂，瞿瞿顾畏曰：“上帝汝临坎，下民具瞻坎，天威咫尺坎。”爰勒珉以自省，并告后之巡行兹土者。

阴阳学在府治西，今废、医学在府治东，今废、僧纲司在兴国寺、道纪司在玄妙观。

汉阳县

县署旧在府治西凤栖山之南冈，明洪武二年建，成化间修。正德间毁于火，知县龚锐重建，嘉、隆间屡修。万历庚子，知县黄思新重修，明季兵毁。

皇清顺治初，知县梁梦鼐借居民舍。康熙□□年，知县张介眉即旧基鼎建。

头门一座、照墙一座、门内号房一间、班房三间、仪门一座、门内左右班房共四间、牌楼一座、东西吏书房共一十六间、大堂一座三间、赞政厅一间、堂侧库房六间、堂后川堂一间、二堂一座五间、堂右书房三间、又书楼三间、书楼后又书屋一间、耳房一间、内舍在二堂后东首计二重共十间。

附唐李白《醉题王汉阳厅》诗

我是鸕鹚鸟，南迁懒北飞。
时寻汉阳令，取醉月中归。

教谕训导署在学官内、典史署在县头门内东偏、头门一座、二门一座、门内科房一间、班房一间、大厅三间、二厅三间、书房一间、内舍三间。

汉口镇巡检司署巡检司署原在汉口南岸，后移北岸循礼坊同知旧署。今同知复设。雍正五年又分设仁义、礼智二司，俱退居民舍、蒲潭镇巡检司署在县治西南三十里下蒲潭所、蔡店镇巡检司署在县治西六十里本镇河街、新滩镇巡检司署在本镇，去县治西南一百三十里、百人矶镇巡检司署旧在县南六十里，后迁东江脑，今裁，署废、蔡店驿丞署缺裁，署废、长江局河泊所署在县治南、三汊河河泊所署在县治北二十五里，后并入长江局所、桑台湖河泊所署在县治西北三十里马肚潭、马影湖河泊所署在平塘渡口东岸，后裁并入桑台所、蒲潭湖河泊所署在县治西南六十里上蒲潭、新滩湖河泊所署在县治西南一百三十里宦子口，后并入蒲潭所。以上各所俱裁，署废。

常平仓雍正七年奉文，以通判旧署改建，共一十六间、社仓分建各里，共二十七所、育





婴堂一在东阳坊，共十间。雍正十三年，知府张廷庆、知县梁瑛率同绅士崔文元等募建。邑绅徐谔捐田九石三斗，以供堂内资用。一在西洋坊，共二十间，系绅士徐诜买高姓房基二所改建、孤贫院坐落西门外，共八间，乾隆二年重建、普济堂在汉口大智坊。先以公费缺少，未及行普济之事。至雍正五年水患，房屋坍塌几尽，因孤贫院在西关外，房屋仅八间，孤贫众多，不能容住，且汉阳孤贫至汉口觅食，祈寒暑雨，奔走维艰。乾隆二年，知府胡学成于汉口大智坊重建普济堂一所，计内外房屋六十九间，移为栖息孤贫之地，并有各所铺月给口粮，以资养济，而名则仍普济堂云。其后开堂收养外来孤贫，详载《县志》、麻风院坐落西门外棉花山，共一十四间，雍正九年建、马厂在县治东、府监狱在鼓楼侧东首、县监狱在县大门右首。

坊表附

五云丹诏坊在城隍庙东，为朱凤立。

绣衣坊在凤山门外，为御史朱宪立。

集贤坊在府治南，为历科举人立。

谏议坊在县左，为给谏曾廷芝立。

天官清卿坊在府学东，为选司王秩立。

尚书坊在府学西，为戴金立。

褒德旌直坊在府学西，为李练、李宗鲁立。

开府坊在凤山门内，为都谏尹应元立。

褒封天部坊在凤山门内，为王教立，以土坊今存。

父子进士坊在玄妙观西，为张登高、张季彦立。

世承天宠坊为知府王一麟立。

三世巍科坊在凤山门内，为举人李芄等立。

中丞坊在府学西，为尹齐立。

榜眼坊在儒学西，为萧良有立。

都宪尚书坊在儒学西，为戴金立。

柏台三家坊在府治西，为御史朱衣、傅桂、戴金立。

进士坊在东门内，为朱衣立。

以上坊，今废。

汉川县

县署旧在阳台山东，元至元二十二年自大赤迁今治，廨宇兵燹不存。



明洪武初，知县张敬即故址鼎建。宣德中，知县游学重修。

皇清康熙初，知县梅琮增修。

头门一座三间、内宾馆一间、仪门一座三间、门内班房四间、东西吏书房共一十二间、大堂一座三间，堂前甬道有戒石坊、二堂三间、堂后内舍五间、后楼三间、二堂西书房三间。

教谕训导署在学宫内、典史衙在县堂西，计头门一间，厅事三间，内舍三间、刘家隔巡检司署在县北三十里，计头门一间，厅事三间，二厅三间，后为内舍、阴阳学在县南、医学在县南、僧会司在县治东北阳台寺、道会司在开天观、布政分司在县治东，今废、按察分司在县城隍庙西，宣德七年，知县游学建。成化十年，知县陈惠重建。今废、公馆在县街东，正统九年建，今废、行署在刘家隔巡检司西，嘉靖六年，知县周正蕃建，今废、府馆在刘家隔行署东，嘉靖六年，知县周正蕃建，今废、刘家驿成化十年自三汊驿徙此，今驿丞裁，署废、上零残河泊所在县南二十五里，明嘉靖四十年本所钱粮并入沉下、安汉二所带征，本所官基遂废，属民领管、沉下湖河泊所在县西南一百里、安汉湖河泊所在县北二十里，万历八年，知县詹天伦申详两所钱粮俱派入红粮下，其官吏裁革，两所官基俱属民管、税课局在刘家隔巡检司西，明正德间，德安景府、寿府征税于此。因其病商，巡按御史唐符奏革，官基俱属民管，局遂废。

营建附

常平仓在城内，瓦屋八间。

社仓在各里。

育婴堂在城内察院西。

养济院在城阳台寺内。

监狱在县头门内。

马厂在县治南门内。

坊表附

清朝司宪坊为尹应元立。

五星耀汉坊为举人龙襄等立。

两蛟起汉坊

双鸢冲霄坊

龙门高跃坊

丹山彩凤坊

青云接武坊

攀龙坊

黄陂县

县署自明季兵燹后颓陋，几不蔽风雨。

皇清康熙二年，知县杨廷蕴尽撤重造，规模始具，渐复旧观。

头门五间，门上有谯楼，额曰大观楼、仪门计七间三间为门，左二间为土地祠，右二间为收纳钱粮之所，知县杨廷蕴建、大堂三间左为龙亭库，右为古贤堂，各三间，康熙二年知县





杨廷蕴重建，堂前甬道有上谕坊一座，戒石坊一座、大堂左右书吏房东西各六间、班房各二间，顺治中知县吕燦如建、川堂名保善堂，堂后为宅，门左右耳房各二间。川堂左积贮库三间，杨廷蕴重修。库东耳房二间、三堂在宅门内内五间，明知县王林建，久颓，杨廷蕴重修、自公堂在三堂后七间，杨廷蕴新建，前后有老槐各一株、左有耳房三间、后有土地祠祠旁老柏数株。东书房在三堂左三间、西书房三间，在三堂右、内舍三间，在自公堂右，明知县狄同然建，后毁，杨廷蕴修、从房七间、迎宾馆三间，在仪门左，明知县胡璉建。

国朝杨廷蕴《自公堂记》

余自壬寅来陂，旧署蔽风雨者曾不数椽，随解橐建内廨七楹，课书牖于其中，颜曰“自公”。义何居乎？邑大夫发号施令，与吏民相见，必于大堂是视，若一邑之大、庶民之众、各乡保会之遥，其所为号且令者，或不能临事而猝图之也，当先于退食之地讲求探讨，而后大堂征发，庶几就理。故昔之循吏昼作夜思，而民隐毕达，大都多得之闭阁之余，盖大堂以出治，而退食以图治。古圣王宣室夜分，犹不禁前席，良有以也。今出宰百里，地方利弊、疾苦痼瘵，悉由一人，使一事不考究，一夫不殄念，而百里内外颠连见告者多矣。

余之首庀“自公”，诚以内舍虽微，环陂闻声于斯、睹形于斯、设身请命于斯，相见及之，不相见亦及之，民艰国恤，繄此究图，实与大堂相表里，岂徒取以自安，而顾谋之亟亟也哉。今四年来陂邑纪纲无不大小粗立，以至民情款曲无不肯綮熟尝，皆由“自公”之讨论有素，故所应差得自谅耳。是大堂之建，所关固在治体。“自公”之构，攸系端在治先。后人绎是义而夙图之，未必无小补也。遂援笔为之记。

县丞署在县堂左，计头门一座，二门三间，厅事三间，二厅三间，内舍五间，康熙四年县丞李成纪建、主簿厅在县堂左，顺治初裁，署废。旧有马王庙，左右马厩，今亦废、典史衙在县署右，计头门一座，厅事三间，内舍三间、教谕训导署在学宫内，明伦堂后、大成镇巡检司署在县北一百二十里大成潭，无衙署、东公馆在县治东，计头门三间，厅事三间，后厅三间，班房三间，耳房六间，知县杨廷蕴建、西公馆在县治西，制同东公馆、府馆在东公馆前，今废、漚口公馆在漚口镇、阴阳学旧无建置、医学旧无建置、僧会司旧在城一里，久废、道会司莫详所在。

营建附

常平仓三座，计九间，坐落县前寅宾馆、社仓分建各里，计百二十二座、永丰仓旧建



在大西门内，官厅五间，仓屋三十六间，外积谷仓四间，后有土地祠，今废、预备仓在寅宾馆后，旧仓五间，明知县胡璉建，后知县洪其道增建十间，捐贮积谷以备赈，今改、汉阳仓里民各建之仓也，计三十六间。顺治九年，奉文南漕留充本省兵饷，每里各建仓房一间，暂贮米，听候拨运，今废、义仓明知县萧胤儒建，义劝士民输谷五千石零，原贮各城楼。后知县胡以百姓担负维艰，散贮各乡，民便之，感激，争输谷至八千石，后废、便民仓旧在淝口市，明知县熊炜改建鲁台山下，今废、育婴堂在县前，雍正十一年建、养济院在鸡鸣楼外，乾隆二年建、监狱在仪门右、马厂。

坊表附

城隍勅封坊在县东。

晏公勅封坊在小南门。

大生宫坊在城西。

程乡坊在草庙巷，二程夫子诞生处。巷内暑月无蚊，人传为异。洪武三年立，今废。

我家先生坊张涛为二程夫子立。

花柳前川坊在鲁台，今废。

里门奇烈坊张涛为木兰将军立。

二世沐天恩坊为郑鸾、郑佖立。

大廷尉坊为董威立。

捧日回天坊在三眼井，为张涛立。

纶褒三代坊为张大猷立。

孝感县

县署在城正街中稍西，明末兵毁。

皇清顺治初，县令皆僦民舍以居。顺治八年，摄县事德安府同知金有选始建堂，湫隘不蔽风雨。十六年，知县张擢士更新之，规模渐备。

头门三间，门左申明亭，门右旌善亭，今废、门外屏墙一座，左为巉山岩邑坊，右为濯水花封坊、仪门三间、门外左首为寅宾馆三间，颜曰“事友堂”，堂左有土地祠，仪门外右首民赋所五间，康熙三十二年知县梁凤翔建、大堂三间，号“亲民堂”，左为赞政厅，右为库，各三间，堂下雨道，中为戒石坊、东西书吏房共一十八间、左右班房各二间、二堂五间，颜曰“思补堂”、贮册楼在大堂东，内贮丈量册籍，康熙三十年知县梁凤翔建、三堂五间，名“澹宁堂”、左右耳房各三间、又左书房一间，本知县张擢士建、内室知县王





梓改为三堂，堂右西厅三间、厅后有亭、亭后书屋三间、内舍五间名“萱曜楼”，知县王梓建，在三堂后。

附明罗勉《琴堂槐荫》诗

讼庭清暇鼓瑶琴，满地高槐散绿阴。
大暑不来无酌吏，南薰操罢慰民心。

县丞署 顺治初缺裁，署废。**典史衙** 旧在县堂左，康熙间知县刘于治左辟，青龙巷捕衙遂改在治外，计头门一座，厅事三间，后内宅二重，各三间，右有书室三间，班房二间，在头门外、**教谕训导署** 在学宫内、**马溪河巡检司** 旧无署，雍正十二年巡检胡洋龄奉文支帑买三汊埠民舍建，厅事三间，头门三间，班房一间，厅后内宅二重，各三间、**小溪河巡检司** 在县北一百二十里，旧无署，赁居民舍、**阴阳学** 旧在申明亭左，今废、**医学** 旧在旌善亭右，今废、**僧会司** 在广化寺、**道会司** 在会贞观、**察院署** 在县治东，明季毁。顺治六年，摄县事德安府通判宋继舜重建。十七年，知县张擢士重修，今废、**按察司行台** 在分司街东，明季毁。顺治十七年，知县张擢士重建，今改为城守把总官署。

营建附

常平仓 在县署右，知县梁凤翔建，左右各七间。

社仓 分建各里。

广储仓 在城内大东门街，明季毁。顺治十七年，知县张擢士重建，厅事三间，左右廩各十二间。

义仓 旧共一十二所，顺治十八年知县张擢士建，后悉废。康熙三十二年，知县梁凤翔重修，仓各三间。雍正元年，知县张宏敏于每会建仓，共百八十四所。五年，奉文尽以义仓谷归公贮城内，各仓遂废。

国朝梁凤翔《义仓碑记》

积贮者，天下之大命系焉。《记》曰：“国无九年之蓄曰不足，无六年之蓄曰急，无三年之蓄曰国非其国。”盖惟天地生万物，圣贤养万民，故古后之理天下也，若天时别土宜，导利布于邦国，而好生厚下、节舒优养之德行乎其中。

我国家庶征协应丰亨豫大之象，屡占大有，间有雨暘失若，罢税捐租，赈救多方，致廩圣虑而犹无日不关心民瘼，思患预防，颁劝民输粟之诏，以备不虞。盖欲其奉行之力，而一旦金粟衰旺，长吏按册行赈，直取诸其寄也。夫土均地征之法，皆掌于大司徒，下至遗人、旅师，有县郡之委积，以待凶荒，锄



粟、屋粟、闲粟，皆待赈乏，后世常平、社仓，要皆祖其遗意，而通变各因乎其时，即如潞邑南、漕二粮载《全书》者，征有定额，支有定数。国初因无厰可贮，民苦于羁延，官难于考核，胥吏丛奸，蠹好私敛，积逋者无算，官民交困，矧积谷乃劝民所输，听其乐从而自纳者，若无汇聚之所，保无有壮哉之雀鼠乎？

今为之建义仓，使归画一。爰割俸钱以襄是役，无亏公帑，罔算民缗，丰或除陈以易新，凶则哀益而拯济，用以佐耕三之有余，补二鬴之不足，是亦先事之虑也。然以积贮之区而建置于远不及经之地，锐入啻出，奚何从塞？乃于治之右旧主簿裁署所，度以寻步，卜吉肇造，俾公得阅视而便于收纳，私无守候而利于交卸，事有规画，义实相维，长此时和年丰，则斯仓斯箱，其储无穷矣。

经始于庚午年仲秋月，计用木若干章，瓴甌、甓甌若干万，佣匠人、涂人若干日，佣版筑、刈棘若干工，为堂若干础，厰若干间，例得并记。

惠民药局在城北，久废、总铺在县治前、接官厅一在城外五里墩，一在城西李家嘴，今废、演武厅在城东门外、育婴堂旧在节孝祠后，雍正二年，知县张弘敏创建，瓦屋十间，月捐给乳妇工食银六钱，春秋给乳婴衣絮银各二钱，后废。雍正十年，知县金虞改建北门内汪公池侧、养济院在城北门外，久废。顺治十八年，知县张擢士重建，瓦屋十间，后圯。康熙五十八年，知县张弘敏重建，瓦屋五间，茅屋五间、监狱在仪门外，内外共六间、马厂在青龙巷典史署后、杨店驿马厂旧为斗山铺驿公馆，明季毁。顺治十七年，知县张擢士重建，久圯。康熙五十九年，知县张弘敏重修。

坊表附

汉孝子董永仙乡坊

唐忠臣张杵故里坊

义门坊为程昂七世同居建。

御史坊为万言扬建。

三世司徒坊为严正矩立。

祖孙进士坊为严贞、严志迪建。

令尹子文故里坊

尚书坊为傅淑训建。

巡抚坊为刘应遇建。





论曰：公廨者，官府之传舍；厅事者，仕宦之寄寓。抑思朝廷建置之意，养尊处优，居高御物，将必重门洞开，俾游宇下者得荷帡幪，庶可称国之良栋矣。临斯堂也，不愧屋漏，凡所以莅众而亲民，布化而敷政者，悉于是乎在。昔谏院之题名“风高司马”，蓝田之记壁“望重崔丞”，官无尊卑，其期于尽职则一也。噫，召棠则致美矣，莱柏且兴思矣，昭退食自公之义，而致风鸣琴，是所望于司牧者。




《汉阳府志》卷之七 地輿〔五〕

漢陽府志卷之七

輿


輿









漢陽府治圖




漢陽府治圖






學宮圖








漢陽府署圖




漢陽府署圖





四縣水陸總圖








汉阳县山川图





汉阳县乡会图









汉阳县塘汛图








漢川縣治圖



汉川县治图










漢川縣鄉鎮圖




漢川縣鄉鎮圖






漢川縣堤垸圖








漢川縣塘汛圖





黃陂縣治圖




黃陂縣治圖





黄陂县山川图





黄陂县乡会图








黃陂縣堤垸村鎮圖

每方
十里



黃陂縣堤垸村鎮圖








黃陂縣塘汛圖


正東離城六十里與黃岡縣分界

東主黃岡縣界六十里。

每方十里



黄陂县塘汛图








孝感縣治圖




孝感縣治圖








孝感縣山川圖



孝感縣山川圖







孝感縣鄉會圖



孝感县乡会图








孝感縣塘汎圖



孝感縣塘汎圖







晴川閣圖



晴川閣圖







魯臺山圖



魯台山圖







九真山圖



九真山圖







陽臺山圖



陽台山圖







木蘭山圖



木蘭山圖







九峻山圖



九峻山圖





《汉阳府志》卷之八 地輿〔六〕

《山川志》序

夫地之有山川，犹人之有骨血。虽峙者为高、流者为深，其成形各异，而气脉之贯通，仍属一体。不然，山顶之泉可涸，而海有不能容水之时矣。两山之间，必有水焉；两水之间，必有山焉。《禹贡》山川之见于各州者，山川之经也。其导各州之山川而条贯之者，山川之纬也。经纬分明，而山川之脉络见矣。禹因深达山川分合之故，而顺导之，而九州之患平矣。宋儒以三大干论九州之脉络，岂非《禹贡》江河两大界之所界而然乎？

今汉阳山脉西源中干，水则江汉为经。七省水会之区，其间民社安危之系于山川者，岂他省与他郡比哉。是不可无编辑以待后之言水利、论废兴者引证焉。

为《山川志》。

山川〔志〕

汉阳县

山

大别山 在郡城北半里，即鲁山，一名翼际山。《禹贡》：“导嶓冢至于荆山、内方，至于大别。”蔡注曰：“《左传》吴与楚战，自小别至于大别。”盖近汉之山，今汉阳军汉阳县大别山是也。《禹贡锥指》：“大别山在汉阳府城东北半里，汉水西岸。”《水经》：“江水又东径鲁山〔西〕〔南〕。”^① 酈注：“古翼际山也，山上有吴江夏太守陆涣所治城，中有晋征南将军、荆州刺史胡奋碑。又有平南将军王世将刻石，记征杜曾事。有刘琦墓及庙。山左即沔口。”《元和郡〔国〕〔县〕志》^②：“鲁山，一名大别，在汉阳县东北一百步。其山前枕蜀江，北带汉水。

^①西，当为“南”之误。

^②国，当为“县”之误。



或曰凤栖山西有鲁肃庙，故以凤栖迤西名鲁山。”朱衣旧《志》曰：“观大别、凤栖，南北并峙。其间无他山，鲁山为大别别名无疑。”山北有桃花洞、关王洞、锁穴，山头有禹功矶，矶侧有洗马洞，俱详《古迹》中。

凤栖山 在府署后。因山为城，府治坐此。宋知军刘辟疆记曰：古有凤凰栖于此，故名。

梅子山 在府城西四里。旧《志》曰：“其山多梅。”今无。

黑山 在汉城西五里。汉口镇南岸居民每采石于此。汉邑绅士以取石则汉镇多火灾，公请勒石永禁，各宪准立禁碑。碑文及贡生唐裔潢《风水论》，以文多未载，详于《县志》。

附载禁采之山名目：

梅子山	卧虎山	黑山	龙潭山
锅底山	仙女山	禹梁山	汤家山
石马山	磨旗山	大别山	大教场前石山

计勒碑四座：一立汉城，一立黑山，一立汤家山，一立石马山。续经五十二年、六十一年、雍正元年，奉府三勒禁碑，文不具载。

紫霞山 在城西六里。

女郎山 一名禹梁，在城西十里。旧《志》谓即楚襄王会神女处，以唐刘禹锡诗证，误也。详见汉川县“阳台山”注。

磨旗山

汉南山 在城西十里，汉水之南，故名。楚《志》载明楚昭王射虎于此。其山三峰并峙，一仙女，二楼子，三马足，故又名三山景。

锅底山 **磨盘山**

汤家山 在众湖中，环以官寨、楼子、马足诸山，聚以龙王、鄱官诸水，云起则雨。中有簸箕洞，山势回转如洞也。万历中，土人以关壮缪、岳武穆皆尝驻兵于此，设像祀之，称关岳祠。明朱衣有《汤家山赋》，文多不载。

观寨山 **石马山**

以上去县治十五里。

风火山 **空山** **吴家山**

湖盖山 其形似盖，南临汉水，西带大湖。

道冠山 **栗林山** **马头滩山**

香城山 **广王山**





柏泉山 相传大别禹祠古柏,其根直透于此。山有古柏,井底双鱼动跃,泉枯,则柏根并现,今皆无。

以上去县治六十里内西北鄙之山也。

汉阴山 旧《志》云:以汉阴丈人得名,一曰马鞍山。下有集贤村,传是钟子期故居。按子贡遇丈人,系庄子寓言,且泛云汉阴,即为今郡地也。

猫儿山 **姚家山** **成功山** **独山**

临嶂山 一作临鄡,俗名城头山。势颇盘曲,城址犹存。汉水绕其北麓。《水经注》曰:“沔水又东径林嶂故城北。”《晋书》建兴二年,太尉陶侃督荆城镇此。旧《志》谓晋江夏郡沌阳、安陆县、宋德安府皆治此。非是。按《水经》“沔水又东径林鄡故城北,又东径沌阳县北”,则沌阳与林鄡非一地明矣。林鄡故城自是陶侃屯兵处,沌阳县处沌水之阳,亦与此无涉。至言江夏郡治此,尤误,详见《沿革》下。惟《宋史》咸淳中德安为元兵所逼,侨治于此。元世祖至元十三年仍还旧治,非以此为德安治地也。

金牛山 **白马山**

以上去县治西^①,由南而北之山也。

玉笋山 《舆地纪胜》云:山有白石,参差如笋,故名。一曰栲栳山。

羊牯山 **尧山** **磨旗山**

乌鸣山 一名乌梅。

蝙蝠山

以上去县治七十里,由东而西之山也。

虎头山 **笔架山** **千子山**

尉武山 旧《志》:唐武德二年,遣尉[迟]敬德战朱粲于此^②。考本传及《朱粲列传》,皆不载此事,岂相传之讹耶?然敬德封于鄂山,前有御田庄、兴唐渡等名,则俗传或有所因,存疑可也。山西北三里许,有地名螃蟹洞。

伏牛山 **季符山**

以上去县治西六十里,由北而南之山也。

叹父山 一名炭步。《水经》:又东径叹父山南。

鸡翅山

①据全书山川志书法,“西”下当脱里程数。

②尉敬德,当作“尉迟敬德”。



文寺山 下临沌水，斜对大别。

响山 山顶有平地，可丈余，不生草木，履之辄响。

小军山 《水经》：“江水又东径小军山南。”郦注：“临侧江津，东有小军浦。”

洞门山 山有石洞，可容数十人，今闭。

大军山 《水经》：“江水东径大军山南。”注曰：“山东有山屯，（下）〔夏〕浦江水左迤也^①。江中有石浮出，谓之节度石。右则涂水注之。”旧《志》：吴魏相持，陈军两山之间，故名。然《水经》作于有汉中叶，名不始于吴、魏矣。里老相传元时风雨之际，则闻金鼓声。山高百余丈，每出云蒸雾，则数十里皆雨。上有祖师庙，近时祈祷者甚众。

百人山 下即大江。《水经》：“江水左径百人山南。”宋李巽《南楼记》曰：“郡西南百人山，与赤壁对。”旧《志》谓周瑜遣黄盖领百人诈降魏武，故名。但《水经》已有百人山之名，则此说亦属傅会。

三王山 小蓼山 马影山

观山 下有唐白鹤观遗址。

蒲潭山 澧山 牛尾山

以上去县治五十里，南鄙之山也。

土山

楮山 下临沌水，上有诸葛城、武侯庙，或传为徐稚读书处，考无据。又有凤凰台，生草甚异，相传曾有凤凰栖此。

豹子山

大蓼山 蓼山寺在其顶。

纱帽山、龙霓山 两山并峙，云起则雨。戴司马金曰：山自九真中麓发脉，迤迳三十余峰，至是三峰突起，二峰端严如釜，一峰秀拔如笋，每雨后涧壑深处瀑布飞流，如白龙蜿蜒状。

高子山

覆钟山 戴家塔在其下。

九真山 在县治西九十里，一名五藏山。九峰相向，势如游龙。旧传有九仙女炼丹于此，上有飞升石。唐咸通中赐名“仙潜”，高数百丈，望之佳气郁然。

^①“下浦”，当作“夏浦”。





面为郡城之干，背临太白之壑，形家谓为郡之祖龙也。《輿地纪胜》云：“上有炼丹台、九真庙，又有九泉水，甚清澈，秋冬不涸。旱甚，祷请其水，无不辄应。山下有菖蒲洞，曾产菖蒲一寸九节。”《昨非园集》：九真为汉阳镇山，蜿蜒百里而结郡治。相传有真人刘姓证道于此，世加崇号，礼秩视公，神之锡祚千年矣。明初，楚庄王宫中疫。有黄冠以法辟之，物色其神像如宫中所见者，遂建庙崇祀，山名益著。每境内旱，守令躬以诚求，甘澍立至。神以八月八日诞，拜献充庭。相传有九仙女炼丹上升，因名九真，其下有炼丹池。

凤凰山 背为陈伏岭。自岭穿石径迂曲而低，山麓皆乔松老木，白日阴森，长夏可以忘暑。

山西头 下有石厂，甚幽深，俗号桃源洞。

香炉山 以形似得名。相传元世祖南征，尝驻蹕于此。

裴家山 **桐山** **薛公山**

鲁公山 世传为鲁肃屯兵处。

以上去县治西八十里，由东而西南之山也。

侏儒山

皂角山 乱石玲珑，嵯峨万状，环山皆是。邑中有园亭者，咸构取之。

土茧山 **横山**

以上去县治一百二十里，西南鄙之山也。

竹篠山

鹿城山 一名六神。

鹰脑山 **纱幔山** **仙女山**

天皇山 下为嵩阳寺，有泉甚甘冽，大旱不涸，世传骆禅师卓锡出之。今坐禅石遗迹尚存。又有黄金洞，在寺侧，甚幽窅。

马城山 山以西为汉川县界。

以上去县治一百二十里，由南而北，西鄙之山也。

乌林峰 在临嶂山南。

桃林冈 在县北二十里。

西倪冈 在县北二十五里。

栗林冈 在县西北二十五里。

枣林冈 在县西南六十里。

顿家岭 在县西二里，旧有顿姓居其下。



杨家岭 与顿家岭相接。

分金岭 在县西一百一十里。

蜈蚣岭 在县西一里许。

禹功矶 在县东北大别山东，初名吕公。元世祖驻蹕黄鹤山，问隔江石矶何名？众以吕仙对。帝曰：“唐以前何名？”一老叟对曰：“大禹成功之所，后讹为吕公耳。”帝大悦，因建祠，岁时致祭。

张王矶 在南门外，详《古迹》。

桃花洞 在鲁山北，详《古迹》。

关王洞 一名藏马洞，在大别山左，详《古迹》。

洗马洞 在禹功矶上。万历间，知县陈尧钦建水月庵于其旁，旧有一碑，勒“振衣冈”三字。

簸箕洞 在汤家山。

螃蟹洞 在玉山乡。

菖蒲洞 在九真山。

梅子洞 在分金岭。

五里墩 在县西五里，高数丈，上平。

祝家圻 在玉山乡。

以上皆一县高阜有名者，例得附载于各山之后。

川

江水 上承岷江，合洞庭诸水，流入县界之东江脑。又东北流一百五十里，经县治东北，流径烟波湾。又四十里入黄冈界。

《水经》：江水左径百人山南，东径大军山南，又东径小军山南，又东径鸡翅山北，又东北至江夏沙羡县西北，沔水从北来注之，又东径叹父山，南对叹州。注亦曰叹步，江之右岸当鹦鹉洲南，有江水右迤谓之驿渚。三月以末，水下通樊口，又东径鲁山南，左得湖口水，通大湖，又东合淝口水。

秦《志》曰：自荆江监利而下，经汉阳玉沙界、水洪二口东江脑，又经大、小军山北，会沌口过城南，经大别东北与汉合者，大江之正流也。其经沔阳播为阳明诸湖，汇于太白，自沌口出江者，与经沔阳播为黄蓬诸湖，经上平放过汉阳之下平放，至新滩镇出江者，及自孝感经汉阳之石潭河入黄陂境，至沙口出江者，则皆汉水潏汇邻境，江弱则下流归江，江盛则逆漾而转灌邻境诸湖，此就水势偶值强弱之时而言之，然江海为百谷王，其诸口入江之处，总为汉水





入江之道也。出沌口、新滩口者，在县治西南，出沙口者，在县治东北。

按：《书》言“江沱潜汉”，史云江夏其水皆会于汉阳，而今不可悉指矣。大江东北流，环境二百里，去城仅咫尺。曩江岸有鹦鹉洲障之，去水略远，百年以来，洲既沦没，岸亦崩洗，城郭剥肤，惟留心者防维之。乾隆三年，制府特请修筑汉阳江岸，蒙恩准行，于是遴员分段承修，详《城池》下，兹不复载。

汉水 在城北三里。

《禹贡》：“嶓冢导漾，东流为汉。又东为沧浪之水，过三澨，至于大别，南入于江。”蔡注：“水发源嶓冢，至武都为汉。”《汉志》：“东汉水受氏道水，一名沔，过江夏，谓之夏水，入江。”故又名夏口。《水经》：“沔水南至江夏沙羡县北，南入于江。”注：“庾仲邕曰：夏口，一曰沔口。”《图经》：“汉水至江夏安陆县又名沔。”《通鉴》：“梁武帝筑汉口城以守鲁山。”盖夏口、沔口、汉口，名有三而实则一也。自孙权筑城于黄鹤山东北，以夏口为名，于是夏口之称移于江南，而汉水所出专为沔口，故何尚之谓夏口在荆江之中，正对沔口，通接梁雍，是为要津也。后人或疑沔、汉为二，故《湖广通志》于汉水之外别书“沔水”，注之曰：“在县西三十里。”又书“沌水”曰：“在县西南四十里。”

夫县西南三十里止一沌水出江耳，安从得沔水乎？又安得四十里外之沌水乎？其讹甚矣。再《荆州府志》“监利县堤防”下有庞公渡，即中夏口，是夏水之首，江之沱也。自庞公渡塞，而夏水遂不与汉、沔合，此自言中夏口，非《汉志》、《水经》所言之夏口也。

今列江、汉、沌三水源流分合之故，而削沔水，使考者有征焉。

秦《志》曰：水自竟陵乾滩镇入汉川之田二河，经张池口、两河口，循县治下涓口，然后经蔡店临漳山、郭师口，又北出大别山后东入于江者，汉之正流也；又有自孝感安河出者，有自云梦苛河出者，有自应城五龙河出者，有自天门皂角河出者，有经田二河、沉下湖出者，有经回流湾及经南河金刚脑出者，此在涓口以上小水出汉者也。有自猪龙潭经汉阳三汊会白水，又经东西二至山过陈门湖、下蔡店者，此汉之别流、分于涓口之上、合于涓口之下而复于汉者也。

附汉蔡邕《汉津赋》

夫何大川之浩浩兮，洪流淼以玄清。配名位乎天汉，披厚土而载形。发源自乎嶓冢，引漾澧而东征。纳阳谷之所吐兮，兼汉沔之殊名。总畎浍之群液，演西土之阴精。遇万山以左回兮，旋襄阳而南萦。切大别之东山兮，与江湘乎



通灵。嘉清源之体势兮，澹澹潏以安流。鳞甲育其万类兮，蛟龙集以嬉游。明珠胎于灵蚌兮，夜光潜乎玄洲。杂神宝其充盈兮，岂鱼鳖之足收。于是游目骋怀，南援三州，北集京都，上控陇坻，下接江湖，导财运货，懋迁有无。既乃风焱萧瑟，勃焉并兴。阳侯沛以奔(骛)[骛]^①，洪涛涌而沸腾。愿承流以上下，穷沧浪乎三澨。观朝宗之形兆，看洞庭之交会。

又按：汉水之道有三：自潜江西南上流十五里名夜泽口，汉水从此分流，为入荆之要路，合太白诸湖，萦九真山，达沌口而入江者，为一道。其由潜之张接港，过景陵三澨至沔阳仙桃镇下注于汉川县，得沮水，至汉阳府之大别山而入江者，为一道。其由潜之张接港分入芦袱河，距沔南莲子口合复池诸湖，而总汇于九真、太白诸湖者，为一道。出《沔阳志》。

《水经》曰：“漾水出陇西氐道县嶓冢山，东至武都沮县为汉水。”又曰：“沔水出武都县东狼谷中，东南经沮水戍而东流注汉。”孔安国释曰：“漾水东流为沔，盖与沔合也。至汉中为汉水，是互相通称矣。”《水经》明言漾水为汉水，明言沔水东南流注汉，何得谓三国以前书传多称沔、不言汉；三国以后多称汉、不言沔哉！然则非一水而二名，乃二水而互称也。再考《安陆府志》，汉水自京山小河口分流，径青山东南巾水，至南湖九水之隶竟陵者，又南入于沔，是曰刀口。沔水一自潜江县排沙渡，至深江入沔阳州西北界，径诸湖河水逶折而汇于白湖，出沌口入江。是汉、沔合流入楚之后，亦有分衍、径注之别矣。

又考本朝《御制皇輿经纬图》，漾水于嶓冢发源，经山谷间南流二百余里，至汉中府西。沔水自西而东，经今汉中府之沔县南，又经褒城县南，亦二百余里，至汉中府西而后入汉，则桑钦《水经》所说非无见也。且桑钦北人，于南水或有不详，于北水则未有不详者，况汉、沔又水之大者乎。惟后世因汉、沔合流，而遂以汉、沔二名并称，而安陆所属又有沔阳州治，当日以沔阳名州者，盖亦以汉、沔二水曾已互称，称沔亦即称汉矣。况其下又已有汉阳之号，欲以区而别之，遂称沔阳，非入楚之后又另有沔水，而沔阳因以名州也。后人未深察之，以致多生臆解矣。

《黄氏日抄》云：“汉水二源，一出秦州天水县，谓之西汉水，至恭州巴中县入江；一出大安军三泉县，谓之东汉水，至汉阳军入江。”观此，则二汉水源流益洞然矣，何纷纷聚讼为哉。

^①“骛”，当为“骛”之误。





附唐许浑《汉水伤稼》诗

西北楼开四望通，残霞成绮月悬弓。
江村夜涨浮天水，泽国秋生动地风。
高下绿苗千顷尽，新陈红粟万箱空。
才微分薄忧何益，却欲回心学钓翁。

废襄河 在汉口北岸十里许，即古汉水正道，久淤。夏秋水涨，名潇湘湖；春涸草生，名黄花地。《堤防考》：汉水旧从黄金口入排沙口东北转折，环抱牯牛洲，至鹅公口，又西南转北至郭师口，对岸曰襄河口，约长四十里，然后下汉口。成化初，忽于排沙口下、郭师口上，直通一道，约长十里，汉水径从此下，而故道遂淤。今鱼利略存，舟楫已不通矣。呼襄河者，水自襄阳来也。

附明太祖《潇湘湖》诗

马渡沙头苜蓿香，片云片雨渡潇湘。
东风吹醒英雄梦，不是咸阳是洛阳。

今考太祖殪陈友谅于鄱湖，追至武昌而返。后一年，又躬讨陈理，驻兵汉阳，修其城郭。理降，振旅，足迹未尝越江汉以南，不当远涉潇湘也。惟汉口后有潇湘湖，适与太祖用兵之地相符，勒马赋诗，或当在此耳。存之以待识者考焉。

沌水 在县西南三十里。汉水别出三汉，汇太白湖，至于沌口，南入于江。昔晋郭舒留沌口，税湖泽以自给，陈周文悉众御之。又陈高祖时，王琳与侯安都战于此。史炤曰：“江夏安陆有沌水，其地曰沌口。”《水经注》：“沌水上承阳县之白湖，东南流为沌水，径阳县南注于江，谓之沌口，有阳都尉治。晋永嘉六年，王敦以陶侃为荆州镇此。”旧《志》按：白湖即太白湖，“阳”字上有阙文，宜曰“沌阳”也。“径阳县南”及“阳都尉”上，俱应有“沌”字。沌阳县或在此耳。范成大曰：“自石首县舟行一百七十里至鲁家洲，自鲁家洲入沌。沌者，江旁支流，如海之汜，其港仅通运舟，两岸皆芦荻，支港皆通小湖，故为盗区。客舟非结伴不可行。”张舜民曰：“下汉故镇南对金口，自沌口至下汉五十余里，金口在鄂州西南，金口之下即窦家沙，江之西有沌口。”今按：沌水受太白全湖之委，下流为马影、蓼河，东北径香炉山、上下蒲潭，又东过小军山，东径文寺山下十里入于江也。



潏水 在县北四十里。其水自黄陂入汉阳界，与沦、索二水合流，南入大江。《水经》：潏水，上承沔水于安陆县，而东径潏阳县东南入于江。旧《志》：潏阳废县在潏水之阳。

涢水 在县西北一百里。上承德安、孝感诸水，流注于沔。《水经注》：“涢水出蔡阳县东南大洪山，山在隋郡之西南、竟陵之东北。”涢水“东南径隋县西”，“县隋国矣”，“又东南过江夏安陆县西”，“历横尾山”；“又东南入于夏”，“涢水又南分为二水，东通潏水，西入于沔，谓之涢口”。《通典》：“安陆县有涢水，亦名涢口。”《元和郡国志》：“安陆县涢水，故清发水也，西北自隋县流入，注于沔，今在汉阳县西北。”旧《志》谓“晋陶侃为杜曾所败，将奔涢口，即此”，是也。而谓“其源出自陪尾”，则非是矣。

以上县治内江河长流诸水也。

郎官湖 在城南，与汉学泮池并。唐李白泛舟处，详见《古迹》。

月湖 在大别山阴，东近大江，北连汉水，有杨柳、郭公、三搁石三堤，俱见《堤防》下。旧《志》：古有郢月城，在沔口左，湖或以此得名也。

潇湘湖 见上“废襄河”注。

以上县治附郭之水也。

应马湖 **牛湖** **猫儿湖** **桑台湖** **鸬鹚湖**

柏水 以柏泉得名。

以上县治五十里内北鄙之水也。

马家湖 **墨水湖**

太子湖 相传梁昭明太子食采于此，考无据，又讹为台子湖。

官湖 一名天鹅湖，周环数十里。

毕四海 **南湖**

刀环湖 《寰宇记》：湖形弯曲如刀环，故名。

以上自县治西五里至八十里内西南诸水也。平时北出平塘口，注于汉。夏秋泛滥，则亦南出火巷，注于江。

马影湖 **大小蓼湖** **赤马湖** **野猪湖** **沌阳湖** **桐湖**

官林湖 **蒲潭湖** **新滩湖** **裯裆湖**

以上去县治七十里内南鄙之湖也。

太白湖 在九真山南，广袤二百余里，西接沔阳。自北来西湖、李老沙湖、泗港诸水汇焉；沱自南来，直步阳明，黄连诸水来汇焉，而东南泄于沌水入江。





春夏与新滩、马影、蒲潭、沌阳等湖合而为一，秋冬水落，沟洫始分，山水清丽，颇堪栖隐。明末寇乱，避此获免者甚多。然港汊迂回，盗亦匿聚。顺治初，议设兵防守，未几罢。今已宁谧。旧《志》：李白泛舟于此，后人因以为名。《水经注》：“沔水又东径沌水，南通县之太白湖。湖水东南通江，又谓之沌口。”则湖之得名，不自青莲始也。湖旧属沔阳，今半属汉邑。

附明戴金《太白湖》诗

序云：湖据汉、沔之间，周遭逾二百里，春夏水泛，南接洞庭，北联三澨，盖与洞庭、彭蠡相伯仲，而名相远者，冲僻之殊耳。

薄天开巨浸，匝地竟谁伦？

汉沔疑无界，洞庭或有邻。

量包吞吐外，云渺往来津。

试问观澜者，何如待渡人？

龙潭湖 竹篠湖 黄连湖 鸡笼湖 笕箕湖 杂湖

以上去县治一百里，由南而北西鄙之湖也。

陈《志》曰：旧《志》所载诸河泊所中小湖、淤港不可胜数，名字纷纭，地理混杂，且无关于故实，不系于供需。今但取其章著者载于江河之后，其余悉从删削。

千湖泾 在侏儒山东南，通太白湖，详见《堤防》。

三十六湾 在凤栖乡，南抵沙泊口，北抵华家嘴。

附唐许浑《三十六湾》诗

缥缈临风思美人，荻花枫叶带滩声。

夜深吹笛移船去，三十六湾秋月明。

烟波湾 县东北三十里有白沙湾，疑即烟波湾。秦《志》曰：其水清澈，晴则烟岚起，风则水波生，旁有烟波里。

永济港 在县西南二十里，南入大江，疑即今火巷也。

直阳港 在县治西四十五里，与沌水合。

索子港 在县西一百里，秋冬水涸，会太白、龙潭及杂湖诸水，北出蔡镇金牛港与汉水合，南出沌口与江水合。



柏泉 详见《古迹》。

卓锡泉 详《山〔川〕》^①。

义井 在凤山门内，方二丈，宋时所凿，今居人塞。

四眼井 在兴国寺前，今塞。

炼丹井 在九真山，以九仙女得名。

凤凰池 即府儒学泮池。

放生池 有三：一在兴国寺前，名梵僧池。一在寺东大别山下，唐乾元初，肃宗命将史除、张建等置两池相对，即此，俗呼为上下莲花池。一在归元寺内。

附明赵弼《放生池》诗

渺渺方塘春水生，紫鳞白鸟戏纵横。

渔舟网罟无休日，漫说池名是放生。

小军浦 《水经注》曰：“小军山，临侧江津，东有小军浦。”

黄军浦 船官浦 《水经注》曰：“历黄鹄矶西而南，直鹦鹉洲之下尾，江水湓回〔状〕〔湓〕浦^②，是曰黄军浦”，“船官浦东即黄鹄山”，“东北对夏口城”。

鹦鹉洲 详见《古迹》。

刘公洲 在县南江中。宋延祐八年，有沙洲涌出，知军刘谊种荻其上，令民采用。民感之，以名洲。秦《志》曰：洲自三里坡直抵南纪门，荻苇繁茂。嘉靖以来，洲渐没。按：此洲直跨汉城东南，捍江涛而聚贾舶，为利久远。今东南两门外不盈寻丈即涉长江，昔之夹沙缠护，今且化为洪波浩流矣。近岁三里坡前于秋冬水落，微有沙洲，直至新河口，岂即刘公故处耶？倘此洲复现，一则捍水东去，一则积塞泥沙，江水之在城南势必弱小，江岸可渐以阔，城隍可渐以固，渔薪之利，又其小矣。

附明赵弼《刘公洲》诗

渺渺长江秋水平，芳洲落日乱鸦鸣。

刘公勋业无传述，百载空遗种荻名。

①“山”后当脱“川”字。

②“湓回状浦”：四库全书本《水经注》此句下案语云：“湓，近刻讹作状。”又四库全书本《水经注》（清赵一清撰）亦作“湓回湓浦”，“湓”字义长，可从。





《汉阳府志》卷之九 地輿〔六〕

山川〔志〕

汉川县

川邑山川总说

川为泽国，殊非沮洳，山阜环绕，川流分会，亦善地也。

粤稽地脉，自安陆府属京山县五架山，过天门县皂市汤池地方，入汉川垌冢东南历虾子沟，过汈汊，由黄龙湾红庙姚儿岭至徐家畈起仙女山，高峰翠嶂，一名阳台山，又名采芝山。东二里结县治，北分余气至杨子港而止，南枝走绳子头至庙头，过汉河起担山、临泽湖南，于梅城乡一、二、三里地方起力山、双马山、仙师山、龙门山、石镜山、凤凰山、卜审山，东起龙霓山、高观山、黄家山、双山、史家、小别甌山，环列于县之东南。其田地坐落皆依山傍岭，历无堤垸，较湖乡垸田科则有别。此汉川地脉之形势也。县北德安府属诸山，发脉由应城东南岗岭，至长江埠入川邑郭家店梧桐嘴，走大赤乡冈岭，过麻河渡河龙耳冈，为北之来脉。西北一望平远，群山屹峙，东南小别之形如甌，一名甌山，其西南阳台一山，相传为楚襄王梦神女处。

城内西北有山名伏龙山，学宫、县堂坐其脉。城外西有山名姚公山，上有仙人（石位）〔位石〕、棋盘、磨刀诸石^①。城南内有小官陂池，外有大官陂池，水抵道观垸堤曲流麻布港。北城内有文水沟池，通外河消泄之所。城外东南围绕有腰带小港，上通麻埠港，下绕台阁，出汉水。仙女山峙于西，小别山翼于东，汉水绕其东南，洪湖、松湖、慈湖诸水绕其西北。此又城垣形势之大概也。

山

阳台山 旧名羊蹄山，在县南一里，俗呼为仙女山。上有女郎石、神女祠，旧有唐裴敬碑，今毁。《北周书·裴宽传》：宽为沔州刺史，州城卑狭，宽恐秋

^① “仙人石位”，据下文“姚公山”条，当作“仙人位石”。



水暴(长)[涨]^①，陈人得乘其便，即白襄州总管请戍兵，并请移城于羊蹄山以避水。胡三省《通鉴注》：“汉川有阳台山，土人谓之羊蹄山。”陈《志》谓宋玉赋高唐即此，未免附会。按羊蹄山形如羊蹄，阳台之名盖由羊蹄而讹。宋玉之赋固当属诸夔州之巫山。

附载唐人《咏巫山神女》诗

十二巫峰叠叠青，襄王神女本无情。
只因宋玉轻才调，挽断银河洗不清。

宋范致虚《阳台山女郎石》诗

伤心独立阳台望，暮雨凄凉宋玉情。
极目草深云梦泽，远天水阔汉阳城。
当年楚国山犹在，千古襄王梦不成。
往事悠悠魂已断，高唐今日有虚名。

伏龙山 在县城内西北，偏北为学宫、县治发脉。

附明陈惠《伏龙山》诗

村南六月观新稼，便扇轻摇还策马。
酷日当空暑气骄，乘凉久坐棠阴下。
田村行处稻花香，一路薰风昼日长。
茅屋几家竹篱外，绿荷池浴雏鸳鸯。

姚公山 在县西关外南二里，接伏龙山尾，上有仙人位石、棋盘石、磨刀石。又云昔有姚姓者居其下，因名。

小别山 在县东南十里索子垸，依附城南。《左传》：吴人伐楚。楚令尹子常“济汉而陈，自小别至于大别”是也。其形如甑，又曰甑山。北周立甑山县以此。《晋书·朱伺传》：伺讨杜曾，为贼所败被伤。伺从船底沉行五十步乃免。杜曾遣人招之，伺不应，乃还甑山。时王廙与李桓、杜曾相持，累战甑山下。军士数惊，唤曰：贼欲至。伺惊而卒，因葬甑山。

^①“长”，当为“涨”之误。





附宋范致虚《甌山》诗

朱伺屯兵古战场，甌山城堞久凄凉。
闲来搔首高冈上，万里碧天愁思长。

明茅光著《小别山》诗

吴楚茫茫霸业空，浮岚依旧护青峰。
逢人试问前朝事，惟说当年导水工。

- 黄家山** 在县河东三里地方，离城二十里。
- 史家山** 在县河东十三里索子垵，依附城垵。
- 担山** 在县南十五里长城乡庙头地方，湖水中两山并峙，其形如担。
- 双马山** 在县河正南一里梅城乡地方，离城四十五里。
- 力山** 在县河正南一里梅城乡地方，离城四十五里。
- 卜审山** 在县河正南一里梅城乡地方，离城四十里。
- 双山** 在县东二十里，两山对峙。
- 仙师山** 在县东南二十五里。
- 高观山** 在县东南三十里梅城乡，与汉阳界。
- 马城山** 在县东南三十里，有马城铺。
- 汉山** 在县口四十里，唐武德四年置汉川县以此。
- 蒲山** 在县南四十里。
- 石镜山** 在县南四十里，其山有巨石一，圆净如镜，故以为名。
- 凤凰山** 在县南四十里故河湾地方，昔传有凤凰止山上，因名。
- 龙霓山** 在县东南四十里梅城乡，其山常有云气隐隐如龙。

内方山 在县西南五十里。秦《志》谓《禹贡》“导嶓冢、内方至于大别”，即此。按：《后汉·地理志》江夏郡（立）〔有〕章山^①，本内方。《晋志》“竟陵”注：“章山在东北，古之内方山。”《尚书》蔡注曰：“章山，古文以为内方，在江夏郡竟陵县东北，今荆门军长林县也。”宋之长林县，今省入荆门州，则《禹贡》所谓内方在荆门，不在此也，名偶合耳。

龙门山 在县南六十里南河渡地方。山麓一空洞有龙潭，祷雨，汲水辄应。

^①《后汉书·郡国志四》“江夏”条原文为：“有章山，本内方。”



以上据旧《志》，皆县境内东南自近而远之山也。陈《志》又云：汉川西北皆平湖，以堤为垸，防水于外而田其中，古云梦泽也，故西北无山，而山尽在东南。

松石岭 裘羊冈 砖窑冈 俱在县北三十五里大赤乡。

白潭冈 在县北四十里。

石龙冈 在县南五十里。

赛子冈 菜子冈 俱在县南。

破 冈 避水冈 俱在县东八十里，夹浥对峙。

龙耳冈 在县北九十里，西有龙耳湖，东有龙尾矶。

白马坂 在县南三十里。

十八里坂 在县北三十五里。

三湖坂 在县西三十五里。

簪子坂 鲫鱼坂 俱在县西十里。

急水埠 担水埠 横山赛 鲁班赛 俱在县境。

女郎石 在阳台山上。

仙人位石 蒲团石 俱在姚公山。

蟠龙石 在县南四十五里。湖中长石横亘数十丈，起伏旋转，鳞甲森然，其形如龙蟠之状，故以为名。

川

汉 水 自蟠冢发源，从陕西汉中府东流至白河县。入湖广郧阳府，经均州，襄阳、安陆二府及潜、沔，过三澨，而至天门县所属之牛蹄口南北分流。大河由仙桃镇至麦旺嘴入汉川，顺流东六十里至庙头，又东三十里至系马口，又东三十里经县城南，又东六十里至浥，入汉阳县界，过大别而入江。汉之西南，汉水支河自牛蹄口至乾镇驿入田二河，下至张池口分流，东至麦旺嘴入汉，河北一支绕回流湾、小里潭、虾子沟出慈湖、松湖潆洄合流，而东会于浥口以入江。

浥 水 自随州东流经云梦县入县界，又流至浥口入于汉。

两河口 在县南十五里。

白 水 在县南七十里。《左传·定公五年》：“楚王之奔随也，将涉于成臼。”杜预注曰：“江夏竟陵县有白水，出聊屈山西南入汉”，即此水之上流也。旧《志》曰：水自大河口东流至沌口出，又支流经凤凰山出为系马口，入臼子河，与汉水合。今河道已塞，惟春夏水泛可通舟楫。





附唐白居易《臼口阻风十日》诗

洪涛白浪塞江津，处处遭回事事迍。
世上方为失路客，江头又作阻风人。
鱼虾过雨腥盈臭，蚊蚋和烟痒满身。
老大光阴能几日，等闲臼口坐经旬。

腾池口新开河 在县北一里。县旧无城，水在学宫后。自明崇祯九年筑城，水乃在城北矣。旧《志》：隆庆元年，士民以开河上请。三年，知县张崇德浚决引松湖上流达汉水，逶迤五六里许。而形家言河未绕回学宫，无益也。万历乙巳，举人方懋德等复以请于巡抚梁云龙，令知县陈林再浚，乃自文昌阁西南掘通古河，又价买曹一凤田四亩五分，粮归于官，从迎恩桥转搬载口出迎汉水，乃环抱有情，始为尽善。上有腾池桥。

安河 在县东北三十里，侧为安姓所居，源出随州，南流经孝感县境，又流至柘树口入县界，与潏合。

算河 旧《志》：在县北三十里，源出随州，流经孝感县境，又流至柘树口与潏水合。原非长流，春夏水涨，始通舟楫。明嘉靖末，冲决颇甚，与潏水逆流合沦水，而潏口以上，通塞不常。刘家隔士民以状闻，各上台议筑塞算河以通商贾，惜未举行。

关前河 上通德安，下达汉口，近淤浅。

夹河 水从萝卜沟入，下台口出，系刘家隔腰带水，近淤浅。

史港河 在周陂乡，自田二河至丰门，近皆淤浅。

金带河 **包河** 俱在县西北五十里。

竹筒河 在县西七十里。明隆庆三年，巡抚刘恂委推官吴与言浚之，今冬涸夏泛，水不盈数丈耳。

田二河 在县西九十里。

赤河 在县西一百二十里，流出吴王口，达于沉下河。

五龙河 在县西一百二十里。旧《志》：源出京山，与应城分界，两邑人民俱饮河水，而语音轻重互异，水土之说，信有之乎。

重石河 在县西二百二十里，接应城界。

横湖 **江西湖** 俱在县东五里。

三台湖 **溢港湖** 俱在县东北九里。



大松湖 在县北一十八里，上达天沔，下通沮汉。

小松湖 许家湖 俱在县东二十里。

安汉湖 在汉北二十里，一名冈下湖。

段庄湖 在汉南三十里。

白石湖 在县南三十五里。

瓜子湖 在县西北三十余里。

野猪湖 汧汉湖 五湖 俱在县西四十里。

清水湖 在县西北六十里。

郤月湖 在县南七十里，形如郤月，故名。

沉下湖 在县西九十里。

黄龙潭 在县东二十里。

管公潭 在县西南三十里。

周家潭 邕齿潭 丁公潭 南蒲潭 三汉潭 俱在县西南三十里。

猪龙潭 在县南六十里。

小理潭 在县西南一百里。居人稠密，县之一大村镇也。《通志》曰：“汉水所注。”按：今镇去县止七十里，水亦不甚深广。

麻埠港 在县东南五里，即汉水支流自戊子圻分，下流仍入汉水，夏秋泛涨，可通舟楫。按：大河自庙头曲流至县城三十余里，而此港仅十里，最为便道。崇祯中，尝浚治之。

城隍港 在县西南十五里鸡鸣乡，自天门城隍台至铁石矶，今淤废。

杨子港 在县北二十里，即襄汉支流至柘树口仍与沮水合，虽腰带水，俨然天堑也。通应城、天门、沔阳，然夏水泛涨，甚为盗舟出没。

附明张鯤《杨子港》诗

其一

杨花飞飞大麦黄，春水满田当下秧。
浪喜借来官府种，不知医是眼前疮。

其二

汉川底事人号呼，为说汉川通两途。
岸上雄藩催税课，江中大木攒皇夫。



其三

长年三老愁不眠，三江吴蜀波相连。
多方津吏已横税，半夜县官还掬船。

张 港 在县北二十里。

螺蛳港 在县北二十五里。

曹木港 皂 港 俱在县西一百一十里。

鸡鸣汉 在县西一百二十里鸡鸣乡。《元史·宽彻普(花)[化]传》^①：顺帝至正十六年宽彻普(花)[化]还镇武昌，命其子报恩奴、接待奴、佛家奴以大船四十余只，水陆并进，攻徐寿辉将倪文俊于沔州，且载妃妾以行。兵至汉川县鸡鸣汉，水浅舟阁，不能行。文俊以火筏尽焚其船。接待奴、佛家奴遇害，报恩奴死之。即此。

滤水洪 在县西南一百一十里汉水经流处，接沔阳界。

牛角湾 在县西一百里。明隆庆初，承天知府何浚之，今废。

搬载口 在县东一里。旧宽阔，今为居民侵隘，宜塞，导水入迎恩桥，至新河口。

韩牙人口 在县东北二里，今淤。

汤三口 在县东一里，即今文水沟出入剝口。

柘树口 在县东二十里。

新河口 在县北三十里，通德安。

徐公口 在县南二十五里。

汪师口 在县南三十里。

神灵口 在县东三十里。

七里口 在县西北四十里。

府河口 在刘家隔西，通沮水。

台 口 在刘家隔东，近宝花台。

牛落河口 通云梦。

百埠口 在县西北七十里，通应城、京山。

张池口 在县南九十里。尹中丞应元世居其地。

^①宽彻普花，《元史》作“宽彻普化”，是。





吴山口 在县西一百里，上通赤壁河。

税河口 在县西一百里，上通天门。

鹅公洲 庙子矶

葱担沟 通应城、天门、沔阳。

养鱼池 在县东南二十里。

天鹅池 在县南。

观音泉 在县南三十五里。泉在山腰，旧有石观音壁立泉上，后为好事者凿去，今凿痕尚在。其泉甚甘冽，旱不竭，雨不盈。误以荤物投之，泉即止，僧诵经，泉复涌出，其灵异若此。

白龙泉 在县南三十里高观山下。相传昔有白龙蜿蜒其处。

筑河疏

顺治己丑进士、京畿道御史、浙江参政 顾如华
为奸豪违例筑河，不惟壑邻，兼至病国。请勅行查为首姓名究拟，以苏残黎，以全赋事。

臣惟自古大一统之世，有分土而无分民；洒沉淡灾之法，有疏导而无壅阏。况曲防遏余，垂戒前史，未闻不经题请、不协輿议，而公然创筑河口，希图嫁祸邻封，先已敛怨同邑，如臣乡安陆府潜江县奸豪之擅塞芦汊口一事者也。

考汉水发源于嶓冢，经秦之汉中、巩昌，楚之郢阳、襄阳、安陆、汉阳等府，上下二千余里，始合流于大别以入江。《禹贡》所谓“江汉朝宗于海”是也。

按汉水随地而得名，曰漾、曰沔、曰汉、曰沧浪，余波则谓之潜，总之一汉水也。今俗为襄河。然自安陆而上，夹岸皆山，故势不得逞。由安陆而下，则山渐远，而水渐大，故南北两岸之民多筑堤垸以自固，犹虞其横也，两岸又各为河以杀其势，南则有荆州之夜泽口、潜江之芦汊口、北则有天门之牛蹄口、有汉川之麦旺嘴，皆所以分衍水势，使之上流有注，下流有泄，其来久矣。

乃近来臣乡汉水降割于安陆、汉阳二郡尤烈，前此屡经抚按奏报，上廑宵旰殷忧，是虽有分衍之支流，且不能遏抑水患，况可塞此溃彼，聘一二人强暴之私智，障数百年通行之水口乎。潜江而上，不暇具论。潜江迤下，则为天门、汉阳、汉川等县，直抵大江，旁及德、黄二郡。诸属县前塞芦汊，则水无所泄，必泛滥于两岸，而天门、汉川并受其溃决之祸。潜与沔西湖一隅为邻也，独不思天门亦己之切邻乎？若潜可塞芦汊，天门亦可塞牛蹄，汉川亦可塞麦旺嘴。各为壅泉激水，而数百里之民尽化为鱼鳖矣。此臣所谓不顾邻封之安危者，一也。





即就潜江论之，按该县田地坐襄河南岸者四十二垧，坐襄河北岸者二十七垧。其地俱该县十之九，坐东岸黄汉等十垧仅得该县十之一。此河一筑，止利于黄汉诸垧，而南北两岸垧禾尽委洪波，可乎？且潜产豆，商贾所集。潜不宜稻，借费邻境。潜西无薪，悉取于河北。塞则豆不得出，谷不得入，晨炊之刍，不能不悬釜以待，则于民商皆有所不便。今潜人怨声载道，彼此相诤，可知其专欲难成，无关地方永久之图。此臣所谓不顾同邑之利害者，二也。

且臣更细询其形势矣，塞河不独为天门与汉川，并潜累也。盖夜泽、芦淤二口为王师入荆之路。今夜泽河身久淤，非盛夏水涨，则舟不得行，所藉者芦淤一河耳。若此河又塞，则舟师无由入荆，荆南军需多转输于汉北，塞此则饷道不通，其病国在兵饷。天门民粮不下三万，汉、德诸属邑皆不下数万，一潜邑不过万余，合盘打算，利害孰多孰少？其病国在赋税，则为害滋大。此臣所谓不顾国计之轻重，三也。

既非众论之佥同，又未经抚按之题请，显系该县土豪持强朦上虐下，实为群心所不甘、国法所难容也。目今正居长夏，大浸不测。臣切虑桑梓，不能不据以入告者。应请勅部、抚、按详察为首姓名，揭报县官，金拨人夫，决开筑口，止许各修堤垧，以御水患，则国计民生，罔不攸赖矣。

汉川县开腾池口河记

（雍正□卯）〔嘉靖辛卯〕举人叙州同知^① 尹大本

川治濒江汉津，众流之汇，其土易淤，恒多水患。《禹贡》：“嶓冢导漾，东流为汉，又东为沧浪之水，过三澨，至大别入江。”治汉之略也。故汉南郡有云梦陂泽之官以分治焉。我朝郡若邑置官专司水利，时命宪臣要其成，慎广民之生也。江流东经襄、郢、三澨之地，在昔圩防未广，溢冈为厉。迨年离奄夹峙，其崇如墉，是故湍流东注，每四五月之间、暑雨之日辄涨，汉沔一壑。

岁嘉靖庚申，大溢垫溺之虐，惟川为尤巨，意弗吊于天。七年相仍，民命不绝如线。都宪万安刘公皇皇犹己之溺，叶谋藩臬诸执政，捐帑金若干，委重府节推少白吴公疏川之上流竹筒河，注县西之松湖，乃梗于谢陂久湮，弗达于河，水田周围六十余里悉为巨浸，民益困。戊辰，邑侯瑱峰张公至，降观川源，廉得其状，惻然曰：“厥陂泄水从腾池口而下，则治矣。”遂疏议当道，乐相之费，取诸赎醵，僦诸乡间之好义者，委义民郭本朝、刘春富等督工。学谕河南

^①“雍正卯”，据万历《汉阳府志》，当为“嘉靖辛卯”之误。



刘北冈日往视成，不阅月而工讫。凡八尺广、八丈有奇，直出腾池口，达于河，与潏水合流入江，下逝若奔，民得平土居之，信道水之为惠也。

但经始之初，工力未敷，上流因湖尾为河。越四年辛未，水复大溢湖尾，遂淤为平地，无复河迹矣。长计四百余丈，人谓此而弗治，前工尽弃。适新侯屿川段公继至，目击时艰，深虑民患，兴衰救弊、拯溺亨屯之图，无所不至，即视此未成之工以为己任，仍疏恳于当道，得羡金若干，委阴阳官张绅、乡约张绣、金凤阳督工开浚，偕学谕龚岳石提撕于上。三子奉公命惟谨，敷土程工，遂成长河。事举于后，功增于前，治河始底绩也。

士民砉石问记于本，将以诏之后也。本惟御灾捍患，恒由于相继之协心也。兹河之治，都宪刘公成之于上，张侯成之于始，段侯成之于终，犹周之治殷，三(后)[侯]协心^①，同底于道也。尝闻史起凿漳水于魏，郑国导泾水于秦，穿渠以苏民，而禾黍之咏，照耀简册。今侯决壅以导滞，上媿永赖之休，而人文之责，又有以仰裨化成之猷，奚翅禾黍、稻粱之咏已耶？

是为记。

开河口碑记

康熙初年邑庠生 严光化

功待人而成，事因时而起。人与时会，远则数百年，近或数十年，盖古今之事，往往而然也。

汉川泽国小邑，水之利害，各居其半。旧有腰带河，因汉水支流自县属庙头入江，西垸麻埠港导入县东迎恩桥侧，通城内文庙文水沟，北通腾池桥，环绕西北，东会于新河口，绕台仍入大河，如人身之有带脉，能令经络曲畅旁通。数十年来，渐以湮塞，地理家言水脉壅滞，文沟未清，以故人文间鲜利达，然安得神明之人与时适会，尽穷变通久之道，以成斯美哉。

岁在戊申，幸而府君陈公、邑侯吴公相因并至，咸具兴衰拨弊之才，而抱感时悯物之心，相其阴阳，观其流泉，知川邑地形所歉，实在于此。修志生员严光化、岳亮公等因而条陈，蒙申抚院及督，由府行县。邑侯吴公命乡约张我启等起夫督理浚疏。既阅半载，又旧有台阁镇压水口，年久颓朽，适抚院林公经过县界，偶尔邂逅，惜其倾圯，捐俸数百金，复整饰之。府君、邑侯更相率捐俸，助其不足。于是川邑百年废弛之形胜，悉焕然一新，非复昔日之陋规矣。

^①万历《汉阳府志》此句作“犹周之治殷然，三侯协心”。





识者观之，咸谓台阁修则形胜嶙峋，而有雷天之壮；带河疏则波流藻洄，而成风水之焕。此后人文之贵，殆盛于昔乎！己酉乡试，本邑中文武科及复明经科者，果至十数人，亦从来未有也。吴父师愈神其事，复令乡耆张我启等率理疏河，而乡耆等亦乐趋公事。朝夕劳来，以致告厥成功。斯皆贤豪相聚，声气有感，以致天宝地灵，毓秀储详于川邑，所谓百年之运，人与时会，如斯之盛，非偶然也。通邑士民，莫不欢忭踊跃，相与磨石而记其事，俾后世人文亨通，诵府君、邑侯之功德于不衰云。

黄陂县

山

鲁台山 在县东越城河数十武。昔二程夫子筑台望鲁，因以为名。至今台基尚存，上有二程祠、双凤亭。

甘露山 在县东十里。世传陈武帝时，甘露降，得名。山上有甘露城。

马迹山 在县东十一里。世传神人乘天马过此，有遗迹焉。

响山 山巅，人蹶之有声。

虎豹山 俱在县东三十里。

以上皆县东境之山也。

太阳山 在县东北三十里。峰峦高耸，日出则霞彩相映。

白龙山 在县东北三十里。上有一井，岁旱，祷雨辄应。

大陂山 在县东北三十里。下有大陂，可以溉田。

鹿耳山 在县东北四十里。层峦削立，形如鹿耳。

磨盘山 在县东北八十里。石形如磨盘，人腋之，辄动。

以上皆县自东转北之山也。

横山 在县北二十里。断岩横峙，突兀如障。

伏马山 在县北三十里。

木兰山 在县北六十里。上有玉皇庙、真武殿，远近祈赛，香火甚盛。山下有黄石崖洞、木兰川。旧《志》谓山以古《乐府》所云代父从军之木兰得名。木兰世居于此，姓朱氏，唐贞观时人。山上有将军凹，木兰祠及墓在焉。

考之传籍，一无所据。《隋书·地理志》：开皇十八年，置木兰县。则木兰自是山名，盖因山名县，而非因人名山也。则以木兰为黄人者，大率因山而傅会耳。且指为贞观时人，亦无可考，想因昔人云“朔气传金柝，寒光照铁衣”似唐人声



调耳。今绎《乐府》之词曰“可汗大点兵”，唐太宗时如何称“可汗”？当是北朝拓拔、宇文，虽礼仪称号俱袭中国，而其下狃于旧习，尚有是称也。至“朔气”云云，安见大邢、小魏、卢八、刘三辈决不为此等语耶。其词又曰“旦辞爹娘去，暮宿黄河边”，又曰“旦辞黄河去，暮宿黑山头。不闻爷娘唤女声，但闻燕山胡骑鸣啾啾”，夫黄河、黑山、燕山，皆北边地，木兰究不知其人之有无，有亦应是北人，所以旦辞家而暮黄河，旦黄河而暮黑山也。若黄陂之于黄河，不啻南海之去北海，风马牛不相及矣。然则以木兰为黄人，其为因山名傅会无疑。但相沿既久，姑存古乐府一篇以备考证。

附《古乐府》

唧唧复唧唧，木兰当户织。不闻机杼声，惟闻女叹息。问女何所思，问女何所忆。女亦无所思，女亦无所忆。昨夜见军帖，可汗大点兵。兵书十二卷，卷卷有爷名。阿爷无大儿，木兰无长兄，愿为市鞍马，从此替爷征。西市买骏马，东市买鞍鞯，南市买辔头，北市买长鞭。旦辞爷娘去，暮宿黄河边。不闻爷娘唤女声，但闻黄河流水鸣溅溅。旦辞黄河去，暮宿黑山头，不闻爷娘唤女声，但闻燕山胡骑鸣啾啾。万里赴戎机，关山渡若飞。朔风传金柝，寒光照铁衣。将军百战死，壮士十年归。归来见天子，天子坐明堂。策勋十二卷，赏赐百千镶。可汗问所欲，木兰不用尚书郎，愿驰千里足，送儿还故乡。爷娘闻女来，出郭相扶将。阿姊闻妹来，当户理红妆。小弟闻姊来，磨刀霍霍向猪羊。开我东阁门，坐我东阁床，脱我战时衣，著我旧时裳。当窗理云鬓，对镜帖花黄。出门看火伴，火伴皆惊忙。同行十二年，不知木兰是女郎。雄兔脚扑朔，雌兔眼迷离。双兔傍地走，安能辨我是雄雌？

柏叶山 在县北八十里。石形苍翠层折如柏叶。

试刀山 在县北八十里。

龙珠山 山形如龙，前有小山如珠。

小尖山 丹崖壁立，人不可上，惟禽鸟得至，俱在县北九十里。

马鞍山 在县北九十里。其西北为马吼岭。

金鼓山 在县北一百里。上有石形如鼓，阴雨辄有声，又名阴鼓。

嵯峨山 在县北一百三十里。有花崖洞，其势嵯峨，不可攀跻，故名。

老君山 在县北一百五十里。世传李耳炼丹处，炉井犹存。





以上皆县境北鄙之山也。

龙王山 在县西北六十里。其形如削玉，又名龙王尖。

矿山 在县西百八十里。至巔约十里许，山上寺内有二井，水分黑白异色，山麓有仙人洞、瀑布泉。

大悟山 在县西北一百二十里。

黄柏山 仙居山 俱在县西北一百六十里。

以上皆县境西北鄙之山也。

庙儿山 在县西五里。谚云：水绕庙儿山，黄陂出状元。

赶鸡山 在县西三十里。

分伙山 在县西南六十里。上有仙人绩麻石筐。

以上皆境内自西而南之山也。

川

县河 在南郭外，上自潏河来，径鲁台山西流入于江。后人因程明道“花柳前川”之句，遂谓之前川。康熙初，进士胡明垣建亭其浒，题曰“午天轻淡”。往来济渡者，赖息肩焉。

东河 在县南二里，自北县河东南流径县南，又东南流注于武湖。

石港河 在县北十五里。

草埠潭河 在县东三十里。

石盘河 在县北七十里。

旧镇界河 在县西北六十里，与孝感接界，源发德安府，南流与滕子港合。

龙骧水 在县南七十里。世传晋龙骧将军王浚屯兵于此。

潏水 在县北二百里。发源河南罗山县，径大城潭入县河，达于江。

流矢湖 在县东二里。相传二程先生习射流矢于此。

武湖 在县东南二十五里。周围四十五里，春夏泛涨，秋冬水落。世传汉时江夏太守黄祖阅武之所，又名黄汉湖。东通大江。

附明刘振铎《武湖烟涨》诗

武湖自古号芳洲，春涨桃花静不流。

夹岸斜阳千树合，丛林细雨万家浮。

光摇蘅杜迷归雁，天入蒹葭隐钓舟。

闻道龙船曾习战，烟波愁绝汉官秋。



国朝闻政《泛武湖》诗

晚驾扁舟过武湖，蓬窗遥望忆雄图。
景升事业空沙鸟，黄祖兵戈冷荻芦。
水长星宵鱼拔刺，烟笼江口树模糊。
渔人放艇春波上，谁问当年魏与吴。

鸭儿湖 在县南五里。

洋漫湖 在县西南五里。

石子湖 在县西南三十里。

后 湖 在县西南四十里。

牛 湖 在县西南五十里。往省要津，设有官渡。

薛家湖 在县西一里。

新河口 在县南三十五里。明万历间，江水冲洗，通于汉。人物稠密，县南一镇市也。

五通口 在县南四十里，上承武湖，通大江。

沙 口 在县南五十里。旧《志》云：上连武湖通大江，宋夏贵与元伯颜战地。按《元史·伯颜传》，至正十一年，大举伐宋。伯颜军次蔡店，宋淮西制置使夏贵等以战舰万艘分据要害，兵不得进。千户马福建言：汭河口可通沙芜入江。伯颜使觐沙芜口，夏贵亦以精兵守之。乃围汉阳军，声言由汉口渡江。夏贵果移兵援汉阳。十二月丙戌，军次汉口，辛亥，诸将自汉口开坝引船入汭河，先遣万户阿剌罕以兵拒沙芜口，逼兵武矶，巡视阳罗城堡，径趋沙芜，遂入大江。沙口当即沙芜口也。

小河口 在县南五十里，上承淝口水，注滕子港，入于江。

淝 口 在县西南四十里，上承县河水，径小河口，入于江。

两河口 在县北一百二十里。二水汇于大河，达于江。

郭皮嘴 蒲潭嘴 长湖嘴 俱在县南三十里。

黑林嘴 葫芦嘴 俱在县南四十里。

鸭儿湖嘴 在县东南五里。

大 嘴 陈德嘴 俱在县东南三十里。

金家嘴 在县东三十五里。

瓜园嘴 在县东四十里。





金牛嘴 樟牌嘴 俱在县东五十里。

靳家湾 在县西三里。

唐棣湾 在县南五十里。旧《志》云：其地，民以网罟为业。遇水泛，夜操小舟，十百为群，窃各湖禁鱼。有斗者，多溺于水。出没莫可踪迹，逋逃藪也。

西流湾 在县南五里，其地以网罟为业。

白沙湾 在县南五十五里。

铁锁潭 在城内西偏百武，中有墩，立石柱二，各高丈余。成化间，风折其一。旧传古萧寺有泥龙，阴雨，或潜或现。僧异之，以锁系龙。一夕大雨，泥龙化去。后渔人网鱼，得长锁，不知何代废，后称铁锁龙潭。

附明狄同然《铁锁龙升》诗

寒烟百尺古城西，神物何年借此栖。

夜月扬髻森似戟，春涛起蛰振如鼙。

冥飞铁柱空留锁，幻出琼泉渐作溪。

我欲乞灵消旱魃，豢龙今已属鲸鲵。

鲁台潭 在东郭外七十武，水清冽，其深莫测。

团潭 在县东南二里，水深阔，可泛舟，商贾货多积聚。

石门潭 在县北三十里。石壁嶙峋，辟若石门，下有深渊，世传龙蟠于下，又名城门潭。

牙鱼潭 在县北六十里。

大城潭 在县北七十里，有大城镇巡检司。

放生池 在城内西北百余武。按旧《志》，唐肃宗作放生池，颜真卿撰记，天下效之，此其一也。

余皆细碎不详载。



《汉阳府志》卷之十 地輿〔六〕

山川〔志〕

孝感县

山川说

旧《志》梁凤翔曰：江汉发源于岷嶓，楚中山水所自肇，非鞅掌簿书所容大言炎炎。

窃自戴星以来洎丈量正赋所登涉，闻耆旧为余言潞邑脉络，始于大悟，稍逾白汤岭而东，双峰、黄草之际，右出为朝阳，左出为白云，又左出为葛萝欠，即邑塋也，又折而西北始南行，起牛迹，历青龙十五里至邑，从北门入。其自索勒井、牛迹山分支之左右，尽于北涇嘴、教子山。弘乐乡塋自黄草山中出横陂坳以往，左右诸支尽于陡山、方家河，而小悟在金马之前，九巖列双峰之阳，绵于风山，迄于雨山，蜿蜒迤邐，不啻兔丝茯苓。若乃三山五岳、黄岩青山、望湖望府、大魁小魁，金壁有金牛之呼，凤凰即乳凤之冈，龙泉喷薄于北鄙，鹤山振翥于西陲者，又未易缕举也。

其水之自信阳来者，至天磨河入邑境，清风湖之水注之，而后淮水注之，磨陂之水又注之，距治六十里洒而为二，其东播者乃名潞河，是后或南流，或西南流，或又分为三支，以入于汉者互异，其一逆流，绕治西南隅合于西河，后湖诸水注之，与县河合而东流至龙潭之相见湾。旧有堤曰“流不通”，严少司农公曾增修之，溃于水，今复筑。盖潞水自批岩冲拥、衍溢乖岐，至此安翔徐回、悠远磬折，过扬马湖，会注泉以东迈，中间如东湖、西湖、东河、西河诸水入江、入汉，无中高不通之处。

山川灵杰，具萃于斯，诚先正所云：山本同而未异，水本异而未同也。两山之间必有水焉，大川之上必有涂焉。山国、泽国殆兼之矣。《周礼》天下土地之图掌于司徒，而山镇薮泽详于职方，非止以金锡丹青、羽毛鳞介辨物宜以诏地求，亦将察其有无丰耗利赖，方津专晷，而且使不逢不若也。“山林之木，衡鹿守之；泽之萑蒲，舟鲛守之”，晏子所以谏景公也。然公以利者，必思其害。深山大





泽，实生龙蛇。潯邑壤错申罗，自小河溪、九里关以北叠嶂密箐，至信阳数百里，始见城郭官吏，逋逃易以为藪。沮洳之潞于东南者，一经水泛，涘渚不辨牛马，捩舵操舟中所与游者，能保其尽无辟乎？

奉天子以惠元元，周知地俗方慝，用备司险之采，牧兹土者之责也。谨以所见闻者，摘其大略云。

山

大悟山 在县东北百二十里，一名上界山，上有平壤可田，高二百余丈，周四十里。《一统志》云：灵济和尚道场也。

双峰山 去大悟四十余里。高三百余丈，诸峰如剑脊垂枝下，中二峰，望之如双笔矗起云端，峰间为寺，夏可绵也。石间有瀑布。峰端晴霁可眺江汉，时有云气覆之。

九峻山 在双峰西南，一作九宗，即双峰之尾北行者。上有宝陀、罗汉诸峰，层峦叠嶂，林壑幽杳，大溪横其前，景物幽丽，最称巨观。

风山 九峻之支也，俗云：祷之即风。

雨山 九峻之尽也，俗传祷之雨降。是山如伏牛，望之翠逾诸山，尽于磨陂。

黄草山 在双峰山之东，双峰如锥，黄草如屏，青翠对峙，人迹罕到。春秋多岚雾，咫尺蒙昧。上为龙池寺，僧人甚众。黄陂诸山障其后。

小悟山 在金马山前，有桐子崖。

界山 在桐子崖前。

大观山 在界山前。

小观山 在大观山前。

石壁山 大观山之正支南出者，尽于王蒙河、清水堰，其一支右行折北者，尽于小河溪。

磨刀山 在小悟山前。

牙山 在磨刀山崖。

风洞山 在华山前。

殷家山 **青山** 俱在风洞山前。

游风山 距县北百五十里。

观音山 在游风山南。

大山 距县百七十里，其阴有马口岭。



黄云山 在大山北，云色多黄，与诸山异。

白云山 距县百二十里，一名石人山，自狮子崖至白云山，皆大悟山之支也。元白平章察罕致政退居于此，有白云别墅。明末李自成之乱，楚豫骚然，邑绅程良筹立寨白云山，练义勇、讲守御，保全乡里数千家。伪帅白旺以十万众来围，接战四十日，走之，遂引兵克复孝感、云梦，俄为贼所败，被执不屈，死之。

朝阳山 在双峰、黄草之际，垂支右出，障邑垅之北，稍左为白云山，又左出为葛罗欠，即邑之龙脉也。南行抱白云寨于其内，山又西北行，经索勒井又折而北为平冈，始南行，历黄金庙，起仰山庙，蜿蜒至牛迹山。

牛迹山 上有石牛迹，自是县之龙脉入平畴，经金神庙、青龙冈、十五里冈至邑，从北门入，以结县治焉。

教子山 一名敖子，盖牛迹山分支之右行者。山在九子墩旁，有松林冈。

望府山 在大悟山狮子崖之阳，下有仙姑洞，洞前有橘一株，高数丈，大数围，干如青铜，不知何代物也。洞门高七尺许，中如堂，堂高于门，堂旁有数小洞，堂后洞窟四重，石磴高低，秉烛入，旁垂石钟乳如柱。相传有二人秉烛入，行约二十余里，忽睹天日，溪水阻之，深不可渡。有断石桥，隔溪茅屋骈列，花木蕃盛，溪边一女汲水，谣语曰：“此非尘世，渡此不复返矣。”二人遂归。山前为金马坑，山顶有坑，方数丈，深不可测，水清彻底。

金马山 即金马坑。

七屏山 在了心庵前。

五岳山 距县百八十里。

栗谷山 **大魁山** **小魁山** **磊山** **兔城山** **光城山**

俱在五岳山旁，有豹子崖、老虎崖。

牛头山 距县二百里。

清风山 **盖顶山** 俱在牛头山旁。

五峰山 距县二百二十里，五峰并起，故名。

黄岩山 在五峰山旁。

龙泉山 距县二百三十里，又二十余里为黄茅岭。

离城山 距县百八十里，有马踏石。

兜鍪山 在县西二百里外，申阳之水径焉。

磨山 距县九十里，楚蒙谷不受爵禄，自弃于磨山之中，即此。磨城，子胥所筑，盖以此山名城也。





三山 距县百四十里，三峰鼎峙。

鹤山 在三山之西。

金壁山 一名金牛山，在凤凰山旁。

马家山 在金壁山旁。

陡山 即杨店之山也。

望湖山 近蒲湖，距县三十里。

凤凰山 距县四十里，一名乳凤冈，四面皆水。晋穆帝永和四年，凤产九子于东冈。《方輿胜览》：冈在孝感东四十里，今名凤凰台。

以上各山，俱照旧《志》编入，余以冈、岭、岩、坳、墩欠名者，例得附书，但地属细碎，自详《县志》，兹不复载。

川

潯河 《南齐书》作环源，出信阳州，至天磨池中。河有石，高数丈，如磨。入邑境，径九里关、黄茅岭南流，绕三里城，径新店，清风涧之水注之，为双河口，为詹家河二郎畈，为太公潭，至观音崖，杨陂港之水注之。杨陂水出大山，俗名扬鞭口。大悟山之水亦注之，为小河溪，距县百二十里，折而西流，至两河口，与黄沙河、烂柴港、哭竹港之水合而南流，径九子墩，绕旧南义阳城为晏家河，为方家河、塔儿潭。潭上有山，宋时建小塔七级于上。邑东北诸山之水注之，磨陂之水复注之，距县六十里分为二，其东流者名环河，或曰自信阳至此，拖绕山谷如环也，为绕龙潭、丘址港，下流合于西河。

白沙河 环河之南流者，径赵师埠、黑龙墩注于响水潭，复分为三：其一高步潭，径涂家河；其一注上沙港，至沙港口，合沙港之水南流，径李家嘴，又径陶家嘴，后河之水注之，乃与东流潯水会。

县河 本白沙河三支所分之水，逆流绕县西南隅，合于西河，朱思湖、白水湖、后湖之水注之，又流径县南，又东流径乌龙庙、郭家潭、徐潭港，董家湖之水注之。董家湖者，十五里港之水也，过理丝桥，注于湖，至此与县河合，而东流，至县东十里龙宫潭。旧《志》：龙窟也，雩之辄应。曲折东流，有相见湾，旧有堤曰“流不通”，少司农严公正矩会协修之。甲戌，水溃，后梁凤翔准公议重筑。又经陈八步、毛陈渡至杨马湖，注泉之水会之，至竹子复分为二。

淮水 出县境东北诸山，于龙王寨会青山口诸水，下晏家河。

陡冈埠河 白沙河分支，西南流注于埠，径祐河，又径蔡家渡，合东河之水注于老鹤潭，又分为三支，其一合深沟桥之水，注于白龙潭，入于汉。



八埠河口 在县南三十里，亦白沙河三支所分，合云梦县河之水南流，径窝而潭，又径注泉湖，入于汉。

东山沦河 在县东南二十里，逆流绕治西南隅，流至竹子港分二支，一南流为东山沦河，径算河，至浞口入汉。

北泾嘴河 亦逆流绕治西南隅之水，分支东流，渡北泾嘴，至马溪口与马溪合流，径杨家寨石滩河、鄢家埠五通口入江。鄢家埠以下，黄陂境矣。

三汉埠东河 系县垄、弘乐乡垄界水也，源出横坡坳之右，径二八桥红石潭、周李河，绕斗山铺城隍墩，曰东湖，至三汉埠下二里，与三汉埠西河合流，入野猪湖，出沙河，入马溪河。

三汉埠西河 出石堰头，下浚川河、孙家河、栗树埠，至三汉埠，与东河合。

理丝桥水 出牛迹山、丘址港、十五里港，径理丝桥入董家湖。

熙丰铺诸山之水 西历师古墩，径许家河、高阜桥，入杨马湖。

界湖 黄、孝二邑界水也。其源出滑石冲，又溯之为黄家冲，有泉如散珠，或曰星宿海之小影也。界河水至白水湖，出蚌蛤口，与邑河会于黄陂境上。

两河口 白云山之水出娄家坂，朝阳山西之水出石灰冲，双峰之水出簪叶涧，又名仙人洞，经雨山、黄家冲，三水合流北行，与磨陂之水会，至陈家河与青山口之水会。青山口者，离城山、陈家冲、四里冲、无泥冲、潘家冲、卢家冲、罐子坳诸山之水口也。口左为公婆山，右为青山，对峙如门，二水合流，至龙王寨与淮水会。地名两河口，下晏家河。

陈家河 磨刀山下之水，出祝家冲，绕尖山寺，至青泥港下先古庙一支，出杨家石堰，历水口寺至陈家河。

雨山口 簪叶涧、黄家冲水会于此，有泉同二水南流，其北畔有气上蒸里许，冬寒乃见，似温泉而不甚温。

西湖 在县西北五十步，阔数十顷，春夏水泛，流光潋潋，远岫映带，一佳胜地也。湖孺故有神鼎阁、明月台，每际良辰，颇多游览之士，而云含古寺，雨入前邨，景物与西子湖仿佛，今则荒烟蔓草，不可复识矣。《方輿胜览》云：“宋太祖微时游于此，渴，索酒村姥。姥曰：‘榷禁甚严，此私酿也。密之。’与之金，不受。太祖受命后，特宽西湖酒禁，仍置万户酒馆。”按五代后汉时，董宗本为随州刺史，宋太祖往依之，有紫云黑龙之祥。《宋太祖本纪》云：“后汉初，太祖漫游无所遇，舍襄阳僧寺中。”今天门、应城有义河，以太祖赐名，则随、郢、襄、沔，皆其漫游之地，而西湖村亦足迹所寄也。





东湖 即董家湖也，以董永得名。《一统志》云：“宋徽宗时，孝感东湖村夜有光烛天，闻于官，掘之，得成周九鼎贡于朝。”旧《志》云：九鼎之说，惟王嘉《拾遗记》以为五者象阳法，四者象阴数，然《（诏）〔召〕诰》正义云^①：“九牧贡金（铸）〔为〕鼎^②，故称九鼎，其实一鼎。”《史记》云：秦时九鼎没于泗。无九鼎尽没之理，且泗水去楚甚远，周鼎何由得至潯邑？陈士元云：三代铸鼎，祭祀、封建、燕享、锡赉，无不用之。汉宣帝得周鼎于美阳，张敞观其文，知为成周褒锡诸侯之物。东湖之鼎，得无类是。

按《史记·秦纪》，秦庄襄王楚元年，周初亡，其器九鼎入秦^③。“禹贡金九牧，铸鼎荆山下，各象九州之物。”^④ 历殷至周赧王十九年，秦昭王取九鼎，一飞入泗水，余八入于秦。《宋史·徽宗纪》：宣和元年，蔡京等进安州所得商六鼎，当即此。然则东湖村所得，乃商六鼎，非周九鼎。鼎固有九，非惟一也。李湘《宋明古鼎考》，详见《古迹》“神鼎阁”下。至阁所庋，则明万历中所得鼎，非此也。河侧有严氏别墅。

杨马湖 在县东二十里，潯水自逆流县治西南隅，合西河诸水曲折东流，至杨马湖或过或注，浑灏淳泓，为境大观。

蒲湖 俗名野渚湖，在县东四十里，浐川河、牛山河之汇也。

白水湖 在高埠潭侧。

黄台湖 其初台也，距邑百里，相传黄台寺厨中有筭出地，老僧令其徒以清水浇之，徒恚。一日，老僧方濯足脱鞋，犬衔鞋去。老僧起逐犬，其徒以热水灌筭，厨中龙起，寺陷为湖，而老僧独得全。至今湖岸尚有半台在焉。或题诗曰：回首老龙翻殿角，半成沧海半成台。

龙坑湖 在板桥坂。

杨家寨 苏家寨 旧《志》云：见《水经》。苏家寨在杨家嘴。二水名为寨，实皆湖也。昔兵乱时，聚艇保于此。

以上诸水俱依旧《志》备载，又有水以潭名者九，以溪名者三，以港名者十五，然多细溪小港，自详邑《志》。兹惟：

小河溪 在治北百二十里。

①“诏”，为“召”之误字。

②贡金铸鼎，应作“贡金为鼎”。

③《史记·秦本纪》此句作：“昭襄王……五十二年，周民东亡，其器九鼎入秦，周初亡。”

④“其器九鼎入秦”下，《史记正义》有此句。



丘址港 在邑西北六十里，内有小泉，冬温。

凤凰港 弘五六里，山自朱家寺始岐，至丁家寨之沟，遂水注而成港渐大，历凤凰台，注白水寨，出蚌蛤口。蚌蛤口，界河之尽也。与县河会者三处，为水大，故载之。

狮子岩 在县西北五十里。

观音岩 在县西北九十里，怪石险峭，形肖观音。

短轩岭 在县北五十里。

长轩岭 在县北五十五里。

朝阳洞 在县东三十里，嵌岩深远，白石为盖。

白云洞 在木兰山。山水奇绝，程氏两夫子时游衍于此。

附明方与时《白云洞纪略》

黄陂山川奇绝之甚者，尤在于木兰之白云洞焉。莲湖环其上，玉屏峙其右，珠帘参其前，琳岫拱其后。山幽水秀，花木长春，几案亭台，皆石琢就。兰长于云之中，云弥于兰之谷，香气袭人，清风可淑。至于掬古洞之流霞，览绝巘之遗迹，见其真阳伏穴，点雪成烟，瀑布淋空，流泉激电，幽遐玮瑰之状，其殆猿狖之所家而鱼龙之所官者乎。

隆庆庚午岁春正月记

八角石 在县南十字街，车马往来，从无辙迹。

余以石名者四，无甚奇特，故不录。

论曰：古者名山大泽不以封，而诸侯例得祭其境内山川，故盛德感敷，莫不陆磬水栗，奔走而来宾，则林麓藪泽，又带砺所必及也。乃蜿蜒磅礴，扶輿清淑之气每钟于伟人，以为江山生色。故读书怀古之士，时深山高水长之思焉。至于一丘一壑，横溪断岸，偶有关于景物，亦载籍所不可缺矣。况大别实神禹所经，江汉为南国之纪，望鲁寻源，阳台托迹于高唐，征孝则哭竹之港尚存，考异则黄台之湖犹在，录其一，以概其余，则圣贤、豪杰、孝子、忠臣并耀寰中，汉郡诚南服一隩区哉。昔史迁文字得江山之助，遂擅千秋绝调。产斯土者，山环水秀，永峙长流，得勿奋然振兴，以佐文教昌明之盛已乎。





《汉阳府志》卷之十一 地輿〔七〕

《形势志》序

形势之说，三代以上未尝言之。其言形势者，战国纵横之习也。方城、汉水，楚之所以恐惧齐师，亦即所以自恃而争雄六国。子胥伐郢，其险要犹在方城乎？至三国六朝，则又视此地如元首之尊，而为东南之所仰重。夫山川丘陵，大禹以分疆域、设险守国，王公以佐凭凌。今汉阳为滇、黔、粤、蜀之门户，建康、淮泗之上游，雍、豫、燕、齐之孔道，荆、襄、汝、邓之唇齿，论形势者，固东南一大都会也。为纪旧有之关隘、津梁、乡里、村镇、堤防、风俗，以鸣国家之盛，而古迹亦附焉。

为《形势志》。

形势〔志 关隘 津渡 桥梁〕

汉阳县

关隘

铁门关 在县东北三里，大别山头，禹王庙侧，推官杨枢题联曰：“汉门日抱鼇鼉窟，大别天开虎豹关。”隆庆庚申毁于火，未几修复。

西关 在西城外三里，永安桥上。

保障关 在蔡店巡检署侧，久废。里人嘉兴通判项钟严倡修。

津渡

汉阳渡 在东南门外，东渡武昌省会要津也。

汉口渡 一在宗三庙，一在五显庙，一在老官庙，一在沈家庙，一在接驾嘴，一在科家马头，一在龙王庙，一在四官殿。

郭师口渡 在汉口西外五甲。

平塘渡 在汉口西十里，一名琴堂，云是伯牙弹琴处。



蔡店渡 汉口上六十里。

马家渡 在蔡店南五里，向有堤，今坍塌。

兴塘渡 一曰“兴唐”，以尉迟恭得名。在县治西三十里。

沌口渡 在县西南三十里。

蒲潭渡 在县西南六十里。

龚家渡 在县西北八十里，俗传子路问津处，非是。

张大渡 在马鞍山南，有堤，已坍塌。

老官渡 在县西九十里，九真山北。

破罐渡 在县西二十里墨水湖。

桥梁

迎恩桥 在县东。

迎春桥 在县西，宋大观初建，上刻“迎春”二字。一云在郎官湖上。

洗马桥 在东门外洗马口。

王公桥 在县东北三里，旧名“免溺”。万历间知府王宗本重修。

段家桥 在杨柳堤。

高公桥 在杨柳堤，上有凉亭。雍正十年，知府高纲并绅士甘昌祺捐建。

丛林桥 在莲花堤。

聚仙桥 在城西。

永安桥 在县西三里。

郭公堤石桥 在月湖中，详《堤防》下。

永利桥 在月湖北，康熙二十四年，邑人刘尽忠建。

问善桥 在三搁石。

喻义桥 在汉口坊。里人刘廷瑜建。

九如桥 在汉口循礼坊后湖港上。

弘膺桥 在汉口坊。里人李衍广初建木桥以通往来，后贡生李国柱更筑以石，上加石栏，行人称便。

万寿桥 陆渡桥 广义桥 新盛桥 俱在汉口后湖港上。

三眼石桥 在平塘渡。邑人刘肇远建。

琴塘桥 在〔平塘渡〕^①。邑人刘肇远建。

^①“在”下，原书留空，今补“平塘渡”三字。据余家鼐《新辑汉阳识略》卷二“经济”云：“琴塘桥，又名汉益桥，在平塘渡。乾隆元年刘肇远建。”





慈渡桥 在南乡升官渡，大石桥，系邑人吴曦建。

一字桥 在晴川阁北。里民乐焕文建。

叶公桥 在蔡店石洋湖。里人叶灿虚建。

永镇桥 在蔡店流水口。里民薛耀先募建，绅士徐采畴等募重修。

官桥 在县西一百里。里人高德甫建。

鸭港桥 在县西南八十里。

石潭泾桥 东流港桥 俱在县北四十里。邑绅张叔珽重修。

附国朝张叔珽记略

东流港、石潭泾二桥，溯创造之初基，未审权輿何日。访父老之传说，犹能历数当年。建砂中蹲鸱，金曰周副使遗迹犹存。修水上悬磴，众谓先大夫宏功难泯。嗣是颓败更新，则有李君名天康。过此蹇崩继理，曾无他氏。嗟乎！年未及百，修已凡三。今牵车服贾而来，仍褰裳以兴叹；致乘坚策肥而至，复濡轨之是忧。珽己亥自吴归里，过石泾而流连；癸卯由燕返家，渡东流而感慨。伤哉，缔造尽付波臣；痛矣，继修全归河泊。欲仰承夫先志，不惜捐金；苟有济于斯人，宁辞鬻产。纠工在甲辰之夏，观成于乙巳之冬云云。

姚家沟桥 在北乡。

原守陈国儒志曰：汉阳府，魏、晋、宋皆为沔口重镇，盖汉水入江处谓之沔口。屈完谓楚“汉水以为池”。魏初定荆州，屯沔阳，后移镇夏口。晋陶侃为荆州刺史，镇沔。宋绍兴中，贼李成留汉上经营襄、邓，赵元镇上疏，乞下湖北帅师提备贼情，是也。

至长江之险，与武昌共为门户，曰大别山。三国吴之所守者，禹功矶也。矶之旁为铁门关，古置戍守。商船鳞集，阡阡外屏，则今汉口，而蔡店、沌口、新滩、百人矶亦皆要害。至刘家隔，居汉沔之间，湖泊辽阔，萑苇蒿密，盗贼窜匿之区也。明正德间，丘仁、杨清倡乱于汉川之同冢，啸聚万人，立寨沔阳之麻洋，劫乡破邑，屡挫官军。台臣奏闻，以右布政陈镐、副使蒋升率汉土兵擒之。嘉靖间，汉川风门河一带上下数百里，群盗出没，截掠商船。知县昌应会时率兵捕之，盗拒战，割应会左耳去。隆庆元年，群盗白昼入刘家隔市镇，杀捕盗人役，解其支体。地方团保不敢窥，其猖獗如此，皆防御当严之地也。后时以筑隍为言，莫之应也。及崇祯丙子，张献忠寇黄府，陷云梦。县令率乡



兵拒之于杨子港，贼始去，意未尝忘汉川也。

汉川县

关隘

刘家隔 在县北三十里。《明一统志》：“杨琚抚治荆襄，创筑刘家隔诸要隘。”明末献贼来攻，邑令孙光祚率众败之于此。旧《志》：刘家隔为汉川旧县治，距今县三十里，东至孝感界，北至云梦界，西至应城界，南至本县杨子港。其地卑下，每岁春涨，至秋始涸。城脉来自应城伍家山，蜿蜒起伏，衍为平原，周广四十里，而襄水、沮水、郢水、白水五派合流，环为一区。其初居民鲜少，永乐以后，生聚日繁。宣德正统间，商贾占籍者多，贸迁益众。宣德六年，巡抚白请于朝，设巡检司。正德十三年，添设捕盗通判驻扎。嘉靖初，革通判，改县丞一员。万历六年，改附县治。自后驻节有馆，送使有舟，遂成巨镇。明末寇乱，焚毁殆尽，闾里萧然。

津渡

阳台渡 在县东一里阳台山下。

附宋曾慥《阳台渡》诗

渺渺阳台去，茫茫鹦鹉洲。
干戈迷大别，烟雨暝南楼。

存诗见宋时犹有此渡。

两河口渡 在县南十五里。

南河渡 在县南六十里，龙门山下首。宋党仲升御金人于此。

附宋况暹《南河渡》诗

南河流水渺微茫，问涉曾须一苇航。
鸥荡白苹惊撇舵，雁依红蓼怯鸣榔。
几家渔屋寒烟外，十里江村夕照傍。
分堠客如星散乱，行吟犹记步斜阳。





安河渡 在县东北三十里。

关前渡 新河口渡 襄河渡 杨子港渡 俱在县北三十里。

皂港渡 在县西一百二十里。

庙头河渡 刁汊河渡

小泐渡 在县南四十里，泐山下，古汉川也。

竹筒河渡 在县西五十里，一名丰门。

张家渡 在县北七十里。

桥梁

迎恩桥 在县治东关。

女儿桥 在县治南关。

南虹桥 在南关。

汶水桥 在县城北街。

道观桥 在县南二里。

甌山桥 在县东十五里，甌山下。

义 桥 在县北十五里。

汤家桥 在县北二十五里。

高观桥 在县南三十里。

马家潭桥 在东岳庙后。

新陂桥 在县西北四十里大赤乡，系车马通衢，桥久颓废。康熙六年，知县傅置木桥，为水所冲。

土 桥 广济桥 青云桥 俱在刘家隔。

义济桥 在县治北一里，新开河西。先是，义民刘春倡建桥之议，知县桂命吴邦意等成之。

黄陂县

关隘

金竹关 在县北一百九十里。

漈口镇 在县西南四十里。

大城镇 在县北一百二十里。

沙口镇 在县东南五十里。



津渡

鲁台河渡 在县郭外，旧设浮桥，今废。

许家河渡 在县东四十里。

漫口渡 在县南四十里，旧设官渡。

旧镇河渡 在县西六十里。

牛湖渡 在县西五十里，旧设官渡。

十里渡

桥梁

平易桥 在县治前，知县石巨川建。

小板桥

大板桥 在西郭外，宋嘉定建，明永乐修。

沙港桥 在县北半里。

丁公桥 在县西二里。

程夫子桥 在县西五里。

洋漫湖桥 在县南四里。

石港桥 在县北十五里。

甘棠桥 在县东四十里。

花石桥 在县西三十里。

和尚桥 在县西四十里。

乌泥港桥 在县西南十五里。

石子湖桥 在县西南三十五里。

骆驼桥 在县东二十里。

黄婆桥 旧《志》：宋太祖微时过此，渴，求水。黄婆见而异之，具酒以进，桥以此名。

孝感县

关隘

黄岘关 在县北三百里，土名九里关。《魏书·地形志·南司州》宋安郡东随县，注：“黄岘关。”即古火隧，为豫、楚险，南北朝屡争之。

镇阳城 在县东北八十里，黄草山西，垒石为城，四山陡立、仅通一线者。





人多避兵于此。

白云寨 在县东北八十里白云山，层峦削壁，明末拒流贼于此，详夏时亨、程良筹列传。

附明程良筹《贼围白云月余，请救不至》诗

片石持全楚，危山抗重兵。
魂销锋满壁，气暗夜攻营。
愁笛看明月，悲歌动短檠。
贺兰与叔冀，谁复念孤城。

津渡

南门河渡 船二只，夫二名。

李家嘴河渡 船二只，夫二名。

以上每渡船银三两，夫每名工食银四两，闰银六分六厘六毫。顺治四年，俱裁半。

注泉河渡 船一只，夫一名。

蔡家河渡 船一只，夫一名。

白沙河渡 船一只，夫一名。

以上每渡修船银二两，夫每名工食银三两，闰银五分。顺治十四年，俱裁半。

杨桥河渡 船一只，夫半名。

澧河铺渡 船一只，夫半名。

旧镇铺河渡 船一只，夫半名。

以上每渡修船银一两，渡夫半名，工食银二两，闰银三分三厘三毫。八渡银两，顺治十四年俱奉文裁半。

浐川铺渡	陡山铺渡	冯銮渡	杨家渡
毛陈渡	东山渡	梁陈埠渡	石潭河渡
北泾嘴渡	马溪河渡	石头渡	赵师埠渡

以上十二渡未置船。

桥梁

西湖桥 在城西。正统己未，知县罗勉建。万历丙辰，京卫经历彭春华修。

深沟桥 在城南五里。

傅家桥 久圯，邑人傅友铨公建，知县梁凤翔重修。



万寿桥 城东关外。

理丝桥 城东北十里，知县彭之轨修，梁凤翔重修。

仁圣桥 城西六里，又名转棚桥，知县梁凤翔建。

蔡家渡桥 城西八里，水冲圯，梁凤翔重建。

石平桥 在城东十五里，即三军台桥。

石蓬桥 原名梅家桥，县北八十里，在芦管店尧天会，南至杨店二十里，北至小河溪五十里，系通衢要路。康熙三十二年，知县梁凤翔建，有碑记，载《艺文志》。

徐潭港桥 在城东南十五里。

严家桥 在董湖。

高阜桥 城东十二里。

鲁班桥 城东三十里。

赛公桥 城东南三十里。

浚川桥 城东北四十里。

皇华桥 城东北四十里。

绩麻桥 今讹七马桥。

二公桥 地名三渠口。

明水桥 在狮子口，一名狮子桥。

云公桥	东蔡家桥	宋家桥
五里桥	七里桥	十五里桥

贞惠桥 萧老女建。

丘址港桥	跃龙桥	蔡家桥	黄龙港桥
普安桥	愿藏桥	青石桥	女人桥
三板桥	杨家寺桥	白沙桥	太平桥
公孙桥	烂柴港桥	老石桥	季家桥
白洋港桥	白沙河板桥	梔子港桥	刘家桥
东河板桥	三汊埠桥	凤台桥	梅家桥

陡冈埠石桥 侍郎沈维炳建。

竹林港桥 邑人张古溪建，今颓。

吴家桥 王家桥 俱邑人喻由俭建。

席家桥	左右桥	斗山铺桥
-----	-----	------



《汉阳府志》卷之十二 地輿〔七〕

形势〔志 城郭坊镇 乡里村镇〕

汉阳县

城郭坊镇

建中坊 东阳坊 西阳坊

以上在城。

居仁坊 由义坊 循礼坊 大智坊

崇信坊 在居仁坊西，旧为障地。顺治戊戌大水，潜、沔、景、川难民移住甚众，奉上编入户口，名外五甲。

以上汉口各坊。旧《志》秦聚奎曰：“汉镇士民，不事田业，惟贸易是视。商船四集，货物纷华，风景颇称繁庶。无奈郡邑供应，取诸本镇者十九，小民少有盖藏，捡括一空。”

按：每坊乡各设有乡约，各设有保长。乡约即古党正读法之属，汉三老、亭长之任，而保长即遁人以木铎徇于道路者。今保长所职，大凡官府兵马经临，其屏帐几榻、盘盂盆桶、槽铡夫草之类，临期责办，一有不给，捶楚随之，其役亦云苦矣。然即有那移侵吸之弊，有卖富差贫之弊，有假公济私之弊，有隐匿商税之弊，有包藏奸宄之弊，至民间鼠牙雀角、投缳溺水、彼证此质、张狐载鬼，其神通更有出人意表者。一年役满，复行彙报，愚者贿之以求脱，黠者买之以居奇，改头换面，从前恶迹一笔勾消矣。此弊乡村犹少，而汉镇为更甚。社狐沙蜮，役虽贱而为祸颇能，牧民者所宜详察也。

汉镇形势说

汉镇，一镇耳，而九州之货备至焉，其故何哉？盖以其所处之地势则然耳。武、汉当九州之腹心，四方之孔道，贸迁有无者皆于此相对代焉，故明代盛于江夏之金沙洲，河徙而渐移于汉阳之汉口，至本朝而尽徙之，今之盛，甲于天下矣。夫汉镇非都会、非郡邑，而人烟数十里，行户数千家，典铺数十座，船





泊数千万，九州诸大名镇皆有让焉，非镇之有能也，势则然耳。

附汉口基地

汉口基地，旧系民业，后为奸人投献楚府。嘉靖年间，会经题请，踏勘改正，征租解司，奉旨立碑，开载甚悉。本朝顺治年间，兴屯未悉始末，误开入藩产项下达部，彼时士民未经辨改，今奉圣恩，蠲除正价，民荷更生。然前旧案未可废却，用录旧碑于左。

汉口北课旧碑记

湖广汉阳府为敬陈肤见、以(课)[裨]国用事^①。

嘉靖二十五年，奉守巡二道案验，蒙钦差巡抚湖广等处地方、兼赞理军务、都察院右副都御史姜案验准户部咨前事内开一(报)[款]汉口基地^②，先该抚按衙门会议，查系江夏县民萧廷机始祖萧一承佃汉阳县三沧河泊所十八垵蚊子马场湖南侧地土，西至郭师口，东至大江。天顺年间，民人张添爵等父祖在彼筑基盖房，每年认萧一课银三分。

成化年间，被武昌护卫军孙广、(刑)[邢]琏投献江夏王府^③，每年上岸基地一间，收鹅二只，下岸一间，收鸡一只。(比)[此]时民因征租不(会)[曾]告争^④。弘治十年，又要加征课银，各民不肯认纳。孙广、邢琏转投献楚府，每年上岸一间征银三钱六分，下岸一间征银一钱八分。各民惧府势力，不能抗违。嘉靖四年，该府差已处决承张庆等，丈(景)[量]出上岸张添爵等六百三十户^⑤，共房基一千零三十五间，每间每季该银九分，共该银九十二两一钱五分，下岸徐文高等六百五十一户，共计地一千零九十一间，每间每季该银四分五厘，共该银四十九两零九分五厘。李勤等七十三户新筑基地二百八十一间，每间每季征银六分，共银一十六两八钱六分。丁泰等二十户偏僻地八十二间，每间每年征银一钱，共银八两二钱。王彦、李仕英二十一户开垦园地一十一段，每年收银三两五钱八分，通共每年该银六百四十七两。嘉靖二十四年二月内，江夏王因楚王薨，听信军校纪奎、吴大贵、臻友富、单廷巩、工文智、石荣、陈忠、

①明万历《汉阳府志》载此碑记，“课”作“裨”，是。

②明万历《汉阳府志》“报”作“款”，是。

③万历《汉阳府志》“刑”作“邢”，是。

④万历《汉阳府志》“比”作“此”，“会”作“曾”，是。

⑤万历《汉阳府志》“景”作“量”，是。





张滨拨置捏称前地系该府官地^①，楚府白沙湾、犁头嘴等处柴地抵换等情，挟启世子田给票上管^②。稔文高等不甘^③，连名告行汉阳府踏勘明白，具呈分巡道，复委武昌府覆勘明白，并不系该府钦赐地土，节行长史司查吊册籍，并无明文可证。

今奉明旨，亦当裁革横敛，以解倒悬之民，况册籍未明，难以断给前项地基。天顺年间，居民始盖房屋，洪武年间，无由拨给，无再加^④，酌议将前项房租减半征收，每年上岸一间，征银一钱八分，下岸一间，征银八分，通共每年征银三百二十三两六钱。征解布政司收贮，听候补给禄粮，委为官民两便。合候命下准行抚按衙门，转行该府长史，将前项占管民房尽数查给各〔主〕^⑤，不许听从下人拨置争占，仍照例起科征银解布政司，以补各王府欠缺禄粮之数，若不遵依，听抚按官指实参奏，庶利归公用，民沾实惠矣。

题奉圣旨准，备札到府，拟合刊刻石碑，以垂永远。为此合行晓谕该镇军民人等，一体遵奉施行。嘉靖二十五年十月十三日，奏巡抚都御史姜、巡按监察御史伊、案行布政司左布政管、右布政刘、按察司孙、都司指挥僉事刘、分守道右参政邹、分巡道僉事朱、汉阳府知府贾、武昌府知府何、同知张、通判丁、推官郝、武昌经历张、知事徐、汉阳县知县董、典史肩，会议明白，该户部尚书王题奉圣旨准议行，钦此钦遵外，刊碑谕众同知。嘉靖二十五年立。

查汉口业甲萧廷机原系武昌府江夏县籍，先朝承本县三沦所湖课钱粮、管收基地湖业等项，嗣后仅存后湖柴草地土，廷机子萧茂、裔孙萧良珩、萧次文收办纳粮，于本朝顺治十八年三月内，被贩马诸商纵放践食，钱粮^⑥，抚轮奔控。前巡抚都察院杨批汉阳府杨审明详院。奉批：造栏认草。既经断明，仰榜示遵照在案。

乡里村镇

一十九里，逐里村乡田亩多寡，形势高下，种植所宜，水旱同异，细志。

①万历《汉阳府志》“臻”作“徐”，“巩”作“华”，“工”作“王”。

②万历《汉阳府志》“田”作“出”，“上”作“占”。

③万历《汉阳府志》“稔”作“徐”。

④万历《汉阳府志》“无由”，作“何由”，“无再加”上有“合”字。

⑤“各二十一”，万历《汉阳府志》作“各主”，是。

⑥“钱粮”下当有脱文。



附秋粮官米说

旧《志》王光裕曰：汉阳郡，元安南王故都也^①。明革元命^②，墟其国而籍其土田，凡安南书院田、学田、寺田、观田等项，举在籍没之数。于时王田最腴，故重其赋而蠲其差。凡田中之入，汇解赴京。故相传曰“京库”，又曰“官米”也。

至成、正以后，有力者争利其田，移奉明旨^③，准台臣议行一条编法，士民称便。良有司续造全书，咸相谓曰：腴田归有力者，而使十九里之民行三等九则之法，独当繁重赋役，是不均不平之政也。申详司道，转申两院详允，以通县官米一千八百三十三石四斗有奇，摊派于秋粮民米一万五千三百三十一石一斗有奇之内，则种京库田者不得独轻，而种九则民田者不得独重。一县通行，刊布全书，凿凿可据，虽杂旧《志》所载米数不同，较之里书作弊，暗栽于麦地，使无辜受祸者，相去远矣。轸民瘼详覆全书，并查历年易知单，细心检阅，万民实受其福也。

县正东逼近大江，接连省会，并无居民人户，亦无田地〔畝〕^④，无凭稽载。

县西南离城六十里，系玉一里地方。原额田一万五千一百二十四亩零，地九千五百二十五亩零。额征钱粮一千二百二十七两一钱一分一厘四毫四丝五忽。村落则有南湖嘴、张大渡、季余家垸、宝家嘴、洪山庙、黄沙庙、尉武山、补锅岭、鸭港桥等九处，地势高下不同，如南湖嘴、张大渡、季余家垸则逼近官南湖，宝家嘴、洪山庙、黄沙庙则又地势平坂，无冈陵丘垤，每当发水之时，外有大江之水由火巷浸灌而入，内有襄河、府河之水由平塘灌进，故自南湖嘴以至黄沙庙等六处，素称畏水之乡。内南湖嘴、张大渡、季余家垸三处尤甚，惟尉武山、补锅岭、鸭港桥等三处有尉武山为屏障，形势颇高，但遇雨泽稍愆，则又苦旱。至于春花秋粮，各随地土所宜，无不兼种。

县西南离城七十里，系玉二里地方。原额田一万三千一百二十七亩零，地六千四百八亩零。额征钱粮九百九十八两四钱九分四厘六毫八丝。村落则有黄陵桥、河西庙、二姑堡、花园嘴、大蓼山、乌石堡、大东堡、小东堡等八处，

①万历《汉阳府志》“元”前有“胡”字。

②万历《汉阳府志》此句作“皇明启运，遂举元命”。

③“移”，万历《汉阳府志》作“后”。

④“亩”上当脱“畝”字。





形势与玉一里相等，其间所不同者，如黄陵桥、河西庙、二姑堡、大蓼山、乌石堡、大东堡等六处，山多水少，土性稍瘠，惟花园嘴、小东堡二处地属平原，颇称沃壤，无大水患。此八处地方春花秋粮，因时随地，无不兼种。

县西南离城八十里，系玉三里地方。原额田二万二千三百亩零，地一万二千九百一十四亩零。额征钱粮一千七百七十九两八钱七分八厘五毫四丝四忽。村落则有龚家渡、插湖堤、三汊港、郑家畈、松林嘴、白马山、乌梅山、大蓼巷、小蓼巷、成伏岭等十处，形势高下各半，自龚家渡以至松林嘴等五处，乃川南二水经行之地，因龚家渡傍鸡笼湖，故此五处岁多畏水，自白马山以至成伏岭等五处，则以白马、乌梅等山为屏障，形势最高，故此五处岁每忧旱，若雨暘均调，则咸登大有，至于春花秋粮，无不兼种。

县正西离城九十里，系湘一里地方。原额田一万三千四百二十一亩零，地六千七百七十七亩零。额征钱粮一千五十一两六钱一分三厘四毫四丝二忽。村落则有蔡家岭、老石陈、同人寺、官桥、索河等五处，自蔡家岭至官桥，俱在龙霓山之前，以山为屏障，形势颇高，岁多惧旱，惟索河一区地居稍下，亦不甚潦，俱属中平之地，至于春花秋粮，无不兼种。

县西南离城一百里，系湘二里地方。原额田一万六千三百九亩零，地九千九百一十五亩零。额征钱粮一千三百一十八两三钱二分六厘八毫二丝五忽。村落则有龙潭、马城、嵩阳寺、研子岗、并龙霓山、朱儒山等六处，俱在山后，以山为屏障，形势颇高，岁多惧旱，惟龙潭地方一带平畈，颇无水旱之虑，实属沃壤，至于春花秋粮，随地俱种。

县正西离城一百二十里，系湘三里地方。原额田二万二千六百四十九亩零，地七千四百七十一亩零。额征钱粮一千六百七十六两七钱四厘八毫九丝六忽。村落则有金潭、赵家畈、刘二湖、鸭公嘴、老鸦嘴、铁鹿嘴、许家嘴、毛旗岭、匡家湾、马四寨、白丈寨、土茧山、横山、小山、白头堡、桃树岭、朱家岭等一十七处，形势俱属卑下，自金潭以至白丈寨共十一处，悉近白湖，亦川南二水环绕之地，素号水乡；自土茧以至朱家岭等六处，虽有横山、小山，究为洼下，该里地土俱系黄壤，止堪种麦，春花秋粮，每年惟藉水汛迟长早消，随时栽种。

县西南离城四十里，系山一里地方。原额田一万四千五百六十七亩零，地一万二千二十二亩零。额征钱粮一千二百三十七两三钱四分五厘五毫五忽。村落则有洄流湾、龙王脑、大江口、萧家湾、黄沙坂、沌口、小军山、黄陵矶、下蒲潭、大军山、枣林冈等一十一处，形势俱属洼下，其间自洄流湾至黄沙坂



等五处，逼近襄河，沌口、小军山滨临大江，岁为川南二水所浸灌，惟自黄陵矶至枣林岗有诸山、大军山为屏障，稍免水患，究因地处低洼，土瘠民贫，向植春花，兼种秋粮，丰收鲜少，民间多取水草编把作薪，贩卖为业。

县西南离城六十里，系山二里地方。原额田一万四千三百六十一亩零，地八千一百五十四亩零。额征钱粮一千九十三两六钱二分二厘七毫九丝七忽。村落则有大东堡、小东堡、东土山、西土山、上李仙堡、洪山庙、千子山、薛公堡、猪山等九处，俱近大涧、小涧、猪山等湖，加以川南二水自春徂秋浸溢弥漫，素称泽国，虽禾麦兼种，而收成歉薄，民多取草作薪贩卖，并捕鱼为业。

县西南离城七十里，系山三里地方。原额田一万七千五十五亩零，地一万一千九百六十亩零。额征钱粮一千四百一十三两八钱九分二厘三毫三丝二忽。村落则有上蒲潭、香炉山、三王头、周家山、唐家山、周家河、上水南、下水南、石头山、赵公山、滩头、东庄堡、南庄堡等一十三处，俱近白湖，地势最下，岁被川南二水之害，种植收获与山一、山二两里相等，惟取湖草之利更胜各里，民赖资生。

县西南离城一百里，系山四里地方。原额田六千一百六亩零，地一万四千五百八十三亩零。额征钱粮七百六十两一钱二分九厘四毫一忽。村落则止有东江脑、通津二处，地多田少，外滨大江，内为诸湖环绕，地势最下，绝无山冈屏障，江湖弥漫，一片汪洋，土性硃瘠，向植春花，兼种黄黍、芝麻、莽豆杂粮等类，若遇早岁，其地大收。

县西南离城七十里，系怀一里地方。原额田三千九百九十三亩零，地二千五百四十亩零。额征钱粮三百一十九两六钱七分二厘五毫二丝二忽。村落则有堵埠头、陈家山、何家坂、朱家山、纱帽山、窑头等六处，俱滨大江，内有诸湖，地势低下，土性瘠薄，冬种二麦，夏种黍粮、麻豆，干则大收，涝则全没，而水势亦与怀二三里相同。

县西南离城一百二十里，系怀二里地方。原额田一万八千九百四十八亩零，地三万四百二十五亩零。额征钱粮二千三百二十七两一钱一分三厘七毫八丝一忽。村落则有邓家口、桡子湖、鞋尖水、郑文庄、袁家墩、陈家墩、龙梗口、姚家湖、张家地、宋家湾、宦子口、鲍家地、狄獐、霍家地、刘兴三渡、泗湖、白釜池、平坊、东湖、洪口、新沟、新滩等二十二处，地势低下，或滨大江，或近诸湖，或临小河，为川南襄水汇合必经之地，一当水涨，洋溢浸灌，地多田少，土亦瘠薄，岁植春花，兼种粟、黍、麻、豆各杂粮，喜早畏涝，与山四





里地方相同。

县西南离城一百五十里，系怀三里地方。原额田一万五百八十四亩零，地二万五千四百七亩零。额征钱粮一千三百四十三两五分五厘七毫三丝七忽。村落则有彭家边、傅家边、蔡家边、吕家边、蒿地铺、沙头、小林、姚家湖、蒿洲等九处，俱近大江，地势低下，每当水涨，与怀二里同，土性亦与怀二里同，向植春花，兼种粟黍、膏粱、芝麻、黄豆、绿豆一切杂粮，收成亦与怀二里相同。

县西南离城一百里，系湘四里地方。原额田二万六千二百七十八亩零，地一万一千二百四十二亩零。额征钱粮二千六两九钱三分二厘六丝九忽。村落则有九真山、高祚山、峡石岭、古迹冈、新集、桐山头、戴家塔、裴家山、薛家坂、余家坂等十处。自九真山至古迹冈，地势颇高，桐山头、戴家塔、裴家山则属平坂，薛家坂、余家坂俱属低下，内通白湖，外畏川水，地势使然，难施人力，其高阜之田有塘蓄水，平坂之地有河消泄，极下之处亦视水汛消涨迟速以定收成，向植春花，兼种秋粮，尚称乐土。

县西南离城一百里，系湘五里地方。原额田一万六千四百九十九亩零，地七千八百六十九亩零。额征钱粮一千二百五十九两九分四厘九毫九忽。村落则有洪城堡、西汉坂、邹家坂、戚家山、高家坂、东至山、鲤鱼港等七处，地势最下，俱近白湖，无山冈屏障，岁受江水浸没，土广瘠薄，止堪种麦，喜干恶涝，春水迟发，麦收有望，即系丰年。

县正北离城四十里，系凤栖里地方。原额田二万三千五十亩零，地六千四百五十二亩零。额征钱粮一千六百七十四两三钱四分七厘九毫五丝七忽。村落则有拖路口、戚家山、长乐坂、竹台寺、鹅鸭台、塌儿头、城隍台、文昌阁等八处，俱滨大江，带以襄河，环以西湖，地势卑下，绝无屏障，每遇水发，大江弥漫于前，汉沔之水涌灌于后，素称泽国。田地广种，若遇水小发迟，则收获丰稔。禾麦兼种，间布杂粮。

县西北离城六十里，系丰乐里地方。原额田三万六千七百三十亩零，地一万二千九十六亩零。额征钱粮二千六百五十七两一钱四分五厘七毫五丝。村落则有桂花庵、纱帽山、柏泉山、承顶冈、睡虎山、锦台寺、石头埠、花果园、巨龙冈、石潭泾、东流港、毛家嘴、化家嘴、戚皮淌、城隍台、张家垸、骡子庙、李家河头、杨家庙、陈唐碑、袁家嘴、陶家庙、孙家山、李家嘴、宋家嘴、湖东坂、沈家庙、石潭河、南头嘴、西头嘴、夏家湾、滥泥嘴、殷家嘴、罗家湾、老屋湾、林家湾、大官田、小官田、腰屋湾等三十九处。此内自桂花庵至巨龙冈凡九处，



尚在高阜，而自石潭泾以下俱属低洼，绝无屏障，外则江水由五通口直浸牛湖而湍激，内则汉水、沔水由涇口灌注弥漫，岁苦水患，人力难施，然总以水汛消长迟速定收成丰歉，至于春花秋粮，随时随地，无不兼种。

县正西离城六十里，系汉阴里地方。原额田二万七千七百九十三亩零，地一万二千一百九十一亩零。额征钱粮二千四十二两八钱一分四厘九丝八忽。村落则有龚家岭、马鞍山、陈谷山、黄丝桥、崔家铺、黄连铺、幺铺、汉阴山、薛家山、城头山、杨家山、萧家庙、草洋台等一十三处，地势高下不等，如龚家岭而至幺铺，俱在高阜，汉阴山、薛家山俱属平原，有山为屏障，自城头山以至草洋台，则逼近大河，地势极下，江水由插湖堤灌入，直浸萧家庙、草阳台二处，而城头山、杨家山又畏襄河、府河之水，内外浸灌，至其余高阜平原，有塘有河，水旱无虞，素称膏腴之地，所种春花秋粮，在在俱有。





《汉阳府志》卷之十三 地輿〔七〕

形势〔志 城郭坊镇 乡里村镇〕

汉川县

五乡八里村镇

县东

长城乡 在城里附。

旧《志》云：长城乡在县治北十里。东界湓港湖，西界松湖，北界洋子港。台阁下至湓口上下长湾，沿河六十里、河东岸体德甲、甌山铺、养鱼铺市集、高观铺、黄家山乡村、榔头饭店共七处，离县六十里。

梅城乡 一里、二里、三里附。

县南

鸡鸣乡

胡家闸系乡村河堤、两河口乡村河堤、二里乡村、系马口集镇临汉河、桐木湖乡村、阴山头乡村、垵头梅城乡村、南河渡在梅城一里地方、山前市镇、山后乡村、芦杨排乡村、白沙保乡村、西江亭乡村、打雁湖有乡集、莲子袱乡村、刘家赛乡村、张家脑乡村、澄波亭乡村河堤、分水嘴市镇河堤、管公岭乡村、车柱口乡村边河、界港乡村边河、城隍港乡集边河、庙头乡村市镇边河，共二十四处，离城九十里。

县西

周陂乡

在县西北一百二十里。西至京山界，北至五龙河，抵应城界，南至天门县界，其陂在同冢南侧。四周微高，宛如釜形，仅数十亩，今尽为田塍畔井，然乡以此得名。仙女山乡村、姚儿湖乡村、新店乡村、燕子湾乡村、芦鼠湾乡村、小里潭乡镇边小河、洄流湾市集边小河、张池口乡集边小河、里二河市镇边小河、张广庙乡村、堵坡头乡集、新河口乡村边小河、炼水港乡村、石心垵乡村、竹筒河乡村边小河、教子台乡村、怀德保乡村、韩家集村市边小河、虾子沟乡



市边小河、杨腰陂乡集边小河、冯家岭乡村、左家渡乡村边小河、倪家漈乡村、垌冢乡村集镇、花林甲乡村、汭汉乡村、后河保乡村、叶家店乡铺，共二十九处^①，离城一百二十里。

县北

大赤乡

在县治北六十里。北连云梦界，即令尹子文旧里，西北接应城交马站，东通十八里刘家隔，南界麻城濠渡，一衣带水，西则清水湖东汉，数十里汪洋，地僻民众，垂杨宛柳，赢亩方塘，大致如此。七里庙乡集、长兴铺乡集、杨子港乡集、十八里乡村、刘家隔镇市、道人桥乡市边德安府河、郭家店乡村、梧桐嘴乡村、大赤乡村、麻河渡乡市边河、神灵口乡村、邵家嘴乡村边小河、裘羊岗乡村、柘树口乡村边河、笋港乡村边河、高脚庙乡村边河、沙湖港乡村边河，共一十八处^②，离城七十里。

大小乡村共七十八处。

五乡八里堤垸、里至、田亩数目

一、索子垸在县河东岸边，临汉水大河，自小别甑山头朱家埠起，至汪家河连谢家垸横堤，抵史家山底，共堤一千九百六十丈，该垸建有石闸一座，垸内上地三十二顷，中地一十六顷，下地二顷，滨大河，坐落长城乡。

一、谢家垸自史家山岭起，从汪家河包圆至石礅滩下转湾，南至榔头岭，东至汉阳白湖横堤底，共堤一千二十五丈。该垸建有石闸一座，垸内上田五顷六亩，中田三顷七亩，下田二顷九亩，上地一顷八十亩，中地五顷六十亩，下地一顷四十九亩三分，滨临大河，坐落长城乡。

一、麻埠垸在县南门外，麻埠港起，至交接江西垸堤底，共堤六千三百二十一丈。该垸建有石闸一座，垸内上田五顷五十一亩，中田四顷二十二亩，下田二顷三十四亩，上地三顷五十亩，中地一顷六十亩，下地一顷八十九亩二分，滨临大河，坐落梅城乡。

一、江西垸东南接麻埠堤起，从北至南，于系马口转湾走两河口，至麻埠港口底，共堤八千六百四十丈五尺，内丘字脑、陈家湾人户堤垸系汉阳县所属。该垸建有石闸二座，垸内上田一十六顷三十二亩、中田二十一顷五十四亩，下

①“共二十九处”，原文实列二十八处。

②“共一十八处”，原文实列一十七处。





田八顷八十亩，上地一十顷一十二亩，中地六顷三十亩，下地五顷四十八亩七分，滨临大河，坐落梅城乡。

一、姚儿湖垸自庙起，至城隍港底，共堤二千一百三丈四尺。该垸建有石闸一座，垸内上田五顷一十二亩，中田二顷三十五亩，下田二顷二十一亩，上地二顷二十三亩，中地四顷五十二亩，下地三顷七十三亩二分，滨临大河，坐落长城乡。

一、香花垸自城隍港起，至六湖垸堤底，共堤二千一百三丈四尺。该垸建有石闸一座，垸内上田三顷六十七亩，中田四顷四十七亩，下田七顷二十四亩，上地五顷七十五亩，中地九顷九十二亩，下地八顷九十八亩二分五厘，滨临大河，坐落长城乡。

一、六湖垸自香花垸堤接连起，至三汊潭庙塘底，共堤三千九百四十丈四尺。该垸建有泄水石闸一座，垸内上田一十五顷三十亩，中田二十顷四十一亩，下田一十二顷二十一亩，上地五顷六十三亩，中地八顷六十二亩，下地一十四顷九十一亩七分，滨临大河，坐落长城乡。

一、裙带垸自三汊潭庙前起，至分水嘴木桥底，共堤八百六十丈。该垸建有泄水木闸一处，垸内上田八顷五十六亩，中田七顷五十四亩，下田六顷三十亩，上地九顷三十亩，中地四顷四十二亩，下地四顷三十六亩，滨临大河，坐落鸡鸣乡。

一、彭公大垸自分水嘴起，至麦旺嘴底，内支流小河二十里一带，借沔成汉堤，有汉四沔六之分，田属沔而堤属汉，相沿已久。共堤七千六百五十三丈一尺。该垸于吴朝口塘汛左建有大石闸一座，又官湖口石闸一座。垸内上田五十顷三十一亩，中田三十八顷四十四亩，下田四十七顷五十亩，上地三十二顷七十亩，中地六十一顷三十一亩，下地五十顷六十七亩三分二厘，滨临大河，坐落鸡鸣乡。

一、太安垸自分水嘴起，至匾担垸堤头底，共堤六百三十丈。该垸下湖边建有泄水木闸一座。垸内上田三顷五十一亩，中田七顷五十四亩，下田六顷三十亩，上地九顷三十亩，中地四顷四十二亩，下地四顷三十六亩，边临大河南岸，坐落梅城乡。

一、匾担垸自太安垸堤头起，至杨林沟底，共堤五百三十丈。该垸内上田七十二亩五分，中田四十二亩，下田四十一亩，上地二十三亩，中地三十三亩，下地二十九亩九分，边临大河，坐落梅城乡。

一、白鱼垸自杨林沟起，至麦旺嘴下间堤底。垸内上田二十顷二十亩，中



田八顷三十二亩一分，下田五顷五十一亩，上地三十一顷六十一亩，中地一十顷四十亩，下地四顷五十五亩，边临大河南岸，坐落梅城乡。原堤防稿有白云赛而无白鱼垸，彼注白云赛堤长一千二百七十丈，而无里至田地顷亩之数，兹系查致，本县现今逐垸清查册报者，自必以此为确，仍存堤防原稿之数，以备参考。

一、宁家垸自泉家垸起，至沔阳连界之萧泗沟底，共堤四千五百丈，与沔阳合修内南堤一千丈，汉二沔一。该垸建有泄水木闸一座，垸内上田二十一顷二十五亩，中田二十二顷三十亩，下田一十五顷五十四亩，上地一十二顷四十亩，中地一十四顷五十一亩，下地四顷七十亩，边临赤野湖，坐落梅城乡。

一、细鱼垸自宁家垸堤起，至湘洋垸间堤底，共堤一千四十丈。垸内上田二顷二十七亩，中田一顷一十一亩，下田四顷一十二亩，上地二顷三十一亩，中地二顷三十五亩，下地一顷八十四亩，边临小港，坐落梅城乡。

一、湘洋垸自细鱼垸起，至朱龙垸底，共堤一千六百三十丈。该垸内上田六顷六十亩，中田七顷五十三亩，下田五顷三十五亩，上地八顷三十四亩，中地三顷三十六亩，下地五顷九十亩，边临小港，居南，坐落梅城乡。

一、朱龙湖垸自湘洋垸起，至莲子袱垸底，共堤一千五百六十丈。该垸内上田六顷二十七亩，中田五顷五十一亩，下田五顷三十亩，上地五顷六十二亩，中地四顷四十六亩，下地八顷五十二亩，边临小港，居南，坐落梅城乡。

一、莲子袱垸自朱龙垸起，至周家帮底，共堤二千四百丈。该垸建有泄水石闸一处。垸内上田一十五顷三十亩，中田一十六顷四十七亩，下田二十一顷五十四亩，上地二十四顷一十亩，中地一十五顷四十一亩，下地二十二顷一十八亩，边临赤野湖，坐落梅城乡。

一、打雁湖垸与朱龙垸、莲子袱垸接壤，共堤一千一百三十丈。该垸内上田一顷一十四亩，中田一顷三十七亩，下田一顷二十亩，上地二顷五十二亩，中地一顷一十五亩，下地一顷三十八亩，系偏僻之处，坐落梅城乡。

一、喻家垸自张池口起，至田二河底，共堤四千八百三十六丈。该垸建有泄水石闸一座。垸内上田一十五顷二十亩，中田九顷八十七亩，下田一十顷三十二亩，上地一十一顷二十一亩，中地二十一顷四十亩，下地一十二顷三十四亩五分四厘五毫，边临大支河西岸，坐落鸡鸣乡。

一、蓼湖垸自回流湾起，至麻洋潭底，共堤二千九百八十丈。该垸建有泄水石闸一处。垸内上田二十顷一十亩，中田一十八顷三十三亩，下田三十顷四十亩，





上地一十顷二十一亩，中地一十五顷八十七亩，下地一十一顷九亩，边临里支河，坐落鸡鸣乡。

一、靡家掇垸自三角坵起，至南湖垸堤角头底，共堤一千六百二丈。该垸建有泄水石闸一座。垸内上田八顷三十七亩，中田五顷一十亩，下田五顷八十一亩，上地五顷二十五亩，中地六顷三十亩，下地八顷七十七亩一分五厘，边临小港西首，坐落鸡鸣乡。

一、东湖垸自小里潭起，至崔家横堤底，共堤一千五百九十一丈五尺。该垸建有泄水木剝一处。垸内上田七顷二十一亩，中田六顷四十七亩，下田四顷三十二亩，上地五顷八十二亩，中地八顷八十亩，下地五顷四十九亩八分二厘，边临里支河西岸，坐落鸡鸣乡。

一、石心垸自崔家横堤起，至韩家集底，共堤一千三百六十一丈。该垸建有木剝一处。垸内上田五顷四十二亩，中田四顷二十五亩，下田二顷二十一亩，上地五顷八十二亩，中地三顷六十四亩，下地五顷六十六亩，边临里支河西岸，坐落周陂乡。

一、老实垸自韩家集起，至虾子沟底，共堤一千五百四丈。该垸建有泄水石闸一处。垸内上田八顷一十二亩，中田五顷四十亩，下田六顷八十三亩，上地一十顷五十四亩，中地四顷三十一亩，下地一十四顷九十一亩七分，边临里支河，接壤西岸，坐落周陂乡。

一、德丰垸自虾子沟起，至下边三台湖堤角底，共堤一千二百丈。该垸建有泄水石闸一处。垸内上田五顷四十一亩，中田六顷五十亩，下田三顷三十一亩，上地四顷三十八亩，中地四顷二十四亩，下地四顷一十六亩，边临里支河西岸，坐落周陂乡。

一、竹筒河垸自三义庙起，至教子台底，共堤一千一百二丈。该垸建有泄水木闸一处。垸内上田八顷一十二亩，中田五顷三十亩，下田五顷八十亩，上地二顷一十二亩，中地八顷三十一亩，下地二顷四十三亩，边临里支河，坐落周陂乡。

一、教子台垸自竹筒河堤头起，至太实垸底，共堤一千七十丈五尺。该垸建有泄水木剝一处。垸内上田二顷九十一亩，中田一顷二十四亩，下田二顷五十亩，上地二顷二十一亩，中地四顷三十一亩，下地一顷四十三亩，边临里支河，坐落周陂乡。

一、汧汉垸自后河保起，至太实垸堤头底，共堤二千四百六十一丈二寸。



该垸建有消水石闸一处。垸内上田九十八顷八亩，中田四十五顷一十亩，下田六十一顷三十二亩，上地二十二顷二十一亩，中地一十顷六十亩，下地二顷六十九亩，边临松湖，坐落长城乡。

一、南湖垸自田二河，至天门县之乾镇驿界底，共堤一万二千六百四十丈。该垸建有泄水石闸三处。垸内上田五十一顷三十亩，中田六十四顷五十一亩，下田六十二顷二十四亩，上地五十二顷七十亩，中地四十四顷六十一亩，下地九十三顷六十四亩，边临牛蹄口分流，大支河之南，坐落鸡鸣乡。

一、魏夏垸又名夏魏垸自叶家沟起，至许家堤头底，共堤七百四十八丈。该垸建有泄水木闸一处。垸内上田二顷三十七亩，中田二顷一十二亩，下田三顷一十一亩，上地二顷三十八亩，中地二顷五十亩，下地三顷五十二亩，边临小港，坐落长城乡。

一、郝城垸自龙家堤角起，至蒋家台底，共堤八百九十丈。该垸建有泄水木闸一处。垸内上田一顷二十亩，中田一顷一十二亩，下田一顷一十一亩，上地九十亩，中地一顷一十亩，下地四十九亩三分，边临松湖北首，坐落长城乡。

一、长兴垸自长兴铺起，至洋子港底，共堤一千九十丈。该垸建有泄水木闸一处。垸内上田二顷四十一亩，中田三顷二十二亩，下田三顷一十亩，上地一顷三十五亩，中地一顷五十二亩，下地三顷三十一亩，边临松湖之北，坐落长城乡。

一、后湖垸自刘家隔起，至新河底，共堤一千八百四十三丈六尺。该垸建有泄水石闸一处。垸内上田三顷五十二亩，中田四顷四十五亩，下田三顷七十亩，上地二顷六十一亩，中地四顷四十亩，下地二顷九十亩一分八厘，边临德安府河之北，坐落大赤乡。

一、十八里垸自新河起，至道人桥底，共堤八百六十四丈五尺。该垸建有泄水石闸二座。垸内上田六顷八十二亩，中田八顷三十二亩，下田五顷五十四亩，上地七顷六十五亩，中地一十顷二十一(顷)[亩]^①，下地一顷五十一亩，边临德安府河，居北，坐落大赤乡。

一、郭家垸自道人桥起，至长江埠间堤底，共堤一千丈，以三分为率，应城一分，汉川二分。该垸建有泄水石闸一处。垸内上田五顷四十一亩，中田四顷三十二亩，下田六顷五十四亩，上地五顷二十七亩，中地六顷三十四亩，下

^①“顷”，当为“亩”之误。





地一顷七十一亩二分六厘，边临德安府河，居北，坐落大赤乡。

一、太实垸自教子台起，至虾子沟底，共堤七百四十丈六尺。该垸建有木剏一处。垸内上田二顷九十一亩，中田一顷二十四亩，下田二顷五十亩，上地二顷二十一亩，中地四顷三十一亩，下地一顷四十三亩，边临里支河西首，坐落周陂乡。



《汉阳府志》卷之十四 地輿〔七〕

形势〔志 城郭坊镇 乡里村镇〕

黄陂县

黄陂邑志“形胜”，有此名目，无所纪载，仅有形胜之说数行。今附载于此，以见大义。

岚溯嵯峨，金鼓脉迤，甘露鲁台，东、西、北三隅，列岫攒峰，宛若儿孙绕护，而黄安、罗山，分司北门锁钥焉。潏源道自大城潭界河，合于滕子港，既山北而东折，亦南汇以西流，或渚武湖入江，或纾潏口达汉，膏腴环衍，灵秀内融，夙称黄郡望邑。至夫軫通省会，邮接中州，尤三楚之要区也。

集镇

东乡

团林埠，离城五十里。

刘家埠，离城四十里。

南乡

潏口，离城四十里。

西乡

双庙，离城二十里。

胡家集，离城四十里。

李家集，离城四十里。

黄家集，离城四十里。

北乡

河口，离城一百二十里。

蔡家店，离城一百三十里。

夏家店，离城一百三十里。

塔儿冈，离城六十里。





长轩岭，离城六十里。
南门港，离城八十里。
柏模港，离城四十里。

附载黄陂县逐图均田米数

每甲花名、均田米数详于《县志》，兹不俱载。
通县共秋粮一万六千四十八石五斗八升四合一勺。

高邑乡共秋粮米四千九石七斗九升五合。白一图共米四百四十五石八斗三升三合。白二图共米四百四十五石五斗一升三合。白三图共米四百四十五石四斗二合。白四图共米四百四十五石六斗二升九合。南一图共米四百四十五石三斗五升六合。南二图共米四百四十五石四斗六升四合。南三图共米四百四十五石七斗二升四合。太一图共米四百四十五石三斗九升二合。一厢图共米四百四十五石四斗八升二合。

崇义乡共秋粮米四千一十石一斗九升七合。子一图共米四百四十五石七斗八合。子二图共米四百四十五石四斗六升三合七勺。子三图共米四百四十五石四斗四升五合。子四图共米四百四十五石六斗八升四合。子五图共米四百四十五石三斗九升八合三勺。漈西八图共米四百四十五石八斗五升二合。漈西十图共米四百四十五石五斗一升一合。漈西十二图共米四百四十五石八斗三合二勺。漈西十三图共米四百四十五石三斗三合。

漈源乡共秋粮米四千一十石七斗九升五合七勺。漈东一图共米四百四十五石二斗五升五合。漈东二图共米四百四十五石九斗四升四合。漈东三图共米四百四十五石六斗九升三合。漈东十一图共米四百四十五石六斗六升六合。漈东十二图共米四百四十五石四斗四升三合。漈西一图共米四百四十五石五斗六升四合。漈西二图共米四百四十五石六斗四升一合。漈西三图共米四百四十五石八斗五合。漈西六图共米四百四十五石七斗八升四合七勺。

礼教乡共秋粮米四千一十七石七斗九升七合。东一图共米四百四十五石五斗四升二合。东二图共米四百四十五石七斗一升一合。东三图共米四百四十五石四斗四合。西一图共米四百四十五石八斗一升。西二图共米四百四十五石七斗六合。西三图共米四百四十五石六斗一升七勺。西四图共米四百四十五石二斗三升五合七勺。西五图共米四百四十五石五斗四升九合。二坊共米四百四十五石六斗四升九合。图外孔甲米七石五斗二升。



孝感县

乡村据《县志》

白云乡领十里，明万历中割六里属潞府为村五：盘陂村、石墩村、板桥村、西观村、安陆村。

郭下乡领六里为村四：杨桥村、仁和村、三山村、西湖村。

弘乐乡初名横乐，知县刘崑改今名为村五：石桥村、沐缘村、城头村、苏诸村、白松村。

广杨乡领六里为村二：新安村、罗陂村。

诸赵乡领二里为村二：安仁村、藻湖村。

五乡旧辖三百六十会，因会名重复，今更加改正，按籍而稽，历历可指，列其名于左。

城内外各会：首善大东门内外、从仁北门内、齐仁北门外、倡化小东门内、亲民小东门外、蛟龙南门内外、公义西门内、迁乔西门外。

白云乡五十九会：无量、更化、新政、德行、旋吉、效义、云龙、五岳、鹿鸣、秉公、安居、同安、居仁、树德、永年、崇林、来善、安乐、大公、遵道、义重、阳平、保和、存德、同丰、亲民、至公、天爵、尚义、忠信、永善、奉公、忠圣、升平、家和、同心、大安、兴化、尚质、维风、良善、公善、还淳、永康、敦伦、尧天、友助、永平、乐义、永安、守约、共悦、上致祥、下致祥、兴让东、兴让西、兴让南、兴让北、兴让中。

郭下乡三十七会：永春、春和、乐业、和教、敦厚、敦德、敦和、忠义、向修、修善、仙桥、明善、遵信、斗山、正通、集贤、思齐、从善、习仁、万安、向善、正道、乐群、西农、崇隆、登虞、丰登、懋德、迎送、劝农、明农、观善、敦化、聚守、易俗、康德、率教。

弘乐乡三十一会：遵化、弘治、归元、劝善、大同、舜日、仁孝、仁德、承仁、岁丰、振德、维新内、维新外、陡山、和平、盛治、兴贤、永宁、由内、庆丰、循礼、好义、公心、敏德、明伦、泰彰、先淳、绥和、静善、睦邻、周德。

广阳乡五十八会：存诚、归化、聚善、仁让、里仁、绥众、普恩、咸宁、永丰、盛世、庆平、观成、尚礼、昭化、同木、仁寿、寿域、法台、兴仁、阳和、务本、尚文、启祥、顺乐、肃清、乐育、心善、兴治、兴德、昭青、兴伦、集义、迁善、崇贤、从俭、齐贤、云从、治平、成治、由存、亲逊、由道、由教、昌治、广训、





应霖、熙平、建安、成德、允和、兴教、怀仁、安业、新存、乐平、顺化、崇庆、育德。

诸赵乡十一会：人和、安仁、偕乐、自新、永和、同睦、和隆、复古、志仁、尚德、正行。

五乡一百九十五会，合城内外七会，共计二百零四会。

集店

杨家店在治东北五十里，乃黄孝驿传站所，邮亭在焉，盖诸集中之最冲犄者。

周家店在杨家店东北三十里。

刘家店在杨店西北四十里。

三汊埠店在城东三十里。

北泾店在城东南四十里。

马溪河店在北泾东十里，其地夏秋皆水，居人去之，冬春水涸，复聚焉。

陡冈埠店在城西四十里。

金神庙集在城西北四十里。

杨家河集在金神庙北二十里。

白沙铺店在金神庙西二十里。

花园店在杨家河北三十里。

黄云埠店在花园西北十五里。

磨山王店在花园北三十里。

陈家店在花园西北三十里。

小河溪店在花园东北三十里，走“武胜关”路也，较“恨这关”为径，南北行人自非驰传者，皆取道于此。

二郎畈店在小河溪北五十里，相传孙仲谋曾猎于此，故名二郎，盖其行第也。

新店在二郎畈北三十里，后汉王常起兵于此。



《汉阳府志》卷之十五 地輿〔七〕

形势〔志 堤防〕

《堤防志》序

葵丘一会，齐桓有曲防之禁，盖以水之为物，疏而通之，则民收其利，堤而障之，则邻受其害矣。第楚为泽国，郡又地滨江汉，每至夏秋，众流合汇，泛涨之余，不特田家陇亩尽付波臣，即城郭街衢亦岌岌焉有为鱼之忧。然则随时利导，相水势而察地形，因人事为补救，必有桑根之绸缪，以固我田庐者，而绝不侔于邻国为壑之私也已。

汉阳县堤防

免溺堤 今名杨柳堤，在县东北三里。明正德初，知县蔡钦筑。自铁门关接汉水亭。亭久废，里民周南佐以石桥，其亭所水涨不圯。顺治中，知府丘俊孙修。康熙七年，知府陈国儒重修。

附国朝陈国儒《杨柳堤记》

出东门，沿江岸巡历禹功矶，凿山脊而扼其吭，则俗所称铁门关是。逾关以北有堤，长亘数里，襟江而带湖，盖汉镇居民入城孔道也。舆马之所践，负贩之所习，春秋祈赛、士女袂褰之所追逐，舍路无由，岂非村郭联络之要冲哉。

岁久崩圯，桥梁岌岌如断虹欲堕，风雨之晨，霜月之夕，行者患焉。余以戊申秋来守是邦，舟泊汉渚，驺从候于道左，即目矚而心动焉。岁首迎春东郊，堤柳初萌，旌旄相属，童叟喧阗，观者如堵，而土石剥落，前驱或阻。嗟乎，此何事而致烦我民之竭蹶乎？亟呼父老而谕之，方今庶务聿新，是亦不可缓也。余捐俸若干，别驾赵君、城守刘君、邑侯唐君各捐俸有差，而行僧某复出钵资二千金以助焉。乃檄邑尉董其役，畚土筑坞，磨石架梁，甫经旬而工竣。

堤(城)〔成〕^①，仍夹道植柳，可荫行旅，以无虚曩昔命名之意，而历历

^①“堤城”，当作“堤成”。





晴川或补胜概之万一也。因是追念往迹：隋堤荒游，无足称矣；苏公治堤西子湖上，碧波藏莺，青丝络马，往来其地者，冷然如御风而行；即大江东岸，相传武昌东门柳，冶绩风流，迄今诵之不衰。休哉。余何敢当所厚愿者。此邦之人朝夕由是路而不病于涉，后之人随敝随修，使江涛不啗于外，湖苇不浸于内，通而不塞，久而无斲，庶几与大别并重焉。

新丰堤 一名永丰堤，在城西北半里，康熙八年知府陈国儒重修。

附国朝陈国儒《新丰堤记》

出凤山门稍北，越百余武，有塍如虹，矗然于两山之间者，传为新丰堤云。堤南抵龙泉庵，北连大别，为郡渡月湖必经之地。赤城烟景，绿树参差，水色山光，交相映带。道左民居数十家，历落散处，如晨星点点，若断若续，亦郡西一胜概也。

堤两涯皆稻田，夏时雨集，野农资以灌溉，春冬积雪初消，流澌甫下，牛马蹄涔浸淫为壑，然径此至汉口不过里许，出东门经柳堤，盘旋曲折而后汉口乃至，将十余里不尽，居民苦之，褰裳濡足，其能免乎？余守郡之明年，念士女之往来于汉者，皆由东西二桥以达。今东堤既新，而西堤何独颓然不整？爰允僧某之请，捐貲若干，仍命李尉董厥役，薄者厚之，卑者高之，罅者坚筑之，中间两翼各用石甃，如砥如矢，不越月而告成事焉。

余思新丰之名，本汉高帝所制，以慰乃太公者也。为思故丰，乃立新丰，使儿童鸡犬都识故处。读史至此，殊令人有望衡对宇，越阡度陌光景。今斯之称斯名也者，则谓何意？汉民之托处于兹者，大半皆东西南北之人，弃其庐墓，捐其伯叔甥舅，以逐此什一之利者也。将使之顾名思义，动其粉榆之念，而体先王教人以孝之遗意乎！

莲花堤 在城北兴国寺前、晴川阁之右，有石桥，桥左右二渠皆种荷花。

郭公堤 在城西北大别山麓月湖中。初，行人往来城镇者，每为舟人所窘。雍正二年，绅士胡钧、熊占、崔文元、彭启贤、刘廷瑜、傅泉曹、黄镛、崔国玖、曾遵孔、朱轮等公请于府，知府郭朝祚即捐俸以倡，邑人共襄其事。不数月而堤成，起湖滨，北抵汉口五显庙南岸，长二百四十五丈、高三丈、阔一丈八尺，中建石桥，桥北建水鉴亭，统名为郭公堤云。

袁公堤 即后湖堤，在汉口镇北。明崇祯八年，通判袁焜创筑。自后居民渐集，



今名后湖堤。镇为水陆要冲，汉水径其南，大江横其东，湖水绕其西北，夏秋水涨，四面皆成巨浸，惟赖此堤为数百万家保障。里人岁加修筑，终未完固，水势若虐，即虑泛滥。

附国朝许纘曾《滇黔纪游》一则

由汉江陆路沿江东北行，若时值二月，黄花烂漫，千顷一色，土人谓为黄花地。惟汉上有之，他处所罕见也。

三搁石堤 在城西五里。黑山之南，梅子山北、月湖尾。

张大渡丰乐堤 在县西五十里，汉阴山南，直接对岸著山，长六十一丈八尺、高二丈五尺。康熙五十年，请帑创筑。中建石闸，以时蓄泄，内湖三十余里、外湖七十余里，水小则舟楫不便，水大则仍易冲决。雍正五年，决十余丈，复修，随坍。

马家渡堤 在蔡店西南五里。雍正三年，邑绅李俊有筑，约长半里、高八尺，中建石桥，行人称便。五年，湖水泛决。

草阳台堤 在蔡店西五里。

千湖泾堤 旧《志》云：原奉文堵筑，勒有碑约，后为势家所开，河水遂涸，内地数十里居民难以运载薪草谷麦，深苦不便。今若使内湖居民堵塞如故，实永赖云。

杂湖堤 在县治西九十里。康熙十三年，首士朱士桀募修。

东西杨树堤 室安堤 李家堤 莲花堤 青草堤 山嘴堤 石林堤

谭家堤 谢家堤 郑家堤

以上旧俱属平塘河泊所。

高作陂 在县西六十里。宋庆元中筑堤，首尾置青龙、水济二闸，延袤四百八十七丈，高七丈至一丈五尺，阔如之。

龙船陂 张艳陂 老鸦陂 八公陂 社林陂 曹公陂 东庄陂 良思陂 庙林陂

以上旧俱属马影河泊所。

唐家陂 曹家陂

以上旧俱属桑台河泊所。



汉阳县水利考略

郡城与武昌对峙，大江环抱，东南汉水合潏水、沔水、沌水入大江，会于郡北，涨则弥漫于诸湖，为卑洼田地之患。

按县旧有襄河口，在汉口北岸十里许，即古汉水正道。汉水从黄金口入排沙口东地转折，环抱牯牛洲，至鹅公口又西南转北，至郭师口对岸曰襄阳口，约长四十里，然后下汉口。明成化初，于排沙口下、郭师口上直通一道，约长十里，汉水径从此下，而古道遂淤。且汉口虽为汉水泻流之地，但为江水汹涌横截其口，流不能泄，复逆折而上，故太白、新潭、马影、蒲潭、沌口、刀环等湖易以泛滥，而春夏水涨，郡治常苦浸淫之患。其障御全藉大别一山，故从来不设堤防。至柏泉一带，地势平衍，动连数十百里，虽间有土壤微高之处，而洪涛冲激，亦非小小堤塍所能捍蔽，故每遇涝岁，蒿目以俟水落而已。

汉川县〔堤防〕

吴公堤 旧名和公堤。明成化中，都御史吴琛筑。一自县东至甌山十五里，一自县北和公城至刘家隔十五里。

湖垱堤 在县北二十里杨子港。明嘉靖中，都御史姜仪筑。

以上皆以堤名者。

谢家垱 共堤一千二十五丈。

索子垱 共堤一千九百六十丈。

江西垱 共堤八千六百四十丈五尺。内丘字脑、陈家湾人户堤垱系汉阳县所属。

麻埠垱 共堤六千三百二十一丈。

以上四垱俱坐落三里。

姚儿湖 共堤二千一百三丈四尺。

香花垱 共堤四千五百七十三丈二尺。

六湖垱 共堤三千九百四十丈四尺。

刁汊垱 共堤二千四百六十一丈二尺。

夏魏垱 共堤七百四十八丈。

郝城垱 共堤八百九十丈。

长兴铺垱 共堤一千九十丈。

以上七垱俱坐落长城里。



太安垸 共堤六百三十丈。

匾担垸 共堤五百三十丈。

宁家垸 共堤四千五百丈 与沔阳合修。内南堤一千丈，汉二、沔一。

白云赛 共堤一千二百七十丈。

湘洋垸 共堤一千六百三十丈。

莲子袱 共堤二千四百丈。

朱龙湖 共堤一千五百六十丈。

打雁湖 共堤一千一百三十丈。

细鱼湖 共堤一千四十丈。

以上九垸俱坐落一里。

裙带垸 共堤八百六十丈。

彭公垸 共堤七千六百五十三丈一尺。

喻家垸 共堤四千八百三十六丈。

南湖垸 共堤一万二千六百四十丈。

东湖垸 共堤一千五百九十一丈五尺。

蓼湖垸 共堤二千九百八十丈。

糜家撮 共堤一千六百二丈。

竹筒河 共堤一千一百二丈。

石心垸 共堤一千三百六十一丈。

以上九垸俱坐落鸡鸣里。

教子台垸 共堤一千七十丈五尺。

老实垸 共堤一千五百四丈。

德丰垸 共堤一千二百丈。

太实垸 共堤七百四十丈六尺。

永固垸 但家垸 方家垸 张家垸 李家垸

以上九垸俱坐落周陂里。

刘家隔后湖垸 共堤一千八百四十三丈六尺。

十八里垸 共堤八百六十四丈五尺。

郭家垸 共堤一千丈。以三分为率，应城一分，汉川二分。

以上三垸俱坐落大赤里。

叶家垸 蔡家垸 河南岸垸





以上三垸俱坐落刘家隔。

以上堤垸，每年著令当年堤总长催督业民及时加修。

旧《志》云：按川邑之倚堤垸为命也固已，然有堤垸之利，亦有堤垸之害。盖禹之治水，水之道也，必上流有所泄，而后堤垸始不受冲突；必下流有所归，而后堤垸始不受浸没。

今汉水自襄郢而下，分为数道，其东支为夜泽口，由潜邑以达荆江，西支为牛堤口，出脉旺嘴，又中分流为竹筒河，经周陂瓦河会隕水，又西流为管公岭响水滩、城隍港口，又西流由系马口经内方，属蔡镇，而皆合于汉之正流。

曩时诸口俱开，襄水一至，四散各注。湍急之流既分，澎湃之势自减。且邑西有松湖、横湖，邑南有泽湖、赤野湖，皆洼下之地。众流之汇，是以水之来也有所分，其归也有所滞。于是高田为堤垸，下田为沮洳，高田岁收籽粒，下田亦取莲芡、鳊雁、鱼虾之利，而县官亦定为上赋、下赋不等，数百年来，相与习而安之。

自潜邑三江口闭，郢茅草岭溃，而怀襄之害，在在见告，举向之所谓牛堤口、城隍口、系马口等处分道出入诸水之处，悉行淤塞，上无所泄，下无所归，水势横溢四溃，而桑田沧海之变，遂不可问矣。于是高者修堤，低者亦修堤。堤防既多，水道亦窄。以堤岸丈余之尘土，当千余里吞天浴日之洪涛，欲其不崩溃而浸没也，不亦难哉！是不惟近年增筑之新垸悉付逝波，而从前额设之老堤，亦“载胥及溺”矣。乃以邻为壑之奸，犹日控于上曰：“修垸以充赋也。”其说似乎美谈，上亦乐闻而姑听之。夫孰知高下不分，内外交逼，纵日费斗金，不抵西风一浪，徒斤斤焉曰修堤修垸，亦何济于国计民生也哉。

夫鯀湮洪水，只缘筑塞，大禹地平天成，不过疏濬决排。为今之计，惟在开通各旧水口，相地势高下，应堤者堤，应湖者湖，不惜下湿之地，以为水之渊薮，一切奸宄甘言，置之勿听，斯为地方计久远之谋也。

又云：汉川水患有二：其一则南水，嘉靖、万历中，屡经泛滥者是也；其一则西水，自襄阳至安陆南北俱有堤障，中流颇狭，水涨多旁溢，而南又沙洋一带为堤，而茅草岭、七林洲一带无岁不有冲决之患，然犹二三年一见也。至永镇观冲决，而鸡鸣、周陂、长城、大赤皆成巨浸矣。

按：周陂自同冢下至风门，皆滞水之藪也，即汉水不溢、堤不溃，若淫雨作祟，亦茫然巨浸，收者什之五六，若堤一决，水势滔天，则尽为泽国矣。盖汉水溃入景陵之后，分为数河，悉注于周陂之净潭、陈选口、杨腰陂等处，最为利害



者为金带河，故里谚有曰：“金带水流漫，周陂收一半。金带水流急，周陂最淹没。”自金带河奔放而来，下承以茫洞、三台二湖，至丁家嘴渐狭，东则竹筒河，淤泥渐淤成岸，直至应城梅家港止，截断三合湖水。今惟宜掘所谓九条口等以泄之，若源大委小，波流滢洄，必诸垸尽没然后已，因其势高下速，所以受害独甚也。

又按：老实垸筑之最先，故受溃尤甚，以出口之处渐塞故也。若教子台、太实垸、永固垸，俱天启甲子以后所筑，地淤稍高，故溃减二三次，则德丰垸受溃亦甚，以近土牛冈，下高于上也。若芦林沟、杨腰陂、但家垸、沙港、冯家岭，西抵方、张、李三垸，地势相若，堤亦彷彿，每水暴至，不出二三日，皆相继溃决，获全者什仅一二。左家湖以北三垸相联，数小垸附之，地势与堤犹之前也，厥险一，类无有超出诸垸之上者，是在神明之宰督劝之，则与南湖等垸争固矣。

按：汉川之倚堤垸为命，旧《志》既详悉言之矣。查川邑田额三千四百顷有奇，而上田仅二百四十顷，中田四百四十顷，下田则八百七十顷，水乡塌田又八百七十三顷，沉没荒田至一千余顷，是在在皆水乡，其所以输将无匮者，惟堤垸为亟也。堤垸既多，业非一姓，缓急先后，既不能使之同时而程功；浮脆坚凝，又不能保其历久而无溃。即使外水不涨，各垸晏然，偶值淫雨愆期，则积潦难消，淹没冲决，所不免矣。必江河之水，流通于外而不浸；陇畔之渠，容蓄得所而不溢。此国计民生所当熟计者也，余详《总论》。

附国朝制府李荫祖《灾出异常疏》

题为灾出异常之变，民有必死之形，谨据实上闻，仰廑宸虑事。

臣稽往古，尧水九年，汤旱七载。天灾流行，何代蔑有？然或灾祲偶及，未有屡经兵燹，历苦旱涝，供输疲困已极，而复罹异常水灾，如今日之楚民者也。顾楚素号泽国，地势卑下。臣前仲夏自荆泛舟回省，目击荆属江陵、安属潜、景等县，水势弥漫，杳无涯际，已将淹没情形具疏入告。其余武、岳、汉、黄等属，暨臣前疏未及者，俱经抚按诸臣陆续题报在案。现今檄令各属确查分数，汇请蠲豁。

间臣于八月初旬，睹江汉水势愈加澎湃，浸塌城垣。询诸乡民耆老，佥称从来水大，莫如万历三十六年，城岸镇水铁牛，仅平牛耳，今则过耳及顶，止露寸许，比之更大，实百十年所未见者。臣赴荆州，乘舟而行，所过汉阳、汉川、景陵、潜江等处，及沔、监、江陵一带，处处岸崩，在在堤决，水天一色，





川原莫辨，鱼游畎亩，田地悉归河伯；船过市头，篱屋尽随波逝。佃种之穷黎，哀哀无告，兔徙远方；有土之稚老，恋恋难移，蚁丛高阜。宵啼露处，哀号万状，历见裸体跣足，踏泥河畔，茭粃浮没，竞相采取。臣睹兹形状，停泊而问。老者幼者，鸠面鹄形，孱弱而不能前，噎呜而不能对，环向臣舟，呼号啼血。臣观其采取之茭粃，亲验不敢凝眸；探其所煮之饘粥，亲尝万难下咽。嗟嗟，水之为害，惨至于斯。野无青草，谷食难草食亦难；地无尺土，屋处难，土处亦难。真郑监之图绘不能出，亦贾生之泪哭不能周者也。

哀哉，楚民当寇氛未靖，苦于兵、苦于贼、苦于征师之挽运，力已竭矣，髓已枯矣，即遇岁时丰稔，尚忧支吾维艰，复遭不造，罹此鞠凶，虽淹没应征钱粮，分别分数，自可邀恩豁免，但目前存活莫存，后此流亡易尽，正供责之何人？财赋取之何地？《诗》云：“其何能淑，载胥及溺”，今日之谓矣。受人牛羊，责在牧者。此臣奉职无状，罪不容辞，除所属官吏亟图修省外，窃念下臣精诚浅薄，无足格通上帝。

史称古之商王六事自责，自苏七年大旱，千古之下以为美谈。我皇上吊民之仁，不下成汤，昊天笃爱之诚，同示谴告。今者大业丕建，百度维贞，道德齐礼，施政明刑，未尽善与？臣不敢诬也；胥尽善与？臣不敢谏也。窃思变不虚作，灾不易生。伏冀皇上身居九重，念垂四海，刑罚或有中，思所省之；财用或有未舒，思所节之；前后左右或有比暱，思所远之；游逸宴乐或有悖淫，思所禁之。罢不及之兴作，黜无益之崇奉。行将上回天心，下苏民命。成汤自责，不独专美于前；周武丰年，立可招致于后。绥万邦而迈周历，端在此矣。孤陋远臣，不识忌讳，以忧民者忧国，因以责己者望君。谨将灾民采食茭粃敬呈御览，并陈愚赤，仰祈鉴纳施行。

顺治十五年十月日题，奉旨：据奏汉、景、潜、沔一带，水灾异常，穷民无食无居，难以聊生，采取茭粃，苦楚不堪，深轸朕怀。著该督、抚按督同各地方官速图多方拯恤，务令得所！该部知道。

黄陂县〔堤防〕

县前河 通沙口，入汉江，春夏涨则〔午〕〔牛〕湖、武湖泛滥^①，河侧田地被淹，侵及城郭，漫入县市矣。

^①黄陂有牛湖而无午湖，“午”，为“牛”之误。本书卷四“疆域·黄陂县”“地名牛湖”可证。



百家陂 在县南三十里。

大坂山坡 在县东北三十里，下有大陂可灌田百亩。

千工堰 在县北四十里，可灌田三千亩。

以上系民间防水小堤，官民岁勤修筑，渐加高厚。

东寺畈 在县城外东北隅，原系高耸河岸。知县邵大业以其地当汉水之冲，更为城垣保障县城。溪河南岸理趣林相连共十三垵，每岁劝民修筑增厚。乾隆二年，蛟水冲溃。大业请修土堤七百八十丈六尺，乾隆三年三月竣工。

毛清河 在东寺畈对岸。乾隆二年，蛟水冲溃河坡一百七十七丈，知县邵大业详请修筑。

靳家湾 在县城西南数武。乾隆二年，蛟水冲溃河坡一百八十一丈，知县邵大业请筑二项工程，俱于乾隆五年五月告成。

孝感县〔堤防〕

后湖 溉田甚溥。明正统间，以湮塞，复加修筑。

白陂 县丞卢哲修。以上县东之陂也。

罗陂 研陂 长安陂 常林陂 大坡陂 长塘陂

以上俱广阳乡之陂也。

雀陂 马陂 东官陂 天娥陂 石花陂 裯陂 石堰

以上俱弘乐乡之陂堰也。

石陂 官陂 千工陂 黑龙墩 乌陂

以上俱郭下乡之陂墩也。

八口陂 陈陂 磨陂 清水堰

以上俱白云乡之陂堰也。

黄花垣 罗家垣 友邻垣 三合垣 天井垣 董家垣 戴家垣 宋家垣

高公垣 徐家垣 深沟垣 老鹳垣 鲁家垣 游家垣 游家小垣 汪家垣

万金垣 茶壶垣 彭家垣 李家垣 文家垣 长湖垣 冷家垣 简家垣

新城垣 游家垣 张家垣 涂柳垣 鲁班堤 鲁家垣 杨子垣 姜家垣

王家垣 叶家垣 张王垣 王家垣 张家垣 冯家垣 鹅湖垣 柳家垣

枯河畈 湾半垣 黑龙墩 七里垣 邓家垣 秦家垣 溢马垣 孟家垣

柘树垣 响水垣 刘家垣 虫注垣 蔡家垣 龙坑 黄丝堤 知府马文炜筑





李家新垣

以上垣田五十六处，原系湖乡，居民垒土为堤，高一丈，宽五尺，耕作其中。偶遇山水冲决，鸠众自修，赋无逋欠。后因胥役趲修扰民，康熙二十九年，知县梁凤翔据通邑呈请申详，勒碑县前，永行禁革。

论曰：九泽既陂，九川涤源，水土平而稼穡维宝矣。乃雍冀为高燥之区，荆扬属卑湿之境，相土作义，固有不可概论者。若地本旷衍，既不可任其葭苇丛生，委之湮漫，又不能禁其波流浸灌，妨我秋成，则堤其外而田其中，斯亦计之无容缓者也。然田之所仗者在堤垸，而堤之所患者惟冲决。有堤势稍低，即于低处流开水道而决者；有堤形虽峻，而横势稍薄，撼激奋迅而决者；堤虽高厚，而中不坚实，渍渐透漏而决者。

反复筹度，大抵筑堤之法有十：

其一曰审水势。东洗则西淤，下涩必上涌。审慎以立其址，如顺注之倾崖，则堤势宜〔纠〕〔迂〕^①；急湍之回沙，则堤势宜峻也。

二曰宽堤身。向以丈尺计者，今倍之，缓处半倍之。其挖压之田粮，悉予豁除，或以他处升科者补项焉。

三曰察土宜。尽去决处浮泥，必见根土，乃以黄壤加筑堤基，则不致浮松而易溃也。

四曰筑月堤。临水为堤，必为水啮，宜先勘要害所在，筑重堤以护之。

五曰塞穴隙。秋冬水涸，遍察獾狸蚁穴，极抵而阖塞之。春夏水涨，密视孔窠而坚补之。

六曰固杵筑。木杵不如石楔，石楔不如牛辄也。

七曰卷土埽。以萑苇为衣，以柳枝为筋，以黄土为心，以谷草为绋纆。初筑之土未坚，以柳枝为埽，横栖堤外，可资捍御矣。

八曰保成堤。多植杨柳，使根土相著，纠互连络，外复披以草鳞，斯不患剥肤矣。

九曰用石甃。冲波要处，惟石能遏水怒也。

十曰立排桩。以大木密排堤外，联以绋纆，结以竹苇，可免溃卸之患矣。

其防护久远之计，又有四：

^①“纠”，当为“迂”之误。



一曰立堤甲。每千丈签堤老，五百丈签堤长，百丈签堤甲各一人。各堤事宜，官司责成堤老，堤老责成堤甲，堤甲率堤夫十人守之。有垵之处亦设垵长、垵夫，法与堤甲同。凡受利者分堤若干丈，守堤者派夫若干人，一有疏防，责难他诿。勿徇乡保混报，勿任奸滑规避，勿纵胥役勒索抑派，则堤老、垵长之俸各得其人矣。

二曰豁重役。凡堤老、堤长诸人，各复其身，每遇编审，概除别差，则得专意堤防，而无他顾虑矣。

三曰置铺舍。照漕河事例，于堤上创立铺舍，往来栖止，防护无虞也。

四曰严禁令。凡有奸民盗决堤防者，照河南、山东例发遣，庶足以惩顽而警惰也。

查汉郡所属，汉阳不设堤垵；黄陂虽有堰坂，然民自修筑，丈尺尚不逾千，余皆山田也；孝感垣田五十六处，逼近湖河，变茅茨为沃土，诚泽国之急务；而汉川一邑，壤接潜、沔，惟恃堤垵以充国赋而足民食，一遇溃裂，率皆失所。盖与汉阳同居江汉之下流，必上有以分其支，而下又多开水口以杀其势，则匀匀禹甸，永服先畴，而成功甚巨。物力难齐，区画措置需以岁月，庶官考其成，民乐其业，斯无“载胥及溺”之患也哉。





《汉阳府志》卷之十六 地輿〔七〕

形势〔志 风俗〕

风俗〔志〕序

风之被物也无形，俗之成习也有渐。一人倡而众人和，有不期其然而然者矣。古者命太史陈诗以观民风，其机若顺夫民情者，而风行草偃，其权何尝不操之自上乎？闻弦歌于下邑，觐稚子之仁心。一贤守令已寢寢乎克奏其效，况当兹重熙累洽之余，仁义渐摩，厚生复性，安在刚柔燥湿之不可一德而同俗也。

作《风俗志》。

汉阳县风俗

《汉书·地理志》：“楚有江汉川泽山林之饶，或火耕而水耨，民食鱼稻，以渔猎山伐为业，故苦窳偷生而无积聚，信巫鬼，重淫祀。”此统楚地而言之也。

宋《志》曰：民性劲直决烈，多存仁义，有历世不分者。《皇輿考》曰：“民淳朴，怯于争讼，不好奢侈，有礼让之风。”

此专指宋以前之汉邑而言也。

《总志》云：士大夫学古高蹈，虽贫乏之家，亦志儒业、耻他途。孱弱之民，亦力耕渔、薄商贩，独尚巫崇佛，负性使气，乃故习云。

又云：汉阳，古郢国地。宋游定夫知汉阳，于视事之暇，召一郡弟子讲明道德性命之学，风俗丕变，士知向往。又张昌宗处家以义，八世不分，家属三千余口，男女分食，尊卑序坐，一钱尺布，皆归家长，不敢私匿，迄今江汉有令闻焉。顷年士大夫尤学古高蹈，居乡不事请谒，虽贫乏之家，亦急儒业而耻他途。孱弱之民，亦力耕儒而薄商贩。暴发而鸱张者，群非笑之，可谓善国。独喜巫崇佛，负性使气，乃其故习。而地冲力疲，数罹怀襄之害，汉川多盗，有烦防御云。

又云：汉口一镇，五方杂处，商贾辐辏，俱以贸易为业，不事耕种。



又云：地多湖荡，民多贸渔以生，惟土（着）〔著〕细民力农务穡^①。

又云：街居妇女，多事剪绣；乡农之家，勤于纺绩，每入夜登机，旦即成匹。此就宋以后兼著其俗之为美、为敝，以昭劝诫也。

又汉镇人烟稠密，地基价贵，多构楼居。小民租赁以为栖止，每单瓦楼房一间，一岁可得租价数金。其租者，男女卧榻厨灶悉在焉。一至盛暑炎蒸之际，男女老幼如坐蒸笼镬盘之中，病暑疾者不知几何人，犹有因热甚而致毙者，更可悯矣。然人不能弃此炎蒸之地以就清凉境界者，盖舍此而无恒产可以为生，就此逐末，则犹可以糊口耳。

又汉镇男子多事贸易，女子多事针黹，或为冠为履，或成衣成袜，皆晓夜为之，无事纺绩，近市镇故也。

汉川县〔风俗〕

旧《志》云：“民朴略，春夏力农，秋冬业鱼。其地云梦之薮，春水泛涨，农民迁于原隰耕垦，秋冬水涸，迁近湖泊，网罟以自给。”今无原隰之可迁，有就拾菱芡以疗生者。

又云：山川平易，人民朴野，尚俭嗇，鲜华丽，士皆向学问，颇有淳风。

又云：汉川四周皆水，湖居小民以水为家，多结茭草为簰，覆以茅茨，人居其中，谓之茭簰，随波上下，耕蒔牲畜，咸在其中。同冢一带，土瘠民贫，秋成，即携妻子泛渔艇转徙于河之南、江之东，采芰拾蚌以给食，春时仍事南亩，习以为常。

又云：汉川滨江，民多用牛车引水灌田，为他邑所无。

黄陂县〔风俗〕

宋苏轼云：陂俗尊德乐道，异于他邦。

旧郡《志》曰：黄陂民皆勤农桑、寡游贩，駸慕儒术。

旧邑《志》曰：陂俗阃德独茂，涂鲜游女。贾人行客过其都，未尝见妇女面，惟朝夕勤织纺而已。

又云：陂地瘠民贫，近风气寢薄，家无敝帚者，亦联车骑饰冠裳，为富贵容。

又云：陂民刁悍罔上，健讼轻生，视他邑倍甚，惟士风则駸駸日上。

^①“着”，为“著”之误。





孝感县〔风俗〕

旧邑《志》云：孝感负山滨湖，其山耸峻，故气多亢爽，其水清折，故人多颖秀。

又云：民多朴俭，士喜学问。

又云：邑弘治时质朴，鲜诈伪；正德以后，尚绮靡，岁稍穰，即治庭宇、饰裘马，耗费不貲，一遇凶岁，即坐匱告饥。

又云：五乡业各不同，白云之人，负山耕种，射猎采药，烧炭绩以自贍。郭下地瘠人纤，二乡文风稍逊，气劲易斗。广阳诸赵、弘乐，地滨湖，有渔利，其性靡，无积聚，然子弟好学，人文之盛，弘乐为最，诸赵次之。士子治经，《毛诗》居多，《尚书》次之，《春秋》、《戴礼》又次之，惟《周易》治者甚少。在昔童子小试，多至数千人，皆于城外，或阅武场、或陶家湾，扞竹为垣，各备几案。近则试于宪司行署或文庙，试者较少。从前簪组寥落，太平数十年后盛矣。甲榜每科常三四人，而戊戌则七；乙榜每科或七、八人，而辛卯则十有二，亦邻邑所罕有也。

论曰：汉郡四邑，环江带汉，山川雄秀苍莽，士喜读书，尚气节，为文苍古，浩瀚儒雅，盖彬彬矣。乡镇村落间，秀者勤诵读，朴者力农桑，其妇女皆躬纺绩、修内政，犹有古遗风焉。惟是好斗健讼，使气轻生，略相彷彿，无亦水土雄劲致然，而风俗移人，贤者顾不免耶？至于看春每岁立春日，郡邑大夫率属具鼓吹、盛仪仗，迎土牛于东郊，民老幼咸往聚观、贺年元旦，戚友互相庆贺，欢宴连旬、放灯自十一日至元宵夜，箫鼓花灯，连宵忘倦，或遇风雨，更于十五后补行之、扫墓清明前，率以纸钱、酒饌各祭其先塋、踏青二三月间，各选郊野胜处宴会、竞渡端午日，以角黍蒲觴相饷，或招徒侣操龙舟，伐鼓振金，飞渡争胜以为乐、乞巧七夕，闺中陈瓜果祭天孙，以乞巧慧、荐先中元日，俗以冥镪包簪袱以荐先代，或就浮屠氏建盂兰盆会，资其超拔、赏月中秋夜，罗饼饵肴饌，对月玩赏达旦、登高重九，佩茱萸，饮酒高阜处，效费长房故事、祀灶俗不知腊，惟于十二月二十四日敬祀灶神，谓之小年，近颇有先一日设祭者、团年除夕，无论官民，咸易春联，悬彩缕，灯烛辉煌，鼓乐爆竹，以辛蔬祀先，家人团坐，欢宴至晓，谓之守岁，小异大同，无容胪列。若信巫尚鬼，三楚皆然，不独汉境矣。夫维风范俗，豪杰之士自不随乡邦为浮靡，乃移而易之，又在学道之君子挽颓波以抵澄清，绝不等于桁杨之驱迫也。



《汉阳府志》卷之十七 地輿〔七〕

形势〔志 古迹〕

《古迹志》序

溯高标于岷首，洒泪偏多；搜秘字于岐阳，抗心独远。或风微而人杳，或名存而实亡，此嗜古之士所以遥望千秋，而喟然增叹也。然陵谷虽有变迁，而简册实资闻见。摩挲于断碣残碑之下，大可留连。凭吊于斜阳暮霭之余，都供歌咏。抚斯编者，能无动“高山仰止、景行行止”之思耶？

作《古迹志》。

汉阳县古迹

江夏古城 在大别山上。《水经注》曰：“翼际山上有吴江夏太守陆奂所（置）〔治〕城。”^① 即此也。

梁废城 在县东北大别山下。《方輿记》云：“梁武帝筑城于此。”《梁书·武帝纪》：齐中兴元年，帝自襄阳趋建业，“遣冠军将军邓元起、军主王世兴、田安等数千人会大军于夏首，因筑汉口城以守鲁山。”今大别顶横城即其旧址。

萧公废城 在城北五里。《图经》云：梁武初起兵，尝筑城于汉口。时未即位，故称萧公。

附明朱衣诗

森森长江水，巍巍别山台。
日月夏禹远，时运萧衍来。
鞭驱十万人，板筑飞尘埃。
遗祸迄大业，屠戮良可哀。
古城今荒芜，久立但徘徊。

^① “置”，《水经注》原文作“治”，是。





郤月城 在城北七里。《寰宇记》：“与梁城相对，以形如郤月，故名。”《水经注》：“沔左有郤月城，亦曰偃月垒，戴监军筑，故曲陵县也，后乃沙羨县治也。”《季汉书》：刘表以黄祖为江夏太守守此。吴遣凌统、董袭攻而擒之，屠其城，即此。

按：郤月废城先为曲陵，后为沙羨。旧《志》载郤月，复载沙羨废县，似两地矣。故削沙羨废县，不复重出。

马骑城 在郤月城西二里。《荆州记》：“城周五里，高一丈。”长棚冈即其旧址，未详何代所筑，长棚今亦无考。

汉阴城 赵《志》：在城西四十五里汉阴山下。未详何时所筑，遗址尚存。

诸葛城 旧《志》：在县西五十里诸山之阳，下临沌水，相传为武侯屯兵处。

沌阳废县 《宋书·地理志》：“沌阳子相，江左立。”后废。《水经注》：“晋永嘉六年，以陶侃为荆州刺史，镇沌阳。”旧《志》曰：水北为阳，沌阳应在沌水之北，以今县治西诸山之诸葛城为沌阳故城。或是。

林鄣故城 《水经注》曰：又东过林鄣故城北。按晋愍帝建兴二年，太尉陶侃为荆州刺史，移镇林鄣。又《宋史》咸淳七年，诏德安府侨治城头山，即此。

按：旧《志》载临鄣故城为汉江夏郡治所，其辨已见《沿革》。朱《志》引《元和志》谓沌阳城即临嶂城，统入一条。考《水经》：“沔水又东径沌阳县北。”注：“处沌水之阳也。”又东过林鄣即林嶂故城北。是沌阳、临嶂原属二城，不得混为一处。

铁钱废监 在大别山下，地名静江营。宋绍兴二年，知军皇甫焕奉命鼓铸，岁办钱十万贯。元初裁革。

牧马废监 在县治西南十五里。宋乾道四年，鄂州驻扎亲军都统制赵道奏允，于汉阳军择地修立。元至元三年裁革。

郎官湖 赵《志》：在郡城中，与县学泮池相并。唐开元中，李白流夜郎，遇故人尚书郎张谓使夏口，沔州牧杜公、汉阳令王公觞于江城之南湖。张公四望超然，请白标之佳名。白因号之郎官湖。席上文士辅翼、岑静以为知言，因赋诗刻于湖上。至元末兵燹，石刻遂湮。朱《志》曰：衣儿时从人渔湖中，利颇厚。是时湖可纵舟游，城内水汇于湖，乃自水门入江。其年为弘治庚申，自后居民于屋后培土为圃，为室家，而湖遂淤，今止存一沟耳。



附唐李白诗

张公多逸兴，共泛沔城隅。
当时秋月好，不减武昌都。
四座醉清光，为欢古来无。
郎官爱此水，应号郎官湖。
风流若未泯，名与此山俱。

宋李祈《郎官湖春日》绝句

其一

两山收雨暗平沙，遮断溪梅隔水华。
留得烟林作图画，依然松磴有梅花。

其二

空山玉蕊作琼瑰，到处寻花共往回。
欲识春风最奇绝，试来同看雨中梅。

其三

朦胧疏影月黄昏，著意春风入酒痕。
知是江梅喜佳客，倒垂花蕊照清尊。

其四

十日寻阴到水亭，水边杨柳一时青。
梅花过尽桃花恶，乞取山矾入净瓶。

锁 穴 在大别山阴。《三国·吴书·董袭传》：“孙权征黄祖。祖于大江中横两艨冲挟守沔口，以楫櫓大纆系石为碇。”又《晋书·王浚传》：晋伐吴。吴人于积险要害处，皆以铁锁横截之^①。今山阴四石穴尚存。

禹 碑 本在南岳岿嵎峰上。毗陵毛会建子霞摹刻于大别山禹庙前。

古 柏 在晴川阁侧。相传大禹所〔置〕〔植〕^②，根达于县北四十余里柏泉寺井中，今不存。又传禹植柏在今兴国寺。

①“吴人于积险要害处”，《晋书》原文作“吴人于江险碇要害之处”。

②“置”，当为“植”之误。





附宋苏轼诗

谁种庭前柏？僧言大禹栽。
不知几千载，柯干长苍苔。

元吴莱《观汉阳大别山禹柏图》诗

大别名山如伏螯，大别古柏如立猱。
旧闻夏后手所植，直轧南国无蓬蒿。
洪水曾当泽洞极，圣躬乃此胼胝劳。
乘舟荆衡地可尽，作贡云梦天争高。
一时栽树托所历，千载摩抚繄其遭。
本根盘拿屹负质，枝叶挺拔森旌旄。
碑日吟风耸楚阻，欺霜傲雪麇秦饕。
夜行夏首影弄月，晓舣鄂渚声吹涛。
信哉冥灵欲等寿，材比杗干终称豪。
屏除榴鬐虎豹泣，镇断夔魍蛟龙逃。
匠石徘徊却丧斧，篙工睥睨宁维艖。
吾知嘉木辨尔雅，但惜芳草遗离骚。
生平环辙若未到，幸此画笔何从操。
岂非神明护正直，使在方汉雄城壕。
楼桑出墙尚久特，巨栎蔽社犹坚牢。
惟兹所重有圣德，坐见余物真秋毫。
自来刘李富官室，命下荆蜀刮土毛。
一荣一枯验世道，勿翦勿伐临江皋。
穆满苍茫黄竹咏，重华惨淡苍梧号。
逖然万古万万古，西望叹息同沾袍。

鹦鹉洲 在县西南二里大江中。昔黄祖太子射，宾客大会。有献鹦鹉者举酒于衡前曰：“祢处士今日无用娱宾，窃以此鸟自远而至，明慧聪善，羽族之可贵。愿先生为之赋，使四座咸共荣观，不亦可乎？”衡因为赋，笔不停缀，文不加点，其辞曰：



维西域之灵鸟〔兮〕^①，挺自然之奇姿；体金精之妙质〔兮〕^②，（含）〔合〕火德之明辉^③；性辩慧而能言兮，才聪明以识机。故其嬉游高峻，栖跼幽深，飞不妄集，翔必择林。绀趾丹觜，绿衣翠衿，采采丽容，皎皎好音。虽同族于羽毛，固殊智而异心，配鸾凰而等美，焉比德于众禽？

于是羨芳声之远畅，伟灵表之可嘉，命虞人于陇坻，诏伯益于流沙，跨崑崙而播弋，冠云霓而张罗，虽纲维之备设，终一日之所加。且其容止闲暇，守植安停，逼之不惧，抚之不惊，宁顺从以远害，不违忤以丧生，故献全者受赏，而伤肌者被刑。

尔乃归穷委命，离群丧侣，闭以雕笼，翦其翅羽，流飘万里，崎岖重阻，逾岷越障，载罹寒暑。女辞家而适人，臣出身而事主。彼贤哲之逢患，犹栖迟以羁旅，矧禽鸟之微物，能驯扰以安处。眷西路而长怀，望故乡而延伫。（忤）〔忤〕陋体之腥臊^④，亦何劳于鼎俎？嗟禄命之衰薄，奚遭时之险巇？岂言语以阶乱，将不密（于）〔以〕致危^⑤？痛母子之永隔，哀伉俪之生离。匪余年之足惜，愍众雏之无知。背蛮夷之下国，侍君子之光仪。惧名实之不副，耻才能之无奇。羨西都之沃壤，识苦乐之异宜。怀代越之悠思，故每言而称斯。

若乃少昊司（晨）〔辰〕^⑥，蓐收整轡。严霜初降，凉风萧瑟，长吟远慕，哀鸣感类，音声凄以激扬，容貌惨以憔悴。闻之者悲伤，见之者陨泪。（故）〔放〕臣为之屡叹^⑦，弃妻为之歔歔。感生平之游处（兮）^⑧，若埏箴之相须，何今日之两绝？若胡越之异区。顺笼槛以俯仰，窥户牖以踟蹰，想崑山之高（峻）〔岳〕^⑨，思邓林之扶疏，顾六翮之残毁，虽奋迅其焉如。心怀归而弗果，徒怨毒于一隅。苟竭心于所事，敢背惠而忘初。托轻鄙之微命，委陋贱之薄躯，期守死以报德，甘尽辞以效愚。恃隆恩于既往，庶弥久而不渝。

后为祖所杀，葬于此洲，故名。《行水金鉴》注：洲在汉阳西南二里大江中，

①“灵鸟”，《四库全书·郝氏续后汉书》载此文作“灵鸟兮”，是。

②“妙质”，《郝氏续后汉书》载此文作“妙质兮”，是。

③“含”，《郝氏续后汉书》载此文作“合”，是。

④“忤”，《郝氏续后汉书》载此文作“忤”，是。

⑤“于”，《郝氏续后汉书》载此文作“以”，是。

⑥“晨”，《郝氏续后汉书》载此文作“辰”，是。

⑦“故”，《郝氏续后汉书》载此文作“放”，是。

⑧“兮”，《郝氏续后汉书》载此文无“兮”，是。

⑨“峻”，《郝氏续后汉书》载此文作“岳”，是。





尾直黄鹄矶，今荡灭无存。《一统志》收入武昌。

明戴尚书金云：洲聚于沙，而沙转入水也。汉、晋以来，横亘于鄂尾，接黄鹤，下逮国初，徙于汉滨，每经世复有消长，革而复营，或逆为泛，别为沱，随时异状，若神物然，而隐其机也。

附唐李白《鹦鹉洲》诗

鹦鹉来过吴江水，江上争传鹦鹉名。
鹦鹉西飞陇山去，芳洲之树何青青。
烟开兰叶香风暖，岸夹桃花锦浪生。
迁客此时徒极目，长江孤月为谁明。

竹 斋 唐尚书郎张谓出使汉口，与其弟沔州判官张谨相与酬唱于此，今不知其处。

附唐张谓诗

羡尔方为吏，衡门独宴如。
野猿偷纸笔，山鸟污图书。
竹里藏公事，花间隐使车。
不妨垂钓坐，时鲙小江鱼。

柏 泉 相传禹植柏于大别山头，根达于县北四十里柏泉寺井中，故名，今无。

伯牙台 一名琴台，一名碎琴山，在大别山尾。相传钟期听琴于此。县治西五十里马鞍山，有村名集贤村，亦传是钟子故居。

附明阮汉闻《碎琴山》诗

江色天容斗寥廓，欲雾蒸烟幻诡作。
蹄涔瀾洑走一切，野夫日倚晴川阁。
支公谈理理不缚，一茗一酒对斟酌。
大别遥登古尚书，鬼斧神锹穷禹凿。
高山流水真发趣，可怜古曲不成句。
沙回树合拥青岑，云是伯牙碎琴处。



嗟乎牙心未易识，七音操缦岂难测。
 损箎既叶金兰心，峨洋不藉丝徽力。
 折杨皇萼嗑然笑，我自无弦老孤调。
 输心背面佯相亲，云翻雨覆皆何人。
 琴到于今不胜碎，千古琴声写交态。
 僧雏告我暝钟催，水石湍洄月出大。

石榴花塔 在城西一里。《宋史·五行志》：绍兴间，汉阳军有孝妇杀鸡奉姑。姑食而死，姑女诉于官。妇坐罪，无以自明，临刑折榴花一枝，插于石罅，祝曰：“若毒姑，花即枯瘁。若属诬枉，花可复生。”其后果秀茂成阴，岁有花实。时人哀之，谓天彰其冤，立塔花侧，以表其事。岁久，塔废。明主事黄一道董储汉阳，命有司伐石以识之。今碑亦不存。

附国朝萧广昭诗

梅山远对武昌门，霜影迷离孝妇村。
 杜宇啼残千点血，小桃梦断一枝魂。
 返香无药刀环冷，落叶辞根塔路昏。
 鸚鵡奇冤传鼓史，只鸡怨恨亦堪论。

晴川阁 在大别山头。明知府范之箴建，程金记。其后万历四十年，知府马御丙以为汉阳关锁，非仅游览之地，再修之。顺治九年，御史聂玠、知府王泰交，雍正五年知府柳国勋节次修葺焉。

附明李维祯《晴川阁》诗

登楼不作望乡悲，芳草晴川此一时。
 浪色桃花歌共艳，春声杨柳递相吹。
 风涛自稳鱼龙窟，星月空喧乌鹊枝。
 锦缆牙樯君莫问，扁舟吾已学鸱夷。

国朝施闰章《晴川阁至大别绝顶》诗

桃花洞口桃花开，郢月城边对酒杯。
 大别风高神禹庙，汉川云起楚王台。





江沉铁锁鱼龙蚀，鹤去仙楼鸛鹤来。
绝调千年空怅望，碧烟芳草暮天哀。
漠漠晴川古木稀，褰裳绝壁揽春晖。
水吞山郭蛟还斗，风起江城花自飞。
集浦帆如千树密，傍岩僧共片云归。
郎官湖畔犹堪醉，细雨东来点客衣。

涌月亭 在府城隍庙后，巨石上有“涌月”二字，宋黄清老因建亭其上。今亭废，石亦不存。隔江黄鹤楼后石上，亦有此二字，甚遒劲，近鲁公，不知书者何人，岂互相临摹耶？抑好事者载以东渡耶？

桃花洞 在大别山下，有桃花夫人祠，即息夫人。《左传》：“蔡哀侯为莘故，绳息妫以语楚子。楚子（人）〔如〕息^①，以食入享，遂灭息，以息妫归。生堵敖及成王焉，未言。楚子问之，对曰：‘吾一妇人，而事二夫，纵不能死，其又奚言？’楚子以蔡侯灭息，遂伐蔡。秋，七月，楚入蔡。”《列女传》：楚伐息，破之，虏其君，使守门。将妻其夫人而纳之入宫。楚王出游，夫人遂出见息君，谓之曰：人生要一死而已，何至自苦。生离于地上，岂如死归于地下哉！乃作诗曰：“谷则异室，死则同穴。谓予不信，有如皦日。”息君止之，不听，遂自杀。息君亦自杀。楚王贤其守节有义，乃以诸侯之礼合而葬之。君子谓夫人说于行义，故序之于诗。

附唐刘长卿《息夫人庙》诗

寂寞应千载，桃花想一枝。
路人看古木，江月向空祠。
云雨飞何处，山川是旧时。
独怜春草色，犹似忆佳期。

明方日升《桃花洞》诗

洞口迷离春复秋，几人幽赏赋来游。
云封乱石桃花少，月照平湖茂草稠。
粉黛三年空不语，溪山万古尚含愁。
只今惟有长堤柳，犹以依依念故侯。

①“人”，阮元校刻《十三经注疏·左传正义》作“如”，是。



按《左传》，息妫不死，生二子堵敖、成王，已有明证。而刘向云云，岂别有夫人耶？然《大车》今亦不云息夫人所作，自当以左氏为正，并存刘说，亦乐与人善之意。至夫人身入楚宫，已与息绝。邑非楚都，不当建祠，前贤已言之矣。

洗马洞 在禹功矶南。相传关公尝洗马于此。

关王洞 在大别山北，一名藏马洞。旧《志》：蜀、吴用兵，关公曾藏马于此。傍有武安王庙，今废。洞内有磨石，传为公磨刀处。

清光亭 在郎官湖上，本名“郎官亭”，宋咸淳间改今名，近废。

附宋蒋之奇《郎官亭》诗

郑圃仆射陂，汉阳郎官湖。
郎官何为名？张谓佩使符。
泛觴江城南，乃与太白俱。
明月一万顷，清光天下无。

凤栖楼 在县治后。唐时建，宋知军刘辟疆记。今废。

秋兴亭 在凤山巅。唐刺史贾载建，中书舍人贾至为记。宋元祐初，知军吴处厚新之。景泰中重修，以杜甫《秋兴》八首及唐宋名贤题咏刻于石，后为雷所碎。

附唐贾至《秋兴亭记》

在阳而舒，在阴而惨，性之常也。履险而栗，涉夷而泰，情之变也。观揖让而退，睹交战而竞，目之感也。闻韶濩而和，聆郑卫而靡，耳之动也。夫其舒则怡，惨则悴，栗则止，泰则通，退则无咎，竞则有悔，和则安乐，靡则忧危，情性、耳目、优劣若此，故君子慎居处、谨视听焉。

沔州刺史贾载，吾家之良也。理沔州未期月，政通民和，于听讼堂之西，因高构宇，不出户庭，在云霄矣。仰负大别之固，俯视沧浪之浸，阅吴蜀楼船之殷，览荆衡蕲泽之大。自公退食，游焉息焉，图书在左，翰墨在右，鸣琴洋洋，亦有旨酒，性得情适，耳虚目开，且处动则倦，理倦莫若静，处静则明，惟明以理动^①。穷则变，变则通，通则久。今沔州灵府恬而神用爽，政是以和。

①“郎官亭”，《宋诗纪事》作“青光亭”。

②万历《汉阳府志》载贾文，此句作“且处动则倦，莫若处静，静则明，以理动”。





观其前户后牖，顺开合之义，简也；上栋下宇，无雕凿之饰，俭也。简近于知，俭近于仁。仁、知居之，何陋之有？况乎当发生之辰，则攒秀木于高砌，见莺其鸣矣；处台榭之日，则纳清风于洞户，见暑之徂矣；洎摇落之时，则俯灏气于轩槛，见火之流矣；值严凝之序，则栖同云于肩闑，见雪之纷矣。政成讼清，体安心逸，而诗人之兴，秋兴最高，因以命亭焉。

余自巴丘征赴宣室，歇鞍棠树之侧，解带竹林之下，嘉其俯仰，美其动息，乃命进牍抽毫以记之。

双松亭 在秋兴亭东。唐李白将游衡岳，过汉阳，于此留别族弟浮屠法浩。

附唐李白《双松亭留别法浩》诗

秦欺赵氏璧，却入邯郸宫。
本是楚家玉，还来荆山中。
符彩照沧溟，精辉凌白虹。
青蝇一相照，流落此时同。
卓绝道门秀，谈玄乃支公。
延萝结幽居，剪竹绕芳丛。
凉风拂户牖，天籁鸣虚空。
忆我初来时，葡萄开景风。
今兹大火落，秋叶黄梧桐。
水色梦沅湘，长沙去何穷。
寄书访衡峤，但与南飞鸿。

寥廓亭 在秋兴亭东。未知建自何时。宋宣和中，知军事蔡纯臣重修，改其名曰“仁风”。元末毁于兵燹。

拱北楼 在县西一百六十步。宋皇庆元年，知军胡介常于楼下设酺，与民同乐。淳祐三年，徐安民来守汉阳，更名“春风楼”。元陈益稷又改名“拱北”。后经兵燹，不存。

附元陈益稷《春风楼》诗

突兀重檐倚碧空，一间虚白四玲珑。
马嘶古渡江村晚，鹤翥孤城海峤风。



万顷波涛帆影外，两城烟雨角声中。
朗吟人在清高处，拱北丹心列宿同。

太白楼 在城北十里。元末废于兵。

附唐李群玉《太白楼》诗

江上层楼翠霭间，满帘春雨满帘山。
青枫绿草将愁去，远入吴云暝不还。

南纪楼 在县治。宋蔡纯臣重修，今改建为南门城楼。

附宋夏倪《南纪楼》诗

江发岷山如瓮口，汉从蟠冢又东流。
滔滔从此为南纪，我忆禹功时倚楼。

宋冯杞诗

岂忍轻离江汉州，去思日夜逐东流。
可怜南纪楼前路，常与邦人忆蔡侯。

白云楼 即府署前门楼。

附宋孙珪《白云楼》诗

樵歌南习巴巫远，客棹西归沔水分。
乘暇登临终不厌，两州鸣角任相闻。

月树亭 在大别山。明秦中丞耀建，推官刘熙改曰“宛在”。

梅岩 在凤栖山麓石壁上，摩挲得之，有“凤立梅岩”四字，大如斗，甚遒劲，系汉阳令赵时题。其左，石壁又有“端平丙申”四小字，乃宋理宗即位之十二年也。元时安南王陈益稷寓此，号梅岩叟。

水明楼 在凤山门内，一名“望卓”。邑人王袞建，以居李卓吾赞者。公安袁宏道兄弟至汉阳，辄榻其上，唱咏甚伙。今废。





附明袁宏道《坐王章甫水明楼》诗

经年劳碌马头间，久客虽归也不闲。
争似水明楼上坐，浪花影里看春山。

桃花坞 在凤山门西一里。

鲁肃湾 在县南。

附明王一翥《鲁肃湾》诗

鲁肃不能扶汉鼎，湿风黄叶走江湾。
丈夫一念蹉跎老，敌国孤忠指顾间。
烟点水痕生暮雨，林拖岚影隔乡关。
年深野渡旌旗迹，桡打波声两岸山。

旧《志》又载沧浪水云：刘澄之《山川记》云在沔口，即屈原逢渔父处。或又以在均州，不可得其实矣。按《禹贡》：“漾东流为汉，又东流为沧浪之水。”《水经注》：“武当县北四十里，汉水中有洲曰沧浪洲”，水曰沧浪水，即今均州地。今《均州志》有沧浪水，而汉阳《山川志》古本俱无沧浪水之名，则此水似属均州为正，所云在沔口者，特沧浪之下流耳，乌得载入《古迹》而傅会为屈原逢渔父处耶？故削去。又姑苏有沧浪水，苏子美卜居处。东省《峯县志》：“县北有沧浪渊。”皆与均州之沧浪无涉，因并记之。

旧《志》又载赤壁云：《荆州记》临漳山南峰谓之乌林峰，亦谓之赤壁。吴周瑜破曹操处。《汉阳图经》云：赤壁又名乌林，在汉川县西八十里。今按赵《志》云：《水经》述江水源流，“江水左径〔上〕乌林南”^①，酈道元注曰“〔左〕〔右〕径赤壁北”^②，则赤壁、乌林非一地一名也。况操舟自江陵顺下，周瑜自江州逆上，两军相遇赤壁，则赤壁当临大江。临漳、汉川皆偏僻，非大战之地，况巨舰千艘，非汉水可容，地多洲渚，腾骧安施？则此地赤壁宁足信耶？又以周陂旧称乌林乡，为操走乌林之证，不知操先败赤壁，后走乌林，则乌林又在赤壁之西矣。今所称乌林在赤壁之东，虽或包赤壁而称之，然不逾二十里，而止一驰突已过矣，宁俟奔北而后走耶？其非操鏖战之所，愈较然矣。自昔江汉间言赤壁者三，

①《四库全书·水经注》“乌林南”前有“上”字，是。

②“左”，《水经注》原文作“右”。



惟江夏之说颇合载籍，虽东坡二赋，亦一时江上感怀之作。今汉川赤壁，即旧载所云“一在汉水之侧、竟陵之东者”是也。又省《志》：山在嘉鱼县西南八十里大江滨，西界乌林。沔阳州《图经》：汉建安十三年，周瑜破曹操于此。上有“赤壁”二字，并名人诗赋刻石，现存。省《志》《杂记》又云：世传赤壁有五：汉阳、汉川、黄陂、嘉鱼、江夏也。胡三省云：《水经注》：“江水自沙羡而东，〔右〕径赤壁北。”^① 唐《元和志》：赤壁山，蒲圻西百二十里，北岸乌林与赤壁相对，即周瑜用黄盖策焚曹操船处。杜佑《通典》曰：赤壁在鄂州蒲圻县。《武昌志》：曹操自江陵追刘备至巴丘，遂至赤壁，遇周瑜兵，大败，取华容道归。赤壁山在今嘉鱼县对江北之乌林，巴丘即今巴陵，华容今石首也。盖赤壁初为蒲圻地，今属嘉鱼，正在巴陵下。余言赤壁皆非。至黄州赤壁，乃赤鼻，苏赋特借用耳。

按旧《志》与省《志》辨赤壁，可谓明确矣。然旧《志》既知阳、川之赤壁非吴魏鏖兵处，而复列其名于《古迹》，何耶？《荆州记》及《图经》所载赤壁、乌林，名偶同耳，故《古迹志》内一并削去。

丘墓附

汉

刘琦墓，在鲁山。琦，荆州牧表之子。

祢衡墓，在鹦鹉洲，今没。

唐

牛夫人墓，在城西三里。旧传牛僧孺镇鄂州时，其妻葬此。

〔母〕〔毋〕丘将军墓^②，在城西五里。

宋

参军张沂墓，在沌口。

参军张文翼墓，在府城。

明

教授赵弼墓，在城西四十里。

主事陈福墓，在马家湖。

御史傅桂墓，在九真山北麓。

给谏胡金墓，在马家湖北。

①《四库全书·资治通鉴》胡三省此注中，“径”上有“右”字。

②“母”，当为“毋”之误。





郎中董寅墓，在巨龙冈。
御史朱衣墓，在汤家山。
尚书戴金墓，在公仁山，赐祭葬。
御史朱宠墓，在千子山。
员外郎介肃先生张绪墓，在马鞍山。
封给事李练墓，在九真山北。
给事李宗鲁墓，在龙霓山。
太常王秩墓，在蒲潭。
知府王一麟墓，在曹庄。
给事曾廷芝墓，在沌阳冈。
祭酒萧良有墓，在沌口，赐祭葬。
参政萧良誉墓，在万家湖。
副使孙瑀墓，在索子河。
府尹秦聚奎墓，在龙湖。
知府吴嘉谟墓，在曹庄。
布政萧鸣甲墓，在曹庄。
太仆李若愚墓，在崇文岭。
布政萧丁泰墓，在孙家嘴。
知州王家宾墓，在万家湖。

国朝

都督徐勇墓，赐祭葬，在县西七里。
大理卿李昌祚墓，赐祭葬，在千子山。
学士熊伯龙墓，在新寿堡。
大学士吴正治墓，赐祭葬，在小蓼山。
分巡饶南九道江殷道墓，在老实陈。
绍兴知府张三异墓，在柏泉。
都察院左都御史江蘩墓，在蔡家岭。
黄平知州赠参议道罗鸣序墓，赐祭葬，在新添铺。
高节妇墓，在蔡镇河街。墓已平，亦不详其夫家姓氏。后载府厅各职衔，皆隆、万时任也。岁久，秽塞碑碣，附近居人往往传其为祟。康熙中，里绅项合众姓更新之，近碑前后数十武，无敢犯者。



《汉阳府志》卷之十八 地輿〔七〕

形势〔志 古迹〕

汉川县古迹

甌山城 在县东南十里。晋朱伺与李桓、杜曾相持，屡战甌山下，筑城戍守，故名。或云后周甌山县治此。

鸡鸣城 在县西百里。旧传曹操败乌林时，筑此城以驻兵，闻外军将至，鸡鸣而出，故名。按曹兵败赤壁、走乌林，在今嘉鱼境。即云经过，当奔窜不遑之际，何暇筑城为久驻计？傅会之说，原无确据。然取义鸡鸣，亦未可考也矣。

附明朱襄诗

野外钟声鸡乱啼，乌林犹在古城西。
尘埋铁骑黄云合，草拂旌旗翠羽低。
先主竟承东汉统，老瞒空守北军鞬。
九泉霄汉看诸葛，伊吕声名万古齐。

和公城 在县东北十七里，后周所筑。隋末，贼董道冲叛，和操领兵捍此城，故名。

梁褒城 在县南五里，周宣政中筑。士人梁褒主之，故名。

梅城二里 即梅城里。

附余庠诗

其一

柳阴深处系孤舟，钓罢归来乐自由。
烂醉不知明月上，何妨风浪打船头。

其二

钝斧磨穿石上苔，山中寒尽又春来。
采樵遇着烧丹客，借问碧桃开未开。





其三

春暖春寒布谷啼，白云深处好扶犁。
闲来检点南山事，豆子苗生麦又齐。

其四

黄发儿童著地眠，茸茸青草暖生烟。
醒来不见阳陂犊，寻到落花流水边。

废汉川县 在县界泐山下。《唐书·地理志》：武德四年，析汉阳置，宋改名汉川。

钟离古城 县东五里，即今五里墩。《路史》：楚地，宜咎所城，在汉阳军。《左传·昭公四年》：楚沈尹射奔命于夏汭，箴尹宜咎城钟离。即此。赵《志》谓濠州钟离郡，战国时为吴楚之邑，恐非。此与濠之钟离，自是两地。成公十五年，晋、吴所会者，濠之钟离。昭公四年，宜咎所城者，汉之钟离。《路史·国名记》甚明，赵泥为一处，固矣。

郢城 《盟会图》曰：郢子国在安州，楚灭之，以封斗辛。有郢公庙、郢水。郢城旧县在县北三十里，即大赤乡城。

宝花台 《明一统志》：在县西南五里，上有雷使君庙。

双凤台 在周陂乡。

万魁台 在县东南一里。明崇祯时，邑令郑公建。康熙戊申，巡抚林公重修。为一邑巨观。

附国朝陈国儒《万魁台》诗

台阁入云中，凭栏一望通。
山光层树隔，鸟语暮云空。
邀月杯堪把，临流赋独工。
后先传胜迹，竞说楚雄风。

戊子圻 在县西南十五里，相传关王驻兵处。

大赤 在县西北三十里。《通志》云：曹操乌林之败，自鸡鸣出走，至大赤天曙。亦傅会之说也。

系马口 在县西南三十里，旧传关王系马处。



同冢 一名疑冢，县西百里周陂乡。相传曹操兵败乌林，诈称已死，作冢七十有二，使人莫知己所在，故名。

旧《志》云：冢七十二，其巨擘群冢者为同冢，余皆疑似之形，相传曹操所造，防发掘也。夫许昌距此千余里，且此地一望平洋，非有形势可据，曹之造此何为？且去冢数百武有曹操庙，塑魏武帝像，岂因同冢之疑而祀之乎？至相传有金壶银杯及兵器之属。欲贷者，先夜焚楮冢前，称假某器为用。次早具如所贷，罗列冢前。事毕还之。后有黠者执不归，即鬼祟其室，惧返其物，嗣则冢门闭而绝不与世通矣。此语更属荒唐，然愚民争信，百喙莫胜。崇祯庚申，本邑游手之徒聚此，期日发冢取兵器，几成大患，赖彼地著姓合众剿灭，不然，祸且不测矣。岂曹操败赤壁时，其奔北者或经此，故后有是说与？抑汉都长安，彼时左家渡未经冲决，江汉之游秦者途或出此与？昔为巨镇，今虽荒野，阴雨之后，土人尚有掘得城钉者，则操之经此，或不可知，而遽信为藏骨之处，可乎哉？

又云：前《志》于同冢之事略不置辨，且于《艺文》多收题咏，侈为古迹，真所谓“俗语不实，流为丹青”者也。赤壁之后，曹公疾走华容，喘然恐后，百里之间，追兵四迫，何暇召徒征众作此七十二冢以疑敌人乎？汉高扞足，颜竣同舟，姜维、杨仪反旗鸣鼓以走仲达，盖人心所系，生死易机。曹公虽败于一时，而大势所在，犹足奋玄德之心，生瑜、亮之忌，何肯自言已死，作冢累累以张敌威，而剗己锐？无稽之事，不足信也。聊志于此，以待识者。

按：旧《志》辨同冢甚明，盖古来周陂、大志之间，兵乱相仍，或为埋暴骨之区，或为藏兵器之地，其时代不可考，不得执一说以为断也。然要为古迹无疑，但以为曹操时所筑之疑塚，则断无是理耳。

丘墓附

周

令尹子文墓，在县西二里长城乡地方姚公山。

青风处士魏闾石碑，在于县东台阁左侧。

晋

朱伺墓，在甌山下。

威烈将军墓，在梅城。

元

胡丞相墓，在县北周陂乡。





明

御史尹晋墓，在鸡鸣乡。

御史尹良任墓，在系马口。

主事岳从义墓，在系马口，赐祭葬。

黄陂县〔古迹〕

石阳城 在县北十五里。吴征江夏，围石阳，不克而还。刘表为荆州刺史，使黄祖于此筑城，因名黄城镇，今名西城子。

冶城 在县东南二十里。相传梁武为刺史，冶兵器于此，旧迹犹存，今名东城子。

安昌城 在县北十五里。《元和郡(国)(县)志》^①：齐高帝筑以捍陈寇。《隋志》陂有安昌郡，开皇初废。

南司州 在县北三里独家村，北齐置，后周改曰黄州，隋废。《唐书·地理志》：“武德三年，以县置南司州。七年，废。”苏轼诗“五年一梦南司州”即此。

双凤亭 在县东。相传张夫人梦双凤投怀，生二程。天顺间，佾事沈靖建，亭久废，今重修。

克敌军寨 在县北五里，乃前代筑以御寇者。

附明狄同然《克敌军寨》诗

黄尘四塞盗纵横，驰逐何人仗义名。

左泽列棚团练密，依山树帜指挥明。

不妨女织还供饷，未辍男耕亦典兵。

封豕长蛇艾薶尽，至今原野寂无磷。

仙侣台 在县北五里，峰岚崛起，流水绕匝，俗传昔有群仙聚会于此。

钓鱼台 在县东北五里，有盘石临河干，相传宋隐士垂纶于此，亦十景之一也。

^①“国”，当为“县”字误。



附屠达《钓鱼台》诗

曾传垂钓寄寒汀，一片清光映客星。
江气向人原自碧，月魂连树不知青。
虚无何减琉璃域，咫尺如临白玉屏。
何事羊裘汉男子，鼾声犹入故人听。

望鲁台 治东逾河百武，二程夫子筑以望鲁。昔有乔松数十株，明景泰间，同知蔡绶建祠于其麓，久废，今重建。

附国朝邵长蘅《鲁台春望》诗

柳碧莺啼潏水隈，山从树杪出层台。
川光晴抱孤城转，野色青延远嶂来。
斜日荒林群雀噪，春风古冢一花开。
先生杖履曾游地，双凤亭空暮角哀。

涵虚亭 旧在二程祠内。弘治间，推官罗翰建，久废。

附贡瑞《涵虚亭》诗

半亩方塘一个亭，森森万象入虚明。
百年心印今犹古，怪得蚊蛙不敢鸣。

聪明池 在二程祠内。旧传蛙不鸣，蚊不鼓，旱涝不涸。后人掘地得土龟，列八卦。龟为人窃去，遂不验。正德间，御史王相修，久湮，今复浚。

理趣林 在二程祠前一里，乔木耸翠，即先生傍花随柳处。

附赵镛《理趣林》诗

偶鼓登临兴，因过理趣林。
马嘶池畔柳，鸠唤陇头云。
竹露看朝爽，松风拂午薰。
酒帘花外舞，买醉采香芹。

板桥 在西郭外。伐石为桥，上有仙人足迹，亦十景之一也。



附陈寿《板桥》诗

仙翁抛履定何年？漫灭溪边石半残。
华表乍栖人已远，飞虹欲渡马犹难。
身骑苍兕天留舄，足踏青龙迹未刊。
长伴桥头杨柳色，年年春拂玉栏杆。

思贤堂 在县治尉厅。宋时邑人建，以景仰二程先生。

石柱 在县治西。县旧无公署，迁徙靡常。宋嘉定三年，县簿应行之始迁今治，刘恢代秩，砢石柱以纪其事。

丘墓附

唐

木兰将军墓，旧《志》又谓为朱氏，不知何代人。辨语详见“木兰山”下。明时盗发其墓，风雷卫，止。

明

尚书凌公墓，在赶金城。

孝感县〔古迹〕

汝南城 梁置，本吉阳县地。《隋书·地理志》：梁置汝南郡，西魏改郡曰董城，寻废。

义阳城 在县北百里。《隋书·地理志》：梁置此郡，“西魏改为南司州，寻废”。

废澧岳郡 在县西。《隋书·地理志》：西魏置，隋“开皇初废”。又有澧阳故县，唐置。

西湖村 在县治北百二里。旧有西湖庙，《方輿胜览》云：宋太祖微时游孝感西湖村，因渴，索酒村姥家。持酒以进，言榷禁甚严，私酿，幸秘之。与之金，不受。太祖践位后，宽西湖酒禁，仍置万户酒馆。按：五代后汉时，董宗本为随州刺史，宋太祖往依焉，有紫云黑龙之祥。《宋史·太祖本纪》云：“后汉初，太祖漫无所遇，舍襄阳僧寺中。”今竟陵应城有义河，太祖赐名，则随、郢、襄、沔皆漫游之地，而西湖村或亦足迹所寄也欤？





附明罗勉《西湖村》诗

高馆临湖旧业荒，青帘匝岸拂垂杨。
金舆玉辇无消息，犹想当年酒瓮香。

东湖村 《一统志》云：宋徽宗时，孝感东湖村夜有光烛天。农人闻于官，掘得成周九鼎贡于朝。按：九鼎之说，遍考诸书，惟王嘉《拾遗记》以为：五者，象阳法；四者，象阴数。《（诏）〔召〕诰》正义云^①：九牧贡金铸鼎，故称九鼎，其实（二）〔一〕鼎^②。《史记》云：秦时九鼎没于泗^③。无一时尽没之理，盖亦书《正义》之解耳。但泗水去楚甚远，周鼎何由得至潯邑？陈士元云：三代铸鼎，祭祀、封建、燕享、锡赉无不用之。或成周褒赐诸侯之物，故楚得有耳，东湖之鼎，得毋然欤？

读书台 在县东五里。宋庆历间，二程夫子读书于此。

附国朝梁凤翔《读书台》诗

凤凰台上拜先生，过化犹传诵读声。
正学中天月皎皎，百家谁敢妄争鸣。

尧夫亭 宋治平间，范纯仁为安州通判，常饯客于九峻山。后人思慕之，遂为亭。

小隐庵 在白云山，元察罕隐居处。

东坡亭 在杨店，县东五十里，苏轼滴黄州憩此。

三岩 《图经》云：孝感九峻山，后梁时相传王铁枪所居。上有八境、宝陀、罗汉三岩。

神鼎阁 在北门外，今废。

升仙台 在董家湖，俗传织女升仙处。

仙姑洞 在望府山下，详见《山川志》。

凤凰冈 晋永和四年，凤产九子于东冈。《方輿胜览》云：冈在孝感县东

①“诏”，当为“召”之误。

②“二”，当为“一”之误。

③“九鼎没于泗”句恐误。张守节《史记正义》云：“秦昭王取九鼎，其一飞入泗水，余八入于秦中。”





四十里，又名乳凤冈。

黄龙岩 上书一“大”字，未详何代？数武有石巉岩，书曰“阿弥石”。相传有僧止颂阿弥佛号，久之，于此化去。

塔儿潭 有山临潭上，存小石塔七级，宋时建。

二郎畈 相传孙权校猎于此。

附国朝王梓《二郎畈》诗

楚豫分疆界，山连涧水清。

城无三里迹，畈有二郎名。

古道丛林合，平畦细甲生。

地偏民俗俭，两足慰深情。

哭竹港 世传孟宗哭竹处。

会水台 在小河溪西北五里，峭壁嶙峋，如莲花六出，其上旧有寺，明季，乡人避兵者筑寨自保。

岁丰楼 邑东北七十里，周里河之右弘乐乡。

新市 《后汉书》王常起新市、平林之兵，即此。

新店碑 马伏波，史载茂陵人，而孝邑新店有古冢，民居掘得汉马新息侯墓碑。其新店相传即新息侯所开新市也，孝邑滑石冲诸生能道其详，岂新息侯乃自楚迁，是其祖墓，抑或其孙改葬此土也？

董孝子祠 在北关外，明正统时建。顺治初，知县张擢士移建治东会真观。

附董孝子祠考

邑以孝称，谁无本始，诂可不思其义哉？顾孝，公理也。吾邑独擅有美名，抑何幸欤？载刘宋时，以汉末孝子董永故，析安陆县东境置孝昌县，属江夏郡。余尝心焉疑之。

按永迹本末一见于《逸事编》，一见于《孝顺事实》；一云奉父来徙，一云先避兵汝阳，再徙安陆；其鬻身营葬，及织女下配事，二书略同。然史传皆不载，说者谓闾巷砥行之士，简编逸缺者何可胜数？

再考《輿地志》，湖南长沙县有董永祠，江南如皋、博兴二县俱有永墓。河南汝阳县有二孝庄，《一统志》谓为孝子蔡顺、董永所居。岂先贤过化之地，人争宝重，抑天女下配事涉诗张，以是流播尘寰欤？且吾邑之先永而孝著者多矣，



汉之黄香、吴之孟宗，皆江夏人，而今之汉黄承德实古江夏郡地，即谓香与宗为吾邑有可也。旧《志》载句章董黯为汉江都相仲舒文孙，事母孝，和帝尝旌异行，召拜郎中，不就，后侨寓孝感。唐吏部尚书徐浩题其碣曰“汉孝子董黯之墓”。然则董氏之先，不有前永而行义表表者乎！是县之以孝得名，不自永始也。

相传祠始明正统建北关外，顺治初，张令擢士移建治东会真观。向余官京师时，先大夫尝云：张少时茶苦孝养，盖有与永合者。同时乡先达题赠甚多，独孝廉黄文旦先生联语大蒙击赏，然亦不复记忆。董祠之隆，其肇于张公乎？邑令曹下车谒文庙毕，即躬诣祠行礼，端化源、示标准也，课士复以祠考命题，诸同人索书本末，余因摭管见以应，兼以质夙疑焉。

时乾隆甲子夏四月

邑人王廷鸿著

丘墓附

汉

董黯墓，在县北三十里董城，有唐徐浩所书碑碣。

董永墓，在县东十里广阳乡，其左有塚，相传为永父墓，即永鬻身葬者。旧有题碣碑文，久废。康熙三十三年，知县梁凤翔复修。又按如皋县百二十里博兴北崇德社、会稽县五云铺皆有永墓，更有言永葬鱼台长山者，今应以孝感之广阳乡者为是。至今“董墓春云”为潯川胜境。

附明罗勉诗

佣身藏父孝名存，马鬣犹封汉代坟。

冉冉春云常不散，会迎织女在天门。

宋

四君墓，在刘家店台子冈下。天启五年，邑中丞刘应遇方为部郎，卜地于此，葬其先人，掘土得砖。砖穿而四椁见，急掩之，且修茔去。其夜，梦朱衣冠笏者四通谒曰“宋四君顿首谢。”应遇为立石表之曰“宋四君遗墓”。竟不知何人也。

元

平章察罕墓，在白云山，知县余桂萼题碑。其母河东太夫人李氏墓在教子山。平章余仁裕墓，在天娥陂。





明

都御史张瓚墓，在县治。

按察杨璋墓，在县东三十里。

赠都御史傅伟墓，在枣源河。

布政王琰墓，在天娥陂。

太仆程学博墓，在鲁家寺。

巡抚刘应遇墓，在弘乐乡。

尚书程注墓，在张家山。

太仆丞程学颜墓，在县东。

国朝

赠大学士熊祚延墓，在弘乐乡邓家田。

侍郎严正矩墓，在弘乐乡殷家山。

夏节妇墓，在金壁山。长孙翰林力中祔葬墓西。

御史王大纶墓，在诸赵乡诸赵庙前。

论曰：志古迹者，世远年湮，往往借人以重地，或循旧而传讹，事取繁缛，不无附会。第赤壁明属嘉鱼，圯桥远在下邳，而阳邑收之，已从删削。至阿瞒疑冢，遥隔许昌，而川邑采之，此尤无稽之甚者。今因地名同冢传说年深，不得不存之，而加辨论，以俟知者之征信于后代耳。至黄、孝两邑，古迹寥寥，钓台姓氏莫传，竹港地方互异，殆前之纂辑者搜罗未备，致启疑端，至若过田横之墓醢酒兴悲，经董相之坟墓苹增感，遥望千秋，此昔之人所以思随会，而恨不能作于九原也。每抚遗编，不禁徘徊三致意云。



《汉阳府志》卷之十九 地輿〔八〕

兵防〔志〕序

兵者，国之大事，思患预防，斯缓急足恃矣，矧汉郡为九省要区，历代用武之地欤？我国家生养休息，长享升平，民生不闻兵革，猗欤盛哉。然安不忘危，有备无患，约束训练，固枢政所宜亟先，而设置分防，事事悉由庙略，可无纪载以示来兹？惟是列朝兵制，因时值治乱不同，措施亦遂不一。汉阳之为郡为县，犹且忽废忽兴，而兵制变更，更可想矣。明以前，其为专制之将帅，崇卑额设之部伍，典籍文献无征，罔从纪载。纪之自明代始，庶非疑以传疑，而足为汉阳信史欤。

作《兵防志》。

兵防志

〔汉阳府〕

明洪武元年，置武昌卫指挥使、指挥同知、指挥僉事镇抚左、右、中、前、后千户所千户、百户兵五千六百六十二名，左卫员弁亦如之，惟增兵目九百六十二名。正统中，析武昌卫右千户所在南纪门内，千户密福建。弘治间，千户陈山修。正德间，千户朱凤、陶震重修。今复为县学。武昌后千户所在凤山门内，弘治间千户李经〔建〕、正统间千户李鹤修^①。

国朝顺治二年，设参将一员，经治兵六百名。十一年，经略洪题裁参将，止设守备一员、把总一员，经制兵四百名。其官署在南纪门内之西，旧无额设守备，王嘉宾价置，刘应昌修葺。署东有小教场，为县学居民旧基。旧教场在永安桥西，内有演武厅，南有折冲御侮坊，左有关圣庙，供军牙六纛之神，每

^①据上文武昌卫千户所先后建修之例，此后千户所亦当先建后修，“李经”下当脱“建”字。





年春秋三季，操演官军，合府各官俱亲临场内阅操毕，各千、百户荫袭演箭，饮宴而退。本朝俱废止，为考试武童马步箭之地。雍正十年，改设城守营都司僉书一员、把总一员、马步战守兵丁二百八十一名，驻扎本城，并分防阳、川两邑水陆二十八塘汛，船三只。乾隆三年，总督宗室德以汉口水陆通衢，汛广兵单，不足以资防御，奏请以武昌水师一营，额设守备一员、千总一员、把总二员、经制兵二百八十一名，改驻汉口镇，升改汉阳营都司为游击郎，以水师守备为汉阳营中军，仍管理水师船只事务。添建衙署营房。

乾隆三年八月，内奉督宪德题请武昌水师营守备一员改驻汉镇，将原拨给士弁官房六间收回，改为衙署，添建仪门一座。汉镇拨兵一百名，汉城拨兵一百四十八名，每兵给房一间，共房二百四十八间，共计工料基地银二千九百二十两六钱八分一厘七毫五丝。又汉城西郭建造瓦药局三间，盔甲库三间，共计工料基地银一百三十八两九钱一分五毫五丝。于乾隆五年四月初三日以前知县沈孟坚兴工，四月初六日知县刘嗣孔接修，至六年二月十五日报竣。雍正七年，改黄州府之黄陂县来属。今陂邑驻防武职及经制兵丁，俱仍黄州协调拨。于雍正八年复设外委把总一员，驻防滠口镇，亦系黄州协调拨。官兵四十五名，陆塘九处存城官兵四十名，共八十五名，水塘晋家墩、五通口二处，兵各五名，系黄冈县阳逻镇驻防把总管理。孝感县额设把总一员，系德安营调拨，塘汛一十四处，亦系德安派拨。其添设汉阳营兵弁，暨改黄、孝二邑隶汉阳二疏，载在《艺文》。

汉阳府武官姓氏考

明以前将帅之于汉阳皆系兼摄，非专防也。其姓字亦多阙略，今概不敢疑以传疑，故惟以专守汉阳姓字之确可考者为武职官。

明调守汉阳府武昌卫右千户所〔千户〕

冯 成	冯 春	冯 兴	冯 广	冯 堂	冯 明
冯 全	冯 勋	冯 卿	朱 禧	朱 凤	朱之藩
朱之佳	朱世勋	曹 成	曹 瑛	曹 荣	曹 伦
曹 纲	曹 表	曹承勋	曹师彬	曹启昌	陈 玉
陈 定	陈 宪	陈 钦	陈 鉴	陈公斌	陈 义

①“右千户所”下当脱“千户”。



陈琼	陈山	陶涛海	陶旺	陶义	陶信
陶镛	陶璪	陶诚	陶震	唐云龙	唐文科
沈瑞	沈元	沈兆	沈文华	吴经	罗洪
田海	胡暹	胡镇	胡瑞	吴晟	吴升
吴雄	吴祥	吴勋	陈绪	陈谅	陈俊
陈荣	陈焕	陈春	陈恩	陈策	陈孔明
陈孔忠	陈英	陈惠	陈雄	陈纲	陈纪
易璫	易荣	易经	文鉴	文玉章	文应科
文煥	王用	王兴	王瑄	王英	王秀
王锐	何洪	何哲	何奎	何瑞	何经
曹得	沈安	陈忠	陈原	陈田资	

后千户所千户

任聚	任善	任纲	任用	任元	任世勋
任金	李旻	李纲	李经	李满	李春元
李华阳	李璠	李贤	李鹤	李诏	李希白
李实	李宗□	吴瑛	吴忠	吴炯	吴端
吴昱	吴涌	吴化	吴从周	吴梦周	吴震
吴龙	朱四	朱兴	朱贵	朱瑛	朱玺
朱金	朱官	密全儿	密海	密福	密云
密锐	金勋	金采	金臣	黄志	黄钺
黄经	万钊	李福	李聰	易海	易本

右千户所百户

朱保	朱铭	朱荣	罗春	罗贵	罗善
李成	李忠	李琳	李铨	黄谷真	黄忠
黄贵	夏明	夏经	夏勇	夏时中	蔡清
蔡亨	蔡通	蔡斌	蔡芳	蔡仁	蔡名春
舒清	舒纲	舒明	舒金	黄阡二	黄思诚





黄 聪	黄 昶	黄 甲	黄月湖	黄碧山	黄承恩
黄 卷	黄元吉	黄凤占	黄世斌	顾 贞	顾 铭
顾 达	顾 礼	顾 荣	顾 华	顾 山	顾 京
朱永年	朱文简	朱国袞	孙 堡	孙 怀	孙 鏞
孙 灏	孙 柱	顾 成	顾 旺	顾 聚	顾 海
顾 松	顾 节	顾 远	顾 源	顾 信	宋 良
宋 政	宋 纲	宋 承	宋嘉兆	宋继武	宋光祖
刘 贤	刘 胜	刘 恩	刘 科	刘世勋	卢 钟
卢 汶	卢 楫	卢 冈	毕 文	毕 洪	毕 森
毕 勇	毕 京	毕志忠	毕从朝	王 佑	王 宣
王 经	王 缙	王 言	王 印	王国柱	张 旭
张 升	张 瑱	张 琮	张 寿	张 纲	张 聪
张 恩	张 羽	张应斗	张尽忠	高 溥	高 震
高满忠	高 瑄				

镇抚

尹 兴	尹 恕	尹 志	尹 贵	尹 雄	尹 泰
尹 宝					

后千户所百户

张春千户	张 暹	张 俊	张 逊	张 完	张 锦
张 泽	张拱宸	张国正	张拱北	李 旻	李 震
宋 仁	刘 怀	刘 实	刘 裕	刘 选	刘 豸
刘世臣	刘三乐	卢 敬	卢 弘	卢 毅	卢 瑄
卢毕兴	秦文胜	秦 珙	秦 京	戴 翀	戴 缙
戴 盛	戴继志	戴大礼	黄宗仁	黄 英	黄 爵
黄廷松	黄 裳	师 成	师 瑀	师 铎	师 威
师 勋	师 文	师 熊	师 章	师 全	师中吉
李 成	李 贵	李 能	李 恩	李 文	罗 锦



罗 沧 罗 忠 罗承烈 杨文富 杨 炳 沈 贵
沈 源 高 贵 高满溢

国朝参将

杨跃龙，顺治二年任。

赵士忠，顺治五年任。

顺治十一年，奉经略洪题裁，止设守备一员。

守备

齐胤贤，顺治十一年任。

董朝禄，顺治十七年任。

王嘉宾，康熙元年任。

刘应昌，康熙四年任。

姚玉明，康熙己巳年任。汝州人，入籍汉阳。

崔有升，康熙三十七年任。

杨德明，康熙三十八年任。

蔡 廷，康熙四十一年任。

傅 升，康熙四十五年任。

吴天祚，康熙五十一年任。

梁得胜，康熙五十四年任。

范毓琦，康熙五十九年任。

牛 洪，雍正元年任。

王 宣，雍正四年任。

许仕盛，雍正五年任。

张国贤，雍正六年任。

都司

张国贤，雍正九年任，行伍，湖南人。

李士正，雍正十年任，富池人，武举。

范廷卫，雍正十二年任。

游击

范廷卫，乾隆三年，宗室督院德题改汉阳营都司为游击，即以都司范廷卫





题补是缺。廷卫，江南人，侍卫。

马跃祖，乾隆五年任，四川人，行伍。

铁景祐，乾隆八年任，奉天人，侍卫。

李现彩，乾隆十年任，陕西人，侍卫。

中军守备

汤起凤，乾隆三年任。四川人，进士。

李安世，乾隆五年任，湖南人，武举。

赖忠良，乾隆六年任，福建人，侍卫。

柳二成，乾隆十年任，福建人，侍卫。

把总

徐 青 尚文新 刘源贵 张鹤坤

邓中甫 张大采 韩世高 曾名贵

黄陂县驻防千总

赵禄陕西人、吴应彪陕西人、李伍贵州人、陈起凤长沙人、梁肯堂陕西人、徐兆麟湖广人、欧阳弘长沙人、雷云龙黄州人、左良湖广人、张廷英湖广人、黄士华湖南人、张国相湖广人、陈良佐浙江人。

汉阳县

附郭共塘汛一十八处：沌口塘、塘头矶塘、堵埠头塘、东江脑塘、邓家口塘、鞋尖塘、新滩口塘、姚家湖塘、小林塘、蒿洲塘、湘口塘、蔡公亭塘、略牌塘、拖路口塘、蔡店塘、蔡家沟塘、涓口塘、侏儒山塘。

大教场，在西关大桥外。

小教场，在南门内。

驿递附

汉阳县原额驿马一百七匹，雍正六年裁马七匹，实存在城厂马六十四，蔡店塘马二十四，涓口塘马二十四，共马一百匹。

原额马夫五十三名半，雍正六年裁减三名半，实存马夫五十名。原额排夫一百四十名，雍正六年裁减三十名，实存排夫一百一十名。

铺递十处，徭编铺司兵共五十一名。在城急递铺铺司一名，铺兵五名。十



里铺铺司一名，铺兵四名。孟家铺铺司一名，铺兵四名。新店铺铺司一名，铺兵四名。黄连铺铺司一名，铺兵四名。腰铺铺司一名，铺兵四名。蔡店铺铺司一名，铺兵四名。崔家铺铺司一名，铺兵四名。六神铺铺司一名，铺兵四名。高观铺铺司一名，铺兵四名。以上十铺通汉川路。

汉川县

额设分防外委把总一员，系汉阳城守营调拨，兵丁原无额数，其柘树口、牛落湖、葱担沟、麻濠渡、莲子脑、莲台口沿江一带俱设兵守御，共塘汛十处：石滚滩塘、县河水塘、系马口塘、庙头塘、蚌湖口塘、澄波亭塘、柘树口塘、葱担沟塘、刘家隔塘、邵家沟塘。

教场，在城外伏龙山，有演武厅，今废。

驿递附

汉川县原额驿马八十匹，雍正六年裁马二十匹，实存马六十四。原额马夫四十名，雍正六年裁减十名，实存马夫三十名。原额排夫一百名，雍正六年裁减二十名，实存排夫八十名。

铺递九处，徭编铺司兵共三十三名。在城铺铺司兵共六名。养鱼铺铺司兵共五名。甑山铺铺司兵共五名。长兴铺铺司兵共五名。刘家隔铺司兵共四名。观庄铺铺司兵共五名。以上〔六铺〕西北通应城路^①。

庙头铺兵一名、三汊潭铺兵一名、杨林铺铺兵一名。

以上〔三铺〕西通沔阳^②。

黄陂县

额设千总一员，雍正八年复设外委把总一员，驻防滠口镇，俱系黄州协调拨。陆塘九处，每塘官兵五名，存城官兵四十名，共官兵八十五名。水塘二处，晋家墩、五通口各官兵五名，系黄冈县驻防阳逻水汛把总管理。

滠口塘、竹园塘、三根树塘、双庙塘、九子墩塘、新店塘、达义铺塘、贾家铺塘、朱家铺塘、晋家墩塘、五通口塘。

教场，在城西三里，有演武厅，今废。

^①据前后叙述方式，“上”下当脱“六铺”二字。

^②据前后叙述方式，“以上”下当脱“三铺”二字。





驿递附

黄陂县原额驿马一百二十四，雍正六年裁马十四，实存马一百一十四。原额马夫六十名，雍正六年裁减五名，实存马夫五十五名。原额排夫一百二十名，雍正六年裁减十名，实存排夫一百一十名。

铺递一十三处，徭编铺司兵二十三名，永充七十名，共九十三名。县前急递铺铺司兵共一十二名。天井铺铺司兵共七名。骆驼铺铺司兵共七名。什仔铺铺司兵共七名。刘家铺铺司兵共九名。甘棠铺铺司兵共七名。以上六铺，东至阳逻路。青紫铺铺司兵共七名。枣林铺铺司兵共七名。廖公铺铺司兵共七名。达义铺铺司兵共七名。贾家铺铺司兵共七名。以上五铺，西至孝感路。黄浒铺铺司兵共三名。淝口铺铺司兵共六名。以上二铺，西南至汉阳府城路。

孝感县

额设把总一员，系德安营调拨，其城守及各塘汛兵丁亦俱本营派拨，共塘汛一十四处：白家塘、北泾嘴塘、旧镇铺塘、观音堂塘、刘家塘、松林冈塘、小河溪塘、擂鼓台塘、阳平口塘、二郎店塘、双桥镇塘、三里城塘、新店塘、花园店塘。

教场，在东门外，有演武厅。

驿递附

孝感县原额驿马九十五匹，雍正六年裁减二十四，实存马七十五匹。杨店驿额马三十五匹。原额马夫四十七名半，雍正六年裁减十名，实存马夫三十七名半，杨店驿马夫一十七名半。原额排夫一百二十名，雍正六年裁减十名，实存排夫一百一十名。

铺递二十处，徭编铺司兵一十八名，永充四十九名，共六十七名。县前总铺铺司兵共七名。广杨铺铺司兵共三名。檀林铺铺司兵共三名。葛亮铺铺司兵共三名。杨桥铺铺司兵共三名。澧河铺铺司兵共三名。白沙铺铺司兵共三名。义井铺铺司兵共三名。万安铺铺司兵共三名。以上交德安府安陆县路。

永安铺铺司兵共四名。新添铺铺司兵共四名。熙丰铺铺司兵共四名。浚川铺铺司兵共四名。斗山铺铺司兵共四名。旧镇铺铺司兵共四名。以上六铺，交黄陂汉阳界。

新建铺铺司兵共四名，交云梦界。



注泉铺铺司兵一名，交汉川界。

桃林铺铺司兵共三名，黄龙铺铺司兵共三名，茶陵铺铺兵一名，以上三铺，通德安府小路。

论曰：汉郡自魏、晋、宋以来皆为重镇。魏初定荆州，屯沔阳，后移驻夏口。晋陶侃为荆州刺史，镇沔口。宋绍兴中，赵元镇经营襄汉，上疏乞提备贼情。是为古今攻战必争之地。至长江天险，与武昌共为门户，戍守鲁山，则铁门堪为锁钥。而汉口五方杂处，沌口、新滩皆属要害，汉川居汉沔之间，湖泊辽阔，葭苇丛荟，为盗贼逋逃之藪，是防御尤宜严密矣。若黄陂軫通省会，邮接中州，乃南北之要区，汉郡之岩邑。孝感后有三关，前临潏汉，为四达之冲。王常、许成懔悍，而倡乱于元、明，其往事已然，则宁民御暴，又可无先事之图也欤？





《汉阳府志》卷之二十 典礼〔一〕

《典礼志》序

凡典礼之事，本朝以大宗伯掌之，载在《会典》，与周礼无异。今汉阳一郡，并无乘法之书，如各官仪注，人所习见习闻，而立春、土牛、合朔、请雨，礼仪之志悉载。《汉书》告庙祝文，虽似浅近，然皆大宗伯之所颁定，用当著令，以相遵守，曷敢遗焉。因汇一切典礼与大宗伯所掌合者，参之旧《志》，集为一编。

原守陈国儒旧序

安上治民，莫善于礼。顾礼有本有文，本非忠信之人不可学，文则典章法制可得而稽也。然行之于下，则有冠、婚、丧、祭；行之于上，则有吉、凶、军、宾、嘉。彼下焉者，固已载之风俗矣。《周礼》大司徒颁典礼于邦国，今之太守犹古诸侯邦国也，则三礼可不详与？按礼：春朝秋觐，庆吉衿凶，社稷用太牢，八蜡以纪岁成，月吉则读邦法，至入学则释奠于先圣先师，宾兴则卿大夫举其贤者能者，日月食则伐鼓于郊，将射先行乡饮酒之礼，或泰厉国厉之异名，或迎春送寒之多仪，至春秋大阅，武备修焉，以今制较之，虽异其文，而未尝不同其实也。

作《典礼志》。

〔典礼志〕

礼仪

上任礼仪

先日至城隍庙诣神前揖、东向省牲揖、省毕揖，诣公署宿。次早祭城隍，三献，读祝，前后行四拜礼。礼毕，鼓乐导至衙门，祭仪门，行再拜礼。入门望东拜阙谢恩，行三跪九叩首礼。升堂拜印，四拜讫，升座、击鼓、排衙，三



绕毕，报吉时，吏请书公座，各金押讫，开梆，受官吏师生参谒，谕僚属，回堂，待各官茶，送出，礼毕，祭土地祠，行再拜礼，其祝文临时自撰。

开印封印

遵日捧印置公案上，向北行四拜礼。

庆贺礼仪

万寿节，先日黎明，率僚属迎万岁牌至公署习仪，次日五更三点，率属行三跪九叩头礼，礼毕，仍送牌入学宫。旧制，习仪于玄妙观，拜牌于府堂，行告天祝寿、山呼舞蹈等礼。国初改今制。元旦、冬至仪同。

朔望礼仪

每月朔望日，府正率属谒文庙、城隍庙，各行四拜礼，回衙诣土地祠，行再拜礼。县同。

迎春鞭春礼仪

立春前一日，正官率僚属，衣朝衣诣东郊，搭春厂贮芒神、春牛。是日，官属齐至厂，行再拜礼，饮宴毕，各扮故事，迎春入城，赴各衙门送春，仍至正官仪门外，土牛南向，芒神西向，各官公宴毕，各退。至日黎明，各官朝服陈设酒饌祭芒神，行礼三献，读祝文。祝毕，复行礼，各官执彩仗向土牛立，正官击鼓三声，众鼓齐作，各官绕土牛三匝，环击之，乃退。乡民竞取土牛以占丰年。

按：宋景（佑）〔祐〕间颁《土牛经》于天下^①，其土牛以岁之干色为首，支色为身，纳音色为腹，立春日干色为角、耳、尾，支色为颈，纳音色为蹄。元时以立春日为法日，干为头、角、耳色，支为身色，纳音为蹄、尾、肚色。明初袭元制，正统后仍如宋法。皇清因之。

祝文

维某年月朔，越祭日，某官等敢昭告于勾芒氏之神曰：惟神职司春，令德应苍龙，万物资生，品汇萌达。某等忝牧是郡，具礼迎新，仰戴神功，佑我黎庶。尚飨。

^①“佑”，当为“祐”之误。





祈祷礼仪

岁值大旱，府正率属于城隍庙、八蜡庙、山川风云雷雨坛行香，或于玄妙观、教场立坛，令僧道祈祷。旱甚，即行香于九真山，请其水，雨即应。

救护礼仪

日食，正官设香案于公署露台上，设金鼓手于仪门内两傍，阴阳生报日初食，正官率僚属朝服行三跪九叩头礼。礼毕，正官击鼓三声，众鼓齐鸣。食如分数，阴阳生报复圆，各官行礼。礼毕，退。月食仪同，俱用常服。

按：《书》云：“季秋月朔，辰弗集于房，瞽奏鼓，嗇夫驰，庶人走。”《周官》：“鼓人，救日月，则诏王鼓。”“太仆，凡军旅、田役赞王鼓，救日月亦如之。”诸侯用帛于社，伐鼓于朝，退而自责，答天变也。按以上各祀典，郡属均照部颁定制，一体遵行，不敢逐县分别。

迎诏礼仪

每诏书至，设龙亭于回龙寺，府正率属跪迎，乘马后随至府，仍跪候，升于阶下，行三跪九叩头礼。开读毕，以授府正，跪捧入龙亭内。

哀诏礼仪

诏至，易服于回龙寺，跪迎于公署。署中先于堂上设白幄，各官举哀行礼毕，仍哭临三日，辰、午各举哀如仪。

朝覲礼仪

每于辰、戌、丑、未年，应府县正官入覲，或有旨留任，许佐贰官代覲，于堂上拜阙，发表，鼓乐导送出大门。

乡饮

《会典》“乡饮”：州县每岁正月望日、十月朔日，于明伦堂行礼。先期择郡邑中齿德之尊者，启请为宾。以正官为主位；东南以齿德致仕官员为大宾位；西北择年高有行之人，或三人、或一二人为僎宾位，东北以次长为介宾位；西南以宾之次者为三宾位，于宾主介僎之后，以教官为司正，以老成生员赞礼。

弘治十七年，题准以年高有德、为众所推服者为大宾，其次为介，如本县有以礼致仕官员主席，请以为僎，其设席坐次仍旧仪，今因之。

每前一日，司正率执事习礼。次日黎明，宰牲具〔僎〕^①，其酒筵如

①“僎”，为“僎”字之误。



古制，六十者三豆，七十者四豆，八十者五豆，九十者六豆。即具，主人率僚属、司正先至，遣人速宾。宾至，出迎于庠门外，三让三揖，至明伦堂，复三让，唱“升阶”，至月台中，执事击鼓，唱“升堂”，各升堂拜讫就位。司正至堂中北面立，宾主皆立，皆揖。执事者酌酒于觥，授司正。司正举酒，通赞唱“扬觥”，司正扬觥，宣读毕，司正饮酒毕，以觥授执事。司正揖，宾僎以下皆报揖。司正复位，宾僎以下皆坐。执事者举律令案于堂中，宾主皆拱立，读者诣案北面读诰毕，宾主各一揖，复位。执事者唱“斟酒”，举僎案至客前，主人献宾，荐脯醢，设折俎。宾酬主人如之。献僎介，僎介酬亦如之。酒三行讫，工入，升歌鼓瑟。歌《鹿鸣》什一，饮酒供汤；工歌《四牡》，饮酒供汤；工歌《皇皇者华》，饮酒供汤。笙入，笙奏《南陔》，又奏《白华》，又奏《华黍》，诗歌《鱼丽》，笙奏《由庚》，歌《南有嘉鱼》，奏《崇丘》，歌《南山有台》，奏《由仪》，于是合乐，奏《关雎》、《鹊巢》，又奏《葛覃》、《采芣》，又奏《卷耳》、《采蘋》。每诗先歌首章，复供汤。请僎讫，又读律诰如前，读毕，执事者复按行斟酒，或五行，或十行，供汤、供僎，其礼如前，毕，乃彻僎。宾主两拜讫，又宾僎介众宾拜讫，通赞唱“谢恩”，引赞向东北，设香案行谢恩礼，唱“主送宾”，于是引礼前导，送宾于庠门外，主宾东西相向，三揖乃退。

按乡饮酒礼并依《大明会典》弘治十七年题准仪制。其乡射礼久不举行，兹不赘。

按：乡饮酒礼，古重典也。迩来士习大坏，视为垄断，所举耆宾，不论年齿、履历，惟论家道丰约，虽厮隶徒流，苟拥巨资，即俨然得为乡宾，冠带赴宴。名器之滥，极矣，所亟宜惩创者也。

科举礼仪

择吉于府大堂东西及高明堂排设筵席。先于丹墀内架月宫桥一座，旁列妓女。是日，俟科举诸生齐集庭参毕，各就坐，演魁星捷报等剧毕，起席，各生到桥边，诸妓簪花披红奉酒，领卷价盘费讫，鼓乐导出。府正各官送至晴川阁小饮，各三杯而出。

送旗匾礼仪

凡进士、举人捷报，及贡生出学，例有旗匾致贺，择吉俱差役代送。

迎送新生礼仪

凡学院案发文武新生，择吉送入各学。先于府堂齐集，簪花披红，饮酒毕，





鼓乐导出。本府及属送至文庙谒圣毕，至明伦堂，俟各生拜见师长，公宴而退。

阅城礼仪

本府新任示期阅城，县备席于朝宗门楼，公宴而退。

阅操礼仪

明时，本府每岁月日开操，右千户所备席及代仪银两。今俱革。

霜降礼仪

明时，右、后二千户所杀牲祭旗纛神，今行于城守府。



《汉阳府志》卷之二十一 典礼〔二〕

《裡祀志》序

《祭法》：有祈有报，礼之正也。不经而祀，淫也。逮闇而祭，渎也。淫祀不福，渎祀不享。旧《志》之载祠祀，并举寺观而列之，非所以示典常矣。今汇群祭为一条，纪六宗及古贤圣之千秋血食于兹土者，目曰“裡祀”，义盖有别于旧《志》云。

志《裡祀》。

裡祀〔志〕

〔汉阳府〕

先农坛 在西关外，雍正四年建，耜田四亩九分。坛高二尺一寸，广二丈五尺，缭以周垣。每岁仲春亥日巳时致祭，午时行耕耜礼。祭日，承祭官率各官请神位供于坛上。神位牌高二尺四寸，红牌金字，广六寸，座高五寸、广九寸五分。各官服朝衣行礼祭毕，送神入祠。正祠三间，配房各三间。正祠中供神位，配房贮祭器、农具。

祭品 簠一，帛白色；鬶一，和羹；羊，一；豕，一；簠二：黍一、稷一；簠二：稻一、粱一；筴四，无定品；豆四，无定品。

仪注 祭日，各官衣朝衣，礼生引承祭官至拜位，通赞唱：“执事者各司其事。”陪祭官各就位，承祭官就位。通赞唱“瘞毛血”，礼生引诣盥洗所，赞盥洗净巾，引诣香案前。赞迎神，行二跪六叩头礼。兴，行初献礼。引诣神位前跪，奠帛，献爵，叩头，兴，诣读祝位跪，众官皆跪，宣祝文毕，叩头，兴，引唱复位。通赞唱“行亚献礼”，引诣神位前，跪献爵、叩首，兴，复位。通赞唱“行三献礼”，如亚献仪。通赞唱“饮福受胙”，引唱诣饮福受胙位，跪，饮福酒，受福胙，跪叩头，兴，谢胙。一跪三叩头，兴，复位。通赞唱“撤饌送神”，行二跪六叩头礼，兴。通赞唱：“司祝者捧祝，司帛者捧帛，各诣燎所。”唱诣望燎位，焚毕，揖，





复位。通赞唱“礼毕”，各官更蟒衣，诣耜田，行耕耜礼。

耕耜仪 一官捧青箱，一官播种。各官俱用右手扶犁，左手执鞭，各行九推礼。农夫终亩。耕毕，各回官厅更朝衣，望阙恭行三跪九叩头礼，仍将遵行耕耜日期具奏。省城总督、巡抚秉耒，知县执青箱，知府播种。府城知府秉耒，佐贰执青箱，知县播种。州县则正印官秉耒，佐贰执青箱播种。专城卫所亦用正印官秉耒，如无属员，即选择耆老执青箱播种之。

耕耜器物 农具一，赤色。牛一，黑色。仔种一，青色。

耕耜人役 耆老一名，牵牛。农夫二名，扶犁。农童六名，唱歌。

社稷坛 旧在西门外永安桥西。乾隆二年，知府胡学成、知县沈孟坚改建于城北兴国寺前。制坛而不屋，缭以周垣，开四门。自北门入垣内。祭坛一座，三面陛各三级。神台一座，右社左稷，以右为主，长二尺五寸，方二尺，剡上倍下，半埋于坛正中。祭以春秋仲月上戊日，设神牌二位，以木为之，上书县社之神，县稷之神。硃漆青字，祭毕，收贮。

仪注 与祭先农坛同。

祭品 筐一，帛白色。铡一，和羹。笾四，与文庙两庑同。豆四，与文庙两庑同。簋二：黍一、稷一。簋二：稻一、粱一。豕一。羊一。

按：《孝经援神契》曰：“社者，土地之主。稷者，五谷之长。”《礼记》及《国语》皆谓共工氏之子曰勾龙，能平九土，故祀以为社。烈山氏之子曰柱，能植百谷，故祀以为稷。至殷以弃为后稷，亦植百谷，故废柱，祀弃为稷。郑玄谓古者官有大功则配食其神，勾龙有水土功，故配社。弃有播种功，故配稷。郡县置社稷，太守、令长侍祠，牲用羊豕。《周礼·地官》：“大司徒设社稷之壝，而树之田主，各以野之所宜木。”贾公彦曰：主者，山神后土之所依也。宜木者，即松、柏、栗是也。唐神龙中，议立社主。韦淑夏引《吕氏春秋》以为当用石。宋社用神位版合祭，别〔祭〕而大社立石主^①。要之，石主、木主无定形，分祀、合祀亦无定制。至明洪武初，始停配享，合社稷一坛为木主藏焉。祭则设于坛上，仍共用石主，埋中坛。世宗时，分祀、分配悉仍旧。

风云雷雨山川坛 旧在南纪门外，明正德十一年改建于西门外永安桥西。今乾隆二年，知府胡学成、知县沈孟坚更扩其址，規制始备。制坛而不屋，

^①“别”，据古代祭礼有合祭、别祭之分，此当为“别祭”。



缭以周垣，开四门入垣，内祭坛一座，三面陛，各三级。神台一座，设立石主，埋于正中。每岁春秋仲月合祭。设神牌三位，以木为之，上书风云雷雨之神居中，山川之神居左，城隍之神居右。硃漆青字，祭毕藏之。

祭品 风云雷雨，帛四。山川，帛二。城隍，帛一。俱白色。余祭品仪注与社稷同。

祝文

维某年月朔日，某官等敢昭告于风云雷雨之神、山川之神、本府城隍之神，曰：惟神妙用神机，生育万物，奠我民居，足我民食。某等钦奉上命，职守兹土。今当仲春、秋，谨以牲帛、醴薤、粢盛庶品，用伸常祭，尚飨。

又乾隆七年，奉行雩祭于孟夏，择日合山川、社稷、先农祈谷于先农坛，礼同上。

厉坛 在大别山南。每岁清明日、七月望、十月朔，先期主祭官告于城隍庙，届期迎城隍之神，出主其祭，榜无祀鬼神，分祀之，羊三、豕三、饭米三石，香烛酒纸随用。祭时有告城隍文。

里社乡厉二坛 在府城外。

祝文

维某年月朔，越祭日，为遵奉祭祀本府合境无祀鬼神等众事，该钦奉圣旨，普天之下，后土之上，无不有人，无不有鬼神。人鬼之道，幽明虽殊，其理则一，故天下之广，兆民之众，必立君以王之。君总其大，又设官分职于府州县，以各长之。各府州县又于每一百户内设一里长以细领之。上下之职，纪纲不紊，此治人之法如此。

天子祭天地神祇及天下山川，王国及府州县祭境内山川及祀典神祇，庶民祭其祖先及里社土谷之神。上下之礼，各有等第，此祀神之道如此。

尚念冥冥之中无祀鬼神，昔为生民，未知何故而歿，其间有遭兵刃而损伤者，有死于水火盗贼者，有被人取财物而逼死者，有被人强夺妻妾而死者，有遭刑祸而负屈死者，有天灾流行而疫死者，有为猛兽毒虫所害者，有为饥饿而冻死者，有因战阵而殒身者，有因危急而自缢者，有因墙屋倾颓而压死者，有死后无子孙者。此等鬼魂，或终于前代，或歿于近世，兵戈扰攘，流移于他乡，





或人烟断绝，久缺其祭祀，姓名泯没于一时，祀典无闻而不载。

此等孤魂，死无所依，精魂未散，结为阴灵，或依草附木，或作为妖怪，悲号于星月之下，呻吟于风雨之时，凡遇人间节令，心思阳世，魂杳杳以无归，身堕沉沦；意悬悬而望祭，兴言及此。怜其惨凄，故敕天下有司依时享祭。在京都有泰厉之祭，在王国有国厉之祭，在各府州有郡厉之祭，在各县有邑厉之祭，期于神依人而血食，人敬神而知礼，仍命本处城隍以主此祭，钦奉如此。今某等不敢有违，谨设坛于城北，以□月置备牲醴羹饭，专祭本府合境无祀鬼神等众灵，其不昧来享此祭。

凡我一府境内人民，倘有不孝不敬六亲者，有奸盗诈伪不畏公法者，有拗曲作直欺压良善者，有躲避差役靠损贫户者，似此顽恶奸邪不良之徒，神必报于城隍，发露其事，使遭官府，轻则笞杖决断，不得号为良民，重则徒流绞斩，不得轻还乡里。若事未发露，必遭阴谴，使举家病染瘟疫，六畜田蚕不收。若孝顺父母，和睦亲族，畏惧官府，遵守礼法，不作非为。良善正直之人，神必达之城隍，阴加护持，使其家道安和，农事顺遂，父、母、妻、子保守乡里。我等合府官吏人等，如有上欺朝廷，下枉良善，贪财作弊，蠹政害民者，灵必无私，一体昭报，则鬼神有监察之明，官府非谄谀之祭，尚飨。

按：《祭法》：“王祭泰厉，诸侯祭公厉，大夫祭族厉，士丧礼、疾病祷于厉。”《春秋传》曰：“鬼有所归，乃不为厉。”其所由来远矣。

忠义孝弟祠 祠内立碑，刻姓氏于上。雍正三年，建在学宫内。

节孝祠 祠前建坊，刻姓氏于上。雍正三年，建在学宫外。

六先生祠 在凤栖山。宋知军黄幹立祀周、程、游、朱。明正德中，知府蔡钦增祀黄幹、杨时^①。

仙官祠 在府学敬一亭。

土地祠 一在府署仪门左，一在府署内凤栖山上。按：山系府治来脉之镇，祠置其上，全府之势，皆在目中。

关帝庙 在城内小教场，守备董朝禄建，李良臣重修。雍正三年，追封三代公爵，官其后裔为五经博士。今州县皆建专祀，每岁春秋仲月及五月十三日，

^①“杨时”当为衍文，详见本书卷之四十七陈凤梧《六先生祠记》。



以太牢致享。

城隍庙 在府治东，知府舒体震建，康熙二十八年重修。

按：《易》曰：“城复于隍。”又曰：“地险，山川丘陵。”后世专藉城郭池隍以为固。然则城隍之祀，其即山林川泽之祀而推焉者也。

唐李〔阳冰〕《缙云城隍记》谓“祀典无之，惟吴、越有”^①。然成都城隍祠，李德裕建；张说有祭荆州城隍文；杜牧有祭黄州城隍文，则不独吴越为然矣。

又芜湖城隍建于吴赤乌二年，南齐慕容俨、梁武陵王祀城隍神，皆书于史，则又不独唐为然矣。

宋以后，其祀遍天下，或赐庙额，或颁封爵，或迁就附会，各推一人以为神之姓名，如镇江庆元、宁国、太平、华亭、芜湖各处，皆以为纪信，龙兴、赣袁、吉安、建昌、临江、南康皆以为灌婴，今武林则以于忠肃公为城隍之神，庙祀于其墓前，谓之梦林，四方之人皆祈梦于庙内，灵爽异常，亦聪明正直之所致也。《长乐图经》云：“汉御史周苛守荥阳，为项羽所烹。高帝即位，令郡邑各附邑立庙祀之。”城隍之祀，疑自此始。

古皆有爵号，洪武时改称某府州县城隍之神。今汉阳城隍亦称为汉纪信，未知何据。

八蜡庙 在西门外永安桥，明建。岁春秋二仲月，与两坛同日致祭。祭八蜡庙礼仪、祝文、礼仪如祭坛。

祝文

维某年月日朔正祭日，某官等敢昭告于先啬、司啬、先农、大坊、水庸、邮表畷、猫虎、昆虫之神，曰：惟神妙用神功，生育万物，土返其宅，水归其壑，昆虫不作，草木归其泽，皆赖神功，今兹仲春、秋，礼宜报祀，谨以牲帛、醴薤、粢盛庶品，式陈明荐，尚飨。

旗纛庙 在府城内。

汉阳县

附郭各坛壝与府同。

^①《缙云城隍庙记》为唐人李阳冰作，“李”下脱“阳冰”二字。





节孝祠 在学宫外。

大禹庙 在大别山禹功矶上，宋建。明时春、秋致祭，益、稷并祀，旁列元凯，后附召康公、穆公焉。祭大禹庙礼仪、祝文。每岁春、秋二仲于祭丁之后二日，陈设如仪，府正行三献礼。

〔祝文〕

维某年月朔正祭日，某官等敢昭告于夏禹王、周后稷之神，曰：惟二圣人治平水土，播教稼穡，功加当时，泽垂后世。庙貌所在，仰止益虔。今兹仲春、秋，礼宜报祀，谨以牲帛醴薤、粢盛庶品，式陈明荐，以伯益之神、召康公之神、召穆公之神配。尚飨。

龙王庙 在南纪门外大江之浒，今不存。

关帝庙 一在西南大江滨，一在循礼坊正街，一在后湖，一在平塘渡。

鲁肃庙 在鲁山上，今废。

胡奋祠 祀晋征南大将军。

仁显庙 在九真山上。相传为刘伯通，不知何代人。梁大同中，长沙王祀之。元封“敷济仁显灵佑王”，下有灵泉。

张王庙 在南纪门外，祀唐张巡。按睢阳有保障江淮之功，故江淮以南有兵事，城守者多祀之。

太白祠 在郎官湖北。宋咸淳间，学官萧鉴因其亭废重建，塑太白像。康熙四十五年，知府郝士鐸重修。

县城隍庙 在县署东，雍正元年，知县蔡甸建。

土地祠 在县仪门内。

冯公祠 公讳应京，进士，泗州盱眙人。万历庚子，税(盐)[监]陈奉肆虐商民^①。公兵巡武昌，极捍御，奋不顾身，武、汉间赖以无恐。后为奉所中，被逮去。士民扳卧不及，立祠大别山前，岁时致祭。

康穆庙 在大别山顶，明巡抚邵陛建。今祠毁，附禹庙享祀。

^①“盐”，当为“监”之误。



褒忠祠 在下蒲潭，祀宋庆远节度使李道。

按：道字行之，相州人，历官至湖北副总管，卒赠太尉，封楚王，谥忠。娶张氏，封秦国夫人，其中女为光宗后，生宁宗。

文公祠 在循礼坊。

吴王庙 在城西一里，祀吴大帝孙权。有三国黄象碑，明赵崡有《吴王庙》诗。

额公祠 在杨林口下。

郝公祠 在南纪门内。

汉川县

先农坛 在北郊台阁右，雍正五年建，藉田四亩九分。

社稷坛 旧在县治北一里，雍正十年改建西郊外。

风云雷雨山川坛 旧在县南。万历间，知县桂生芝改于厉坛东侧，今在西郊，雍正十年改建。

忠义孝弟祠 在学宫内明伦堂东首，雍正三年建。

节孝祠 在学宫外西首，雍正三年建。

关帝庙 一在南关外，一在县学东，一在戊子圻，一在刘家隔。

令尹子文庙 在县西二里姚公山，今废。

文昌阁 在城外东北隅。万历十年，知县詹天伦建。二十九年，知县范士林设春、秋二祭。三十六年重修。

白龙庙 在县东北五里。旧传白龙蜿蜒陂内，邑人立庙祀之。

广威将军庙 在县东四十里，祀晋朱伺。

水府庙 在东关外临河，祀萧公。

城隍庙 在城二铺，明洪武时建。

土地祠 在县堂西。

邑厉坛 在县北一里。





黄陂县

先农坛 在郭外东北隅，耜田四亩九分。

社稷坛 在城北一里仙侣台上。

风云雷雨山川坛 在大东门外东寺畷。

忠义孝弟祠 在学宫内，雍正三年建。

节孝祠 在学宫外，雍正三年建。

关帝庙 在县堂东，康熙三年，知县杨廷蕴改建。

双忠祠 在县东一里，张巡、许远并祀。相传黄郡守卢浚尽毁祠庙，将及双忠祠。神降附体于担水妇人，属笔留诗甚奇，祠得不毁。后废，重建，今复废。

按：《黄冈志》云：黄州安国寺右有景佑真君庙，祀张睢阳。郡守卢浚遍毁淫祠，将及是庙，忽门皂为神所附，索笔题诗云云，与《黄陂志》小异，姑并记之。

文昌祠 在县西铁锁潭墩上，明胡仲澜建。康熙二十六年，邑人中丞姚缔虞捐修。乾隆二年，水圯，知县邵大业捐资修筑，祠得保固。

城隍庙 在东城内，明洪武间，县令杨起予建。相传神姓张，讳松，汉蜀人。明太祖鄱阳之役，战舰失舵，以足代之。太祖问助阵何人，神对曰：“臣乃黄陂城隍，蜀汉某也。”洪武二年，勅封显佑伯，差官建勅书楼，赐二擎天柱。今毁，独祀典较各神春、秋常祭外多一祭云。

东岳庙 在县西北十里，万历间重修。

晏公庙 在县西南。

萧公庙 旧在西城外，久废，今合晏公为一祠，在小南门城内。

木兰将军庙 在木兰山。

二程夫子祠 在鲁台山下，明景泰间，同知蔡绶建。成化间，知县李恒改旧祠为享堂，复建新祠于前，左辖郑寅定春秋俎豆。隆庆间，苏景和复建堂于后，祀太中公。万历初，洪其道重修。二十年，巡抚李禎摄督篆，韩魏又修。明季尽毁。顺治初年，督学王尔禄复建祠于学左，后圯。康熙五年，知县杨廷蕴、县丞李成纪于鲁台山下重建，并祀开府公通大中公垧，又建双凤亭于山麓，周植桃柳千余株。后署知县胡国选捐俸四十金重修，工未竟。乾隆三年，知县邵大业捐俸，



率合邑重建。知县沈孟坚捐资增修。

附宋朱子《二程祠记》

齐安在江淮间最为穷僻，而国朝以来，名卿大夫多辱居之，如王翰林、韩忠献公、苏文忠公，邦人至今乐称，而于苏氏尤致详焉。至于河南两程夫子，则亦生于是邦，而未有能道之者。盖王公之文章、韩公之勋业，皆已震耀于一时，而其议论气节，卓犖奇伟，尤足以惊世俗之耳目，则又莫若苏公之盛也。若程夫子，则其事业湮郁，既不足以表于当年，文词平淡，又不足以夸于后世，独其道学之妙，有不可诬者，而又非知德者莫能知之，此其遗迹所以不能无显晦之殊，亦其理势之宜然也。

盖天圣中洛人大中大夫程珦初仕为黄陂尉，秩满不能去，而遂家焉，实以明道元年壬申生子曰颢，字伯淳；又明年癸酉生子曰颐，字正叔。其后十有余年，当庆历丙戌、丁亥之间，掇贰南安，乃得狷掾。舂陵周公敦颐而与之游，于是二子因受学焉，而慨然始有求道之志。既乃得夫孔孟以来不传之绪于遗经，遂以其所学为诸儒倡，则今之所谓明道先生、伊川先生是也。

先生之学，以《大学》、《中庸》、《论语》、《孟子》为标准，而达于六经，使人读书穷理，以诚其意、正其心，自家而国，以达于天下。其道坦而明，其说简而通，其行端而实，盖将有以振百世之沉迷，而纳之圣贤之域。其视一时之词章事业、议论气节所系，孰为轻重？所施孰为长短？当有能辨之者，而世非徒不之好也，甚者乃目以为道学之邪气，而必剪灭之。于斯时也，苟无遭其伐木削迹焉，斯已幸矣，尚何望其余哉。

今太守李侯乃能原念本始，追诵遗烈，立二夫子之祠于学宫，以风励而作兴之，非其自信之笃，而不以世之趋舍动其心，其孰能与于此？

李侯名铈，字诚之，其为此邦勤事爱民，固多可纪，特于此举尤足以见其操行之不凡，而非众人之所能及，是以因其请记而具论之，以告来者，使有考焉。

孝感县

先农坛 在东关外，雍正五年建，耨田四亩九分。每年收耨谷七石二斗，以供祭祀。

社稷坛 在西关外，雍正十年改建。





风云雷雨山川坛 在东关外，雍正十年改建。

忠义孝弟祠 在学宫侧，雍正三年建。

节孝祠 在东门内，有木坊，雍正三年建。

关帝庙 在县治西。

城隍庙 在西门内。

东岳庙 在县治东。

火神庙 在北门外。

三官庙 在县西。

龙王庙 在南门外。

令尹子文庙 在西湖闸口西北。宋宣和中，得九鼎于祠侧，敕赐额曰“忠应”。

张忠臣庙 祀唐张公扑，在县北五十里牛迹山。旧名昭烈祠，教谕江本淳建。

孝子祠 知县罗勉建，以祀董永，在北门外。成化中，迁文庙之东，入张扑合祀，改曰忠孝祠。万历中，又入祀令尹子文。明季毁。顺治十七年，知县张擢士重建于会真观前。

文昌阁 在小东门外。

二程祠 祀明道、伊川二公，以曾读书孝昌故也。明末毁。顺治十八年，知县张擢士重建于东岳庙之西。

论曰：祀，国之大节也。圣王制礼，法施民则祀之，劳定国则祀之，御大灾而捍大患则祀之，岂徒崇德报功已哉！明则有礼乐，幽则有鬼神，将使之不强而肃，不媚而孚，亦所以遏人心巧伪之萌也。非是族者，为淫为逆。纪祠祀，重典礼也。



《汉阳府志》卷之二十二上 典礼〔三〕

《学校志》序

三代之时，先王所为治天下之大经大法，无一不出于学。学校为论秀兴贤之地，凡一切礼乐、兵刑、养老、乡射、读法诸大典，皆于是乎在，学立，而万目由之举矣。爰考历代置庙设学沿革废兴之由，备书于册，使为政者知所先务焉。

作《学校志》。

学校志

汉阳府学

府学在凤栖山麓府治西，创于宋之庆历，叶适有记。明洪武初鼎建者，知府程瑞因宋址而成也。成化戊戌，知府何淡增修。弘治二年重修者，知府张文质，忧去。明年，知府张锐始竣厥事，副使王纯记诸石。嘉靖初，知府贾应春复加修葺。迨嘉靖丙戌，郡人邓幹、刘大本重建棂星门，泮池、殿庑、庖湍俱新。后知府宋沂增修，尚书戴金纪其事，嘉靖癸巳岁也。岁久复圯，万历丙午己酉，知府王宗泰、舒体震相继重修，并升至圣殿大成门。旧有龙门、射圃，久湮。明末，悉遭兵毁。

皇清顺治六年，知府傅应星鼎建，规模宏丽，今制是也。康熙二十九年，知府戴梦熊率邑绅江沅等重修。后知府郝士鎔于康熙□十□年率绅士秦坛、江祚封增修。

庙制

至圣殿、两庑、戟门、棂星门、崇圣门、泮池、明伦堂、名宦祠、乡贤祠、敬一亭在凤栖山上，明嘉靖五年建立有御制勒石碑亭，东西有仙官祠。

学基

南横二十九丈五尺，北横二十八丈，左抵汉阳县旧治墙脚，右抵项宦墙脚，





后抵城根石脚。学前西南有基地一段，旧认租银一两一钱。又学前西南基地一段，旧招认租银一两一钱。又空地一块，其租银存为学中搭彩及香亭之用。头门右首八字墙基地一段，旧认租银五钱。又头门左首八字墙基地一段，旧认租银五钱。后山右首与秦宅连界基地一段，旧认租银一钱。又学后山地招住有数家，其租银并存为通学神会之费。以上俱系学外余基。

学田

府县两学原载学田二百九十七亩七分二厘七毫，成熟田二百七十亩零七毫；荒芜田二十七亩七分二厘，无凭开垦。

学地

一十五亩。

随田塘地

共三十亩一分。

一户黄学田共一十三石六斗五升，共八十一亩二分九厘，随田塘一十八亩二分六厘，坐落柏泉乡城隍台，佃民董子建等承种。每亩纳谷一石三斗四升八合二勺六抄，随田塘不派租谷外，共谷一百九石六斗，内除完正赋谷六十石，实纳租谷四十九石六斗，每石折银二钱七分七厘八毫二丝二忽六微，共折纳租银一十三两七钱八分，秋成完库。佃民张天柱、董子建。

一户黄学田九石四斗，共五十八亩七分六厘七毫，下田三亩三分六厘四毫，坐落柏泉乡瓦匠湾骡子庙，佃民李坤有等承种。每亩纳谷一石二斗三升五合一抄，除下塘地不派租外，共谷七十石九斗八升一合，除完正赋谷二十九石七斗四合，实纳租谷四十一石二斗七升七合，每石折银三钱零三毫七丝七忽九微三尘，共银一十二两三钱九分八厘七毫，秋成完库。佃民李坤有、董捷甫。

一户叶学田五石，共三十一亩二分，随田塘六分三厘八毫，坐落新店铺，佃民刘文申等承种。每亩纳租谷一石五斗零一合六勺，除塘不派租外，共谷四十六石八斗五升，又学地一十五亩，纳租银一两六钱，除完正赋谷九石八斗一升并地租银一两六钱外，完纳租谷三十七石四升，每石折银二钱七分，共折银十两零八毫，秋成完库。佃民刘文申、孙美初、周良士。

一户吴学田五石，共三十四亩六分七厘，随田下地一亩、塘六亩八分三厘八毫，坐落马家塘，佃民华玉恒等承种。每亩纳谷一石三斗五升八合五〔勺〕〔勺〕



二抄^①，除塘地不派租外，共谷四十七石一斗，除完正赋谷一十二石六斗，实纳租谷三十四石五斗，每石折银二钱九分，共折银十两零五毫，秋成完库。佃民华玉恒、余国正。

一户田学女额田三石三斗，共一十九亩八分，除荒芜田一亩八分外，成熟田一十八亩，坐落西庄岭，佃民杨南甫等承种。每亩纳谷一石三斗八升八合八勺八抄零，除荒芜田不派租外，共谷二十五石，除完正赋谷九石外，实纳租谷一十六石，每石折银二钱，共折银三两二钱，秋成完库。佃民杨南甫、曾吉公。

一户陈心略额田一十五石，共七十二亩，系下则低田，除荒芜二十五亩九分二厘外，成熟田四十六亩八分，坐落百人矶，佃民陈书伯等承种。每亩纳谷五斗四升二合五勺零，除荒芜田不派租外，共谷二十五石，除完正赋谷七石外，实纳租谷一十八石，每石折银二钱，共折银三两六钱，秋成完库。佃民李自牧、郭文宣。

以上共学田五十一石三斗五升，共折租银五十二两九钱八分，系府县两学公共之项，每学共分银二十六两四钱九分，赈给贫生。

按：以上学田据册开载，与旧《志》碑载小异，存查。

弟子员额数

原额廪生缺四十名。原额增生缺四十名。附生无额数。岁科两考，文童入学原额二十名。岁试武童入学原额二十名。

祭仪

每岁春、秋二仲月上丁日致祭，先期承祭官率陪祭各官齐赴文庙阶下，行一跪三叩头礼。教官涤器、视牲，并瘞毛血。至期五鼓，各官衣朝服，齐集行礼。

谨按：祭期定于春、秋二仲月上丁，自隋文帝始；有司荐享，自北魏主浚始；月朔行礼，自北齐天保元年始；贡土释褐谒庙，自开元二十六年始。

正殿

至圣先师孔子神位，木主高二尺三寸七分，阔四寸，厚七分。座高四寸，长七寸，厚三寸四分。朱地金书。

祭品

筐一帛白色、酒罇一、爵三、太牢一、羊一、豕一、登一太羹煮肉汁，不用盐酱、

^①“勺”，当为“勺”之误。





铏二和羹，以猪腰羊肾肉造、簠二黍一、稷一、簋二稻一、粱一、笱十形盐一、榛一、枣一、菱一、栗一、槁鱼一、鹿醢一、白饼一、黑饼一、豆十韭菹一、菁菹一、芹菹一、笋菹一、醯醢一、兔醢一、鱼醢一、鹿脯一、脾肝一、豚胎一。

谨按：《文王世子》：“凡始立学者，必释奠于先圣先师。”周立四代之学，虞庠以舜为先圣，夏学以禹为先圣，殷学以汤为先圣，东胶以文、武为先圣。其左右四圣之臣成其德业者，谓之先师。自后世通祀孔子，而舜、禹、汤、文、武之祀改祀于历代帝王庙矣。鲁哀公十七年，立庙孔子旧宅。汉高帝十二年过鲁，以太牢祀孔子。平帝元始元年，追谥为褒成宣尼公。此后世尊崇孔子之始也。及汉明帝永平二年，以周公、孔子并祀于郡县学，魏晋六朝，或封公、封侯，或祀于阙里，或祭于辟雍，未有定制。其停周公，专祀孔子，令天下郡县立庙，四时致祭，则自唐太宗贞观初年始也。历代封号不一，自明嘉靖九年改称“至圣先师孔子”，从大学士张璁之议也。文庙门立戟，或十有六，或二十有四，自宋太祖建隆三年与徽宗政和九年始也。殿名大成，自徽宗崇宁四年始也。改大成殿为先师庙，戟门为文庙之门，天下学宫通撤像，易木主，亦自嘉靖九年始也。

又按：成化十二年，国子祭酒周洪谟奏准国学笱豆各十，及嘉靖九年从大学士张璁议，定笱豆各十，示天下尊崇之实，于是笱实之糗、餌、粉、饘，豆实之飧食、糝食，俱不复用。

四配

主高一尺五寸、阔三寸二分，赤地墨书。复圣颜子名回，字子渊，鲁人、宗圣曾子名参，字子舆，鲁人、述圣子思子名伋，鲁人、亚圣孟子名轲，字子舆，邹人。

祭品

簠一帛白色、铏一和羹、羊一、豕一、簠二黍一、稷一、簋二稻一、粱一、笱八形盐一、榛一、枣一、菱一、韭菹一、菁菹一、芹菹一、笋菹一、豆八芡一、栗一、鹿脯一、槁鱼一、醢醢一、鹿醢一、兔醢一、鱼醢一、酒罇一、爵三。

谨按：颜子配享，自魏主芳正始二年及东晋武帝宁康三年始。曾子配享，自唐高宗总章元年始。孟子配享，自宋神宗元丰元年始。子思配享，自宋徽宗大观二年始。以颜、曾、思、孟并享，自宋度宗咸淳三年始。加复圣、宗圣、述圣、亚圣名号，自元文宗至顺二年始。去公称子，自明嘉靖九年始。

又按：四配旧制，惟羊、豕各一，分作四分，每位一分。至明景泰间，则每位各一羊、豕。明初，登一，笱、豆各六。嘉靖时，去登，增笱、豆为各十。



今铜一，筮、豆各八，谨依本朝部颁祀典所定。

十哲，东五位增有子一位。

主高一尺四寸，阔二寸六分，厚五分，座高二寸六分，长四寸，厚二寸，赤地墨书。闵子名损，字子骞，鲁人、冉子名雍，字仲弓，鲁人、端木子名赐，字子贡，卫人、仲子名由，字子路，卞人、卜子名商，字子夏，卫人、有子名若，字子有，鲁人。

十哲，西五位增朱子一位。

冉子名耕，字伯牛，鲁人、宰子名予，字子我，鲁人、冉子名求，字子有，鲁人、言子名偃，字子游，吴人、颛孙子名师，字子张，阳城人、朱子名熹，字元晦，婺源人。

祭品

东西各五案增有子一案，朱子一案。筐一帛白色、豕一、铜各一和羹、簠各一黍、簋各一稷、爵三、豕首一、筮各四形盐一、栗一、菁菹一、芹菹一、豆各四枣一、鹿脯一、鹿醢一、兔醢一。

谨按：弟子追赠，自唐高宗总章元年始。十哲从祀，自唐玄宗开元八年始。升子张补十哲之缺，自宋度宗咸淳三年始。其封公、侯、伯，始于唐玄宗开元二十七年，及宋真宗大中祥符二年，度宗咸淳三年。其去公、侯、伯，称子，自明嘉靖九年始。其升朱子列十哲之次，自康熙五十三年始。升有子于十哲之十一位，自乾隆三年始。

东庑先贤先儒木主規制同十哲。

蘧瑗字伯玉、秦冉、澹台灭明字子羽，武城人、原宪字子思，《檀弓》作仲宪，宋人、南宫适字子容，鲁人、商瞿字子木，鲁人、漆雕开字子若，蔡人、樊须字子迟，鲁人、公西赤字子华，鲁人、梁鳢字叔鱼，齐人、冉孺字子鲁，鲁人、伯虔字子析，鲁人、冉季字子产，鲁人、漆雕哆字子敛，鲁人、漆雕徒父字子文，鲁人、商泽字子秀，鲁人、任不齐字子选，楚人、公良孺字子正，陈人、奚容蒧字子偕，鲁人、颜祖字子襄，鲁人、勾井疆字子野，卫人、秦祖字子南，鲁人、荣旂字子祺，鲁人、左人郢字子行，鲁人、薛邦字子徒，鲁人、原亢字子杭，鲁人、廉絜字子庸，卫人、狄黑字子皙，卫人、孔忠字子蔑、公西蒧字子尚，鲁人、秦非字子之，鲁人、申枨字子周、颜诜字子声，鲁人、颜何字冉，鲁人、左丘明鲁人、穀梁赤字元始，鲁人、牧皮、公都子、公孙丑、高堂生字伯，鲁人、孔安国字子国、后苍字近君，郯人、诸葛亮字孔明、王通字仲淹，龙门〔人〕^①、胡瑗字翼之，海陵人、邵雍

^①“龙门”下当脱“人”字。





字尧夫，范阳人、司马光字君实，夏县人、程颢字伯淳，洛阳〔人〕^①、杨时字中立，将乐人、罗从彦字仲素，剑州人、吕祖谦字伯恭，婺州人、蔡沈字仲默，建阳人、尹淳字彦明，洛人、陈淳字安卿，龙溪人、魏了翁字华甫，浦江人、王相、吴澄字幼清，抚州人、许衡字平仲，河内人、许谦字白云、罗钦顺字整庵、陈献章字公甫，新会人、王守仁字伯安，余姚人。

西庑先贤先儒

林放鲁人、宓不齐字子贱，鲁人、公冶长字子长，鲁人、公析哀字季沉，齐人、高柴字子羔，齐人、司马耕字伯牛，宋人、巫马期字子期，陈人、颜辛字子柳，鲁人、曹恤字子循，蔡人、公孙龙字子石，卫人、秦商字丕兹，鲁人、严高字子骄，鲁人、穰骊赤字子从，秦人、石作蜀字子明，秦人、公夏守字子乘，鲁人、后处字子里，齐人、公肩定字子仲，鲁人、县亶字子家、罕父黑字子索，鲁人、公祖勾兹字子之，鲁人、县成字子祺，鲁人、燕伋字子思，秦人、颜之仆字子叔，鲁人、乐欬字子声，秦人、叔仲会字子期，鲁人、邦选字子斂，鲁人、公西舆如字子上，鲁人、施之常字子常，鲁人、陈亢字子禽，陈人、琴牢字子张，卫人、步叔乘字子车，齐人、公羊高齐人、乐正克、万章、伏胜字子贱，邹平人、董仲舒广川人、毛萇赵人、郑玄字康成、范宁、杜子春河南人、韩愈字退之，修武人、范仲淹字希文，吴人、欧阳修字永叔，庐陵人、周敦颐字茂叔，营道人、张载字子厚，郾人、胡安国字康侯，崇安人、程颐字正叔，洛阳人、李侗字愿中，剑浦人、张栻字敬夫，绵竹人、陆九渊字子静，金溪人、黄幹字直卿，闽县人、真德秀字景元，浦城人、何基字子恭，金华人、赵复安州人、金履祥、陈澧、薛瑄字德温，河津人、蔡清字虚齐、胡居仁字叔心，余干人、陆陇其字稼书，嘉兴人。

祭品

筐一帛白色、豕一、簠一黍、簋一稷、笾四栗一、枣一、菁菹一、芹菹一、豆四鹿脯一、形盐一、鹿醢一、兔醢一、爵各四东西两庑同。

按：祀七十二贤，自汉明帝永平十五年及章帝元和二年始。以左丘明、卜子夏、公羊高、穀梁赤、伏胜、高堂生、戴圣、毛萇、孔安国、刘向、郑众、杜子春、马融、卢植、郑玄、服虔、贾逵、何休、王肃、王弼、杜预、范宁二十二贤从祀，自唐太宗贞观二十一年始。以荀况、杨雄、韩愈从祀，自宋神宗元丰元年始。以周敦颐、张载、程颐、程颢、朱熹从祀，自理宗淳〔佑〕〔祐〕元年始。以张栻、吕祖谦从祀，自景定二年始。以邵雍、司马光从祀，自度宗咸淳三年始。以许衡从祀，自元仁宗皇庆二年始。至明洪武二十九年，增董仲

^①“洛阳”下当脱“人”字。



舒；宣德十年，增吴澄；正统二年，增胡安国、蔡沈、真德秀；八年，增杨时；嘉靖九年，增后苍、王通、欧阳修、胡瑗、陆九渊；隆庆元年，增薛瑄；万历十二年，增王守仁、陈献章、胡居仁；四十一年，增罗从彦、李侗。洪武十九年，罢杨雄。嘉靖九年，公伯寮以毁子路黜；颜何、秦冉以字画相似黜；申党即申枏，以重出削；蘧瑗、林放以非弟子，改祀于其乡；颜无繇、曾点、孔鲤改入启圣祠；荀况以言性恶黜；刘向以喜神仙黜；王肃以党司马氏黜；杜预以党贵要、建短丧黜；贾逵以附会讖纬黜；马融以贪鄙附势黜；何休以屈周王鲁黜；王弼以旨宗老庄黜；郑玄、郑众、卢植、服虔、范宁、吴澄改祀于其乡。皇清雍正元年、二年，复增蘧瑗、林放、秦冉、牧皮、公孙丑、公都子、乐正克、县亶、颜何、万章、郑玄、诸葛亮、尹焞、魏了翁、许谦、罗钦顺、范宁、黄幹、何基、赵复、金履祥、陈澧、蔡清、陆陇其从祀；乾隆三年，复以吴澄从祀。

仪注

分献、陪祭各官入，两旁门序立。赞引官导承祭官至盥洗处盥手毕，引至台阶下立。典仪唱“乐舞生就位”，“执事各官各司其事”，分献官、陪祭官各就位，赞引官赞就位，承祭官就拜位立，分献官随后立。典仪唱“迎神”，唱“举迎神乐”，奏《咸平之章》，乐作，赞引官赞跪叩，兴。承祭官、陪祭官、分献官俱行三跪九叩头礼，兴，乐止。典仪唱“奠帛”，行初献礼，唱“举初献乐”，奏《宁平之章》，乐作，赞引官赞升堂，导承祭官由东阶上进殿左门，赞引官赞诣至圣先师孔子位前，承祭官至案前立。赞引官赞跪叩，兴，承祭官行一跪一叩头礼，兴。赞引官赞奠帛，捧帛官以帛跪进，承祭官接帛，拱举立，献毕。赞引官赞献爵，执爵官以爵跪进，承祭官接爵，拱举立，献毕，行一跪一叩头礼，兴。赞引官赞诣读祝位，承祭官诣读祝位立，读祝官至祝案前，一跪三叩头，捧祝版立于案左，乐止，赞引官赞跪，承祭官、读祝官、分献官、陪祭官俱跪、赞引官赞读祝毕，捧祝至正位前案上，跪，安帛匣内，三叩头，退。乐作，赞引官赞叩，兴，承祭官及各官行三叩头礼，兴。

赞引官赞诣复圣颜子位前，承祭官就案前立，赞引官赞跪叩，兴。承祭官一跪一叩头，兴。赞引官赞奠帛，捧帛官跪进于案左，承祭官接帛，拱举立，献案前。赞引官赞献爵，执爵官跪进于案左，承祭官接爵，拱举立，〔献〕案上^①，行一跪一叩头礼，兴。赞诣宗圣曾子位前，如前仪。赞诣述圣子思子位前，

^①据上奠帛仪“献案前”，此“案上”当有“献”字。





如前仪。赞诣亚圣孟子位前，如前仪。

赞〔诣〕十哲两庑^①，分献官俱前仪行礼毕。

赞引官赞复位，承祭官、分献官仍诣至圣先师位前立，乐止，典仪唱“行亚献礼”，唱“举亚献乐”，奏《安平之章》。乐作，赞引官赞升坛，献爵于左，如初献仪。

赞引官赞复位，承祭官、分献官各复位立，乐止，典仪唱“行三献礼”，唱“举三献乐”，奏《景平之章》，乐止，赞引官赞升坛，献爵于右，如亚献仪。

赞引官赞复位，承祭官、分献官各复位立，乐止，典仪唱“饮福受胙”，赞引官赞诣受福胙位，承祭官至殿内立，捧酒胙二员捧至正殿案前，拱举至饮福胙位右旁跪，接福胙官二员在左旁跪，赞引官赞跪，承祭官跪，赞饮福酒，承祭官（祭官）受爵拱举^②，授接爵官，赞受福胙，承祭官受胙，拱举，授接胙官，赞引官赞叩，兴，承祭官三叩头，兴，赞复位，承祭官复位立。次行谢福胙礼，赞引官赞跪叩，兴，承祭官、分献官及陪祭各官俱行三跪九叩头礼，兴。典仪唱“撤饌”，唱“举撤饌乐”，奏《咸平之章》，乐作，撤讫，乐止，典仪唱“送神”，唱“举送神乐”，奏《咸平之章》，乐止，赞引官赞跪叩，兴。承祭官、分献官及陪祭各官皆行三跪九叩头礼，兴。乐止，典仪唱“捧祝帛饌，各诣燎位”，捧帛官、捧祝官至各位前，一跪三叩头，捧起祝文，在前，帛次之，捧饌官跪，不叩头，捧起在后，俱送至燎位。承祭官退至西傍立，候祝帛饌过仍复位立。典仪唱“望燎”，唱“举望燎乐”，与送神同。乐作，赞引官赞诣望燎位，导承祭官至燎位立，祝、帛焚讫，乐止，赞引官赞礼毕，退。

崇圣祠

雍正元年，追王五代：肇圣王木金父公正中南向、裕圣王祈父公东一室南向、诒圣王防叔公西一室南向、昌圣王伯夏公东二室南向、启圣王叔梁公西二室南向、木主高一尺五寸，阔二寸二分，赤地墨书。

祭品

五案。
筐一帛白色、羊一、豕一、钶一和羹、簠一黍、簋一稷、笾八与正殿四配同、豆八与正殿四配同、酒罇一、爵三。

①“赞”下，当脱“诣”字。

②“承祭官”下“祭官”二字或为衍文。



配位

颜氏无繇，字路、孔氏鲤，字伯鱼、曾氏点，字皙、孟孙氏名激，〔字〕公宜^①。

祭品每位一案。

簠一帛白色、豕首一、簠一黍、簠一稷、笱四与正殿十哲同、豆四与正殿十哲同、豕肉一、爵三。

东庑

周辅成敦颐之父、程珦字伯温，颢、颐之父、蔡元定字季通，沈之父。

西庑

张迪载之父、朱松字乔年，熹之父。

祭品

〔簠〕〔簠〕^②一帛白色、簠一黍、簠一稷、笱四与正殿两庑同、豆四与正殿〔西〕〔两〕^③庑同、豕肉一、每位铜爵三。

仪注同正殿，惟不用乐。

按：启圣进公而王，始于宋大中祥符间。元称启圣公。宋时颜、曾、子思配享堂上，颜路、曾皙、伯鱼从祀两庑。洪迈、姚燧以为崇子抑父，熊禾谓：宜别立一室祀启圣公，而以三子配。程敏政主其说。嘉靖九年遂立专祠遍天下，寻以激公宜进为四配，又以周辅成、程珦、蔡元定、朱松为四从，后又附以张迪焉。

又按：立圣裔自宋真宗始。子孙世袭衍圣公，并曲阜令、儒学教授，并以孔子子孙为之，自明万历始。追王孔子五代，自皇清雍正元年始。

名宦、乡贤二祠同时分祭，仪同两庑。

忠孝、节孝二祠春秋二祭，祭仪同。

按：洪武元年诏天下儒学各建先贤祠，春秋附祭。后分祀，改称名宦、乡贤，则成化中特典也。

祭先圣暨各先贤祝文

维某年月某朔正祭日某，某官等敢昭告于至圣先师孔子之神曰：惟圣德配天地，道贯古今，删述六经，垂训万世。今兹仲春、秋谨以牲帛、醴薤、粢盛

①“公宜”，上疑脱“字”，今补。

②“簠”，疑“簠”字之误。

③“西”，疑“两”字之误。





庶品，式陈明荐，以复圣颜子、宗圣曾子、述圣子思子、亚圣孟子配。尚飨。

启圣祠祝文

维某年月某朔正祭日某，某官等敢昭告于启圣王孔氏之神曰：惟王诞生至圣为万世王者师，功德显著。今兹仲春、秋谨以牲帛、醴薤、粢盛庶品，式陈明荐，以先贤颜氏、曾氏、孟孙氏、孔氏、先儒周氏、张氏、程氏、朱氏、蔡氏配。尚飨。

乡贤名宦祝文

维某年某月某朔正祭日某，某官等敢昭告于游定夫、黄勉斋二先生之神曰：惟二先生道德渊源，相继一脉，表章士类，永兹矜式。今兹仲春、秋谨以牲帛、醴薤、粢盛庶品，用伸常祭。尚飨。

维某年月某朔正祭日某，某官等谨以牲帛，醴薤、粢盛庶品，致祭于乡贤先生之神曰：惟乡贤先生歿祭于社，顾兹汉阳，代有作者，或仕于朝，或隐于野，勋庸行谊，深有可嘉，建兹学官，义不容舍，序列豆登，用昭风雅。尚飨。

维某年月日某朔正祭日某，某官等谨以牲帛、醴〔薤〕^①、粢盛庶品，致祭于名宦先生之神曰：嗟尔君子，敷治汉阳，咸有利泽，士民不忘，建兹学官，与兹豆觴，以酬先庸，毘勉冠裳，式为令典，敢不肃将。尚飨。

乐章

迎神乐：《咸平之章》。无舞。

大太四哉南工至林尺圣仲上、道太四德仲上尊林尺崇仲上、维南工持林尺王仲上化仲上、斯林尺民仲上是黄合宗太四、典黄合祀太四有仲上常林尺、精南工纯林尺并太四隆仲上、神黄合其南工来林尺格仲上、于林尺昭仲上圣黄合容太四。

初献乐：《宁平之章》。有舞。

自太四生仲上民林尺来仲上、谁太四底黄合其仲上盛太四、惟南工师林尺神仲上明太四、度黄合越仲上前仲上圣太四、粢仲上帛太四具仲上成林尺、礼黄合容太四斯林尺称仲上、黍太四稷黄合非林尺馨南工、维南工神林尺之仲上听太四。

亚献乐：《安平之章》。有舞。

大太四哉仲上圣黄合师太四、实南工天林尺生仲上德太四、作仲上乐太四以仲上崇林尺、时仲上祀太四无南工敦仲上、清黄合酏南工惟仲上馨仲上、嘉林尺牲仲上孔黄合硕太四、

^① “醴”下，当脱“薤”字。



荐太四羞南工神黄合明林尺、庶南工几林尺昭仲上格太四。

三献乐：《景平之章》。有舞。

百仲上王南工宗林尺师仲上、生林尺民仲上物太四轨黄合、瞻黄(四)[合]^①之南工洋林尺洋仲上、神林尺其仲上宁太四止黄合、酌太四彼黄合金林尺垒仲上、惟南工清林尺且太四旨仲上、登仲上献太四惟林尺三仲上、于黄合嘻南工成林尺礼仲上。

彻饌乐：《咸平之章》。无舞。

牺仲上牲太四在仲上前林尺、豆太四笱仲上在黄合列太四、以太四享南工以林尺荐仲上、既仲上芳林尺既太四洁仲上、礼黄合成太四乐仲上备太四、人南工和林尺神仲上悦太四、祭黄合则太四受仲上福林尺、率黄合遵南工无林尺越仲上。

送神乐：《咸平之章》。望燎同。

有太四严南工学林尺宫仲上、四黄合方太四来仲上崇太四、恪黄合恭南工祀林尺事仲上、威太四仪林尺雍仲上雍太四、歆仲上兹林尺惟南工馨林尺、神仲上馭太四还林尺复仲上、明黄合裡南工斯林尺毕仲上、咸南工膺林尺百仲上福太四。

乐器

麾一、钟一、堵磬一、鼓一、搏拊二、祝一、敔一、堵琴六、瑟二、凤箫二、笙四、箫二、笛二、埙二、篪二。

舞谱

初献 自稍前向外，开篙舞生蹈向里，开篙舞民合手蹲朝上来起辞身向外，高举篙，面朝^②、谁两两相对，蹲，东西相向底合手蹲，朝上其正揖盛起平身，出左手，立、惟两两相对，自下而上，东西相向师稍前舞，举篙，垂翟神中班转身，东西相向立，惟两中班十二人转身，俱东西相向明举翟三合篙、度稍前向外垂手舞越蹈向里，垂手舞前向前合手谦，进步，双手合篙圣回身再谦，退步，侧身向外，高手回面向上、桀正蹲，朝上帛稍舞，躬身，挽手侧身向外，呈篙耳边，面朝上具正揖成起辞身挽手，复举篙，正立、礼两两相对交篙，两班俱东西，手执篙容正揖斯向外退，挽手举篙向外，面朝上称回身正立、黍稍前舞稷正蹲，朝上非左右垂手，两班上下俱双垂手，东西相向馨起，合手相向立、惟左右侧身，垂手向外开篙垂手向^③神右侧身，垂手向里，垂手舞之正揖，朝上听躬而受之，躬身朝上，拱篙而受之，三鼓毕退。

亚献 大左右进步，向外垂手舞哉左向里，垂手舞圣向外落篙，面朝上师退向正身立、

①“四”，当为“合”之误。

②“面朝”下，原书有脱文。

③“垂手向”下，疑有脱文。





实正蹲天起身向前，转向外舞生向里舞。德合手谦，进步向前，双手簋存谦、作两两相对，自下而上，两班相对，举簋东西乐上下俱垂手，惟两中班上下十二人俱垂手垂身东（两）〔西〕相向^①以转身东西相向立崇相向立，两班上下以翟相簋、时稍前舞蹈，两班上下俱垂手向外祀向里垂手舞无合手谦，进步向前，垂手合簋敦回身再谦，两班上下东西相向，合簋立、清稍前舞，向外开簋翟酙向里舞惟双手平执簋翟，开簋翟馨合簋翟，朝上正位、嘉侧身垂左手，两班侧垂手，向外舞牲躬身正揖孔双手舞簋翟，躬身硕躬而受之，躬身朝上，拱簋受之，一鼓而起、荐一叩首，举右手，叩头羞举左手，叩头神复举右手，叩头明拜，一鼓毕，即起，躬身，三鼓，平身、庶三舞蹈，举簋向左，躬身舞几举簋向右，躬身舞昭举簋复向（正）〔左〕^②，躬身舞格拱簋，躬身而受之。

三献 百向外开簋舞王向里开簋舞宗侧身向外，面朝上师朝上正位、生两班上下，两两相对交簋民合手朝上，正蹲物侧身向里，落簋轨合簋，朝上正位、瞻向外开簋舞之向里开簋舞洋开簋，朝上正位洋合簋、神向外开簋舞其向里开簋舞宁进步向前，双手合簋止回身，东西相向手谦、酌向外开簋舞彼向里开簋舞金开簋，朝上正立壘合簋，朝上正位、惟向外垂手舞清向里垂手舞且朝上正揖、旨躬身而受之、登躬身，向左，合簋舞猷躬身，向右，合簋舞惟躬身，复向左（右）〔合〕簋^③三合簋，朝上拜，一鼓便起身、於侧身向外，垂手舞嘻侧身向里，垂手舞成朝上正揖礼躬身朝南受之，三鼓毕，起身。

按：（记）〔祭〕孔子以六代之乐^④，自汉章帝元和元年始。其后宋文帝元嘉二十六年，诏舞六佾，设轩悬。宋太祖用永安之乐，仁宗用登歌。明洪武二十六年，颁大成乐器于天下府学，令州县学如府式，舞用六佾，乐用登歌。正统十二年，加孔子庙舞八佾。嘉靖九年，改舞用六佾。佾各六人，左右共三十六人，持节二人。凡舞有节、有簋、有翟，节制凡七纓，纓各一尺，竿长八尺五寸。执节者立于东西两阶舞生之前，以节其舞。簋制长一尺二寸，二窍，朱饰，（在）〔左〕手^⑤，执之以舞。翟制用木柄一尺八寸，用雉尾三著于竿上，右手执之以舞。

又按：乐生二十二人，歌生四人，舞生三十六人，执麾一人，引节一人，凡六十四人，俱堂上之乐。其序则麾生一人立神位左，西向，左祝右敬。次左右搏拊，各东西对立。次琴六人，左者以次而东，右者以次而西，俱北向立。

①“两”，疑为“西”之误。

②“正”，疑为“左”之误。

③“右”，疑为“合”字误。

④“记”，据本节为祭孔乐舞，当为“祭”字之误。

⑤“在”，疑为“左”字误。



次左右琴各一。次左右笙、笛，笙在内，箫在外。次左右埙、篪。凤箫、簫亦以次而东西北向立于笙、箫之后。次左钟右磬。又次楹鼓居其左焉。

论曰：古有学无庙，释奠、释菜即于学。汉始庙于太学、阙里。明帝永平二年，以周公、孔子并祀郡学。唐武德初，郡国皆立孔子庙。贞观中，许敬宗奏天下州县置三献官，位爵公、侯、伯有差。宋则州县莫不有学，学莫不有庙。其后衰乱，或学废而庙存。洪武初，诏府州县皆于学专祀孔子，庙曰“文宣”，殿曰“大成”，建学舍以居生徒。嘉靖中，更定礼制，颁乐器、祭器，春、秋上丁行礼。厥后仪制愈详，尊崇愈笃，至我朝为尤盛。迨世宗宪皇帝追封五代，诏天下郡邑学皆祀以太牢，其尊师重道可谓至矣。

但思学校之设何为乎？先王所以造士也。三代而上，治与教合，而士皆受成于学。三代而下，治与教分，而学未尽能收士，顾游息有其地，迪训有其规，亦视造就何如耳。师道立，则善人多。今之倡教于上者，果能远体《周官》司徒所掌之法，近仿苏湖经义治事之方，渐摩陶淑，相与有成，将见人才蒸蒸蔚起，可以助《棫朴》、《菁莪》之化，与安定同风、文翁媲美，庶不使望宫墙者叹学校之设徒名存而实亡也，可弗勛哉。

汉阳县学

县学在南纪门内。永乐初，教谕赵弼倡建。正统癸亥，裁并入府学，以其地为千户所。至万历乙酉，知府杜从易、知县喻应台乃从邑太史萧良有之请，详请重建。越二年丁亥，知县管宗太创建，规模粗具。至二十二年癸巳，知县陈尧钦整葺之，始称完善，楚抚郭维贤记之。又阅七载己亥，知府傅道统、教谕陈阳和协修，亭、圃、门、庑皆具。至万历三十六年戊申，水圯。明年己酉，舒体震来知府事，复之，而自为记。壬子，知府马御丙加建，乃还旧观。崇祯末，复废于兵燹。

迨国朝顺治初，知府丘俊孙复图新之，邑学士熊伯龙纪于石。康熙五十八年，知府柳国勋鼎建大成殿，其两庑倾圯者俱新之。嗣知府郭朝祚率邑绅士募修。今上乾隆元年，知县沈孟坚倡，邑绅徐澍复修两庑，构尊经阁于明伦堂右。

庙制

至圣殿、崇圣祠、两庑、棖星门、戟门、泮池、名宦祠、乡贤祠、明伦堂、





龙门坊、尊经阁、甬壁。

学基

东抵鼓楼街，南抵城脚，北抵旧刘宦墙脚，西抵小教场。计前横一十三丈五尺，后横一十八丈九尺，长三十七丈五尺。西傍屋基一段，前抵街，后抵沟，长一十七丈五尺，前横二丈，后横三丈。生员罗廷植管业，未详始末。又街南基地一段，横八丈五尺，长二丈，与学相对，现属学书役住。

书院

晴川书院，在南纪门内。书院之设，康熙□□年肇自知府郝士鐸。主席者为贡士许之祯。一时从游称得人，如黄平知州死逆苗之难，赠参议罗孝廉鸣序其一也。及公去，而其地茂草矣。继此知县沈孟坚率邑绅兴之，而卒未大振。至乾隆七年，知府陈文言兴废举坠，特续前修，捐俸千金。知县刘嗣孔协助之。于是院有长，月有课，膏火有资，士不下数百人，而又彬彬乎称盛矣。

弟子员额数

原额廪生缺二十名。原额增生缺二十名。附生无额数。岁科两考，文童入学原额十五名。岁试武童入学原额十五名。

祀典

与府学同。

汉川县学

县学在县治东北。元至元二十六年，县治自刘家隔改建今地，儒学与县同迁于此。明洪武初，知县张敬建。正统七年，知县陈惠修，岁久颓圯。嘉靖元年，知县王元佐重修。嘉靖二十五年，知府贾应春改迁于伏龙山下。嘉靖四十二年，知府刘廷梅、知县昌应会复迁旧址，颇恢其制。万历十九年，知县安其善重修。万历二十五年，知县沈立敬创屏墙，横二十余丈，东西各建一坊，岁久圯。万历三十八年，知府舒体震、知县桂生芝、教谕周化鼎建。明季圯。

皇清顺治九年，知县龚应熊重修，改泮池，易棖星门午向。顺治十七年，教谕邹山重修启圣祠。康熙初，藩宪徐惺捐修圣殿门庑，提学蒋永修、训导白士煜修明伦堂。四十四年，合邑重修。



庙制

至圣殿、崇圣祠、两庑、棂星门、戟门、泮池、名宦祠、乡贤祠、明伦堂、敬一亭、射圃、尊经阁。

学基

坐落在城五铺。原将官基抵换举人龙章、义民王臣等各民基修建，内有启圣祠基地，系龙捐补，乡贤祠西侧墙脚一条，系生员王永捐补。

学宫前后官街共一大形

东至龙宅墙脚，西至王宦墙脚，东至邹宅墙界，西至王宦墙界，南至学前街路，北至龙宅墙界。南横四十一弓，北横三十八弓五分，长五十七弓。

街口人行路一形

东至街口，南至箫宅，西至林元吉屋基，北至朱宅墙界。横八弓除街，长二十五弓。

泮池一形

东至萧宅界，南至射圃阮文吾土墙，西至王宦界，北至屏墙。横三十弓，长三十三弓五分。

射圃一形

东至街口，南至顾宦界，西至王文修墙，南至城隍庙，北至阮文吾土墙，又北至文水沟。东横十弓，西横十四弓，长五十一弓。

天开贤路一形

东至段桥，西至城隍庙，东至孙墙，西至城隍庙，北至射圃，南至街口。南横二弓二分，北横二弓，中横一弓二分，长五十一弓五分。

文水沟一形

东至城外曹家院堤止，西至池池汪宅墙界，横以文水桥眼取直，出水南（此）〔北〕横岸各一尺^①，俱抵王界。

学田

共三十五亩五分，坐落长城乡七里庙，系万历壬子年生员程万里捐置，每亩征租谷一石。每租谷一石，自壬子年起，照常平仓口折银二钱。但田属低洼下则，先年洪水沉没九亩五分，详明无耕在案，其余二十六亩，共纳租谷二十六石，

^①“此”，或为“北”之误。





除动支谷一十二石五斗完纳正供外，余谷一十三石五斗奉文赈给贫生。如遇水旱勘田减租，年终造入奏册，载秋粮一石七斗一升。本里九甲籍内原只照解京则例共征条饷银二两二钱，南粮折银三钱五分，取办租谷数内，并无存留。项下杂派，岁以为常。

书院

紫阳书院，坐落县前东首，康熙六十年，知县钟嘉禧建。

弟子员额数

原额廪生缺二十名。原额增生缺二十名。附生无额数。岁科两考文童入学原额十五名。岁试武童入学原额十五名。

祀典

与府学同。

黄陂县学

县学自明洪武十五年诏天下通祀孔子，乃即县治东南隅重建文庙，知县吴旻因宋元故基而新之也。正德丁卯，教谕杨梁捐金购民居，拓其址，伐石树棂星门，而殿、庑、堂、斋以次就理，次年告成。后圯。嘉靖壬午，副使陈昌檄知县周音等用帑金买学傍民舍，更广規制，迁戟门于故池之所，东为名宦祠，西为乡贤祠，余仍旧。又建祠于明伦堂左，进宋故令〔陈〕〔程〕公适^①、故尉程公珣合祀。崇祯己卯，邑令周元泰重建明伦堂，训导朱家藩重建棂星门，明末尽圯。

皇清顺治初年，系知县张尚忠重修，复颓。知县杨廷蕴、县丞李成纪重修，后渐圯。康熙四十九年，知县顾彩捐貲七十金，教谕高元杰、训导陈献猷率绅衿募费五百余金重修。五十三年，教谕彭寿东、训导陈献猷率绅士请复学田，修建外泮池及古沟，新建崇圣宫并景程堂。雍正五年，添建照墙。

庙制

至圣殿、崇圣祠、两庑、棂星门、戟门、泮池、名宦祠、乡贤祠、明伦堂、敬一亭、坐春斋、立雪斋、照墙、射圃。

学田

坐落南乡丁家海，计田四顷七十六亩四分七厘，载正米六石三升。又万历

^①“陈”，当为“程”之误。



年间邑绅张涛捐骆家山田四丘，官濠二口，载正米三斗三升七合二，共米六石三斗六升七合。另立一户“孔甲”附礼教乡里甲册尾，每年纳正赋外，该输银十两二钱四分，造入奏销，报部，起解学道，发赈贫生。外有永丰仓市基米二斗有零。又据《县志》，谓横山地名白庙入官田米，及前任知县李应捐买快活岭祭田三顷，共米一石一斗五升三合，亦附“孔甲”止纳正赋。贫生任启新、刘映藜招佃耕种。有明末，被佃民欺隐自行耕种者，康熙五十三年，合邑绅士具呈请复。知县徐通详丈勘田数，与志相符，议定丁家海纳租谷二百四十石，骆家山纳租一十一石二，共租谷二百五十一石，如遇水旱年分，照民田纳租之例议减。奉各宪批允，勒石于明伦堂在案。此项租谷除完饷赈贫、造入奏册外，余谷照时价柴卖贮银县库，以为修学义举之费。

书院

二程书院，在鲁台山下，知县杨廷蕴重建。

甘露书院，在甘露山下，邑绅黄武滨建。

社学

旧在金鼓寺老山堡后，四乡咸增，今废。

弟子员额数

原额廪生缺二十名。原额增生缺二十名。附生无额数。岁科两考文童入学原额十五名，雍正元年广额五名，共二十名。岁试武童入学原额十五名。

祀典

与府学同。

孝感县学

县学旧在邑治东，宋端平乙未毁。元至元癸未，知县赵资仁即故址建礼殿，知县乔成始构讲堂，县监哈迷重建两庑。延〔佑〕〔祐〕丁巳^①，知县刘谅始创戟门。己未，县尹徐元素等协力兴创，制度始备，元季复毁。明洪武五年，知县朱师胜于县治东常平仓地建立学宫。九年，以县省入德安州，学遂废。十三年，复置县，知县宋显铭即宋元故址创大成殿，规制俱备。永乐时，教谕梁炯增修。宣德丁未，知县史播重修，后县丞卢清、钱钊，知县龙兴、郭斗、赵可镒相继修建。

^①“佑”，疑为“祐”字误。





隆庆二年冬，知县刘昆毁会真观改建学庙，中为大成殿，东西为两庑，门、亭、斋、舍，焕然一新。崇祯十六年，兵毁，仅存正殿。

皇清顺治十三年，邑绅屠奏疏捐貲重建。十六年，知县张擢士增修。康熙三十年，知县梁凤翔重修。五十四年，知县刘朝讲续修。

庙制

至圣殿、崇圣祠、两庑、棂星门、戟门、泮池、名宦祠、乡贤祠、尊经阁、明伦堂、敬一亭、进德斋、修业斋、甬壁、围墙、江汉秋阳坊、左右礼门、义路。

学田

三十一亩五分，坐落本县郭下乡五里广家庙。每年除完正赋银外，实征折租谷银六两三钱七分六厘，存贮县库，听候部示拨用，造入奏销。

书院

经正书院，在县治东南，明知县彭同魁、监生张翰选修，今废。

西湖书院，明嘉靖中知府陈谟建，在郭西北隅明月台处。久湮。康熙三十年，知县梁凤翔捐貲改建于城内汪公池畔。乾隆三年，知县靳树本重修，置田二十亩，以供修脯。

社学

久废。知县梁凤翔置于董孝子祠，今亦废。

弟子员额数

原额廪生缺二十名。原额增生缺二十名。附生无额数。岁科两考文童入学原额十五名，雍正元年广额五名，共二十名。岁试武童入学原额十五名。

祀典

与府学同。

《汉阳府志》卷之二十二下 典礼〔三〕

学校表

孔子以六经垂教，万世师表，自汉以来皆专祀于天下学宫。其封号祀典，因创不一，散漫难纪，特表而出之，以示历代尊崇，且便考核焉。

纪朝		封谥	崇祀	立学	赐予
周	敬王四十一年壬戌	鲁哀公十六年，孔子卒。			
	四十二年癸亥	十七年，立庙孔子旧宅。			
汉	高帝十二年丙午		以太牢祀孔子。		
	武帝			命天下郡国皆立学校。	
	平帝元始元年辛酉	追谥为褒成宣尼父。		诏立学宫，郡国曰学，侯国曰校。	
	明帝永平二年己未		以周公、孔子并祀于郡、县学。	命郡、县行乡饮礼于学校。	
	安帝延光二年癸亥		祀孔子及七十二弟子于阙里。		
	灵帝光和二年己未			置黉门学，画先圣及七十二弟子像。	舞六佾，设轩悬之乐。
晋	孝武帝太元九年甲申			命天下普修学校。	





〔续表〕

纪朝		封谥	崇祀	立学	赐予
宋	武帝永初元年庚申			诏有司立学。	
	文帝		太子释奠。		舞六佾，设轩悬之乐。
		北魏文成帝。	勅有司行荐享之礼。		
	明帝太始七年辛亥	北魏孝文帝延兴元年，谥文圣尼父。	以颜子配享。		
梁	武帝天监四年乙酉		立孔子庙。		
陈	废帝光大二年戊子	封孔英哲为奉圣侯。	以英哲奉孔子祀。		
		北周封邹国公。			
隋	文帝	谥宣圣尼父。	诏州、县学以春秋二仲月上丁释奠。		
唐	高祖武德七年甲申			诏诸州、县，并令置学。	
	太宗贞观二年戊子	尊孔子为先圣，颜子为先师。	罢周公祀，令天下四时专祀孔子。		
	贞观二十年丙午		诏诸州刺史为初献，上佐亚献，博士终献。县学，令初献，丞亚献，簿终献。		



〔续表〕

纪朝	封谥	崇祀	立学	赐予
贞观二十一年丁未		诏以左丘明、卜子夏、公羊高、穀梁赤、伏胜、高堂生、戴圣、毛萇、孔安国、刘向、郑众、杜子春、马融、卢植、郑玄、服虔、何休、王弼、王肃、杜预、范宁、贾逵并从祀。		
高宗乾封元年丙寅	尊为太师。	车驾过曲阜，祀孔子。		
总章元年戊辰	赠颜子少师、曾子少保。	以曾子配享。		
玄宗开元八年庚申		图七十弟子及二十二贤于壁，立十哲坐像，曾子特坐从祀。		
开元十三年乙丑		幸孔子宅，亲奠，遣使以太牢祠墓。	令天下州、县立学。	
开元二十七年己卯	追封为文宣王，服王者衮冕。颜子为兖国公，闵损等九人爵皆侯，曾参伯。	令贡士释褐谒庙。		乐用宫悬，舞用八佾。





〔续表〕

纪朝	封谥	崇祀	立学	赐予
后周	太祖广顺二年壬子		幸阙里庙奠祭，皆再拜。或言天子不当拜。曰：夫子，圣人也。百王取则，安得不拜？	
宋	太祖建隆三年壬戌		亲撰文宣王、兗公二赞。	诏立十六戟于庙门。
	太宗太平兴国三年戊寅	以孔宣袭封文宣公。		诏免孔氏庸调。
	端拱 ^①		幸太学。	
	至道三年丁酉		赐太学御书六经。	
	真宗咸平元年戊戌	加谥元圣文宣王。费侯闵损以下皆公，邾伯曾参以下皆侯，左丘明以下皆伯。寻改称至圣。追封叔梁纥为齐国公，颜氏，鲁国太夫人；（开）〔开〕官氏为郛国夫人 ^② 。		

① “端拱”下，原书脱年数干支。
② “开”，当为“开”之误。



〔续表〕

纪朝		封谥	崇祀	立学	赐予
宋	大中祥符二年己酉	加宣圣冕服九旒九章，桓圭用玉。封七十二贤俱列侯。命中书门下两撰诸贤赞。王旦撰颜子赞。封左丘明以下至范宁二十一人皆为伯，王肃司徒，杜预司空，群臣赞之。		诏天下郡、县于文宣庙立学。	赐田及银、帛、九经、三史、疏释文。
	仁宗天圣二年甲子		临太学谒孔子。		
	景祐元年甲戌	封孔宗愿为衍圣公。		命藩府皆立学。	诏用登歌，赐飞白书殿榜，金字篆牌。
	庆历四年甲申			以范仲淹请，诏天下州、县立学。	
	神宗元丰三年庚申	封孟子邹国公。	以孟子配享，荀况、杨雄、韩愈从祀。		
	哲宗元祐元年丙寅	改封衍圣公若蒙为奉圣公。			
	元祐六年辛未		临太学，一献再拜。		赐田，勅守庙户五十人。
	徽宗崇宁四年乙酉	加冕十二旒、服九章。封孔鲤泗水侯、伋沂水侯。			





〔续表〕

纪朝	封谥	崇祀	立学	赐予
宋	大观二年 ^①		以孔伋从祀。	
	大观四年庚寅	诏执镇圭，用王者之制。		增庙戟二十四。
	政和三年癸巳	封王安石为舒王，子雱临川伯。	以安石配享，子从祀。	
	高宗绍兴元年辛亥	孔氏挈族于衢，以孔玠袭封。	御制文宣王赞及七十二子赞。幸太学，步趋大成门外，执爵灌献。	幸太学。赐田。
	绍兴四年甲寅			令府、州、县皆置学。
	绍兴八年戊午	金太宗天眷元年，求孔子后于山东，以四十九代孙璠袭封衍圣公。		
	孝宗隆兴二年甲申	金加服十二章、纁旒九就，颜、孟章服皆用九。		
	理宗淳祐元年辛丑	褫去安石及子雱祀。列周、张、二程、朱于两庑。		

① “大观二年”下，原书脱干支“戊子”二字。



〔续表〕

纪朝		封谥	崇祀	立学	赐予
宋	景定二年辛酉		诏皇太子谒孔子于太学。加张栻、吕祖谦伯爵，从祀。		
	度宗咸淳三年丁卯		谒孔子于太学，行释菜礼。以颜回、曾参、孔伋、孟轲并配享，升颢孙师于十哲，邵雍、司马光从祀。		
元	成宗大德六年壬寅		建文宣王庙于京师。勅到任官先诣圣殿，著为令。		
	仁宗皇庆二年癸丑		以许衡从祀。		
	英宗至治三年癸亥		泰定帝遣使以太牢祀孔子于曲阜。		
	文宗至顺元年庚午	加先圣父为启圣王，母为启圣王夫人；颜子，兖国复圣公；曾子，郈国宗圣公；子思，沂国述圣公；孟子，邹国亚圣公。			





〔续表〕

纪朝	封谥	崇祀	立学	赐予
明	太祖洪武元年戊申		诏天下儒学各建先贤祠，春、秋附祭，制春、秋二丁释奠，丞相初献，翰林学士亚献，国子祭酒终献，遣子祭阙里。	蠲其子孙赋，给洒扫役户百。
	洪武四年辛亥		定释奠祭品，各为高台，其笾、豆、簠、簋以瓮代，牲用熟。	乐用六奏。
	洪武五年壬子		罢孟子祀，寻复。	
	洪武六年癸丑			学士詹同、乐韶凤上释奠乐章，定舞六佾。
	洪武十四年辛酉		文庙成，遣官以太牢祀神主，诏以后像毋用土绘。	
	洪武十五年壬戌			颁禁例勒石于明伦堂，谓之卧碑。
	洪武十七年甲子		诏天下府、县立学，赐学粮，增师生膳。敕每月朔望府、县官以下诣学行香。	议大成乐。
	洪武二十六年癸酉			颁乐器于天下。



〔续表〕

	纪朝	封谥	崇祀	立学	赐予
明	洪武二十九年丙子		罢杨雄祀，进董仲舒。		
	成祖永乐四年丙戌		行一奠四拜礼。		
	宣宗宣德八年癸丑		正文庙绘像衣冠。		孔谔会试京师，诏赐进士，即授春坊中允。
	宣德十年乙卯		以吴沉从祀。		
	英宗正统元年丙辰		定从祀名爵位次。		
	正统三年戊午		禁祀孔子于释老宫，进胡安国、蔡沈、真德秀从祀。		
	正统八年癸亥		以杨时从祀。		
	宪宗成化元年乙酉			(辛)[幸]学 ^① 。	加牲用乐。
	成化十二年丙申	少詹事杨守成请追崇帝号。祭酒周洪谟请改“大成至圣文宣王”为“神圣广运帝”，尚书邹幹驳。	以先贤祠分为名宦、乡贤祠。上亲释奠太学，诏衍圣公及三代子孙听讲，赐冠带有差。		乐用八佾，十二筩豆。命孔氏世举一人为曲阜令公，亲弟承子思为翰林五经博士。其居衢州者，亦世袭博士。

①“辛学”，据该表前后“幸太学”，当为“幸学”之误。





〔续表〕

纪朝		封谥	崇祀	立学	赐予
明			改大成殿为先师庙，门为殿门。祭用笱豆十，州、县笱豆八，佾舞六六。四配笱豆六，十哲笱豆四，两庑如之，佾舞六。罢申党、公伯寮、秦冉、颜何、荀况、戴圣、刘向、贾逵、马融、何休、王肃、王弼、杜预、吴澄从祀。林放、蘧瑗、郑玄、郑众、卢植、服虔、范宁各祀于其乡。进后苍、王通、胡瑗、欧阳修、陆九渊从祀。专祠祀启圣公，以颜无繇、曾点、孔鲤、孟孙氏配享，以周辅（臣）〔成〕 ^① 、程珦、蔡元定、朱松从祀。		
	世宗嘉靖九年庚寅	改称至圣先师。孔子四配为复圣颜子、宗圣曾子、述圣子思子、亚圣孟子。从祀弟子称先贤，左丘明以下称先儒。去肖像、易木主、罢封爵。			
	穆宗隆庆六年壬申		进薛瑄从祀。		
	神宗万历十四年丙戌		进胡居仁、陈献章、王守仁从祀。		乐用六佾，选民间子弟充之。

①“臣”，当为“成”之误。



〔续表〕

纪朝	封谥	崇祀	立学	赐予
明	万历四十一年癸丑		以罗从彦、李侗从祀。	
国朝	世祖章皇帝 顺治九年壬辰			四配、十哲及东野、周、张、程、朱后裔各世袭翰林五经博士。
	圣祖仁皇帝 康熙二十年辛酉	幸阙里，御制诗勒石孔林。		
	康熙二十四年乙丑		敕勒御书“万世师表”匾额于天下文庙。	
	康熙四十一年壬午	升祔先儒朱子于十哲之次。	颁御制训飭士子文。	
	康熙五十一年壬辰	改“启圣”为“崇圣”。	敕悬御书“生民未有”额于天下文庙。	
	世宗宪皇帝 雍正元年癸卯	追王五代。	增宋儒张迪从祀崇圣祠。	诏圣庙特设执事官三品二人，四品四人，五品六人，七品八人，八品十人，九品十人，悉以孔氏子孙为之。





〔续表〕

纪朝	封谥	崇祀	立学	赐予
国朝	雍正二年甲辰		复增蘧瑗、林放、秦冉、颜何、郑玄、范宁从祀。进牧皮、公孙丑、公都子、乐正克、县亶、万章、诸葛亮、尹焞、魏了翁、许谦、罗钦顺、黄幹、何基、赵复、金履祥、陈澧、蔡清、陆陇其从祀。	
	雍正四年丙午	诏避孔子讳，除圜丘外，余俱加邑。		
	雍正五年丁未			诏以关〔羽〕、韩愈后裔世袭五经博士 ^① 。
	今上皇帝乾隆三年戊午		升有子于十哲中，复以吴澄从祀。	敕悬御书“与天地参”额于天下文庙。

①“关”后，原书有空格一，系为示敬避讳而未出“羽”字。清代雍正十年（1732），授湖北当阳关公后裔世袭五经博士。



《汉阳府志》卷之二十三 食货〔一〕

《食货志》序

《禹贡》为唐虞封域山川贡赋之书也。《周礼》则备六官而载焉。汉、晋、唐、宋于《地理志》、《郡国志》外，又以田赋、布帛、漕运、盐铁、皮币、役法、税课、仓储、钱法、物产诸事统载而为《平准书》、为《食货志》。顾考课之法，列代各有重轻，而世道亦因之而生治乱，故志食货者，为一朝典故，重纪当时之事。

今汉阳以郡统邑，为一郡专志，则有关于国计民生者，食货其大焉。按府属有田赋，有丁徭，有夏税丝，有秋粮米，有山桑丝，有漕运，有南粮，有芦课、湖课、渔课、税课，有鹿鹅翎毛、缎匹、雁兔折色，有白硝、麂皮、胖袄本色，上之所以取下，下之所以事上。其原额与新增、旧制与新除，或民生实受其惠，或虽奉减裁而非与诸民者，悉据奏册款项，核之《赋役全书》，证于郡邑旧《志》，而四县之科条款则，各有不齐，若但依《全书》之统融会计，止书总数，又何以辨各属、各款之有多寡重轻也？今以四县为纲，而诸事分载其下，庶于各属土壤之科则、赋税之重轻、民力之缓急，可得悉观矣。

为《食货志》。

〔食货志〕

〔汉阳府〕赋税

本府征解税课

商税额银二百八十九两。牙帖税额银二百八十九两八钱。当税一百九十五两。每年开歇不一，原无定额。向例每座每年纳银五两。官地租银三两八钱。鱼厂银二两五钱。房船税银无定额，尽征尽解。以上六项，系本府征解奏销。

本府额征渔课银二百二十三两八钱七分七厘三毫三丝六忽五微九尘七纤五渺五漠，遇闰加征银一十九两六钱三分一厘二毫，共银二百四十三两五钱八厘





五毫三丝六忽五微九尘七纤五渺五漠。此项在汉阳县册内奏销。本府经管常平仓谷，共一万二千一十八石二斗九升三合四勺六抄二撮八圭五粒六粟。

盐课

汉阳府康熙八年旧《志》载：汉阳府属原额盐一十四万四千引，汉阳县原额盐一十万四千引，汉川县原额盐四万引。原系两县共销一十四万四千引，今黄陂、孝感改归汉阳府属，乃属四县，而《赋役新全书》载合府额销盐引一十三万二千一十引，反少于旧《志》之数，不解何故？《新赋役全书》仍载每引改子盐四十一包六分九厘六毫，每引纳税银二分，系商人交纳，解司拨用。查每年行销，原无一定，理合注明。

又旧《志》引按明盐法初制，盐院每拨楚商行盐，俱遵照额派口岸销卖，无敢逾越。明万历间，各商因所派郡邑或有不可泊船者，始群聚于武昌之白沙洲。嗣洲岸倾圯，复群聚于汉阳之汉口。汉口之有盐行，自兹始也。行分因招各口岸小贩贩卖，有司亦以便商为请，而向时盐院所拨之口岸册无用矣。且汉口为九州百货备集之所，而盐务一事，亦足甲于天下。汉口一年所行之盐引八十三万道，课额一百余万，而货卖官引盐价六百余万，于十五省中亦未有可与匹者。吁，可勿知其概乎！

关税

府治内汉口上十里宗三庙、大江上十里火巷、汉口外江下五里茶庵三处征收船料银，向系武昌府同知征收，后系每年奉院委道员或武、汉二府知府，或亦委同知管理，无定制。

又按《大清会典》，此税不载于户部各省关税之下，载于工部杂税、落地等税项下，名船料银。康熙八年，郡守陈国儒旧《志》亦谓汉口关税地属汉阳，而税务乃属武昌职掌。当时创置之故，不解云何？且汉口距汉城陆路不过二里，距武昌水路七里余，客商渡江讨票，跋涉颇远，且波涛之惊、风雨之阻，往往停滞数日始得成行。至于官府之号令不一，往来之奸宄莫测，是诚地方积年一大弊政。绅士呈请题更，而当事惮于改弦，因仍莫察甚矣，任事者之难也。

四县征解各种本折赋役

正杂钱粮，共一十一万一千五百七十六两三钱四分三厘七毫六丝六忽。

漕粮

汉阳、黄陂、孝感三县征收起运，一万三千三百五十八石九斗六升四合二



勺二抄二撮零。

南粮

四县征收起运，一万四千三百二十二石三斗六升三合二勺七抄五撮七圭六粒。

人丁四县

赋内正丁共三万七千九百三十六丁。自康熙五十五年起，至乾隆三年节届编审，钦奉恩诏，滋生人丁，永不加赋。

汉阳县

田

原额上田一千二百三十七顷八十三亩六分八厘九毫八丝九忽，每亩科秋粮民米七升三勺九抄。中田四百六十九顷四十五亩八分四厘四毫六丝五忽，每亩科秋粮民米四升九合五勺八抄。下田二百二十二顷四十二亩四分八厘一毫八丝，每亩科秋粮民米三升五勺七抄。水乡田六百四十四顷九十五亩五分七厘八毫九丝，每亩科秋粮民米二升六合一勺。极下田八十七顷八十三亩九分七厘九毫，每亩科秋粮民米一升六合九勺二抄。

凤丰二里土名塔儿头等四处：上田九顷四十九亩二分五厘九毫五丝，每亩科秋粮民米六升七合。中田八顷六十五亩三分五厘八丝，每亩科秋粮民米四升七合。下田六顷三十二亩四分七厘四毫二丝，每亩科秋粮民米二升七合。水乡田八十二顷一十一亩一分七厘九毫，每亩科秋粮民〔米〕二升四合^①。极下田六顷五十九亩四分四厘一毫，每亩科秋粮民米一升五合。

地

原额上秋地二十六顷七十七亩四分八厘六毫九丝四忽，每亩科秋粮民米四升。中秋地九十四顷五十一亩九分七厘六毫五丝六忽，每亩科秋粮民米三升。下秋地一十四顷二十三亩三分五厘六丝，每亩科秋粮民米一升六合。

多丈地

凤丰二里塔儿头等四处，上、中、下多丈地二顷六十九亩四厘六毫九丝，每亩科则不等，共科秋粮七石三斗九升二合九勺六抄。原额上税地四百一十六顷一十九亩四分五厘四毫三丝七忽五微，每亩科秋粮官米一升四合，科夏税二

^①“民”下当脱“米”字。





麦折实二升八合。中税地一百五十一顷七亩五分二厘七毫五丝一忽五微，每亩科秋粮官米九合，科夏税二麦折实一升八合。下税地一千九十一顷二十五亩九分五厘五毫六丝七忽，每亩科秋粮官米七合一勺五抄，科夏税二麦折实一升四合三勺。水乡地六百二十四顷四十九亩七分四厘四毫六丝，每亩科秋粮官米五合三勺五抄七撮七圭九粒，科夏税二麦折实九合六勺一抄二撮四圭三粒。

山

原额上上山四十八顷二十九亩九分九厘三毫六丝一忽五微，每亩科夏税桑丝七钱。上中山五十六顷一十六亩二分一厘七毫八丝一忽，每亩科夏税桑丝三钱五分。上下山八百六顷三十四亩一分四厘三毫九丝，每亩科夏税桑丝四分五厘。中山六十九顷一十九亩八分七厘，每亩科夏税桑丝二分八厘二毫三丝六忽。下山一千七百九十五顷五十七亩九分五厘三毫五丝五忽，每亩科夏税桑丝四厘一忽七尘二纤。极下山五百八十七顷六十三亩九分六厘二毫，每亩科夏税桑丝二厘。

塘

原额上塘九十顷三十一亩九分四厘六毫一丝，每亩科秋粮民米四升五合。中塘一百五十顷二十八亩五分九厘六毫二丝，每亩科秋粮民米三升八合。

墩堰

一百六十五顷八十三亩六厘九毫，每亩科秋粮民米二合五勺七抄一撮二圭。

风丰二里塔儿头等四处：原额上塘九十三亩二分三厘三毫一丝，每亩科秋粮民米四升一合。中塘一顷三十二亩一分五厘六毫六丝，每亩科秋粮民米三升二合。墩堰五顷六十一亩九分四厘，每亩科秋粮民米二合一勺。

以上每米一石，并新加颜料派折银七钱九分一厘四毫五丝八忽三微九尘八纤三渺八漠，税地水乡地每米一石折银二钱六分一厘三毫，每麦一石折银七钱二厘五毫八丝五忽，每丝一两额征，并新加北绢派银六分八厘九丝六忽三微七尘三纤七漠。

以上原共额上中下田地、塘堰二千三百二十顷二十一亩九分九厘九毫七丝四忽，共科秋粮民米一万五千三百三十一石一斗三升三合三勺二抄四撮四圭三粒五粟，共折银一万二千一百三十三两九钱五分四厘二毫二丝六忽三微一尘一纤一渺。

原额上中下税地共二千二百八十三顷二亩六分八厘二毫一丝六忽，共科官米一千八百三十三石四斗八升四合一勺六抄九撮二圭六粒五粟，共折银



四百七十九两八分九厘三毫八丝四忽，共科夏税二麦折实三千五百九十八石七升四合三勺五撮六圭，共折银二千五百二十七两九钱五分三厘九丝三忽。

原额上中下山三千三百六十三顷二十二亩一分四厘八丝七忽五微，共科夏税桑丝七百五十一斤一十五两三钱六分六厘六毫二丝，共折银八百一十九两二钱九分二厘四毫三丝。

以上原额田、地、山、塘共八千九百六十六顷四十六亩八分二厘二毫七丝七忽五微，额征条银一万五千九百六十两二钱八分九厘一毫三丝三忽三微一尘一纤一渺。

万历四十六七八三年派征九厘饷、驴脚米，折银及优免杂徭，另派麀皮京扛银、岁贡银共二万三千五百八十七两七钱六分四毫八丝九忽四微七尘一纤一渺，内于康熙三十八年除(删)[坍]塌田^①、地、山、塘二百八十六顷四十三亩六分六厘九毫，共无征、条、饷、米折等银二百七十两八钱五分七厘九毫二丝九忽五微一尘三纤四渺七漠，于通县田地内公摊补项。

实在田、地、山、塘，共八千六百八十顷三亩一分五厘三毫七丝五忽五微。实在秋粮民米一万五千三百二十二石九升八合三勺六抄八圭三粒九粟。实征条银一万二千一百二十六两八钱三厘四毫二丝八忽四微九尘七纤四渺二漠二茫。实在官米一千七百四十八石一斗八升二合四勺七抄二撮七圭五粒八粟。实征条银四百五十六两七钱九分七厘五丝二忽二微二纤一渺三漠。实在麦粮三千四百四十五石三升四合二勺三抄八圭二粒四粟。实征条银二千四百二十两四钱二分九厘四毫三丝二忽六尘三纤四茫。实在桑丝一万一千一百四十三两七钱四分四厘八丝一忽九微一纤四渺一漠八茫。实征银七百五十八两八钱六分八毫五丝四忽一微八尘九纤九渺五漠四茫。实征九厘饷银五千九百四十五两三钱四分八厘四毫二丝一忽七尘四纤一渺九茫。实征驴脚米折银五百四十两六钱四分一厘二毫七微四尘三纤四渺五漠。

另补麀皮京扛银三钱九分六厘。补征本府岁贡银六两五钱。奉裁绅士优免银一千六十一两一钱二分六厘一毫七丝一忽一微八尘六纤八渺六漠一茫。

以上共实征条饷米折，并麀皮、岁贡、优免等银共二万三千三百一十六两九钱二厘五毫五丝九忽九微五尘七纤六渺三漠。

原额人丁银二千二百三十三两九钱四分二厘八丝二忽九微六纤四渺。雍

^①“删”，当为“坍”之误。





正七年，丁随粮派案内加丁银一千一百一十一两九钱二分三厘零。此项于雍正十一年、乾隆二年二次减除全免。雍正八年，坍除优免丁银二百四两九钱八厘四毫八丝五忽三微二尘。乾隆二年，新垦应摊丁银二钱六分六厘七毫九忽零。实征新旧丁银二千二十九两三钱三毫六忽九微三尘三纤三渺三漠五茫。民赋额内带派均摊银七百六十六两九钱一厘五毫六忽三尘四纤六渺六漠。

以上共实征条饷随驴地丁，并均摊等项共银二万六千一百一十一两六钱三厘三毫七丝二忽四微三尘五纤九渺八漠六茫。

康熙三十六年起，至乾隆三年止，新垦水乡田八亩八分六厘五毫一丝四忽八微，极下田二顷七十一亩五分五厘九毫三丝，下税地三顷五十亩五分二厘七毫八丝六忽，水乡地四十四顷二十三亩九分九厘九毫六丝四忽五微二尘二纤九渺三漠三茫。新增秋粮民米、官米，共三十一石八斗一升三合三勺二抄。新增夏税二麦，四十九石二斗三升二合六勺一抄。新增条、饷随驴等银六十九两七钱八分九厘六毫三丝。通县共实征银二万六千一百八十一两三钱九分三厘二忽八微三纤五渺七漠二茫。

漕粮本色

外派本色兑军正米三千六百一十八石三斗，内除折色米一千石，实征正米二千六百一十八石三斗。每正米一石，派耗米四斗，共派耗米一千四十七石三斗二升。每正米一石，征贴米二斗，共征贴米五百二十三石六斗六升。《全书》并无贴米之项，惟载另正米一石，里纳船脚米各则不等，合府共计三百六十二石九斗九升八合九勺。雍正十年，奉文革除节年新垦本色兑军正米八斗四升三合，共派耗米三斗三升七合一勺，贴米一斗六升八合五勺。

以上实征漕粮正耗赠贴并新增米四千一百九十石六斗二升八合八勺。

随漕项下

兑军盘费银三十两。楞木松板银一十两四钱七分三厘。运粮官军行月粮米九百五十五石三斗九升，每石折银四钱，该银三百八十二两一钱五分六厘。江西运粮官行月粮米一千四百五石九斗九升三撮，每石折银五钱，该银七百二两九钱九分五厘一毫五丝。三六耗席轻费银四百八十九两二钱二分九厘三毫五丝五忽，原议每百两有解淮扛银一两在内。浅船银四十八两七钱五分六厘。额外节年新垦随漕银一两一钱四分六厘。

以上随漕原额新增，共银一千六百六十四两七钱五分六厘，内除故夫



丁银一两三钱五分，又除办本色松板席片银五两六钱九分六厘，实征解银一千六百五十七两九厘四毫。

南粮项下

原额驴脚米折银五百四十两九钱六分，以二钱给解役，该银一百八两一钱九分二厘，余八钱充饷银，四百三十二两七钱五分八厘。新增驴脚米折银一钱七分四厘一毫。原额并新增，共银五百四十一两一钱三分四厘，外派本色南粮正米三千六百六石四斗。每正米一石，派耗米二斗五升，共派耗米九百一石六斗。新增南粮正米一石一斗六升一合二勺，派耗米二斗九升二勺。

以上共实征南粮正、耗并新增米四千五百九石四斗五升一合四勺。额外升科大麦六十石，内除荒麦六石四斗四升五合三勺，实征大麦五十三石五斗五升四合六勺，以麦二石折米一石，坐拨汉阳营月粮。

更名项下

原额田地山塘、草塌基地共一千六百七十六顷一亩，内除荒外，实在一千五百五十六顷七十五亩六分二厘六毫六丝二忽。原额租饷银五千六十五两九分三厘，内除荒外，实在四千七百一十八两九钱一分一厘六毫五丝三忽二微二纤五渺八漠七茫，内除坍塌熟地一十七顷三十三亩二分，无征银五十二两四钱七厘二毫九丝八忽四微一尘二纤六渺，奉文在于通县田地内均摊补项。实在共一千五百三十九顷四十二亩四分一厘六毫六丝二忽。实征饷银四千六百六十六两五钱四厘三毫五丝四忽七微八尘九纤九渺八漠七茫。

原额纳谷田三十一顷七十亩三分，内除荒外，实在三十一顷七亩一分七厘。额载谷一千九百八十四石七斗四升，内除荒外，实在谷一千九百四十五石二斗四升，每石折银四钱六分六厘，共折银九百六两四钱八分一厘八毫四丝。每田一亩照民赋上则，上田征银八分三厘四毫一丝，奉文减重银六百四十七两三钱一分二厘七毫九丝三微，在于通县均摊外，实征银二百五十九两一钱六分九厘四丝九忽七微。

一更名额外

康熙三十六年至雍正十三年，节年新垦淤地四十顷九十一亩九分五厘九毫九丝，新增租饷银一百一十八两八钱二分六毫二丝七忽六微三尘四纤一漠五茫。康熙三十九年，带派均摊民赋更名坍塌银四十六两二钱九分八厘二毫三丝三忽二微一尘九纤四渺六漠。带派均摊匠班无著银二两三钱二分一毫七丝三忽三微





八尘五纤九渺七漠。带派均摊谷折减重银九十二两七钱八厘五毫一丝八微三尘一渺三纤。乾隆元年，除坍塌地无征银一十八两四钱九厘六毫五丝一忽五微九尘三纤八漠一茫。乾隆二年，新垦应摊丁银二两九钱四分三厘九毫六忽五微五尘六纤九渺五漠。

以上更名，除摊减外，实征租饷新增均摊并新加丁银，共五千一百七十两八钱四分一厘二毫六忽四微一尘九纤五渺五漠二茫。

湖课项下

熟铁正扛银六百九十两六钱五分一厘八丝四忽七微六尘八纤一渺。生铁正扛银六两五分四厘。白麻正扛银一百一十三两五钱一分二厘五毫。

户部项下

盛京干鱼正扛银一百六十一两四钱二分三厘八毫五丝六忽。江南干鱼正扛银二十五两三钱四分六厘八丝。

工部项下

黄麻正扛银一百六十七两四钱三分一厘一毫八丝七忽七微五尘。熟铜正扛银一十三两九钱二分四厘二毫。生铜正扛银一十八两九钱六分九厘二毫。线胶正扛银四十两八钱一分一厘八毫三丝二微。一均摊坍塌银一十二两二钱七分七厘四丝九忽八微七尘七纤一渺四漠。一均摊匠班银六钱一分五厘二毫四丝七忽七微一尘六纤八渺八漠，一均摊谷折银二十四两五钱八分三厘八毫九忽六微五尘七渺三漠。

以上湖课实征解银一千二百七十五两六钱五丝三忽五微三尘七纤五渺五漠，外带征闰银二十两二钱九分三厘三毫三丝三忽三微三尘，遇闰起解。

芦课项下

原额并新增银九百七十六两四厘三毫三丝七忽八微八尘八纤七漠。带征三案均摊银二十四两一钱八分六厘七毫一丝一忽九微五尘九纤六渺七漠。新增银一百九十五两四钱一分九厘九毫五忽八微九纤三渺四漠。

以上芦课共实征银一千一百九十六两一钱一分九毫五丝五忽六微五尘七纤八漠。

门摊

原额银三百四十两六钱。带征三案均摊银一十两三钱九厘四毫三丝七忽八



微五尘二纤八渺八漠九茫。

以上实征银三百五十两九钱九厘四毫三丝七忽八微五尘二纤八渺八漠九茫。

合县民赋更名湖、芦、门摊等项，共实征银三万四千三百六十五两八钱八分五厘一毫五丝二忽二微五尘二纤三渺五〔沙〕〔漠〕三茫四灰^①。

《全书》内载有渔夫银，按季给发。排夫节年驿道〔银〕^②，奏册统于驿站银内报销，系在额外地粮内派出。

起运项下

布政司民赋银一万六千六百九十两七钱九分八厘八毫八丝四忽三微九尘七纤二渺七漠三茫。更名银五千一百七十两八钱四分一厘九毫四丝二忽七微一尘三纤六渺六漠五茫五沙。渔课银一百四十七两五钱四分四厘三毫三丝六忽五微九尘七纤五渺五漠。湖课银一千二百七十五两六钱九分五丝三忽五微三尘七纤五漠。芦课银一千一百九十六两一钱一分一厘二毫九丝六忽一微九尘三纤八渺。门摊银三百五十两九钱九厘四毫三丝七忽八微五尘二纤八渺八漠九茫。芦课均摊银二十四两一钱八分六厘七毫一丝一忽九微五尘九纤六渺九茫。此项芦课均摊，奏册内系另款开载，不在芦课一千一百九十六两一钱零之内。督粮道随漕楞木松板、芦席、驴脚银二千二百四两五钱八分三厘九毫九丝五忽九微四尘八纤四漠三茫。

驿站项下应解裁等项

驿盐道冲途买马、裁减夫马充饷银一千七十一两四钱九分三厘九毫二丝七忽七微一尘六纤八渺。

布政司拨运项下

布政司《宪书》表夫、科场对读、举人会试长夫、各部寺解费银，共一百一十二两五钱四分九厘。

支給项下

本府俸工银共四百一十五两五钱六分。

同知俸工、通判俸工银共一百九十一两五钱四分三厘。经历俸工银共三十九两七钱一分四厘。司狱司俸工银、府学俸工、廩膳、乡饮、香烛、岁贡

^①“沙”，当为“漠”之误。

^②驿道”下原书留空，据《四库全书·世宗宪皇帝硃批谕旨》有“河工驿道银”，补“银”字。





花红等项银共一百二十五两四钱八分四厘一毫。本县俸工银共六百五十五两九钱一分七厘。典史俸工银共六十一两四钱一分六厘。仁义等处巡检司俸工银共四百一十一两七钱九分。县学俸工、廩膳、香烛、岁贡花红等银共一百五十七两九钱八分五厘。本县铺司兵工食银三百一十两二分七厘。本县迎送皂隶工食银一百三十两二钱八分九厘。平塘、龚家二渡渡夫工食银二十两二钱六分三厘。四镇弓兵工食银一百五十五两四钱九分九毫。孤贫口粮布花银五十四两四钱。府县二监囚粮银六十八两九厘。江济解官盘费银九两九钱六分五厘。文庙春、秋二祭银八十三两四钱一分一厘。关帝三祭银三十五两七钱四分六厘。清明三祭银一十一两九钱五分八厘。走递项下脚马、排夫、支应等银三千二百一两四钱。

税课附

田房税，尽征尽解无额数。牛驴骡马税，尽征解无额数。

仓谷附

一、重农积粟等事案内，官捐谷一千三百五十五石，内除动支八十石赈贫外，实存谷一千二百七十五石。

一、钦奉上谕事案内，民捐谷一百一十一石三斗八升，大麦一百二十一石四斗一升。

一、钦奉上谕事案内，米易谷一万石，内除拨谷三千石碾运黔省军需，又拨三千五百石协济汉川饥民外，实存谷三千五百石。

一、钦奉上谕事案内，雍正四年、六年、七年，分三次采买谷，共六千二十三石六斗八升六合零，除雍正十二年详派分贮通山等县谷三千四百石外，实存谷二千六百二十三石六斗八升六合零。

一、再行检举事案内，米易谷一千五百四十二石九斗五升三勺。

一、钦奉上谕事案内，商捐银采买谷二千七百六十三石七升五合，内除拨谷二千五百一十石八斗碾运军需，又拨谷一百一十石二斗一升六合碾运耗米，又拨谷九十三石四斗五升六合代德安府碾运耗米外，实存谷四十八石六斗三合。

以上常平仓共现存谷，九千一百一石六斗一升九合零，大麦一百二十一石四斗一升。

社仓

各共一十七处，贮谷一万八千九石五斗零。



户口附

原额人丁六千五百八十七丁，豁除运夫故丁五百七十五丁，实在人丁六千一十二丁。顺治十四年并康熙元年编审，新增一千六百一十三丁，康熙十一年增一十九丁，康熙二十一年增四十五丁，康熙二十五年增二十三丁，康熙三十年增二十九丁，康熙三十五年增二十七丁，康熙四十年增二十丁，康熙四十五年增一十九丁，康熙五十年增二十三丁，共实在人丁七千八百三十丁。

额征丁银之数，载在前实征条饷米折之后，兹不复载，自康熙五十五年起，以后编审，钦奉恩诏，滋生人丁，永不加赋。





《汉阳府志》卷之二十四 食货〔一〕

〔食货志〕

汉川县

原额上、中、下田三千四百五十五顷四十五亩二分三厘三毫。

田

上田二百四十一顷五十三亩八分三厘五毫。每亩科秋粮官民米三升八合九勺九抄九撮四圭五粒。每米一石折银一两五钱五分七厘六毫。

中田四百四十四顷五十九亩八分八毫。每亩科秋粮官民米三升三合四勺二抄八撮一圭。

下田并山乡田八百七十四顷九十亩七分八厘。每亩科秋粮官民米一升四合四勺八抄五撮五圭一粒。

水乡塌田八百七十三顷三十九亩八分一厘。每亩科秋粮官民米七合三勺五抄四撮一圭八粒三粟。

沉没荒田一千二十一顷一亩。每亩科秋粮民米二合七勺八抄五撮六圭七粒五粟。

原额上、中、下地，山二千六百三十三顷八十五亩六分一厘九毫。

地

上地并刚柴地八十二顷二十二亩七厘九毫。每亩科秋粮官民米三升六勺四抄二撮四圭二粒五粟。

中地并撒柴地四百一十八顷三十三亩三厘五毫。每亩科秋粮官民米一升六合七勺一〔撮〕〔抄〕四撮五粒^①。

下地并山乡地五百五十六顷三十三亩六分一厘九毫。每亩科秋粮官民米一升二抄八撮四圭三粒。

乡基地七十九顷五十三亩五分五厘八毫。每亩科秋粮官民米一升三合九勺

^①“撮”，当为“抄”之误。



二抄八撮三圭七粒五粟。

竹木树林坟外地三顷五十九亩四分四厘三毫。每亩科秋粮官民米一升三勺六抄二撮七圭一粒一粟。

沉没荒地九百九十八顷九十亩。每亩科秋粮官民米二合七勺八抄五撮六圭七粒五粟。

山

茅芦柴山三百九十四顷七十三亩五分三厘。每亩科秋粮官民米八合一勺三抄四撮一圭七粒一粟。茅草山六十七顷一十二亩四分三厘。每亩科秋粮官民米七合五勺七抄七撮三粒六粟。石山三十三顷九亩九分二厘五毫。每亩科秋粮官民米九勺八抄五圭五粒七粟六糠。

塘

原额塘湖河沟港坡二千四百八十八顷二十二亩五分四厘七毫。水塘九十一顷八十九亩五分六厘七毫。每亩科秋粮官民米六合四勺六抄二撮七圭六粒六粟。

湖河

上、中湖河、淤洲、港坡共一千五十四顷二十五亩二分三厘七毫。每亩科秋粮官民米二合七勺八抄五撮六圭七粒五粟。下湖河九百四十四顷五十亩六分五厘六毫。每亩科秋粮官民米一合一勺一抄四撮二圭七粒。

沉没草塌三百九十七顷五十七亩八厘七毫。每亩科秋粮官民米二合五撮九圭六粒四粟八糠。每民米一石，带科官米一斗一升四合二勺七抄，带科夏税丝一钱八分七厘三毫，带科桑丝七分四厘八毫五丝一忽。

以上田、地、山、塘等项，共八千五百七十七顷五十三亩三分九厘九毫，除拨归渔田纳租外，实科秋粮官民米五千五百四十六石三斗五升二合六撮三圭。

县册称：每官民米一石，实折交柜银二两七钱四分九毫九丝七忽八微八尘七纤六渺六漠三茫六沙四漂。

川邑奏册载：原额田、地、山、塘、湖、河，共五千五百八十六顷一十一亩四分一毫一丝三忽三微。额征秋粮米五千五百四十六石三斗五升二合六撮三圭。额征银八千六百三十九两一钱九分二厘三毫九丝五忽五微一尘。县册未有每石秋粮折银几何之数，今以额征总银为实，而以额征秋粮总数为法除之，得银一两五钱五分七厘六毫三丝，即秋粮每石折银之数。

今川邑于原额田、地、山、塘、河、湖之内，有免米之田，地、山、塘、





河、湖二千四十八石七斗二升。又奉文止免杂徭，不免正供，每米一石，派银七钱六分二厘二毫五丝三忽九微五纤六渺，其未曾奉免者，谓之无免米，三千四百九十七石七斗三升二合六撮三圭。每米一石，派银二两二分三厘五毫二丝五忽五微五纤六渺。有免无免，共征银八千六百三十九两一钱九分二厘三毫九丝五忽五微一尘。是有此一免，而免者固轻，而未免者加重矣。今县册亦未分别免者与未免者是何乡何里，统融会计，而川邑之粮，每石之折银至二两七钱四分有零之多，至更名项下之米，其交柜之银，每正银一两犹有三钱七分有零之加，川邑折银，较之他邑可为重矣。

又按：川邑有南米无漕米，大约当日为秋粮米折银之数太重故也。带派夏税大麦二百一石八斗四升六合六勺六撮。带派小麦七百三十五石五斗四勺五抄二撮。带派夏税丝七十八斤五两一钱六分。带派桑丝三十一斤四两八钱八分。每民米一石额征，并新加北绢派征银一两五钱五分七厘六毫零，共银八千六百三十九两一钱九分二厘二毫零。每亩九厘饷银二千三百五十六两一钱三分八厘四毫四忽。

漕米无

外派征本色南粮正耗米一千九百九十二石。每正米一石，里纳船驴脚米一斗五升，该米二百三十九石四升。每米一石折银一两，以二钱给解役，八钱充饷，该银一百九十一两二钱三分二厘。

自康熙三十三年新垦升科起，至乾隆三年，共增垦额外下地三十顷八十亩六分二厘六毫。共升科秋粮官民米一十三石一升五抄八撮九圭五粒一粟。共升科条辽饷银三十一两八钱五分二厘二毫。共升科南米四石六斗七升二合六勺二抄七撮五圭九粒六粟。共升科驴脚米折银五钱六分七毫。

以上原额，并新增田、地、山、塘、湖、河，共五千六百一十六顷九十二亩二厘七毫。共实征秋粮官民米五千五百五十九石三斗六升二合六抄五撮二圭五粒一粟。实征条辽饷及优免银共一万三千五百二十一两二钱七分七厘二毫。实征南米一千九百九十六石六斗七升二合六勺二抄七撮五圭九粒六粟。

来册载此系解荆州府仓之米，尚另有随征加一耗米一百九十九石六斗六升七合三勺。此未载注耗米在内、在外。实征驴脚米折银二百三十九两六钱七毫。实征原额民赋更名并新垦丁银，共七百三十四两六钱六厘一毫二忽九微九尘。



更名项下

原额田、地、山、塘、湖、河，共二千九百九十一顷四十一亩九分九厘七毫。共科秋粮官民米一千九百一十五石九斗八升一抄一撮五圭九粒八粟。县册载称：每更名项官民米一石，科正银二两二分五厘二毫二丝三忽七微八尘八纤一渺九漠四茫。每正银一两，实折交柜银一两三钱七分一厘九毫九丝九忽八微七尘八纤九渺。此汉川赋役之不同于别邑一大端矣。共派征银三千九百三十九两三钱三分七厘六毫。

自康熙三十三年起，至乾隆三年，共增垦额外田、地、山、湖、草塌二百一十五顷四十五亩六毫，升变则秋粮官民米七十二石五斗二合三勺四抄八撮九粒八粟。升渔夫正租饷银一百八十二两四钱四分一厘六毫。以上原额新增田、地、山、塘、湖、河，共三千二百六顷八十七亩四毫。实征租饷并变则秋粮官民米一千九百八十八石四斗八升二合三勺五抄九撮六圭六粒六粟。实征渔租正夫饷银四千一百二十一两七钱七分九厘三毫。一更名原额并清出遗地，共一百五十一顷七十二亩四分二厘七毫，额征租饷银六百八十两九钱七厘六毫。原额茅柴湖草地额征租饷银一百四十三两四钱八分八厘八毫。原额纳租谷田一百一十一顷四十二亩五分六厘九毫，额征租谷四千五百四十三石三斗，额征谷折银二千一百一十七两一钱一分七厘八毫。康熙三十九年，减除银一千四十一两五钱八分五厘六毫。

以上民赋更名、驴脚、新增等项，实征银二万二千四十九两一钱七分四厘四毫九丝八忽零。

起运项下

布政司正饷银一万五千三百七十五两六钱八分八厘四毫四丝。芦课银五百二十七两五分九厘九毫。督粮道驴脚银二百三十九两六钱七毫。驿盐道裁二充饷银一千七两八钱七分四厘零。裁减住支工料银五百九十八两四钱。酌用买马银三百六十两。

存留支給项下

本县各官俸、役食、祭祀等银，共实支一千九百九十一两七钱五分一厘一毫七丝。夫马工料等银，共实支一千九百四十八两八钱。

税课附

芦课银五百二十七两五分九厘九毫。门摊房租银一十一两一钱。当税银，





原额四十两，开歇不一，无定额。牙税银一百四十三两三钱五分。班匠银三两。田房契税，尽征尽解，无额数。

仓谷附

一、重农积粟等事案内，实存谷六十三石。

一、钦奉上谕事案内，实存民捐大麦三十三石六斗一升，谷九十九石四斗二升。

一、钦奉上谕事案内，实存漕米易谷四千石。

一、钦奉上谕事案内，实存分贮采买谷四千五百石。

一、钦奉上谕事案内，实存商捐采买谷二千五百一十一石七斗二合二勺。

一、钱粮宜归画一等事案内，实存学租谷三石一斗五升一合。

共贮谷、麦一万一千二百一十石八斗八升三合三勺零。

户口附

原额人丁一千六百五十五丁。每丁派征银三钱七厘七毫四丝九忽九微九尘，内除豁免运夫故丁一百五十二丁，实在人丁一千五百三丁，内有奉免人丁七百三丁，奉文只免杂徭，不免正供，每丁派银一钱六分五厘三毫三丝七忽五微六尘五纤五渺，其未免人丁八百丁，谓之无免，每丁派银四钱三分二厘八毫九丝一忽五微六尘五纤五渺，有免、无免，共实征丁银四百六十二两五钱四分五厘六毫二丝二忽九微四尘。

顺治十四年并康熙元年编审，新增人丁四百九十五丁，康熙十一年新增一十四丁，康熙二十一年新增一十四丁，康熙二十五年新增二十四丁，康熙三十年新增一十四丁，康熙三十五年新增九丁，康熙四十年新增二丁，康熙四十五年新增二丁，康熙五十年新增二丁。

以上实在新旧人丁共二千七十九丁，实征丁银六百四十七两二分六厘四毫二丝二忽二微九尘。

一、更名人丁原额一百五丁，带征丁银五十八两八钱六分五厘，在更名粮内一总派征。自顺治十四年至康熙五十年节届编审，增丁八十四丁，共征丁银二十七两一分九厘八丝。自康熙五十五年起，至乾隆元年节届编审，新增民赋更名人丁，钦奉恩诏，滋生人丁，永不加赋。



《汉阳府志》卷之二十五 食货〔一〕

〔食货志〕

黄陂县

四乡原额上、中田八千四百七十六顷五十四亩六分九厘。

田

原溲源乡上、中田九百四十六顷一十六亩一分九厘。每亩科秋粮米二升九勺八抄六撮八圭七粒六粟，共米一千九百八十四石九斗九合一勺，每米一石折银一两九钱九分九厘九毫九丝零。黄陂旧《志》与奏册并未载每米一石折银若干科则之数，今以合县民田秋粮米，与更名米二项之共数，除合县实征钱粮之总数，得每米一石折银一两九钱九分九厘九毫九丝零，为黄邑每粮一石折银之数。

原崇义乡上、中田二千一百八十五顷九十亩二分四厘。每亩科秋粮米一升四合三勺二抄，共米三千一百三十石二斗一升二合二勺三抄。

礼教乡上、中田二千三百五十六顷八十二亩九分七厘。每亩科秋粮米一升三合二勺五抄，共米三千一百二十二石七斗九升九合三勺五抄二撮。

高邑乡上、中田二千三百八十顷六十三亩五分一厘。每亩科秋粮米一升九合八抄，共米四千五百四十二石二斗五升一合七勺七抄。

各县田地皆分三等，而赋税科则必四乡画一。今黄邑四乡同一上、中之田，而各乡上、中之田科则又复不一，必各乡之田地大有肥饶之不齐矣。故专列之，以见黄邑之异。

山乡水乡田二百七十四顷六十九亩九分。每亩科秋粮米一升四勺，共米二百八十五石六斗八升六合九勺。

地

四乡一则上、中地九百一十七顷八亩九分七厘。每亩科秋粮米一升四勺，共米九百五十三石七斗七升三合二勺八撮八圭。溲源、崇义、礼教三乡一则市基地八顷五十四亩五分六厘。每亩科秋粮米一升四勺，共米八石八斗八升七合。四乡一则下地一千三百三十六顷一十九亩六分七厘。每亩科秋粮米五合五勺一





撮六圭，共米七百三十七石四升六合九撮九圭七粒二粟。

山

礼教、高邑两乡一则柴草山场三百一十七顷七十亩九分九厘。每亩科秋粮米五合五勺一撮六圭，共米一百七十四石七斗四升四勺。

塘

四乡一则塘一千二百一十一顷七十三亩三厘。每亩科秋粮米一升四勺，共米一千二百六十石一斗九升九合五勺一撮二圭。

以上原额田地、山塘，共一万二千五百四十二顷五十一亩八分一厘，内除拨归更名里田地塘七百八十九顷六十七亩七分八厘，实在民田地山塘一万一千七百五十二顷八十四亩三厘。

康熙三十五年，开垦升科民赋淤地六顷八十六亩一分四厘六毫。康熙三十六年，开垦升科民赋淤地二十八顷一亩六分七厘。康熙四十九年，开垦升科民赋淤地二顷四亩五分八厘。三共新垦淤地三十六顷九十二亩三分九厘六毫。乾隆二年，汇报夏水偏灾等事案内，沙压冲坍田地共一十七顷二十二亩一分二厘。奉文豁免免征。实在四乡田、地、山、塘一万一千七百五十二顷五十四亩三分六厘。以上顷亩总散之数，亦有不全据本县来册。又载系一万一千七百七十二顷。《全书》载系〔一万一千七百〕五十二顷^①，今从《全书》，并存册数，以俟考订。

原科秋粮米共一万七千四百七十三石五斗二升四合二勺，内除拨归更名里米一千四百二十四石九斗三升九合五勺，实在秋粮一万六千四十八石五斗八升四合七勺。

康熙三十五年，开垦升科米三石八斗二合一抄二撮五圭二粒一粟。康熙三十六年，开垦升科米十五石三斗四升四合六勺三撮七圭五粟。康熙四十九年，开垦升科米一石一斗二升四勺七抄四撮二圭二粒七粟。三共升科米二十石二斗六升七合九抄四圭五粒三粟。乾隆二年，汇报夏水偏灾等事案内，奉文豁免无征秋粮二十四石四斗九升五合三勺二抄九撮五圭三粒三粟。四乡实在秋粮，一万六千四十四石三斗五升六合四勺六抄九圭二粒。

更名里

原额田地山塘七百八十九顷六十七亩七分八厘，派秋粮米一千四百二十四

^①据“今从《全书》”，此处“《全书》载系”下当脱“一万一千七百”六字。



石九斗三升九合五勺，另纳租饷。楚屯原额租银田一十四顷二十二亩。租谷田地二十七顷四十九亩六分，另纳改折租银。

原额漕粮

正四二耗米，共五千四百七十七石八斗三升七合七撮五圭二粒五粟。乾隆二年，汇报夏水偏灾等事案内，豁除正四二耗无征米共八石三斗五升四勺五撮一圭二粒三粟。实征米五千四百六十九石四斗八升六合六勺二撮四圭二粟。

原额南粮

正、耗、贴米，共四千六百四十二石三斗五升五合二勺四抄三撮九粒七粟。乾隆二年，汇报夏水偏灾等事案内，豁免米一十二石五斗一升三合一勺六抄三撮八圭一粒八粟。实征米四千六百三十五石二斗七升八合四勺四抄四撮九圭三粟。

额征钱粮

原额人丁银三千三十二两二钱六分一厘六毫八丝二忽二微九尘九渺。原额田、地、山、塘派征条、饷、随、漕、驴、脚等银一万四千六百七两三钱八分六厘六毫二丝八忽六微一尘四纤四渺。派征民田地亩饷银五千四百九十一两四钱七分四厘七毫七丝一忽五尘。原额鹿皮京扛银二钱六分四厘六毫。额征匠役班价银并带闰银三十九两六钱。优免充饷银，七百二十五两四钱七分八厘五毫。

更名地并楚屯租谷折共额银

二千六十五两三钱六厘四毫。

更名地亩饷银

五百两三钱七分九厘七毫五丝三忽九微四尘。三案淤地升科派征条、饷、随、漕、驴、脚、鹿皮京扛共银二十六两一钱二分八厘九毫一丝三忽八微五纤五渺七漠六茫。丁粮外派代纳黄冈县麻铁子池并门摊商税，共额银二百三十两五钱二分四厘七毫三丝一微九尘一渺，内除无征银五十五两一钱五厘九毫六丝一忽，实征银一百七十五两四钱一分八厘九毫六丝九忽一微九尘一渺。

以上共额银二万六千六百六十三两七钱二毫一丝八忽九微九渺七漠六茫，内除丁随粮派案内，合省均摊人丁减除额银一百四十二两九钱一分七厘八毫一丝五忽九微六尘五纤一渺五漠二茫九沙一灰。实在额银二万六千五百二十两七钱八分二厘四毫二忽九微三尘五纤三渺二漠三茫九灰，内于乾隆二年汇报夏水





偏灾等事案内，豁除无征银三十五两九钱二分六厘六毫二丝四忽七微二尘六纤五渺八漠二茫。现今实在征银二万六千四百八十四两八钱五分五厘七毫七丝八忽二微八纤七渺四漠一茫九灰。

起运项下

布政司原额起运充饷银，一万八千一百八十一两六钱七分五毫四丝一微八尘七纤二渺六漠七茫五沙九灰，内除水灾案内豁免银二十三两二钱五分八厘九毫二丝四忽九微四尘八渺二漠六茫。实解银一万八千一百五十八两三钱二分一厘三丝二忽一微八尘六纤一漠一茫五沙九灰。

布政司《宪书》表夫、科场对读、举人会试场夫、各部寺解费原额银，一百五两九钱三分六厘一毫一丝三忽六微四尘九纤八渺六漠五沙，内除水灾案内豁免银一钱七分四厘四毫五丝六忽九微一尘四纤五渺三漠四茫，实解银一百一十五两七钱六分一厘六毫五丝六忽七微三尘五纤三渺二漠六茫五沙。

按察司表夫额解银，五两九分四厘二毫二忽六微五尘二纤一渺三漠二茫，内除水灾案内豁免银七厘六毫六丝六忽二微七尘七纤八渺一漠五茫，实解银五两八分六厘五毫三丝六忽三微七尘四纤三渺一漠七茫。

督粮道原额解随漕银，一千一十六两四钱一分五厘三毫三忽二微六尘七纤五渺九漠八茫，内除水灾案内豁免银一两四钱九分三厘七毫九丝九忽七尘六纤三渺三茫，实解银一千一十四两九钱二分一厘五毫四忽一微九尘一纤二渺九漠五茫。

督粮道原额解南粮驴脚银，五百五十七两八分二厘六毫二丝九忽一微七尘二纤，内除水灾案内豁免银九钱六分九丝四忽七微一尘四纤五渺七漠六茫，实征银五百五十六两一钱二分二厘五毫三丝四忽四微五尘七纤四渺二漠四茫。

督粮道原额解门听、皂快、轿伞扇夫、铺兵工食银，二百三十三两七钱三分四厘四忽三尘九纤一漠六茫，内除水灾案内豁免银三钱四分五厘三毫一丝六忽一微六尘九纤六渺二漠八茫，实解银二百三十三两三钱八分八厘六毫八丝七忽八微六尘九纤三渺八漠八茫。

黄州府马快工食额解银，五十九两九钱三分一厘七毫九丝五忽三微七纤四渺四漠，内除水灾案内豁免银八分八厘五毫三丝三忽八微八尘三渺三漠，实解银五十九两八钱四分三厘二毫六丝一忽四微二尘七纤一渺二漠。

驿盐道红船水手工食额解银，三十两四钱六分六厘六毫，又酌用买补马价



银七百两，除冲压无征外，又雍正六年七月内奉文裁减夫马工料银五百四十五两二钱。

三共解银一千二百七十五两六钱六分六厘六毫，内除水灾案内豁免银一两九钱四分二厘五毫六丝一忽六微七尘一纤七渺一漠一茫，实解银一千二百六十八两三钱三分二厘一毫一丝二忽二微一纤一渺六漠六茫。县册内又开有驿站项下武昌红船等银四千八百零，于买补马价银内扣解，实征银四千八百九两零。

存留支給项下

本县额支官俸、役食、祭祀、廩膳、养济等银，共一千五百三十四两四钱一分一厘二毫一丝四忽六微六尘五渺九茫，内于雍正五年十月奉文裁减灯夫四名工食银二十三两九钱七分二厘七毫一丝八忽三微六尘二纤九渺七漠六茫，解充饷用。

又于乾隆元年钦奉上谕均摊荒缺内：县丞原额俸银四十两，内除荒缺银四分五厘四毫六丝九忽三微九尘五纤四漠。典巡二员各额俸三十一两五钱二分，各除荒缺银三分五厘八毫二丝九忽八微八尘三纤二渺九漠二茫。儒学二员共额俸三十一两五钱二分，共除荒缺银三分五厘八毫二丝九忽八微八尘三纤二渺九漠二茫。三共除荒缺银一钱五分二厘九毫五丝九忽四尘四纤九渺一漠六茫。

以本县额俸四十五两，照依通省均摊扣除荒缺银二十五两二钱一分九厘七毫二丝三忽二微五尘二纤六渺八漠五茫，内除拨补佐杂荒缺外，余银二十五两六分六厘七毫六丝四忽二微七纤七渺六漠九茫，解司以补通省缺荒之项，其扣荒俸银，遇有升科之年补之。

又于乾隆二年夏水偏灾案内，豁免银二两二钱六分六厘六毫七丝四忽三微二尘九纤四渺八漠九茫，实支银一千五百三十二两一钱四分四厘五毫四丝三微三尘一纤二漠。

县驿夫马、工料、支应等项额支银三千五百四十两八钱四分，内除水灾案内豁免银五两三钱九分一厘九毫二丝六忽一微二尘六纤八渺二漠八茫。实支银三千五百三十五两四钱四分八厘七丝三忽八微七尘三纤一渺七漠二茫。前项豁免银两奉文在于买马项下总扣除，无庸摊扣工料项下。

税课附

牙税银一百七十三两八钱。当税银二十五两。田房契牛驴杂税，尽征尽解，无定额。





仓谷附

一、钦奉上谕事案内，实存劝捐大麦二百五十二石九斗九升九合四勺。

一、重农积粟等事案内，实存劝捐谷四十一石。

一、钦奉上谕事案内，漕米易谷二千八十一石六斗六升。

一、钦奉上谕事案内，雍正六年采买谷二千石，又采买谷七百石，又雍正十年采买谷二千二百三十六石八斗四升二合。

以上共应存谷、麦七千二百五十二石四斗九升一合四勺。

社仓

四乡共二百二十二处，共贮谷二万三千五百一十二石八斗八升六合五勺。

户口

原额四千九百八十三户，一十一万六千六百七十口，一万三千九百五十七丁。节奉编审查，计增户二千二百二户，实共户七千一百八十五户；计增口五千八十口，实共口一十二万一千七百五十口。除豁免运夫故丁五十七丁，实共丁一万三千九百丁。

自康熙十一年编审新增四丁，康熙二十五年新增三丁，康熙三十年新增二丁，康熙四十年新增一丁，康熙四十五年新增四丁，康熙五十年新增二丁，共增人丁一十六丁，现在共丁一万三千九百一十六丁。原每丁派银二钱一分七厘八毫九丝七忽五微五纤一渺，每年除绅衿优免科则不等，额征并新加共银三千四十一两一钱九分五厘四毫八丝。实征丁银三千三十二两二钱六分一厘六毫八丝二忽二微九尘九渺。雍正七年，丁随粮派案内，随粮带征奉派额征丁银三千二十三两六钱五分三厘二毫六丝六忽三微二尘五纤七渺四漠七茫九灰。

自康熙五十五年起至乾隆三年节届编审，钦奉恩诏，滋生人丁，永不加赋。



《汉阳府志》卷之二十六 食货〔一〕

〔食货志〕

孝感县

原额田、地、山、塘，共一万三千一百九十九顷七十二亩五分二厘九毫，拨归更名田、地、山、塘二千三百三十三顷九十亩六厘六毫。

田

三则田九千三百七十三顷九十六亩二分二厘五毫，内拨归更名田一千三百三十七顷九十三亩七分九厘四毫，实在三则田八千三十六顷二亩四分三厘。又于雍正七年、十年新垦三则田共一顷一十九亩二分八厘六毫。

原上田六千三百一十四顷五十一亩四分四厘五毫，于雍正七年、十年新垦三亩八分九厘，共上田六千三百一十四顷五十五亩三分三厘五毫。每亩科秋粮一升三合七勺，共科秋粮八千六百五十石八斗八升七合九勺九抄三撮，每石折银七钱九分八厘九毫二丝八忽八微一纤八渺，内每亩科夏税丝九厘九毫九丝五忽五尘八纤九渺。

原中田六百六十九顷三十三亩二分七厘四毫，于雍正七年、十年新垦一亩七分，共中田六百六十九顷三十四亩九分七厘四毫。每亩科秋粮一升一合，共科秋粮七百三十六石二斗八升四合七勺一抄四撮，每石米照前则例折银，秋粮内每亩科有夏税丝八厘二丝五忽二微三尘。

原下田三百三十一顷九十六亩九分九厘二毫，于雍正七年、十年新垦一顷一十三亩六分九厘六毫，共下田三百三十三顷一十亩六分八厘八毫。每亩科秋粮七合七勺八抄，共科秋粮二百五十九石一斗五升七合一勺五抄二撮六圭五粒。秋粮内每亩科有夏税丝五厘六毫七丝六忽二尘六纤五渺。

原山乡田七百二十顷二十亩七分二厘，每亩科秋粮一升二合四勺五抄四撮五圭七粒，共秋粮八百九十六石九斗八升六合九勺八抄一撮九圭六粒。秋粮内每亩科有夏税丝七厘五毫七忽六微七尘。





原额地山

共二千五百三十四顷五十五亩三分一厘，内拨归更名地山九百五顷四十亩九分九厘三毫，实在地山一千六百二十九顷一十四亩三分一厘七毫，于雍正七年、十年新垦地山四十三亩六分六厘一毫。

地

原中地五百三十七顷八十亩二分六厘六毫，于雍正七年、十年新垦四亩五分六厘四毫，共中地五百三十七顷八十四亩八分三厘。每亩科秋粮一升二合一抄三撮一圭七粒八粟，共科秋粮六百四十六石一斗二升六合七勺三抄四圭六粒八粟。秋粮内每亩科有夏税丝八厘七毫六丝四忽四微一尘三渺。

原下地九百一十三顷三十七亩一分二厘八毫，于雍正七年、十年新垦三十九亩九厘九毫，共下地九百一十三顷七十六亩二分二厘五毫。每亩科秋粮八合三勺四抄五撮一圭八粒八粟，共科秋粮七百六十二石五斗五升一合八勺四抄五撮五圭五粒七粟。秋粮内每亩科有夏税丝六厘八丝八忽三微六尘八纤九渺。

原山乡地一百七十七顷九十六亩九分二厘三毫，每亩科秋粮七合七抄二撮六圭九粒一粟，共科秋粮一百二十五石八斗七升二合二勺九抄七撮三圭二粒。秋粮内每亩科有夏税丝四厘一丝五忽八微。每亩科桑丝一厘一毫四丝四忽二微。

塘

原额塘一千二百九十一顷二十亩九分九厘四毫，内拨归更名塘九十顷五十五亩二分七厘九毫，实在塘一千二百顷六十五亩七分一厘五毫。每亩科秋粮七合七勺八抄，共科秋粮九百三十四石一斗一升一合一勺六抄一撮二圭一粒一粟。秋粮内每亩科有桑丝七丝八忽九微一尘。塘系公业，原例随田验派。

以上民赋原额并新垦田、地、山、塘，共一万八百六十七顷四十五亩四分一厘，载秋粮一万三千一十二石二升八合八勺七抄六撮一圭六粒六粟，每石派折银七钱九分八厘九毫二丝八忽八微一纤八渺，共派折银一万三百九十五两八钱三分九厘三毫五丝四忽六微六尘六纤六渺一漠二茫。共夏税丝五百八十四斤四两六钱二分一厘四毫六丝七忽。共农桑丝八斤一十五两五钱四分一厘。夏税、农桑二丝带派在秋粮内。

万历四十六七八三年，每亩加九厘饷，共银五千一百四十两五钱六分七厘四毫三丝四忽九微二尘。于雍正七年、十年新垦田地一顷六十二亩九分四厘七毫，加九厘饷银五钱二分八厘三毫五丝一忽四微六尘七纤六渺七漠，共九厘饷



银五千一百四十一两九分五厘七毫八丝六忽三微八尘七纤六渺七漠。

以上人丁、田、地、山、塘条饷并九厘饷等项，共实征银一万八千二百九十五两八钱三分九厘五毫八丝二忽四微四尘五纤四渺三漠二茫。

漕粮本色项下

外兑军本色正耗米三千四百四十四石四斗三升三合，内有里纳盘脚米二升，船脚米七升，共米二百八石五升三合，于雍正十年奉文全裁。康熙十一年，加征赠贴米四百六十二石三斗四升。雍正七年、十年，新垦兑军本色正耗米三斗三升二合七勺三抄六撮八圭七粒四粟八颗，应征赠贴米四升七合五勺三抄三撮八圭三粒九粟四颗。以上兑军本色正耗、赠贴并新垦，实共米三千六百九十九石一斗二勺七抄七圭一粒四粟二颗。

随漕项下

楞木松板银九两二钱四分七厘。运官行月粮六百一十石三斗九升，每石折银四钱，该银二百四十四两一钱五分六厘。三六耗席轻费银四百二十七两六钱六分四厘五毫。每两议解准银一分，该银四两二钱七分六厘六毫四丝五忽。兑粮运官盘费银八两。浅船银六十七两四钱六分二厘。解官盘费每两九厘，该银六钱七厘一毫六丝八忽。雍正七年新垦随漕银一分一厘四毫一忽二微九尘三纤八渺六茫。雍正十年新垦随漕银六分六厘一忽五微七尘二纤九渺二漠。

以上原额、新垦共银七百六十一两四钱八分五厘三毫四丝五忽八微七尘二纤七渺二漠六茫。

南粮正耗米三千一百八十石八斗五升。奏册系南米三千一百八十石九斗一合七勺六抄一撮六圭六粒。船驴脚米三百八十一石七斗二合。每石折银一两，该银三百八十一两七钱二厘。雍正七年、十年，新垦南粮正耗米三斗二升七合二抄七撮七圭五粒五粟。又船驴脚米三升九合二勺四抄三撮三圭三粒一粟。每石折银一两，该银三分九厘二毫四丝三忽三微三尘一纤。

以上原额南粮并新垦正耗，共米三千一百八十一石一斗七升七合二抄七撮七圭五粒五粟，共船驴脚米三百八十一石七斗四升一合二勺四抄三撮三圭三粒一粟，折银三百八十一两七钱四分一厘二毫四丝三忽三微三尘一纤。

麂皮京扛银二钱八分八毫。雍正七年、十年新垦麂皮京扛银二丝四忽五微八尘七纤九渺八漠六茫。

以上原额新垦共麂皮京扛银二钱八分八毫二丝四忽五微八尘七纤九渺八漠六茫。





更名项下

潞藩田地山塘，共二千三百三十三顷九十亩六厘六毫。额载秋粮二千四百二十七石一斗五升三合七勺。额征租银三千四十五两七钱八分四厘四毫四丝。加九厘饷银一千二百五十八两二钱九分三厘二毫九丝四忽。荣潞藩东山淤洲麦地一千六百三顷五十六亩九分七厘九毫。额载租银二千一百五十八两八钱九分三厘二毫。楚藩田地一百六十顷一十三亩。载租银田地共六十八顷，该租银二百四两一分，加九厘饷银六十一两二钱。租谷田九十二顷一十三亩，该租谷二千四百三十石，每石折银四钱六分六厘，共折银一千一百三十二两三钱八分。肘布二十七匹，每匹折银七分，共折银一两八钱九分。

以上合县民赋，更名地丁随漕、驴脚等项，共银二万八千六百七十七两一钱四分九厘六毫八丝六忽三微八尘五纤七渺二漠六茫。

起运项下

布政司地丁条饷等银，共二万一千三百五十九两七钱二分三厘零，内除驿站夫马工料不敷，应动支正项银一千五百三十四两七钱五分二厘零，实银一万九千八百二十四两九钱七分一厘零，加均丁三分六厘零。实共解银一万九千八百二十五两八厘零。代征籽粒银二十五两三钱六分八厘。督粮道随漕项下银七百六十一两三钱二分六厘零，内除买办本色席板银五两二分八厘零，实解银七百五十六两二钱九分八厘零，内除七年升科银一分一厘四毫零，入司充饷项下，仍赴道请领足额。驴脚银三百八十一两七钱三分五厘零。驿盐道裁二充饷银六百二十四两四钱六分五厘零，买马银六百八十两。驿盐道裁减夫马工料银五百四十五两二钱。

拨运项下

布政司历日科举表夫对读银，共三十八两六钱七分二厘零。会试举人长夫银五十五两八钱七分一厘零。各部寺解费银一十六两三钱九分五厘零。空缺乡饮银二两九钱九分三厘零。裁缺俸工银一百一十一两七钱四分二厘零。府县俸薪内扣补荒缺银四十八两八钱五厘零。拨运德安府俸工各项十五款，共银六百九两四钱七分二厘零。

存留支給项下

本县俸工九款，共实支银六百九十八两八钱二分六厘零。典史俸工，实支银六十七两三钱六分五厘零。儒学俸工，实支银八十八两九钱一分五厘零。



巡检俸工，实支银一百八十四两二钱一分四厘零。各祭祀项下，实支银九十四两七钱四分二厘零。新复廩膳银，六十一两三钱二厘零。铺司兵工食，实支银一百四十一两四钱八分二厘零。各河渡夫工食银一十一两六钱六分三厘零。迎送皂隶议留工食银四十两六钱一分五厘零。本县岁贡花红银六两九钱八分三厘零。杨店门子工食银三两四分三厘零。孤贫口粮布花银六十四两九钱五分一厘零。驿站夫马实支银三千四百八十六两。

税课附

额征牙税银二十两。当税牛驴田房契税，尽征尽解，无定额。

仓谷附

一、重农积粟等事案内，官捐谷九十八石。

一、钦奉上谕事案内，米易谷二千九十三石。

一、钦奉上谕事案内，雍正三年采买谷二千石，六年采买谷七百石，八年采买谷八百石。

以上原贮谷七千九百八十八石三斗，内除赈济贫民谷六十石，实存常平仓谷七千九百二十八石三斗。

社仓

各里共一百九十七所，共贮谷一万一千九百九十六石三斗五升二合。

户口

原额人丁一万三千一十三丁。每丁派银一钱九分六厘一毫四丝六忽二微三尘二纤四渺。每年除优免科则不等，应征并新加共二千五百五十二两四钱五分九毫二丝二忽二微八尘五纤一渺，内于康熙四年奉文豁免运夫人丁一百一丁。实在人丁一万二千九百一十二丁，内又有上六里人丁一千八百八十四丁。每丁派银一钱四分九厘八毫六丝一忽九微四尘五纤七渺四漠。又有免人丁三千六十四丁，奉文止免杂徭，不免正供，每丁派银六分五厘四毫二丝一忽六微六尘四纤二渺五漠。其未曾奉免人丁七千九百六十四丁，每丁派银二钱五分七厘三毫八丝九忽二微八尘五纤二渺五漠。有免无免，共实征银二千五百三十二两六钱四分一毫五丝二忽八微一尘二纤七渺。

顺治十四年，额外新增人丁一千一百九丁，派征银二百八两八钱七厘二毫七丝三忽八微九尘四纤八渺五漠。康熙十一年，额外新增人丁三十六丁。康熙二十一年，额外新增人丁一十五丁。康熙二十五年，额外新增人丁九丁。康熙





三十年，额外新增人丁五丁。康熙三十五年，额外新增人丁七丁。康熙四十年，额外新增人丁五丁。康熙四十五年，额外新增人丁七丁。康熙五十年，额外新增人丁五丁。

以上康熙列年编审新增人丁共八十九丁，派增实征丁银一十七两四钱五分七厘一丝四忽六微八尘三纤六渺。合县旧额、新增共丁一万四千一百一十丁，实共征丁银二千七百五十八两九钱四厘四毫四丝一忽三微九尘一纤一渺五漠。

自康熙五十五年起，至乾隆三年节届编审，钦奉恩诏，滋生人丁，永不加赋。



《汉阳府志》卷之二十七 食货〔二〕

《户口志》序

今志书所载人丁，乃因田、地、山、塘派出丁徭银数，实乃丁粮，谓之人丁，而非天下现在人民之数。如汉、晋、唐、宋《地理》、《郡国》诸志所载某郡某邑之户几何、口几何，固非丁粮之谓也。古者司徒以民数载于方策，上于天子，天子拜而受之，登于天府，事綦重矣，岂得略而不书？今因取四邑所编保甲户口悉载之，以补旧《志》所未备。查取各邑册籍，各有详略，故其书式不能画一。

（保甲烟户丁口）〔户口志〕

汉阳县〔保甲烟户丁口〕

一典史所属烟民一万六千一百一户，四万八千九百二十一名口。仁义巡检所属烟民一万四千一百八十九户，四万七千七百三十二名口。礼智巡检所属烟民一万八千二十户，五万一千六百四十九名口。蔡店巡检所属烟民一万四千四十五户，五万七千二百九十六名口。沌口巡检所属烟民一万一千八百五十四户，四万四千三百三十五名口。新滩巡检所属烟民二万一千九百三十九户，八万九千三百一十八名口。

以上总共烟民九万六千一百四十八户，共丁口三十三万九千二百七十一名口。

汉川县保甲烟户丁口

合县保正共一百七十三名，合县甲长共三百七名，合县牌头共二千四百五名，合县民共编二万四千五十三户，合县民共查八万九千九百八十七丁。





黄陂县保甲烟户丁口

城乡保正共二百四十名，甲长共四百九十六名，烟户共五万一千二百二十二户，大小丁口共一十九万五千七百一十二名口。

孝感县保甲烟户丁口

白云乡共十里分：一里共编过一保一十一甲一百一十五牌，一千一百五十二户，四千五百五十一名口。二里共编过一保九甲八十八牌，八百七十四户，三千五百五十八名口。三里共编过一保一十四甲一百三十八牌，一千三百六十户，五千三百二十五名口。四里共编过一保七甲七十一牌，七百二十三户，二千八百六十四名口。五里共编过二保一十七甲一百六十九牌，一千七百一十五户，六千九百七十四名口。六里共编过一保一十一甲一百一牌，一千一十八户，四千八十一名口。七里共编过一保一十二甲一百二十牌，一千二百五户，四千八百四十八名口。八里共编过二保二十甲一百九十五牌，一千九百三十九户，七千六百三十八名口。九里共编过一保一十一甲一百九牌，一千六十三户，四千二百六十四名口。十里共编过一保一十一甲一百一十一牌，一千一百六户，四千四百四十五名口。

郭下乡共六里分：一里共编过一保一十甲一百牌，九百九十二户，三千九百九十七名口。二里共编过二保二十一甲二百一十三牌，二千一百一十七户，八千三百六十六名口。三里共编过一保一十二甲一百二十二牌，一千二百二十四户，四千八百三十六名口。四里共编过一保一十三甲一百二十八牌，一千二百九十三户，五千二十七名口。五里共编过一保一十一甲一百一十一牌，一千九百一十二户，四千三百四十三名口。六里共编过二保二十甲二百二牌，二千三十一户，八千一百二十七名口。

洪乐乡共五里分：一里共编过一保一十三甲一百二十九牌，一千二百九十六户，五千一百五十五名口。二里共编过一保一十一甲一百七牌，一千六十九户，四千二百三十九名口。三里共编过一保一十三甲一百二十六牌，一千二百五十七户，四千九百三十四名口。四里共编过一保一十二甲一百二十一牌，一千二百一十四户，四千九百二十一名口。五里共编过二保一十七甲一百六十九牌，一千七百户，六千九百四十九名口。

广阳乡共六里分：一里共编过一保一十甲九十九牌，九百八十七



户，三千八百二十四名口。二里共编过一保七甲六十七牌，六百五十二户，二千六百三十二名口。三里共编过一保八甲七十九牌，七百九十二户，三千二百四十九名口。四里共编过一保一十三甲一百二十五牌，一千二百四十七户，四千九百九十一名口。五里共编过一保一十三甲一百三十三牌，一千三百二十九户，五千三百三十一名口。六里共编过一保一十一甲一百一十牌，一千一百户，四千四百二十二名口。

诸赵乡共二里分：一里共编过一保九甲八十六牌，八百四十三户，三千四百五十三名口。二里共编过一保八甲八十牌，八百三户，三千四百五十九名口。

以上总共编过三十四保三百五十五甲三千五百二十四牌，三万五千一百九十三户，一十四万七千五百五十三名口。





《汉阳府志》卷之二十八 食货〔三〕

《物产志》序

任土贡物，以验土宜，非欲数取民也。《周礼》山师、川师、下逮迹人、舛人，皆有所守，以供王事。兽舍麇麋、鸟翼、鰕卵犹恐取之非时，用之过度，以伤天地之仁，况苛取于民乎？今汉阳所属四邑，非有珍奇怪异、奇技淫巧，所产者不过布帛菽粟之常，所能者不过梓匠轮舆之任，然物产蕃庶，人民赖以滋生利用。盛代咸熙之乐，不可不纪之以佐怀方氏之所掌，下不敢匿其所有，上亦不苛责其所无。黄、孝两邑，征之旧《志》，有山林、虎豹、药材之利，阳、川水泽之乡，则菱芡、鱼虾独擅也。但旧无志乘可征，仅以见闻所及者补其未备。

作《物产志》。

物产〔志〕

汉阳县

稻之属

芒草撒置田中，不须栽插，成熟最早。陂泽卑下之处，每多种之、白芒儿一年两季、一丘水、青黏、火黏、柳条糯、接早子、等苞齐。

帛之属

小布贫家妇女穷日夜之力，机声轧轧，人可得一匹，长一丈四、五尺。四方来贸者，辄盈千累百捆载以去。

蔬之属

羊角菜即橘芽，初生时采取，濯以沸水曝干，以供盘饌，甚香美、白茄类紫茄，稍大，色如玉，子少而皮嫩、芸苔秋末择肥地艺植之，随时刈取，不待春初。



石之属

楚石质黑理疏，可供雕刻、太湖石质青理坚，嵌空玲珑，园亭假山多采取，皆出东至山。

鱼之属

鲋鱼、鳊鱼、鳊鱼、鲤鱼、鲢鱼、草鱼。

汉川县

稻之属

五十早仍种秧栽植，比众稻独早，其味稍梗，收亦比他稻较薄，惟取其能早熟，以济望岁者、早稻高田专种之、青粘湖田水乡始种之，四月半后栽，秧长二尺余，栽于水中，惟露秧秒寸许，即可发生，收比早稻较多，味亦香软、晚稻刈去早稻之田，得种晚禾，入秋始植。稻嘴有芒，如牟麦状，其壳色带微黑，米则香美特甚。

豆麦之属

赤小豆、黑豆、茶花豆、豇豆、黄豆、绿豆、刀豆、小麦、大麦。

瓜之属

冬瓜、南瓜亦名番瓜、菜瓜。

菜之属

芥菜、白菜、苋菜。

水谷之属

菱、芡、蒿米、莲实、藕川邑所产莲实与藕皆红花者，莲实亦系已成石莲而后剥出，与湘莲相似，惟煮不易烂，其味少逊。藕系野湖蔓生，不须种植，惟其节长尺余，与家藕经人种植者有异，生啖不及家藕。白花者之香味，若经蒸煮，既熟之后，则香美异常。乡人每磨藕取汁澄粉，贸于汉镇，价颇贱。以沸水冲之，其色稍带青紫，谚名莲青。扬之有丝，亦甚益人。

鱼之属

鲤鱼、鲫鱼大者亦不满尺，黑鳞而味美、乌鱼、鳝鱼、虾土人多取其肉为米，其色赤。

帛之属

白木棉、紫木棉、小布。

卉之属

蓝叶如细槐，其色甚艳、缸药以蓝作色，或其缸。偶病，土人以此草医之、小蓼土人每以和小麦麸为曲蘖酿烧酒，不数日即可饮。





木之属

桑叶微小而树大，不似江浙之小树而叶大，故丝不甚良、柘大者可为材、杨柳堤居者绕屋树之，不计其数，绿杨之阴，在在皆有。

鸟之属

布谷、啄木、黄鹂、鸠、雀、鸦、鹊、乌、鸽、鸡、鹅、鸭。

兽之属

牛、羊、马、犬、豕、猫、狐、兔。

黄陂县据邑《志》

谷之属

稻梗、糯之通称，邑中俱有之、麦有大麦、小麦二种、荞麦、豆有黄、黑、青、红诸色外，复有绿豆、豌豆、饭豆、蚕豆、匾豆诸名、芝麻一名胡麻，压油最佳。《广雅》云“巨胜”，《本草》名“脂麻”、葛秫即糯稻也，取酿酒、黍不黏者为黍、稷俱供文庙祭品。

泉之属

木棉有黄、白二种。

蔬之属

白菜一名菘菜，四时皆有、芥菜有青、紫、白三种，子可入药，其味辣、苋菜《格物论》云：白苋入药，马齿苋、红苋作蔬、芹菜生水中，叶似芎藭，花白色，入文庙祭品、莴苣，大也，茎叶大而味苦，又名苦苣。常食者为白苣、茼蒿二、四月开黄花，《本草》云：茼蒿，湖中产、萝卜有红、黄、白三种，黄者为胡萝卜，红、白者亦名莱菔、菠菜、茄一名酪苏，味甘寒，久冷不可多食，损人动气、韭叶细而长似蒜，一名钟乳、蒜《本草》曰：大者名胡，小者名蒜。俗云蒜有百益、葱有数种，一名胡葱，一名茗葱，一名朮，一名菜伯，一名和事草、芋一名土芝，又名蹲鸱。芋仅可愈蜂螫、山药《本草》谓之薯蓣，味平无毒。

果之属

栗有大小二种、柿《格物论》曰：柿为朱果，有闷柿、牛心柿、羊矢柿、桃其类不一，有早者，有晚者、枣大曰枣，小曰棘、杏、银杏俗曰白果，二更开花，随即卸落无形，树分雌雄、李绿叶白花，味有甘、酸、苦、涩数种。野李仁可入药、石榴、樱桃、无花果。

水谷之属

藕、菱。



瓜之属

西瓜、南瓜、冬瓜、丝瓜、王瓜、菜瓜、葫芦甘者可食，苦者可作器，大者可以涉水。

木之属

松、柏、椿香者名椿，臭者名樗。香者叶可食、槐、栗、柘、柳、桑、梓、桐、杨、棠梨、樟、榔。

竹之属

水竹、三月竹、五月竹、凤尾竹、丛竹一名慈孝竹。

花之属

牡丹、芍药有红、白、紫数种、玉簪、鸡冠、剪春罗、萱、茨、梅花比他梅更香、金盏菊其种不一、莲、蔷薇其色不一，蔓生、木槿、桂一名木犀，有苏、广二种，有丹、黄诸色。

药之属

红花、芫花、金银花、紫薇花、益母草、旱莲草、谷精草、龙胆草、凤尾草、(菡筵)[菡萏]草^①、苍耳草、夏枯草、枸杞子、槐角子、香附子、覆盆子、车前子、地骨皮、桑白皮、地榆皮、天花粉、瓜蒌仁、紫地丁、天门冬、土茯苓、青木香、白部 白芨、白艾、元参、丹参、苍术、桔梗、茯苓、紫苏、茴香、薄荷、牵牛、山查、瞿麦、扁蓄、百合。

鸟之属

布谷、啄木、黄鹂、鹁鸪、燕、雉、鸬有班鸬、鸬鸪之异。雄呼晴，雌呼雨、莺云雌雄双飞。羽黄色，冬则藏蛰入水中，以泥裹。至春始出，其音圆溜，可作诗肠鼓吹、鹰爪利，能击、雀、鹁大如鸦，以音感为孕。季冬始巢，开户避太岁，向太乙，知来岁风多，巢必卑下、鸦白腹者，鸦，《诗》所谓“鸛”也、乌纯黑而反哺者曰慈鸟、鸽羽色不一，眼有朱砂、金银之别，俗多养以为戏、鸡鸡能知时，能备五德、鹅、鸭。

兽之属

牛、羊、马、驴、骡、犬、豕、猫、狐、兔、狸、鹿、虎、狼、豹尾贵而胎美。

鱼之属

鲢鱼、鳊、鲭、鲤、鳅头促鳞细，身有黑(班)[斑]^②，其味如豚、黄鲇、赤眼、金鲤、

①“菡筵”，当为“菡萏”。

②“班”，当为“斑”之误。





𩚑《本草》曰𩚑，〔无〕鳞而多涎^①、𩚑、𩚑、𩚑似蛇而无鳞，夏出冬蛰，有蛇变者，夜以灯照之，项下必有白点、𩚑、乌鱼即七星鱼也，一名𩚑。元丁、沙口、𩚑、𩚑、𩚑。

孝感县据邑《志》

晚稻、麻糖处处有之，而孝感独著、棉布、葛布、苧布、夜合、蚰。

^①“鳞”上，据《证类本草》，当有“无”字。



《汉阳府志》卷之二十九 人物〔一〕

《秩官通表》序

甘棠布泽，钳网兴残。麟、凤、鹰、鹗，各从体性。凡载籍以年次为经，与以品汇分别善恶纪事者，又各有体裁，如《秩官通表》是也。

汉阳自隋大业中，始改“汉津”为“汉阳”，而季汉之太守黄祖、刘琦已守郢月城于今府治之北，经一千五百余年。其间奉天子命来莅斯土，可考其姓字者，仅一百五十余人。四邑邑宰自梁天监以至于今，可考其姓字者三百五十余人。贤者或不尽传，而传者不必尽贤，其漫遗缺略，伊可慨已！今无论其人之贤否，第以朝代后先，纪其姓字，著为一编，拟作史者通表例耳。然其间勋业炳炳者，自另有列传，或入名宦之科，或归良吏之次，徽音溢美，不藉兹表以传。至于文遗献阙，泯灭无征，不幸而不传其所事，今仅列空名表上，聊以示后人之不敢遽忘其旧，而法鉴惟昭，则又在睹斯表者得诸于语言文字之外矣。

作《秩官通表》。

秩官〔通表〕卷上

国朝经制职官

汉阳府

知府一员、同知一员、通判一员、推官一员康熙五年奉裁、经历司经历一员、照磨所照磨一员康熙□年奉裁、司狱司司狱一员以上俱流官，本省回避、儒学教授一员、儒学训导一员以上用本省人，同府者回避、阴阳学正术一人、医学正科一人、僧纲司都纲一人、道纪司都纪一人以上系土官，由学金举。

汉阳县

知县一员、典史一员、汉口镇仁义司巡检一员、汉口镇礼智司巡检一员、蔡店镇巡检一员、沌口镇巡检一员、新滩镇巡检一员以上俱流官，本省人例回避、儒





学教谕一员、儒学训导一员以上用本省人，同府者回避、阴阳学训术一人、医学训科一人、僧会司僧会一人、道会司道会一人以上俱土官。

汉川县

知县一员、典史一员、刘家隔巡检一员以上俱流官、儒学教谕一员、儒学训导一员以上用本省人、阴阳学训术一人、医学训科一人、僧会司僧会一人、道会司道会一人以上俱土官。

黄陂县

知县一员、县丞一员、典史一员、大城潭巡检一员以上俱流官、儒学教谕一员、儒学训导一员以上俱本省人、阴阳学训术一人、医学训科一人、僧会司僧会一人、道会司道会一人以上俱土官。

孝感县

知县一员、典史一员、小河溪巡检一员、马溪河巡检一员以上俱流官、儒学教谕一员、儒学训导一员以上俱本省人、阴阳学训术一人、医学训科一人、僧会司僧会一人、道会司道会一人以上俱土官。

秦

守 分楚地为四郡，郡置守，秩二千石。

丞 佐守，秩六百石。边郡有长史掌兵马，秩六百石。

尉 典武职甲卒。

以上姓氏皆无考。

汉

太守 景帝中二年，更名郡守为太史，秩如秦。新莽，改太守曰太尹。

丞

以上姓氏皆无考。

东汉

太守 秩如旧。

黄 祖 治郢月城。 刘 琦 代黄祖守郢月城。

①以下各朝代秩官原书以表排列，此次整理改为散文表述。卷之三十同。



丞 秩如旧。

功曹吏 伍官掾 督邮 亭长 记室史 盐官 铁官 工官 都水官
以上太守姓氏可考者二人，余及丞姓氏俱无考。

季汉

太守 秩如旧。

魏 文聘治石阳。

吴 程普、孙奂、鲁肃、陆渙《水经注》：翼际山上有吴太守陆渙所治城。

丞 秩如旧。

以上太守姓氏可考者四人，余及丞姓氏俱无考。

按郡志《职官志》：其官于此郡者也，贤否例得备书。若官非守土及治地不在本郡者，不容混入。如陈《志》首载召公奭、召虎、郕公斗辛，三代官制与后世不同，且郡县未立，何可牵附。

又按省《志》载，汉哀帝时萧田，桓帝时田明，安帝时陈忠、应垒、张成、魏桓禹、吴却礼、刁嘉，俱江夏太守，汉阳均非治地。郝普系季汉零陵太守，误作吴江夏太守，俱不录，附记以备参考。

晋

太守 皆加将军，无者为耻。

吏员治中 别驾 郡从事 秩六百石，汉于定国条州大小设。晋因之，而省郡丞。

主簿

以上姓氏无考。

刘宋

太守

丞 元嘉二年复。

略如汉制。

齐

太守 郡为国者，为内史。

北周

太守 杜杲 见旧《通志》，陈《志》遗。





以上太守可考者一人。

隋

刺史 开皇二年，罢天下郡，以州统县，州置刺史。

太守 大业三年，改州为郡，置太守，上郡从三品，中郡正四品，下郡从四品。

长史、司马 改别驾、治中为之。

赞务、通守 罢长史、司马，置赞务以贰之。又加置通守，又改赞务为丞，位次通守下。

东西曹掾 上郡正六品，中从六品，下正七品。

主簿、司功、仓户、兵法 土曹等书佐。因郡大小为增省。

以上姓氏俱无考。

唐

刺史 武德元年，改太守曰刺史，加使持节。

太守 天宝元年改刺史为太守。

泽王上金武德四年，割沔州二县为汉阳郡，即今治。开耀元年，上金任刺史。

张廷珪有传。

杜 公有传，失名。

杨 琮

贾 载有传，至德中任。

虞 常会稽人，郭子仪荐。

刘 清字德一，天成中任。

韦嗣立玄宗时人。

姚绍之

韦安石万年(八)[人]^①，天宝时任。

王忠嗣汉阳太守，有传。

别驾 改丞为之。

长史 高宗改别驾为长史。上元二年，复置别驾，以诸王子为之。永隆元年省，景云二年复置，始参用庶姓。八载废别驾，文宗世复置。

李 仁

司马 从五品。

员外置

张 谨

录事参军 从七品。

①“八”，当为“人”之误。



辅 翼

司功参军、司仓、司户、司田、司兵、司法、司士 皆从七品。

录事 从九品。

以上刺史、太守可考者十一人，别驾一人，司马一人，参军一人，余姓氏俱无考。

朱《志》云：按史传，汉阳太守庞参、郑璩、杜纂、张奂、傅燮、盖勋、冯盎辈颇多，赵《志》已载参、璩、纂三人。今考唐武德中始置汉阳军于今境，忠嗣贬于玄宗朝，故汉阳秩官应自忠嗣始。旧《志》有任棠与参相关，并除之。唐以前汉阳在今陕西秦州，查秦《志》、陈《志》俱载此语。

陈《志》又云：纪汉阳太守自王忠嗣始。可谓确矣。乃唐以前千余载，吏斯土及有功绩可传者，一人不载，岂但知唐以前秦州为汉阳，独不知唐以前汉阳之为郢、为江夏、安陆、郢州、沔州，一切都督、刺史姓名行事亦当纪于此乎？今自周而下至于唐，择其可征者补焉，于是遂载鲁肃、羊祜、杜预、王浚、庾亮、桓嗣、桓石民、谢尚、郭舒、卞敦、桓宣、周访，刘宋孔灵符、刘粹，南齐李安民、焦度，陈程洗、程文季，北周权景宣、韦世康、裴宽，隋柳俭等。其官皆都督、监军、督军，非郡太守比，即有领太守、刺史者，其治地非本郡，应入沔阳、安陆、德安等志，不当入汉阳秩官明矣。其说已见良吏之后。

又晋陶称、周抚皆监军也，南齐萧缅则都督，所领则雍州刺史，书郢州误也。陈樊毅亦都督，司马消难在周为总管，在陈则九州八镇大都督也。刘宋萧思话，南齐萧子响、萧遥昌皆郢州刺史，非江夏郡守也。周迪则临川内史、高衡二州刺史也。唐穆宗则都转运使，韩皋则观察使也，皆非汉阳专官。

又晋陶侃、杨岷，宋蔡兴宗，齐柳世隆、沈冲虽皆江夏太守，然治今德安县地，宋以后治夏口，隋治沔阳，皆非汉阳为治所，俱不列。

五代

刺史 自唐天宝元年改刺史为郡太守，自是州郡刺史、太守更相为名，其实一也。故五代仍刺史之号。

宋

知州军事 革五季之患，命朝臣出守列郡，号权知州军事，二品以上，及带中书、枢密院、宣徽使职事，称判其府州军监，诸府置知府事一人。





知府 宁宗时设，知府之名始此。

李 恕太祖时任，败江南兵于鄂。

李仲芳有传，见欧阳《文集》。旧《志》遗。

胥 偃

游 酢有传。

陈执中

黄 幹有传。

赵朝泰嘉定五年任。

王得臣

赵 郛有传。

刘 谊又有书刘谊者，云种荻于洲，诸民赖其利者，即此君。

刘辟疆

皇甫焕

于 霆修《南纪》五卷。

孙 杓

孙承议

孟 琦咸淳十年，琦以城降元。

团 练 非州官，然亦系之州，必有事于州，如今之运司，故列之于此。

通 判 通判之名始此。乾德初，下湖南始置诸州通判。其广南小州，有试秩通判兼知州事者。

彭 乘有传。

张汝明有传。

潘 乘神宗时判汉阳，旧《志》遗。

推官孔目 推官之名始此。

金书判官厅公事、两使防团军事推判官、节度掌书记、观察支使 以上皆幕官，掌裨质郡政，员数多寡视郡大小、职事烦简。政和间改金书判官厅公事为司录，建炎初复旧。

录事参军、户曹参军、司法参军、司理参军

张 先有传。

张 沂旧《志》遗。

司马、兵马、都监、副监、监押 以宗室为之。

胡敦实有传。

洪 僊

吴处厚

蔡纯仁一作纯臣，宣和间任。

陈升之

李成之宁宗时任。

徐安民有传。

胡 介有传。

于 震

王中甫

曹彦约有传。

冯 杞

王朝奉



以上知州、军府事可考者二十七人，通判三人，幕僚二人，余姓氏俱无考。

按：陈《志》载王燮则制置使，岳飞亦制置使，陈规镇抚使，陈谦则宣抚使，均非守土之官，皆芟去。

元

达鲁花赤、总管 蒙古人为之。

安抚使 汉人为之，至正二十年，定万户之下者。下路置达鲁花赤、同知、判官各一员。

卢克治

杨铭之 江西人。

戎 益太原人。

梁彦义 真定人。

张仲良 真定人。

谭□□ 失名。河东人，置大成乐器。见余阙《记》，旧《志》遗。

同知

朱德辉 见陶九成《辍耕录》，云德辉承父荫仕至汉阳同知。按德辉乃宋扬州守臣朱焕之子，于至元十二年得元世祖招谕诏旨，次年丙子以城降。旧《志》遗。

判官

黄清老

刘□□ 失名。妻梁氏守节，被旌。

推官 至正二十三年，下路置推官，专理刑狱。

经历、知事、提控案牒、照磨、录事

司狱、库大使、副使、局大使、副使、仓大使、副使、提领

以上安抚使可考者六人，同知一人，判官二人，余姓氏俱无考。

明

知府 正四品。

洪武

程 瑞有传，见《名宦》。

苏公让有传，见《良吏》。

凌 轸进士，文章政事，卓然著声，建五美楼。

张 寿项城人，进士。廉明公正，吏不敢欺。

永乐

徐 述字信古，建德人，传见《良吏》。

薛 瓘北直人。

路 郁 山东人。





方 俞金华人。

傅扬善金华人。

宣德

王 静字永静，黟县人。有传，见《良吏》。

朱 祐邵武人，字逢吉。有传，见《良吏》。

景泰

姚 琼山西进士。

杨德敷

天顺

邝□□失名。江西进士。

蔡 麟进士。

成化

史 熊进士，日食，中暑卒。

冯 时进士。

何 淡顺德进士，传见《良吏》。

沈 熊浙江进士。

张文质扶风进士，有传，见《良吏》。

弘治

张 锐秦州进士，有传，见《良吏》。

孙 识商河进士。

李 瓚汤阴进士。

马 輿秀水人。

正德

蔡 钦余姚人。

车 梁山东进士。

何 亮登州进士，传见《名宦》。

尚 亨山东进士。

刘 访山东恩贡。

黄 俊武进进士。

徐朝元汲县进士，刚明严整，乞休去。

欧阳诰太和进士，守己爱民。

嘉靖

周 孟山西恩生。

孔 凤宁海举人，修府城。

刘本用安福进士，传见《良吏》。

宋 沂静海进士。

樊景麟新樊进士，传见《良吏》。

刘汝松山东进士。

石 经藁城官生。

杨 木新城官生。

应大桂天台进士。

王汝忠东平官生。

贾应春正定进士，传见《良吏》。

陈 珪化州进士，兴学育才，多所成就。

范之箴秀水进士。

卢 璧盱眙进士。

王 会华廷进士。

王世初安福官生。

刘廷梅南昌进士。

盛赉汝常熟进士。



隆庆

孙克弘 华亭官生，肃心之余，不废政事，尤工花鸟。

程 金 歙县进士。

万历

王宣化 淄川进士。

万钟禄 东乡进士，慈祥恺悌，民有余思。

王学古 朝邑进士，尝纂修郡《志》。

王 琰 解州举人，以循吏称。

杜从易 合江举人。

徐一忠 慈溪人，平明得体，雅好文墨。

司马祉 浙江进士。

胡笃卿 宣城进士。

喻三位 光州贡士。

傅道统 晋江进士。中珣榷税，有捍御功。以奸人争讼远年田产，扰民，败官去。

徐学礼 北直进士。

王宗本 休宁举人，作养学校，多获俊者。

董 谷 字硕甫，海盐举人。

舒体震 临川官生，传见《名宦》。

马御丙 绥德举人，传见《良吏》。

刘孟铤 安福恩生。

张纶音 朝邑进士，传见《良吏》。

天启

周三锡 浚县举人，传见《良吏》。

邹 璠 莆田副榜。

赵弘道 山西进士。

范廷弼 滋阳举人，传见《名宦》。

蒋绍奎 武进举人。

张 嵩 蒲州恩贡。

赵三极 河南举人。

王燮元

同知 正五品，职专清戎。正德十三年添设，嘉靖二十二年裁。

洪武

王 恭 字克庄，静海人，洪武中太学生，历知府，左迁。传见《良吏》。

宣德

潘文奎 有传，见《名宦》。

孙 旻 山阳人，宣德中任，此后裁。有传，见《良吏》。

正德

钱 录 广东举人，复设自录始。

嘉靖

张 纶 陇州举人。

林希范 莆田举人，以清廉称。

陈大壮 洛阳进士。

江 锐 江宁举人。





张天衢字道亨，山阴举人。自嘉靖二十二年以后缺载。

通判 正六品，督储捕盗。

宣德

黄希穀惠州人，宣德初任。有传，见《良吏》。

余 绍建昌人。

童 复合肥太学生，处事详明。

正统

宋 淩

景泰

石 材

成化

沈 选

金 镐

张 铎正定进士，以给事降。

弘治

张 翔保定举人。

陈 赞贵州乌撒卫监生。

正德

郝 辅举人。

徐 弼漳浦举人，传见《良吏》。

李 贞山西举人。

殷 博安庆举人。

任忱甫榆次举人。

嘉靖

张 传汝阳举人，刘家隔捕盗。

越尚德重庆举人。

杨 秩秀水监生。

李 仁东阿进士。

张廷佐陕西监生。

龚承恩太仓监生。

周世爵曲江监生。

陈大韶潮阳举人。

武廷弼山西举人。

周宗休永宁举人。

丁子英云南举人。

游 禾丰城举人。

徐宗尧南江监生。

徐 完吴县选贡。

毛 鏜河南仪卫司举人。

高 品桐城选贡。

缪尚志常熟举人。

房 宿贵池岁贡。

林 琛江阴举人。



隆庆

刘汝登蒲州举人。

秦伯修全州举人。

万历

朱邦华建昌岁贡。

叶尚时马平举人。

周友程南官进士。

夏廷彦江西选贡。

秦从周

刘兆文山东进士。

冯胤四川选贡。

邵炯保定举人。

苏子芳福建举人。

董献策河南选贡。

林梦鼎惠安举人，传见《良吏》。

齐承德锦衣卫官生。

天启

李时馨

刘兆昆广东人。

刘肇基广东人。

张子名

袁焄四川人，传见《良吏》。

尹珪四川人。

荣颖山西人。

温克敏永定人。

推官 正七品，专理刑狱。

洪武

孟骥徐州人，洪武末任，有传，见《良吏》。

沂孟良府城隍庙西正街有太白祠断碑，前书“元年孟夏吉日”，后书“推官沂孟良立”，不知是何元年，附载于此。

景泰

陈华

弘治

刘海苏州举人，弘治中任。

李琮庐江举人。

童敏问淳安监生。

正德

王贤海州举人。

张楷保定进士。

尹达太和监生。

孙绍孟津监生。

嘉靖

程瑀歙县例监。

孙贵汝阳举人。

郭钟秀汝阳举人。

赵岷仁和举人。





陈 器汲县举人。

郝元琛定陶监生。

杨 枢华亭举人，传见《名宦》。

汪 纯庐陵举人。

李承选延津进士。

李 台寿昌进士。

隆庆

唐维翰巩昌举人。

宋万业莆田进士。

万历

叶 修南昌进士，传见《良吏》。

殷 才四川举人。

陈向庭广东进士。

李云雁内乡举人。

天启

罗成才

侯加乘

邢 琦开州人。

许成楚泉州人。

张化枢永平人。

经历 正八品。

弘治

刘 琛

牛 颢河南人。

正德

魏 伦陕西人。

张时禹池州监生。

嘉靖

崔 宜故城监生。

何 辅姚州监生。

张衍祚汲县官生。

孟良弼沂州举人。

洗 沂琅山举人。

吴宗周怀宁进士。

吴与言大埔进士。

张仲仁临安举人。

毛一公浙江进士，传见《良吏》。

吴 遇江西举人，质实无私，查复汉川学基。

宋万略莆田举人，传见《名宦》。

郭 汤山东举人，坦夷质直。

智几先五台人。

沈 泗浙江人。

刘 熙嵯峨人。

刘养贞泗州进士，传见《良吏》。

梁仁杰东明人。

叶 楨浙江人。

谢 通福建监生。

李永随涪州人。

□ 表陕西监生。

知事



李 濮四川监生。

黄 坦山东监生。

张 仿江西监生。

张伯醇山东贡士。

黄德盛华亭知印。

万历

张文思六安监生。

郭维屏阳曲吏员。

张懋忠西平选贡。

徐应骅仁和监生。

陈治安钱塘吏员。

唐有虞江安吏员。

天启

吴以敬歙县监生。

沈大全嘉兴监生。

沈纯芳嘉兴贡士。

以上俱经历。

黄子美乐安吏员，任知事，后题裁缺。

照磨 从九品。

弘治

李 忠

赵 彝

正德

李 蕃陕西人。

以上俱照磨。

赵九思直隶人。

以上俱司狱。

嘉靖

李伯智陕西吏员。

高 岱巢县例监。

申秉忠河南监生。

陈忠谟山西监生。

段一龙山西贡士。

谢 湘北直贡士。

何希周巴州监生。

许 选海门监生。

于 蔡举人。

孙嗣祖尉氏岁贡。

张嘉言高平吏员。

许成皇太湖监生。

李天明邵武选贡。

雷鸣台陕西监生。

司狱 从九品。

方 鉴四川人。

方 越应天监生。

严 珣邳州人。

李 迪直隶人。

杨允恭广昌监生。

王 溥





陈 诏漳平监生。

郭 沛河南监生。

徐文安南直监生。

王济时山东监生。

胡万育河南监生。

以上俱照磨。

田伯都四川人。

仇 纬河南人。

以上俱司狱。

万历

彭 锐宿松贡士。

刘 仪昆山监生。

洪应宠歙县监生。

杜善扬长洲监生。

以上俱照磨。

徐允元直隶人。

卢廷美直隶人。

陈 敬会稽吏员。

以上俱司狱。

天启

毛承荫扬州监生。

徐君召金华监生。

胡振芳嘉兴举人。

以上俱照磨。

陈昌第昌平人，天启三年任。

崇祯

李正卿进贤吏员，崇祯五年任。

以上俱司狱。

仓大使 从九品。

张应祥北直监生。

梁云鸿山东监生。

王希孟山西监生。

黄 甲河南监生。

张 珪山阴人。

郜 珠河南人。

荆 濂安肃监生。

解腾鲲韩城监生。

陈于喈同安监生。

王肇基武进监生。

崔天祐直隶人。

何三畏余姚吏员。

沈一位宛平吏员。

陈仕荐漳州监生。

冯斯金江宁举人。

王大用邵武吏员。

刘德基徐闻吏员，七年任。

赵鸣时钱塘吏员，十二年任，甲申死难。



洪武

李 梅

永乐

孙 辂

正统

叶 芳

景泰

林 檉

成化

张 美

叶尚德

弘治

张 心

正德

谢思道

嘉靖

陈 益

郑守良

隆庆

王曹哲

万历

谢天锡

王 相

谭国相襄阳人。

天启

王 道

程先明江夏人。

况如梁峡江人。

颜时愚

童 和

何 山

郑 珀

李 珊

曾廷相

蔡曰章

王守中

王 正

刘继兴

曾 采

杨于庭云南人。

罗九思会稽人。

以上知府七十六人，同知九人，通判五十七人，推官四十六人，经历三十八人，知事一人，照磨三十三人，司狱十六人，仓大使三十人。



秩官〔通表〕卷下

国朝

知府自知府以下，各官品秩、职掌皆如明制。世宗宪皇帝以冲、繁、疲、难四项授官，府为俱全最要之缺。

顺治

张心忠孝感主员，顺治二年四月奉委署。

王崇儒西乡举人，升本省沔州兵备道。

傅应星登封选贡，升山东盐运司。

王泰交掖县举人。

丘俊孙山阳进士，传见《良吏》。

杨必达奉天贡生，传见《良吏》。

康熙

陈国儒开建拔贡，传见《良吏》。

纪元直隶文安进士。

卢崇兴镶黄旗荫生。

孙兰正白旗荫生，升江南庐凤道。

张铎江南徐州监生。

王明德江南高邮州荫生。

李法祖正黄旗荫生。

张万钟镶黄旗人。

王景禹镶黄旗人，岁贡。

杨道泰正蓝旗荫生。

汪辉江宁贡生。

戴梦熊浙江监生。

黄国材正白旗人。

胡文燊山东贡生。

郝士鎔霸州进士，传见《良吏》。

胡具瞻直隶监生。

雍正

柳国勋太康贡士。

郭朝祚正红旗贡士。

高克暮江都县举人。

封元震山东德州举人。

高纲镶黄旗监生。

张廷庆桐城贡士。

胡学成汀州贡士。

钟昭顺天宛平监生。

陈文言顺天承德举人。





乾隆

陶士楔湖南长沙人，由雍正癸卯科翰林院庶吉士，乾隆十二年任。

同知 明嘉靖二十二年裁。至国朝康熙十三年复设。康熙二十三年复裁，雍正十八年复设^①。

康熙

郭廷弼

刘金虞

高起龙

雍正

田三乐直隶贡士。

乾隆

刘士模山阴监生，乾隆元年任。

王式淳睢州举人，乾隆二年任。

张肯堂山西孟县举人。

王云翔江西新淦进士。

通判

顺治

章文登青阳监生，委署。

张云龙门恩贡。

李元阳大兴拔贡。

董三策孟县拔贡。

徐祚焕辽阳生员。

马肇图忻州拔贡。

李异品虹县拔贡。

郭谟福山恩贡。

康熙

赵斌安东拔贡。

王智龙

王镇正白旗监生。

朱荣祖福建监生。

时际熙镶蓝旗监生。

孙毓瑛正白旗人。

冯泰征正黄旗人。

雍正

张成龙山东人，雍正二年任。

卢辰告江南人，雍正三年任。

王康劼江南人，雍正三年任。

段烜明云南人，雍正十二年任。

苏天福(仍)[任]丘人^②。

冯士章浙江山阴贡生。

①“雍正十八年”：按雍正帝在位只有十三年，此误。

②“仍”，当为“任”之误。





推官

顺治

王以约大兴举人。

温启知咸宁进士。

邹 皋南丰举人。

游庭训崇安举人。

康熙

郝 巽颖州举人。

经历

顺治

李 琳孝感人，委署。

姜可用渭南吏员。

康熙

张一维山阴吏员。

马元翼

沈定国

雍正

吴 双

戴国祥

徐元仁

陈遵礼

照磨

顺治

张永泰华州吏员。

康熙

施承谦青阳吏员，康熙四年裁。

司狱

顺治

周光先山阳吏员。

秘祚焕晋州举人。

王三畏咸宁进士。

姚文烈桐城举人。

杜继召通州进士。康熙六年裁。

言嘉宾萧山吏员。

莫友仁

周弼酉四川贡士。

郭廷珍

饶 锐

何 津

韩 普良乡吏员。

张瑞麟齐东吏员。



康熙

陈之章山阳吏员。

睢千一

牛攀龙

雍正

张国威

张希戴河南吏员。

王文俊

胡光奎

附明林梦鼎《汉阳知府题名记》

通判林梦鼎曰：继庵马公，既莅汉阳，修文读法，百废俱兴，则又以郡缺题名，伐石纪之，令不佞为之记。

余谓汉阳为郡，其来久矣。其间畏垒之尸祝，史传之称述，彪炳睹闻，所可指名者，曾有几入乎？掌故者曰：堂阴旧有《题名记》，更数十年，缺焉不载，其存者，款识漫漶，了不可识。

余曰：题名，旧制也。非予所谓名之谓也。善事上官，雷同取誉，名乎？捷吏也，不阅考而名败矣。内染脂膩，外博壮厉，名乎？巧吏也，不阅年而名伪矣。容容受事，岁满骤迁，名乎？庸吏也，未得代而名靡矣。夫物有至，至则名。商彝、周鼎，谓之名器；华、岱、岳、霍，谓之名山；忧国奉公，谓之名臣；洁己爱民，谓之名宦。汉阳为郡，视十四郡最小，而其治视十四郡差剧。兢兢四境，治废所繇，奉法循理，亦可称良。与颖川、渤海声施到今，蚕绩〔范〕〔蟹〕筐^①，汉阳为之地，名顾不重乎哉！然在下不在上也。《汝坟》之诗不云乎：“父母孔迯。”下以为父母，又幸其孔迯，则斯名也，与贞珉同不朽矣。

秩官通表论

论曰：汉阳府治堂阴旧有题名石，历纪立郡以来郡守姓字。前明别驾林君名梦〔弼〕〔鼎〕者^②，有《汉阳知府题名记》，今石无存矣。然知府题名，则司马、别驾未与焉。今《府志》另为《秩官通表》，自季汉以迄于今上列郡守，次列司马，又次列别驾。康熙六年以前，并推官而列之，下至于府属首领暨四邑令长，不但专纪郡守也。而林记文辞贍美，不可泯没，因附载于左云。

①“范筐”，据《礼记·檀弓》“蚕则绩而蟹有匡，落则冠而蝉有綌”，当作“蟹筐”。

②“弼”，上文《题名记》作“鼎”，是。





《汉阳府志》卷之三十 人物〔一〕

四县秩官表

知县

汉阳县

唐

王□□失其名。开元末任，李白《赠汉阳王宰》诗。

崔 婴

宋

赵 时县治凤栖山石壁有“凤立梅岩”四字，署“端平丙申，汉阳令赵时题”十字。旧《志》遗，今补入。

陈儒林见黄幹《申省余粮积米略》。旧《志》遗，今补入。按《积米略》有孙承议、王朝奉、郑从政、梅从政等员，当俱是官阶，以儒林为名，恐误。因卢《志》稿收入，存之。

元

秦文郁开封人，政声大著，民怀其惠。

许 弼字贤辅，益都人，汉阳令。曲思齐汉阳令，有诗名。

明

赵子芳滁州人，旧《志》无，从《楚纪》补入。

赵庭兰和州人，《楚纪》无庭字。胡兴福

王叔英字原采，黄岩人。李荣宗

葛 鉴臧 荣

蒋 让福建监生。徐 淳云南举人。

周 望四川举人。

以上成化年任。

顾元昭四川举人。段 钦锦衣卫人，举人。

以上弘治年任。



龚 锐贵州举人。

郑 伟福建监生。

以上正德年任。

邓 镛丰城举人。

阮 范安福举人。

陈 骥莆田举人。

尚愚学东平举人。

欧阳玺平乐人，监生。按《通志》于尚愚学之后有陈惠、杨观，而无董谷、欧阳玺，今以秦《志》为据。

熊 瀚庐陵举人，以廉能称。

以上嘉靖年任。

龙大升桂林举人。

宋经济漳平选贡。

夏子谅涪州举人。

雷用龙建安举人。

以上俱隆庆年任。

喻应台荣昌人，祀名宦。

陈尧钦福建举人。

黄思新福建举人。

刘 纪四川举人。驭下严，三月，吏莫敢肆。郡大水，多方赈糴，以全民生。

章 铨浙江举人。

何 効资县举人。

吴庆会会稽人，贡士。

以上俱万历年任。

吴曰若鄞县举人。

以上俱天启年任。

蒋世兴南安举人，政多异迹。

杨四知六安进士。

王风仁盱眙进士。

何 仕四川举人。

石 铨建平监生。

张 坚龙溪举人。

张 俪六安举人。

郑 宝广东监生。

董 穀海盐举人。

陈 纪瓯宁进士。

杨 坦巨鹿举人。

梅继勋宣城举人。

杨 泽合江贡士。

管宗泰江西举人。

黄自修四川举人。

李志弘福建举人。

洪 先临安贡士。

王良相饶州举人，声称和平。

薛梦熊吴县举人。

龚克修曲江举人，谨洁著名。





国朝

顺治

萧善谏防山人，贡士，委署。

梁梦阳灵山卫人，贡士。

吴衷一嘉祥人，进士。

金渐皋仁和人，举人。

以上俱顺治年间任。

康熙

侯绍岐三元人，副榜。

蒋以化扬州监生。

张时雍嘉兴进士。

丘中宽上杭举人。

以上俱康熙年任。

雍正

闫 钠长垣举人。判断明决，民甚颂之。

侯执信睢州进士。

许国鸿萍乡监生。

梁 瑛正蓝旗人，监生。

以上俱雍正年间任。

乾隆

沈孟坚德清进士。

以上俱乾隆年间任。

汉川县

元

杨 观上饶人。

明

张 敬丽水人，洪武初置县治儒学，至今遵其故址。

李义良福建将乐人，由人材。

周岐鸣堂邑人，贡士。

李元成上元人，监生，委署。

范永茂沈阳人，岁贡。

曲圣凝宁海人，进士。

唐之柏灌阳举人。

张介眉崑山贡士。

任五伦昌黎进士。

蔡 甸萧山监生。

黎 昂贵阳举人。

杜若甫

刘嗣孔绥德州举人。

月列帖木儿为邑设主簿一员。

曹子纯歙县人，儒士。



龚文煥四川新津人，太学生。课农桑、均徭役，至今(恩)[思]之^①。

黄季文江西永丰人，由人材。

卢 兰直隶昌黎人，太学生。为政公平，听讼明决，九年秩满升。

郑 玘浙江人，由人材。

游 学直隶邢台人，太学生。由吏科给事中改任汉川，刚劲有为，风行草偃，豪横股票，上下称之。

陈 惠浙江鄞县进士。有传，祀名宦。

戴 璋扬州太学生。

王 奎如皋举人。

陈 德江西新淦举人。修理学校，整筑塘堰，民思慕之。

李清愈山东东台举人。

蒋 玺广西临桂举人。

尹 清四川富顺举人。

林 堪福建莆田进士。有传，纪名宦。

奚 文南直太平人，太学生。

茅先著浙江慈溪进士。

张仕昂南直旌德举人。

侯 达河南汤阴监生。

江 淮贵溪监生。

袁 范江西丰城举人。

王 澐四川宣抚司人，监生。

王 福江西临川人，监生。

王元佐江西湖口人，监生。

周正蕃福建长乐举人。正德初，邑弊方剧，极(方)[力]稽查^②，修葺文庙，置樵楼、刘家隔行署府馆，一一可述。

皮 英江西新淦举人。

黄 玠龙溪举人。

颜 齐安福举人。

郑时畅福建闽县举人。

刘 璜江西万安人，监生。

胡仲锡睢宁人，选贡。

龚 雷吴县人，监生。

郭垣嵩江西南安人，监生。

陈学可海阳举人。

袁 芝江安人，监生。

周 储桐城人，选贡。

昌应会莆田举人，有传，祀名宦。

高文佐归州人，选贡。

陈 简南海举人。

张崇德淦州举人。

段尚云呈贡举人。

曹汝良贵池举人。

蔡 纲九溪举人。

詹大伦绵竹人，由恩贡。为政有体，吏民不扰，有惠政碑记。

①“恩”，当为“思”之误。

②“方”，当作“力”。





安其善贵州普定卫举人。潞藩奏计额粮三千。公以其状闻院司，推官叶修查有衡州解故景藩仓抵补之。有惠碑。

李秉金南直华亭举人。

王应礼江西安福举人。

沈立敬南直溧水举人。

范士林四川宜宾举人。公讶邑征粮无法，创立易知单，以冬春夏秋按季自纳，至今称便，且操守廉洁，升任去。

许大节南直举人。

陈鼎广东东莞举人。

裴应征涪流人，选贡。

桂生芝江西贵溪举人。捐俸修学，盗贼远遁。

陈伯龙莆田进士。

彭大科江西广信府举人。

第宠兆浙江海盐举人。

韩溪祯四川重庆府举人。

应昌期浙江台州府贡士。

张大治四川保县贡士，有传。

郑文龙江西金溪举人。建修台阁。

文经天广西泗州举人。

金时振南直华亭举人。

李学旻江西抚州举人。有传，祀名宦。

孙光祚云南石屏州举人。升蕲州知州，有传，祀名宦。

张应良云南举人。

傅德坚四川新宁人，进士，癸未死难。

叶沛广东贡士。

国朝

李贡大同府人，顺治二年任。

孙根深阳信县人，顺治三年任。

冀应熊辉县人，顺治六年任。

马一良新河县人，顺治十年任。

刘肃之安阳县人，顺治十一年任。

张养元乾州人，顺治十三年任。

陈应登高安县人，顺治十五年任。

傅春闾绵竹人，顺治十六年任。

吴翻旧《志》又载：吴翻，乌程人，康熙七年任。

以上据新稿。至此缺至康熙五十七年，未载职官，昨札询川邑查核，续据川邑折禀前来有：

陈吴岳浙江慈溪人，庚辰进士。治川七载，重民教士，政迹上闻，行取主事。

梅琮丙子举人。贵州安顺人。治川七载，政简刑清，政绩上闻，内升主事。

丁翊寿浙江长兴举人。治政勤敏。

钟嘉禧福建长汀县举人。康熙五十七年任。



雍正

张弘敏江南丹徒举人。雍正四年任。
吴 圻江南武进县举人。雍正五年任。
井 浚陕西白水县举人。雍正五年署任。
胡国选四川茂州贡士。雍正六年任。
张光裕直隶磁州人，岁贡。雍正九年任。
杨高士广东潮州举人。雍正十年署任。
慕泰生苏州府仁和进士。治川两次，操守清明。
李成锦奉天海城县人。雍正十二年任。
苏 岱直隶任丘贡士。雍正十二年任。治川六载，勤慎爱民。
吴元统河南归德府睢州人。

黄陂县

宋

程 通中山博野人。

元

胡 寓
仇公度

王修武
忽都铁木儿燕山人，至元三年任。

明

刘拱宸
杨启序
杨淑安

吴 旻
李 稼
陈宗英浙江天台山人。

以上洪武间任。

刘时省正统间任。

周 鼎

杨 观

以上景泰间任。

陈 翬天顺间任。

李 恒河南仪封人，岁贡。

孙 冠直隶婺源举人。

李 环福建莆田举人。

金 树

以上成化间任。

淡 信河南彰德人，岁贡。

吕调阳云南大和举人。





李本洪四川举人。

以上弘治间任。

余 兰

陈 杰河南〔人〕^①。

谢廷秀福建举人。

以上正德间任。

应鹏冲浙江临海举人。

王 暲直隶崑山举人。

明幼冲四川南充举人。

刘天宠贵州宣慰司举人。

余 韵四川昭化岁贡。

康 志江西太和举人。

许际可河南固始举人。

以上嘉靖间任。

苏景和四川庐州进士。

江 珏舒城人，选贡。

以上隆庆间任。

刘起鹏江西举人。

胡 珽陕西府谷举人。

狄同然江南溧阳举人。

洪其道河南商城举人。

胡仲澜陕西扶风人，选贡。

李应先福建举人。

王明举广东海阳举人。

潘应龙照磨署篆，进士。

邵元凯浙江举人。

李 鉴四川进士。

赵元有福建举人。

徐 珽广东程乡举人。

朱 铤江西乐平举人。

周 曷贵州永宁进士。

周 音直隶华亭举人。

林东海福建莆田进士。

毛文炳浙江余姚举人。

霍 薰云南永昌进士。

石巨川四川人，又云江西宁州举人。

李河图临淮侯官籍，上元人，恩生。

王 朴句容举人。

熊 伟江西建昌进士。

高 翔福建岁贡。

李际春江南武进进士。

萧胤儒江西清江举人。

赵子义府参军署篆。

董绍舒贵州进士。

潘允中云南进士。

蔡懋廉华亭举人。

张一鸿陕西举人。

武化中漂水举人。

周元泰四川举人。

叶长青署篆，嘉兴人。

①“河南”下当脱“人”字。



国朝

顺治

张尚志苏州府长洲县廩监。

吴道凯巢县拔贡。

刘正孝北直通州岁贡。

王昌祚福建福清贡监。

以上顺治年任。

康熙

孟素陕西渭南贡监。

李拱极辽阳县人，镶白旗荫生。

鲁瀚大兴县监生。

顾彩吴江县岁贡。

雍正

陈侃柳州府宾州举人。

钮国亮大兴举人。

纪逵宜顺天府文安县进士。

乾隆

程洪饶州府鄱阳县举人。

谢焕先广西郁林州举人。

邵大业大兴县进士。乾隆二年，东寺畝理趣林等坑蛟水冲决。大业请修土堤七百八十丈。

乾隆三年工竣。乾隆二年并请修筑毛清河蛟水冲没堤一百七十七丈，靳家湾一百八十一丈，俱于乾隆五年告竣。

沈孟坚湖州府德清县进士。

杨洛青州府诸城县荫生。

孝感县

梁天监

李元履兰陵人，八年任。

宋

谢宪子有传。

蔡熙崇德人，以廉平称。见《万姓统谱》，失年。

弓省穀郑州选贡。

王凤翔山西榆社县贡监。

吕燦如北直山海卫岁贡。

杨廷蕴武进县人，乙未科会副。

张士伸顺天府监生。

魏嗣多北直柏乡县拔贡。

徐元璋济南府长清县廩贡。

钱以瑛嘉兴府秀水县进士。

赵廷辅保定府完县进士。

常上平阳府闻喜县举人。

姚廷扬重庆府定远县举人。

黄奭中即墨县举人。

艾恩荫江南上元县进士。

李希尹





元

达鲁花赤塔迷

明

胡 魁始改元制，以知县领印。

汪彦达德兴人。

陈 潜洪武十七年任。

马 祥洪武二十四年任。

盛子良金华人。

袁仕晦有传。

洪 诚有传。

曹 敬

罗 勉有传。

刘怀源高安监生。

徐 勉零陵举人。

陈 亮广德进士。

姚 锡凤阳举人。

陈 表赤水举人。

陈昌期南海举人。

胡 哲会稽举人。

翁 素慈溪进士，亦修城。

田 龙饶阳进士。

杨万钟云南举人。

汪克思余姚举人。

欧文暹顺德举人。

朱 梧晋江举人。

郭 斗有传。

陈 辂有传。聘应城陈士元为《志》。邑志始此。

雷鸣春有传。

于 鹤温江举人。

刘 崑有传。

朱师胜洪武五年任。

宋显铭洪武十三年任。

唐 钦试知县。

徐 遏上海人。

龚 岩有传。

谷 亨新淦人。

史 搢三河监生。

余 玉南城监生。

丁复学正统九年任。

李 义苍梧举人。

潘 英松江举人。

陈 华丰城监生。

雷 迪宜城监生。

张 珽莆田举人。

程 宽歙县人。

王 贤邯鄲举人。始修城。

冯 仁合江举人。

夏 正陕西监生。

祝 珩有传。

邬志皋永川举人。

王 襄有传。

龙 兴有传。

何士通贵州举人。

赵可谿有传。

易 元保宁举人。



任商扈巴县举人。于城西北隅得神鼎。

黄时际丰城举人。

袁光宇常熟进士，以宽和著称。

杨政廉铜仁贡士。

余桂萼上饶举人，有传。修志后迁知州。

董斯性九江贡士。

彭之轨四川嘉定举人。迁锦衣卫经历。

饶继范有传。

卢柱础字勤明，景州进士。

王驥字冀超，丹徒进士。后迁兵部主事。

雍鸣鸾有传。迁户部主事。

计鸿勋字青冥，无锡举人。

莫元教全州举人。崇祯十六年正月，李自成党白旺入德安，邑溃，元教走。

国朝

顺治

顺治二年四月，邑始隶版图。

王者佐北直贡士。三年，者佐罢。

刘绍隆安邑贡士，以疾不赴任。

范体观陕西贡士，顺治四年罢。

郇炳元字飞虹，直隶长垣人，顺治丙戌进士。丁亥授孝感知县。时邑城郭丘墟，人烟稀少，奉朝命而至者视为传舍。炳元抚此孑遗，盡焉心恻。乃胥吏之徒，非胜国逋奸，即党逆余孽，闻赫声，莫不悼而敛迹。五年正月内，会豫寇窃发，邑六城无所捍卫，四民无所讯察。寇兼程疾趋，乘夜袭城。炳元集众，疾呼拒敌，势不能支，谓夫人马氏曰：“余读书半生，冀为良牧冠，岂意婴此鞠凶，以此累若，为之奈何？”夫人亦曰：“臣殉国，妻殉夫，何容再计？吾已纫衣百结，侷垣方寸地，吾死所耳。”寇至，夫妇交口大骂，俱遇害。寇退，封君严瑄赠賸置厝以殓，行道见之，无不流涕。

雍正

赵曜灏县贡士。一年罢。

刘光宗辽东贡士。卒于官，有传。

沈朗苏州贡士。遭忧不赴。

张擢士字异资，南通州戊子副榜。任十年，有传。

薛继茂有传。

蒋以化有传。以化擢御史。

彭同魁贵溪举人。

高大正

李缙有传。

高奇英有传。

李向学

程云字松壺，莱芜进士。

顾龙裳字瑞黄，无锡贡士。任四年。





鲁昌期山东进士。

巫之峦字峦稚，江南当涂举人。任三年，卒于官。

朱 雯字喬三，浙江石门进士。

李玉芳北直举人。本年致仕。

卢仲魁辽东人，镶蓝旗笔帖式。

陈一朋奉天人，正蓝旗笔帖式。

陈应诏广东举人。本年罢。

徐 仪浙江举人。

梁凤翔字梧斋，陕西咸宁癸丑进士。清丈均赋，鼎建书院，设义学，置义仓，修桥梁。《邑志》。

王 梓郃阳人，岁贡。康熙三十四年任。

侯殿国固原人，例监。康熙三十九年任。

齐方起桐城人，进士。康熙五十二年任。

刘朝讲高淳人，进士。康熙五十四年任。

张弘敏丹徒人，举人。康熙五十八年任。

安鉉德聊城人，举人。雍正五年任。

于凝祺天津人，进士。雍正五年任。

张钟秀海盐人，进士。雍正六年任。

马天爵宣化人，岁贡。雍正八年任。

金 虞钱塘人，举人。雍正九年任。

靳树本镶黄旗汉军，乾隆二年九月任六载。

杨 芬广西临桂人，举人。乾隆九年任。

方 嵎江南桐城人，监生。乾隆十一年任。



《汉阳府志》卷之三十一 人物〔二〕

《名宦志》序

名宦一祠，必经题达而后入祀，为不敢滥也。今谨查在祠木主寥寥，考之案牍，漫无确据，咨询各属，俱无文献可征。陈国儒旧《志》所载一十四人，而新稿一府四邑通载二十八人。夫自季汉黄祖、刘琦守郢月城，以至于今二千余年，一郡四邑，莅兹土之职官可考其姓字者六百余人，其功德著于民生堪入名宦者，岂直二十八人而已哉！古人修举废坠，不应如是，然无明案可稽，固不敢意为增入，因念省《志》所载汉阳名宦七十人乃奉敕纂修之书，书成又经御览而后存为国乘，其引证皆据列史本传，或据前明《一统志》，更属累朝奉敕入为名宦之贤矣。谨依省《志》，无刻亦无滥也。

作《名宦志》。

名宦〔志〕

唐

杜公 失名，开元末为沔州牧，与李白相友善，有惠爱于民，时人以杜公呼之。旧《通志》。

贾载 至德中为沔州刺史。贾至《秋兴亭记》：载，吾家之良也，理沔州未期月而政和，于讼堂之西，因高构宇，不出户庭，在云霄矣。

宋

程通 先世中山人，迁洛阳，太宗时徙黄陂令。清谨过人，卒于官，赠司空。旧《通志》。

程珣 字大中。《明一统志》：黄陂县尉。先是，珣父通令是邑而卒。珣因寓居，后为尉，有惠政，邑人思之。二程夫子生焉。





张先 字子野，开封人，天圣二年进士，为汉阳司理参军。遇人浑浑不见圭角，而志守端直，临事果决。旧《通志》。

游酢 《宋史》列传：字定夫，建阳人，第进士，晚得监察御史，历知汉阳军。视事之余，召士讲明性命之学，风俗丕变。

张汝明 《宋史》列传：字舜文，庐陵人，徙居直州。徽宗时，金书汉阳判官。田法行，授牒按境内，使四隅，日具官吏所至，即躬临阅实，雨雪不渝。吏不得通贿赂，而税均于一路。

胡敦实 字观光，靖安人。绍兴初为汉阳幕官，保全辰倅何兑，以忤秦桧罢。旧《通志》。

黄幹 《宋史》列传：字直卿，闽县人。宁宗时知汉阳军，所至重庠序，先教养。值岁饥，余客米、发常平以赈，请罢移粟禁余之令，且告余于制置司。旁郡饥民辐辏，愿归者给粮，愿留者给庐，民大感悦。尝上筑城、储积议，于廨后风栖山为屋，馆四方士，立周、程、游、朱四先生祠。

曹彦约 《宋史》列传：字简甫，都昌人，第进士。孝宗时汉阳缺守，檄军事^①。时敌人大入，彦约访土豪，得许嵩、赵观、党仲升等。敌围安陆，游骑闯汉川，彦约授方略，击走之。以功进知汉阳军。

刘刚中 字德言，光德人。嘉定间调汉阳簿，与黄幹友善，切磋之益居多。旧《通志》。

徐安民 《明一统志》：理宗时，知汉阳军，修城、建公宇、祠坛，捐俸，不取于民，植松、杉、榆、柳三万余于郭内，后无一人忍伐者。

元

卢克治 字仲敬，开州人。《明一统志》：汉阳守。时郡邑新附，人心汹汹。克治布宣上德，抚慰绥辑，一郡向化。

冯翼 志安人，第进士。任汉阳丞，以清雅见称。旧《通志》。

秦文郁 开封人。《明一统志》：汉阳尹，政声大著，民怀其德。

许弼 字贤甫，益都人。《明一统志》：汉川尹，政教休明，德行显著，民心悦服。

^①《宋史·曹彦约传》作“檄摄军事”。



明

胡兴福 洪武中以明经令汉阳，招集流亡，抚惠疮痍，垦辟草莱，疆理土田，创置署宇，百废皆举，而民不知劳焉。

程瑞本 郡人，洪武初守汉阳，肇建廨宇，修立城楼，招抚流移，居民安堵，后崇祀名宦。

以上旧《通志》。

苏恭让 玉田人。《明一统志》：洪武初守汉阳，为政简而明，严而不苛，郡有重役，辄诣上官，反复陈说，多得减省。

冯应京 由进士。南直泗洲盱眙人。万历庚子任武昌兵巡道。时税监陈奉肆虐乡民，公与之忤，竟为所中，被逮去。士民戴之，为立祠大别山前，岁时致祭。旧《府志》。

喻应台 四川重庆府荣昌县人，万历八年任。

窦千仞 字淮南，南直合肥人。中万历壬辰进士，癸卯督学三楚，兴学劝士，诸生怀之。汉川有特祠，旧《志》未载，兵火后，事迹无闻，姑纪大略。

葛寅亮 字杞瞻，浙江钱塘人，中万历庚子解元，辛丑进士。戊午，督楚学政，卓识藻鉴，一时前第。诸生登科甲者，二十余年不绝。所刻有《湖南讲义》。江汉人文，脍炙海内。兵火后，事迹无闻，姑纪大略。

以上四人据陈国儒旧《府志》。

赵庭兰 徐人。《明一统志》：洪武初令汉阳，能爱民任事。朝廷尝遣使征陈氏散卒，他县以民丁应。兰独言无有。鸠工简材，创置县治，民不告劳。

刘拱宸 字守中，吉水人。洪武二年，以贤才荐知黄陂县，性廉洁。邑民郭俊英掘地，得黄金极多，以三斤十二两进，拱宸正色却还之。时文庙倾颓，与广文周贤合力捐建补葺二程读书处，访得裔孙名祖川者，令即守护。暇即训课士子，一时人才蔚起。在任七年，士民纪其善政十二条于石，以志不忘。后以老乞休，贫不能归，遂家于陂。

王叔英 字原采，黄岩人。洪武中令汉阳，值岁旱，斋沐恳祷，甘雨遂降；后雨不止，复祷于神，即霁。著有《汉阳祷神文》二篇。

以上旧《通志》。

杨观 上饶人。《明一统志》：洪武间令汉川，轻徭薄赋，弭盗修学，政行讼清，百废具举。





王 恭 字克庄，静海人。洪武中以苏州守谪汉阳同知，老成持重，体恤民隐，有古循良风。去任，行李萧然。

孟 驥 字子良，徐州人。洪武中为汉阳府推官，忠直廉干，后升贵州布政使司。

龚 岩 崇明人。洪武中由举人令孝感，修学校，劝农桑，律己严明，吏民畏服。

罗 勉 吉水人。洪武中举，贤良方正，任江夏县丞，擢知孝感。公严有为，兴举庶政，邑民怀之。

以上旧《通志》。

徐 述 《楚纪》：字信古，建德人。永乐中守汉阳，兴学校，课农桑，创建谯楼，修葺坛壝，政教大行。时采大木，设法完解，民若弗与其役者。岁歉，民艰于租输，关市得钞数十万，代民输之。郡有虎伤人，为文祷神，虎害遂息。

王 静 《楚纪》：字永静，黟县人。由贡监察御史，永乐时巡视湖广，未几谪守汉阳，厘弊清狱，贷逋赈乏，又刊文公《小学》及陈定宇《通略》，以惠初学。

王 佐 南阳人。永乐中任孝感主簿，立心慈祥，政教明达，超拜监察御史。旧《通志》。

潘文奎 字景昭，永嘉人。《明一统志》：宣德初由左春坊出为汉阳府同知。清慎宽厚。有恺悌之德。

朱 祐 《楚纪》：字逢吉，邵武人。宣德中守汉阳。府旧无廩庾，军民输于武昌。奏请立仓府城，民甚便之。

孙 旼 字丽中，山阳人。《明一统志》：宣德间以江西金事左迁汉阳同知，公平廉慎，虽当繁剧，而裁处雍容，务从宽惠，吏不忍欺，民怀其德。

赵 弼 蜀巴人，号雪航。永乐中授汉阳县教谕，学问渊博，善训诲，著有《通鉴肤见》、《郡志》等书。旧《通志》。

何 淡 顺德人。《明一统志》：成化中守汉阳，恺悌廉平，明于决狱，哲于知人，在任九年，清白如一日。

林 堪 莆田人。《明一统志》：成化中由进士令汉川，纯厚近民，廉介不苟，暇与诸生讲诲不倦。

李 恒 仪封人。成化初令黄陂，教民植桑枣，民受其利。岁饥，设法赈济，多所全活。

张 锐 秦州人。弘治中与扶风张文质皆由进士前后任汉阳守。锐谙于刑名，



劳于荒政；质张弛有序，操履不苟，郡人俱称为好官。

以上旧《通志》。

何亮 字文明，登州人。《明一统志》：正德中守汉阳，清谨廉介，丝毫不取，折狱如流，无不悦服。

徐弼 漳浦人。《明一统志》：正德中通判汉阳，简默恺悌，尤慎操守。时大盗刘六等来寇，舟泊城下，郡无里城，势危迫。弼倚城架木，人得哨守，郡赖以安。

樊景麟 新繁人。《明一统志》：嘉靖初守汉阳，鲠介不阿，政尚纲纪，尤加意穷民，勤恤备至。水啮城址，于词讼役隶，计日借工，随城敛石，时与家僮移巨石于署前，转运江岸，以身先民，节省财费，至今称颂其德。

邓镛 丰城举人。嘉靖间令汉阳，检律详密，吏事精纯。其处置山阳三图抛荒田地，裁减重支应付及多设民壮，卓然可行。

昌应会 莆田人。《明一统志》：嘉靖中令汉川。邑岁被淹没，民不聊生，乃极意拊循，轻徭缓赋。时群盗啸聚，夜劫民舍。闻之，即往驰逐。盗截其耳去。已得盗，尽杀之。景王出封安陆，奏讨庄田，滥及汉川，中珰暴横倍索。会固持之，珰怒，奏逮系按察司狱累月。当道承景府意，坐调去。

刘本用 安福进士。嘉靖间守汉阳，建樵门、南纪楼，民不知劳。兴学校、表节孝，尤善摘发，胥吏无敢舞文者。旧《通志》。

贾应春 字东阳，正定进士。嘉靖中任汉阳守，兴废举坠，著有成绩。纂修郡《志》，人称善本。

杨枢 字细林，华亭举人。嘉靖中任汉阳司理，修建刑署，文章政事，卓然称最。

梅继勋 宣城举人。嘉靖间令汉阳，兴学育才，政先首务，多所裨益。

谢廷蒞 富顺进士。嘉靖间令黄陂，正己绳人，勤事爱民。旧多滞狱，剖决如流，虽稚子贫妇，皆得以情自达，暇即与诸生课讲。

苏景和 泸州人。以给谏忤权相，谪丞，升黄陂令。安静爱民，优士以礼，常率众论学于二程祠，定大中祀典。

郭斗 字应宿，昆明人。嘉靖癸丑进士，令孝感，政尚宽厚，而秉衷介介不可夺，褒节义，重养老，酌民利害，约法不爽。





陈 辂 南(克)[充]举人^①。隆庆间令孝感，庭无滞牍，赋无蠹孔。大计当行，乾糒羸马朝京师。

叶 修 南昌进士。万历时任汉阳司理，性刚直，常面折人过，藩臬皆惮之。汉阳学废，赖以兴复。汉川田为潞藩奏割三之一，民甚苦之。查衡州有岁解德安仓者，申允移抵。民为立祠。

马御丙 绥德举人。万历间，守汉阳，练吏事，善折狱，馈遗悉不受。慨郡乘漫灭，锐意修葺。

张纶音 朝邑进士。万历间守汉阳。己未，剧盗蜂起江洋，舫舟给客，拊其资而委人水中，号为淤泥牌。贾舶戒不敢前。乃捕得数十人，遍置通衢，立杖毙，远迹以安。

朱 珏 休宁人。万历间任黄陂尉，洁己执法，力锄豪右。中以飞语，亦不少变。尝自谓：我要钱，便是典史；不要钱，便可比御史。黄安耿司徒嘉之曰：“人而无欲，岂直一御史哉。”

冯有为 武进贡士。万历间任黄陂丞，布袍羸马，命家僮灌园自给，署邑篆，清约如故。邑人张涛抚辽，调官经历去。

李应先 字伊蒿，南安举人。万历中令黄陂，性直爱民，折狱不惮强黠，曲直立辨，理事常夜分不倦，笃于课士，所拔多名俊，延至署中，同其子讲艺，不间寒暑。

王明举 字浙泉，海阳举人。万历间任黄陂，耿介不阿。邑有宿猾，素磨洗钱粮簿，立烛其奸，遂服罪。又豪姓某以盗中伤平民，捕之，邑赖以安。捐俸葺二程祠及养济院。三年以病去。

赵嘉焕 巴陵人。万历间补黄陂谕，训迪诸生，淳复不厌，见有一善，扬之惟恐不至。

祝世祿 字无功，德兴人。弱冠即慕二程，于书无所不窥。万历间授黄陂学博，见登台望鲁处，与诸生讲习学礼其间，低徊不去。

蒋以化 字仲学，常熟举人。万历间令孝感，崇节孝，重师儒，片言折狱，咸服不冤。时于郭外召父老，问民疾苦。岁大祲，躬为糜粥以哺。道有胔骼，辄给席瘞之。

余桂萼 字毓蟾，上饶举人。万历间癸卯，令孝感，会疫，择医施药，多所全活。

^①“克”，当为“充”之误。



复买向家湾地十余亩，为漏泽园，置学田，修县志，完圯城数十丈。

周三锡 浚县举人。天启元年守汉阳，操守廉洁，每岁俸不给，别取家租佐之。旧城孤悬无内墙，捐资伐禹梁山石，周砌坚固。后贼至，登陴乘守，民归德焉。

张大治 字望平，保县人。天启间令汉川，始至，恫然若无能，奸胥健讼辈多欺之。阅月，悉得其姓氏，始历数其奸状，各置诸法。有豪家计夺邻地，乘邻人酣醉坠墙，诬以盗，缚送于官。治厉色曰：“何不献以地而解之？”时惊以为神。后卒于官，仅余帛数尺。

孙光祚 字怀龙，石屏州举人。令汉川，献贼犯刘家隔，率众直前抵杨子港，与贼战。贼走鲤鱼滩，乘其半渡击之，贼溺水死者甚众。汉川旧无城池，祚筑城七里有奇。壬午，左兵南奔，逼城下七日始去，杀掳酷于贼，民赖城以安。

刘养贞 大足人。怀宗丙子任汉阳推官，刚方自持，居恒止一葛一裘。尝云：“素与酒肉无缘。”郡中豪强尽为之敛迹。

以上旧《通志》。

赵元有 **夏统春** **薛闻礼**

以上详《忠臣志》。

皇清

金渐皋 仁和举人。顺治十四年令汉阳，性仁慈，不轻用峻法绳人。遇岁歉，捐俸赈恤，修学课士，给以膏火，士民德之，祀名宦。





《汉阳府志》卷之三十二 人物〔三〕

《良吏〔志〕》序

握符绶绶，与斯民谋朝夕者，良郡邑吏耳。得其人则胥匡以生，失其理则谤讟四起，所系岂渺小哉。史公传循吏，远征孙叔敖、公孙侨三数人耳，而后世慈祥恺悌，视百姓犹吾子，若魏信陵、元鲁山辈，何尝不史册相望也？汉阳自郡邑来，有课农桑、兴教化，捍灾御患，如数君子者，千载以下犹令人兴起云。

已入《名宦志》者，兹不重录。按名宦、乡贤，我朝设有专祠，春秋上丁祀于学宫，甚巨典也。旧《志》未经分析，凡官于此郡有事迹可称者，无论已祀于祠及未祀，统名之曰“名宦”，殊难稽考；后又泛引古统辖诸名人，名为“宦迹”，其官爵品秩尤不可不辨。

查魏晋职官，州先于郡，刺史先于守，阶级秩如也。统兵之将，都督诸军为上，监诸军次之，督诸军又次之。当时战争攻伐，靡有宁日，荆、襄、郢、沔大率皆要冲，屯札之地，非必督是军即为守是郡也，其以他官实领州刺史、郡太守者，乃为理州、郡事，所载如吴鲁肃，虽常治兵江夏，而官则奋武校尉督军者也；晋羊祜，则都督诸军事；杜预，则镇南大将军、都督荆州诸军事；庾亮，则黄门侍郎、散骑常侍镇武昌；桓嗣，则荆州三郡、豫州四郡之督军，其所领则江州刺史，襄阳、襄城二太守；桓石民，则督荆、江、豫三州十郡军事，其所领则先襄城太守，后梁郡太守，所戍则夏口也；谢尚，则江夏、义阳、随三郡之督军；郭舒，虽尝屯沌口，而所领则南郡太守；卞敦，则沔北七郡之监军；桓宣，则沔中诸军之监军，其领则襄阳也；周访，以扬烈将军屯鄂，沌阳特其进兵之地；权景宣，以外兵郎中从征江陵，沔水特其破敌之所；王浚，以益州刺史〔代〕〔伐〕吴^①，江夏特其经过之处耳；宋刘粹，虽封潯阳县男，而实则建威将军屯夏口；焦度，则武陵王前军参军；程灵洗，则郢、巴、武诸军都督；程文季，则超武将军助防郢州；宋岳飞，则荆湖各路制置使；陈谦，则宣抚使；陈规，则镇抚使也；惟晋陶侃始为江夏太守，后屯沌口，又移林嶂，皆本郡地；宋蔡兴宗为

^①“代吴”，《晋书·王濬传》作“伐吴”。



江夏内史；齐柳世隆、沈冲为江夏内史。汉阳在晋、宋、齐皆江夏郡，晋改太守为内史，宋、齐因之，是数人者虽皆郡守，而治地皆不在本郡，且所载多系战功，亦无本郡事迹，故自羊、杜以下，概从芟削。

盖省《志》统括全省，例得备书。郡《志》载一郡之官，纪一郡之事，虽有统辖、分辖，诸巨公及明代督、抚、藩、臬各大员均不备载，以明不敢褻也。又历代官制如州牧、刺史、太守、内史、知军事、令、长、宰、尉等名，随时互异。国朝悉因明号，一郡则曰知府，一邑则曰知县，故自明以下，皆以其官职直书，不敢虚拟旧名，难辨古今也。

又按江汉导自梁州，所经州县伙矣。凡经传泛称江汉，不注明何地者，皆非汉郡所得私。旧《志》载召康公、穆公，殊觉无谓。又郡自汉、晋后置省无常，治地不一，最易牵混。陈《志》知汉之汉阳为秦州，悉去万历《志》所收任棠、庞参、郑据、杜纂、张奂、冯盎辈，是矣。而又掇摭羊祜、杜预、庾亮多人备录，本皆为荆州刺史也，不知《宋书·州郡志》固云：荆州刺史，汉治武陵汉寿，魏晋治江陵，王敦治武昌，陶侃治沔阳、后治武昌，王廙治江陵，庾亮治武昌，庾翼进襄阳、复还夏口，桓温治江陵，桓冲治上明，王说还江陵，此后遂治江陵，于沌阳风马牛不相及矣。又所收孔灵符、李安民、程灵洗、裴宽、韦世康、柳俭诸人，则以汉阳在南北朝先属郢州，后属沔州，诸人尝为郢沔刺史故也。

按：汉《郡国志》凡县名先书者，郡所治也。《晋书》江夏郡领县七，首安陆，曲陵第三。曲陵即吴石阳，后汉沙羡地也。《宋书·州郡志》郢州江夏郡领县七，首汝南，本汉沙羡地。晋末，汝南民流寓夏口，因立汝南县，次列沌阳，齐、梁因之。《隋书·地理志》：郢州竟陵郡领县八，首长寿；沔州沔阳郡领县五，首沔阳，汉阳第五，则均非治沌阳也。兹不俱载。

〔良吏志〕

唐

张廷珪 河南济源人。开元中为沔州刺史，在官有德化。

王忠嗣 华州郑人。开元中为汉阳太守，久之，徙汉东郡。





宋

李仲芳 字秀之，贝州清河人，淳化三年进士乙科。知汉阳军，居三岁，而汉阳之狱空者二岁。卒以疾解，退居于汉旁。大中祥符间，卒，子孙因留家焉。

陈执中 知汉阳军，持心公正，人莫敢干以私。

陈升之 汉阳民俗好藏交亲尺牋，有讼，则出以质证，有司据以推诿。升之由汉阳军历知谏院，谓此乃告诘恶习，力请禁止。

胡介 字仲藩，孝宗时知军事，政和民安，于署西建熙春楼。

赵鄮 庆元间知汉阳军，筑堤置闸，以除水患，民甚称便。

陈规 为汉阳军镇抚使时，仿古屯田，并百姓授田，各立为法制，兵屯以大使臣主之，民屯以县令主之，岁课多少为殿最，下诸镇推行之。

彭乘 字利建，益州华阳人，由进士通判汉阳。尝与同寅游眺凤栖山，愀然叹曰：“人子岂可久舍晨昏之奉，而为一身之荣乎？”遂乞归养。寇准闻其贤，荐为集贤校理，仍恳辞。上嘉之，特恩除普州，以便禄养。

谢宪子 端平中令孝感，发明朱子之学，政尚礼教，招集远近士子，邑理学自宪子始。

关应庚 度宗时为孝感丞。元野蒲吉儿请守黄，见平靖关人扼宋，宋陈防选十二年时^①。

元

徐元素 铜台人，至治时令孝感。兴教褒德，鼎新学宫，与旧尹赵资仁、乔成咸有功境上。

明

舒体震 临川人，万历中，由官生守汉阳。性乐易，而有才干。详列内监害政积弊，勒石垂戒，狱讼委各属仝解。

黄希穀 惠州人，工于画，宣德中判汉郡。宽和谦逊，上下悦服。

徐弼 漳浦人，正德时通判汉阳。时流寇刘六、刘七往来江上，舟薄郡城。

^①据《四库全书·钦定续通志》卷三十九《宋纪·度宗》载：“九年……戊寅，孝感县丞关应庚上书言边防二十事，诏授武当军节度推官。”“元野蒲吉儿……十二年时”二十三字当系他文错简至此。



弼以里城未筑，前一日倚城架木，人得哨守，贼不能犯，一郡获全。

林梦鼎 惠安举人。临事虚心采听，剖析利弊，雅好文翰，尝辑修《郡志》。

袁 焜 四川人。善于捕贼，计擒大盗李瘦子、高公等。筑堤汉口镇北以防水，居人至今倚为保障。

毛一公 浙江进士，任汉阳推官。文章政事，斐然可观。

尹应嗣 武陵人，以岁贡授汉阳府学训导。月集文士校艺六次，笔札盘餐，力任以给，品定甲乙，极为精当。正己方严，诚胡安定之流亚也。

杨思永 山东聊城岁贡，莅任后，亦有尹应嗣之风。

段 钦 山西籍锦衣卫人。正德初，以举人令汉阳，政务慈惠，民以无扰。

杨 观 上饶人，由翰林检讨宰汉川。敦本务农，轻徭薄赋，修学讲礼以造士，去奸弭盗以安民。政教修明，案无留牍。

王 朴 句曲人，嘉靖中由举人为陂令。旱涝连岁，民多流亡，朴多方安辑，勤心抚字，四方归业。邑中公事，悉行修举，哀前后县令作《题名记》，勒石县署，刊于壁。

石巨川 四川人，以举人令陂邑。威廉敏达，举废坠而民不知劳。筑谯楼，名大观，至今尚存。三眼井铁栏亦其所铸。

熊 伟 江西建昌人。才识谙练，综理精密，善于听断，案牍无扰，而民鲜冤狱。

李际春 武进人，由进士为陂令。政明守洁，僚属吏胥，咸莫敢苟取。讼者勾以木皂，听其自息。

狄同然 平陵人。雅擅文词，常口授诸生经，独析疑义。事上不阿，以廉洁恺悌见称。

萧胤儒 江西清江人。明敏练达，多实政，立保甲、义仓法以便民。

董绍舒 贵州进士。慈惠平恕，民爱之如父母。

张一鸿 陕西举人。有治才，邑有谋财杀人事，刑讯匿供。一鸿虔祷于神，梦得其实，遂亲至贼家，命掘菜地二尺，诸赃俱在，贼遂伏法，一时称神。

武化中 溧水举人。执法不阿，一宦家将干以私，先馈二金爵为寿。化中挥却之。后人有所与结讼者，化中以理断，不少徇，境内肃然。

潘应龙 福建进士。以照磨署陂令。捐资筑堤，以培县治气脉，名潘公堤。不数月去。

李 鉴 四川进士，字水星。莅任后，寇盗猖獗，鉴浚濠筑堤，上加墙数尺，





使避贼不及入城者栖之。又砌内城，分八营以张内势，选诸生有才器者为约主，各练乡兵，内外为援。贼数万围城三日，火焰烛天。有倡讹言者，鉴取死囚斩首悬城上以示戒，贼不得近，遂惊散。陂人建祠以祀。

洪其道 商城举人。综核精明，葺学宫、新程祠，给牛种以赈逃亡，捐药饵以苏疫疠。巨盗就缚，犴狴以清。

周元泰 字春霖，四川举人。时四郊多垒，元泰夜坐城上，传筹巡警。有大帅秦某领兵过陂，下有叛志。秦私就元泰计，即引与登城，兵竟大哗，架大炮摧城数堞，合邑震动。元泰曰：兵无餉故哗，尔取白金陈城下，赏不叛者。立斩倡乱二十人以徇，余皆胆丧，乱遂定。

赵元有 福建举人。明末为陂令，值时荒重疫，大寇猬集，居民流亡。元有独宿城头，昼夜防卫。贼大至，遂以身殉。

叶长青 号锦林，嘉兴人。以黄州幕官署陂篆，轸念民瘼，安上全下，兵荒之余，民赖以少息。后以贫不能归，遂家黄州，次子封成己亥进士。

袁仕晦 新淦人。永乐初，以人材授御史，调知孝感。以兴行为务，明察过人，奸宄咸震怖焉。

洪诚昆 明进士。永乐中，令孝感，以清标自尚，政惠而心劳。

黄 玠 正统中，以德安推官摄孝感事。治绩甚著，曾披榛莽，求董公墓，重修复之，为文纪于碑，尚存。

祝 珣 江南举人。峭厉有鉴裁，庭无沉冤，志操清介。

王 襄 云南保山举人。法令简严，讼庭清肃，以不嫫逢迎论去，惟图书两篋而已。

龙 兴 海阳举人。嘉靖中，令孝感邑。时徭赋多宿蠹偏累，剔厘一清。会矿贼患苦境土，兴率民兵歼之，因请垒土为城，又岁侵，邑民赖以全活。

雷鸣春 字肇元，怀宁进士。嘉靖中，知孝感。丰裁峭厉，不怙权势。景藩就邸，中珰所至骚然。鸣春力镇之不得肆，狱无沉滞，豪民皆严惮不敢犯。尤好奖进士类，置学田以供朝夕，后以内艰去任。

赵可镨 字汝从，泸州进士。孝感故患盗，可镨摘发搜捕，号为神明，犬无夜吠。雅意造士，有讼者，正色责之曰：“儒衣襜褕，乃与齐民持短长乎？”是非立判，士气无少摧抑。

刘 崑 万安举人。隆庆中，知孝感。邑故弛会约，崑召长老使家至敦谕，时俗一变。构求仁馆，集士子讲明圣学，检纂邑乘，事无旷佚。



薛继茂 云南永昌进士。万历中，知孝感。年少果锐，清介自矢，讼无牒缓，赋无耗羨，吏役震慑，致不敢妄受一钱一饭。获盗得其情，即毙之杖下。盗尽越境去，四乡外户不闭，牛马露栖。二年，邑大治。顾性刚多忤，或(𪔐)[𪔐]健讼号姚铁嘴者^①，诬控之。上官廉其介，事竟已。

饶继范 字见石，临川举人。政简刑清，操守廉洁。迁河池知州，人有追赆之者，不受而去。

李 缙 字太华，南昌举人。不务矫矫名，而吏慑民安。以蒲鞭惩理屈者，嚣讼皆化。莅孝邑三年，鸡犬无扰，民相与劝勉曰：“早自输将，勿为贤使君累也。”以忤势要罢归，典质子钱，家乃成行。

高(其)[奇]英^② 明岁贡。为孝邑令，盗蝥起。奇英广为方略，捕得其情，常一日毙八人于杖，盗皆遁，野无窬窃。以忤上官，竟坐疲软罢。

雍鸣鸾 字石莲，成都进士。崇祯中，令孝感。为人和易蕴藉，善默识，邑中诸生，一见后，姓名行履皆能道其详。时流寇躏楚，邑为贼冲。鸣鸾昼夜乘城，缮雉堞，增楼橹，练乡勇，远侦伏。贼屡屡至，辄走之。编烟民各成一堞，十堞筑一庐，择士子为之长。鸣鸾夜屏灯火，循堞巡视，随憩庐中，人皆夙夜无离庐者。一夕，城外濠边有微光，心动，曰：“是有异。”急缒数壮士下迹之，则贼(堞)[谍]也^③，擒以至。其机警多类此。至凡事务崇敦大，听断曲直立剖，无笞扑烦。后迁户部主事。

王国治 字修吾，永昌举人。以同知三摄孝感篆。崇祯癸酉，秦寇自申窥楚。国治闻警，壕增堞，具(千)[干]橰^④，娴操练，邑赖以全。时水旱之后，民多转徙。国治清户口，招流逋，贫不能垦者，贷以牛种。输纳革苛羨，猾胥无敢以利尝者。进诸生，勖以文行，童子试所赏识，后皆成名士，致通显。讼必反复开谕，令其心自愧沮而止。升刑部郎去。

夏统春 字元夫，明末由荐举授陂丞。时全楚被兵，邑尤冲要，贼攻益力。统春冒矢石以守，十昼夜不稍息。贼忽解去，统春曰：“此懈我也，宜益备。”越五日，贼果突至，城陷，统春死战南城，被执。贼胁降，统春指贼大骂。贼怒断其右手，复以左指，又断之。怒骂益厉，割其舌、剜其目。统春犹以头触贼，

①“𪔐”，当为“𪔐”之误。

②“奇英”，该小传题为“其英”。据前“四县秩官表”，“孝感”栏有“高奇英，有传”五字，“其”为“奇”之误。

③“堞”，当为“谍”之误。

④“千”，当为“干”之误。





遂支解之。

何沾沛 普安卫人。嘉靖初丞孝感，雅有吏才，清声颇著。

薛闻礼 武进人。为陂主簿，有志节，多惠政。岁歉，漕兑逋欠，民无以应。闻礼往汉口那借千金代兑，期岁稔清偿。民感其德。张献忠陷黄陂，爱其材，欲污以伪官，挟与俱去。乘间脱归，率吏民攻伪令，诛之。令众远避，已独留。俄贼大至，将屠城。闻礼曰：“杀伪官者，我也。”贼尚欲活之，骂不绝口，遂遇害。

李德 字仲修，番禺人。洪武中，以贡教谕汉阳。博学能诗，广中四杰之一也。诗刻《五先生集》中。

赵弼 字雪航，蜀人。永乐间以贡征授汉阳教谕，修履谨饬，博学善诱。纂修郡《志》，后来传述皆赖之。后家汉阳，子蕃另有传。

周化 应城贡士。教谕汉川，修葺学宫，与诸生讲论经艺，暇则歌咏自适，有濂溪之风。

杨梁 宜山人。弘治间为黄陂谕。初至，学宫不蔽风雨，梁捐俸及诸生贽，更倡募得百余金，遂鼎新焉。

朱家藩 以黄州教职署陂谕。修棖星门，葺大成殿，半载，庙貌顿新。纂辑县《志》，亦家藩始事云。

章讷 字士言，临川贡士，授孝感教谕。质直尚志，古文法庐陵、南丰之间，邑中士大夫家多悬撰记。

朱天启 永康人。司训黄陂，座右书《白鹿洞规》，遵为矩矱。言动悉为士楷模，群称为“朱夫子”云。

杨迂 阿迷人。博极群书，潜心理学，外若恂恂，而风操岳立，练达时事，指训士子，趋于有用。

陈方寰 龙山人。训导陂邑，先正心术，以正文体。恤孤寒，却修贽，邑士因以互相砥砺，文品遂为丕变。

陈耀 字熙宇，河南卢氏岁贡。训海周详，曲济空匮，数年间，陂士无不蒙其教泽。

周文 零都贡士。为孝邑训，雅志清修，不媚权要，急人患难，约士严重有体。

朱珏 休宁人。为黄陂典史，洁己执法，专锄豪强，中以飞语，亦不少变。

黄应貳 丹徒人。尉陂邑，知西界为盗藪，亲薄其穴缉捕，被伤扶归，添役严拿，贼不能遁，夜赍百金以求脱。应貳擒之，贮金于库，置盗于法。



国朝

汉阳府

丘俊孙 字〔吁之〕^①，江南山阳人。由癸未进士授汉阳知府，躬行节俭，造士爱民，尤善治疑狱，凡累讞难决者，俊孙片言剖晰，皆剖然悦服。后升山西冀宁道。

杨必达 字□□，奉天辽阳人。由贡生任府，时大军征剿西山残寇，必达督运军饷，自始事及凯旋，讫无违误，颇著劳绩。鼎建府治，焕然一新。以疾休致。

陈国儒 字去疑，广东开建人。由拔贡知汉阳府。整厉民俗，建堤防，以便往来，修关隘，以稽盗贼。又以郡《志》创自明季，未经修辑，加意纂刊，至今称为善本。

郝士鐸 字子希，顺天霸州人。以进士知府事。性慈祥，听讼以理开慰，不事敲朴，蔼然相对，民皆感颂。尤喜论文，每进多士饮食，训诲如家人相劝勉。建书院于城南，择硕儒为之师。一时忠义士多出其中，后以殿最升云南督学副使，历试数郡。引疾解任，侨寓汉城，未几卒。郡人即书院前立祠肖像以（俟）〔祀〕^②之。

汉阳县

唐之柏 字□□，广西灌阳举人。莅任汉阳县，值滇黔梗化，之柏筹应兵饷，劳瘁多年，日不暇食。至重士轻赋，惩奸缉盗，又属余事。

阎 鈞 字坚西，直隶长垣举人。知汉阳县，首揖学宫，裁减耗羨。汉郡旧仅属两县，每值督学按临，士子赴省城应试，长江隔越，每患风涛。鈞力请鼎建学使者行署，堂庑号舍毕具，一郡士子翕然称便。听断明允，理亏受杖者亦无怨言。尤善捕盗，发奸摘伏，时称神明。

汉川县

冀应熊 字渭公，河南辉县人。以举人知汉川县，有文武才。邑湓松湖等处延袤百里，丛棘深箐，夙为盗藪。应熊计擒法剿，殄灭无遗。能以催科寓抚字，小民不闻追呼声。更勤于课士，讲论精详，邑中文风大振，皆应熊作兴之力也。

黄陂县

金殿臣 奉天人。知黄陂县，官军征滇黔过陂邑，殿臣素有胆智，犒劳外，

①“字”下，原书留空，示有脱文。余家旌《新辑汉阳识略》卷六“人物”：“丘俊孙，字吁之。”据补。

②“俟”，当为“祀”之误。





立于城门以镇之，士卒入城，一无所扰，市肆晏然，居民安堵。

钱以煥 浙江进士。莅黄陂时，年尚少，德器深纯，政尚简易。邑素健讼，以煥廉得其情，不妄准一词，讼端宁息。

魏嗣多 柏乡拔贡。令黄陂，温厚和平，未尝有盛怒。善诗文、真草，公余喜与贤士大夫接，一洗俗吏陋习。

孝感县

周会隆 顺治初，以会同知县署孝邑事，数月，举行软抬法，百年积苦，一旦顿苏。

郇炳元 字飞虹，直隶长垣人。顺治乙酉解元，丙戌进士，次年知孝感县。自明季寇乱，城墟民散，炳元伤之，思安定以苏疮痍。未几，豫寇窃发，兼程疾趋，乘夜袭城。炳元集众拒敌，势不能支，城陷被执，与夫人马氏忿激大骂，遂遇害。寇退，邑绅严琯置榿赠隧以殓。

宋继舜 巨鹿人。以黄州倅摄孝感事，邑多盗，获者辄以贿免，盗益炽。继舜莅任，悉捕而毙之，盗息人安。

张擢士 字异资，江南通州副榜。任孝感承凋敝后，里甲偏枯，胥吏欺诡。擢士首均徭役，总计而分拨之，擘画精悉。邑《志》自明神宗后久失搜缉，擢士续纂成帙。新学宫，平狱讼，未期年，百废皆兴。

梁凤翔 字梧斋，陕西咸宁进士。初至孝感，即建衙署、兴书院、设义仓、义学、修桥梁、邑乘。邑苦土瘠，粮讹税匿。凤翔力请澄清，不避寒暑，履亩勘丈，户清赋定，积弊尽除，可垂永久。

李成纪 辽东籍商河人。以御史谪黄陂县，亟修举废坠，遇事敢为，人皆敬惮。

论曰：比户可封，太和在宇宙间，谓非斯民厚幸欤？而时有污隆，俗有美恶，民有醇器，化有迟速，熙熙然一道同风，良匪易事也。故画疆而治，不独各君其国，有土辟野治、道弗涂荒之异，即随牒推移，得一郡一邑而抚恤之，弦歌闻于境上，保障倚于域中，明珠还浦而来，猛兽渡河而去，莫不民物交畅，颂神君之奏绩。然则一人敷治，一方之民命悬其手焉。彼才难御患，政教无奇，徒蒿目于颠连之无告，亦殊乖刍牧初心矣。历观莅汉诸名贤，率皆风裁峻整，慈惠宅心，变杨球、张俭之先声，布召树、郇膏之雅化，登于简册，蔼然有和平振厉之气象焉。后有采风观化者，慎勿谓古今人不相及也。



《汉阳府志》卷之三十三 人物〔四〕

《乡贤志》序

乡贤崇祀，俎豆馨香之奉，得附于大圣人宫墙，典綦隆矣。自古在昔，先民有作，维桑与梓，必恭敬止，百世而下，方且闻风兴起，仰德里于太丘，溯仁乡于郑氏，岂徒事具文而以示尊优乎哉？

作《乡贤志》。

乡贤志

汉阳县

明

戴景文 字希敬。以《易》魁洪武癸酉乡试。明年，次乙榜。授舞阳教谕，人材多所造就。擢宁府伴读，以辅导自任。后弃官归，隐居数十年，授徒自给，有古人风。景文初从外家罗姓，至四世孙金始奉复本姓。□□时从祀。

戴金 字纯夫。正德甲戌进士，授苏州府推官，嘉靖初擢监察御史。丰裁凝峻，独立敢言。五年，巡视两淮盐政，条奏十余事，请通盐法，以资民用，得羡金六十余万佐边饷。出按四川，值滇南安铨作乱，会兵讨平之。芒部陇氏以争承袭不明，廷议剿设流官，其酋陇政等遂叛，滇蜀皆扰。金条议筹芒七事，皆蒙允行，遂以抚定。寻升南太仆少卿，尹应天，入为大理卿，兼副都御史，巡抚四川。岁大饥，请发帑金二十万赈之，蜀民赖以全活。已复召为都御史。明年，晋兵部尚书，兼督团营。是时北边告警，金陈备边十二议，曰：别武材、稽分领、实缺伍、选民兵、修战车、慎养马、备关隘、重墩台、谨盘诘、处降人、募死士、练土兵，悉命酌行。又奏请畿辅严团练之兵，荆密亟缮筑之御，皆见施行。立朝未久，言者忌而攻之，乃乞归，旋以疾卒。诏赐祭葬。□□时从祀乡贤。

金熟于典故，当事明晰，所著有《三难轩集》、《使蜀》、《海防》等稿，《江





西诗纪》、《棘署余闻》藏于家，曾孙自成崇祯辛未进士。

傅 桂 字汝芳。正德甲戌进士。令陈留，招集流亡，复藩府侵渔民业，尤留心役法，县以大治。擢云南道御史，核储关陕，躬履塞垣，巡按滇南，督察官吏，全活冤狱。武宗南巡，三上疏谏，不报。世宗时，上疏陈大计者六，台端重之，未得尽展其能而卒。□□时从祀。

朱 衣 字子宜。生有俊才，与弟表、里、襄、裘擅名江汉间。中正德庚辰进士，授江南道御史。清戎江北，值大饥，人相食，以便宜发粟赈济，全活甚多。督学京畿，最称得人。世宗初，以争大礼忤张璁，藉妖人李福达之狱，遂罢归。家居二十年，廷臣交章荐之，卒不复召用。衣持躬淳洁，笃于孝友，尤工诗文，修郡志，极为典则，惜皆残缺，存者仅钞本数编而已。□□时从祀。

李 简 字惟贤。正德庚午举人。任巴县知县，卓有循声。家世清白，□□时与父太和令茆同祀乡贤。

伍 伟 字良臣。少工文，弱冠举于乡，教授建宁，未竟其用以卒。伟学行，为乡人所师，朱宠、曾廷芝皆执经出其门下。□□时从祀。

彭楚豪 字彦卿。正德间以明经历官知州。品谊端凝，蕴藉弘雅。归田三十余年，安贫力学，至老不衰，年九十一卒。后从祀乡贤。

朱 宠 字德承。嘉靖甲辰进士，令海门。清白自矢，时豪贵多暴横，民苦之。宠强立不避，有虐民者，即置之法，自是皆敛迹。在邑课桑麻，兴学校，杜吏胥之奸，革里甲之滥，海门大治，报最，擢监察御史。严嵩柄政，慨然欲劾其奸，疏未上，而父艰闻。居乡杜门却扫，与甌山张绪讲学，家贫，至粮绝不问。疾革，藩司阴馈金五百为殓具，坚却之。其操尚如此。宠与前御史衣并以品望标重，时人目衣曰东朱，宠曰西朱，而称其号曰别山、汉水两先生焉。□□时并从祀。

王 秩 字伯庸。父教为甘州经历，梦鹤而生秩。弱冠举嘉靖癸卯乡试，甲辰成进士。初知天长县，丁内艰，起补婺源县。洁己爱民，莫敢干以私。寻擢户部主事，改吏部，历四司员外郎中。剔除蠹政，延访人才。乙未分校礼闱，所得士咸为名臣。迁太常少卿，以忤严嵩，出为河东副使，因拂衣归。神宗时，特召巡抚江西。柄政者锐意罗织，秩辞以疾，里居三十年，时论高之，万历末从祀。

蔡 结 字国凝。嘉靖癸丑进士。初令东乡，调临海。严明果断，二邑皆建祠尸祝之。擢江西道御史，巡按广东，荡涤大憝，海南晏然。历任藩臬，以卓异荐升陕西，行太仆寺卿。□□时从祀。

曾廷芝 字子先。嘉靖癸丑进士。令昌邑，擢工科给事中。奏修河防，议



增屯田水利，悉蒙嘉纳。时陕西宣府两大僚于赈饥多所侵渔，权相庇之。廷芝独不承意旨，奋疏劾奏，遂出为浙江佥事，谢病归。年八十有五，乃卒。□□时从祀乡贤。子文彦，历官光禄寺卿。

萧良有 字以占，号汉冲。生而颖异，以神童名。年十五，中嘉靖甲子乡试。与弟良誉游南雍，祭酒许文穆国奇其文。一时名士，咸与纳交，两萧之名，遂噪海内。

万历庚辰，会试第一，殿试第二，适以内艰归，起补编修，晋修撰，充经筵日讲官。时争以攻江陵为事，良有独持之曰：“江陵非奸相，稍恃权而骄耳。今反其秕政，收其废贤足矣，奈何令圣主有辱大臣老母孀子名哉！”许文穆深是其言，上疏止攻者，而攻者益侧目良有矣。建储议起，上言政府，谓当力请册立之期，与主上定成约，以为社稷计，得则留，不得则去，毋负公论而履危机。王锡爵再相，主并封三王之议。良有上疏固争，事得寝。

历迁国子监祭酒，杜干请、严考课，六馆凛凛向风。戊子、甲午，典试燕、浙，丙戌、己丑，分校礼闱，所得士后皆为名臣。

在史局十余年，负公辅之望。凡阁省有关国家大计者，靡不咨询。性伉直，于时政多所指摘，佥人忌之，遂乞终养归，八年卒，天下皆以未竟其用为惜。

天启初，以讲幄功赠礼部右侍郎，赐祭葬，从祀乡贤。

萧良誉 字以孚，号汉颖。与兄良有并以文章著。万历庚辰，同登进士，授户部主事，历官郎中，出知宁国府，以公廉自誓，在郡四年，无敢以私谒请者。每与同僚讲学于敬亭，一时彬然，号宛陵邹鲁。升河南提学副使，再补广西，务以正学迪士，士皆向风。后调河南参政，丁外艰归。卒年仅四十七。操尚磊落，尤负知人之鉴，尝拔汤宾尹于诸生中。每语人曰：汤生文脉似家伯兄，异日名第定相当也。后果如其言。所著有《过庭代对录》。天启中，从祀乡贤。

李炼 字东泉。太常宗鲁之父。性倜傥，好节侠，济贫周乏，家中落弗恤，居恒不喜近贵人，贤士大夫皆礼敬之。以子宗鲁贵，赠如其官。

李宗鲁 字学仲。万历癸酉魁乡试，甲戌成进士，授中书舍人。居恒以名节为己任，在中秘五年，国家诸大典无不习练，而于九边事尤精，朝士指为武库，言典故者皆咨之。擢兵科给事中，考察军政，执法无所徇。出为台绍佥事，会浙兵变，宗鲁多方定乱，忌者反中之，调广西兵备，遂致仕归。创义田，置塾学，赈贫乏，抚弟与友之孤，使皆成立，里中至今能道之。天启中，与父炼并从祀乡贤。子若愚。





李若愚 字愚公。万历己未进士。授温州推官，多所平反。卓异赴考选，媚珰者指为杨涟死友，署下考，降常州教授。庄烈帝践祚，擢礼部员外，因天旱陈言，请诛奄党许显纯等，以慰忠魂。调掌武选，出为江西参政。时流寇蔓延，多保障功。未几，遽请告归。任司李时，分校浙闱，典试粤西。乙亥，主江西拔贡试，皆称得人。子应橘。

李应橘 字敬仲。由明经选授中书。祖宗鲁曾居此职，以故熟谙典章，辑逊国遗事，补外史所未修。历任三载，旋解官归里，著述自娱。卒，以子昌祚贵，赠中宪大夫、大理寺少卿。康熙中，与父若愚俱从祀。

常道立 字五嶷。万历庚戌进士。除青阳令，调祁门，皆清慎明允。丁内艰，起知固始，报最，升吏部稽勋司，调文选。时铨政多滥，锐意澄清，忤权贵，左迁南直别驾，晋温处道，革陋弊，御倭寇，诸郡服其神明。转海宁副使，甫莅任，卒。□□时从祀。

王维祐 字培梧。万历己卯中乡试。任凤翔推官，沉冤坐大辟者十余案，皆赖平反。以卓异荐升云南石屏州牧。尝捐俸偿民租，苗顽梗化者胥格。迁汾州郡丞。旋擢安顺军民府知府，莅任数月，解组归。卒，□□中从祀。

吴嘉谟 字绩可。万历丁未进士。授新建令，邑故盗藪，嘉谟至，擒其渠魁，置于法，余党悉散。戊申大浸，请赈请蠲，又请改折，复筑长丰圩堤以捍水。擢户部主事，太仓宿弊尽除。由郎中出为扬州知府，以病归。卒，□□时从祀。子守中，黄安教谕。

谢 烛 字斗南。性笃孝，亲没，庐于墓所，风雪不避。万历戊午，以明经授江油令。时奢酋作乱，烛修城埤，严守御。一夕彰明，火光四起，离县仅十余里，众谓城且危，士女奔窜。烛捧印端坐，诘朝无事，还者各相感泣，其镇定如此。贼平，告归林下，十三年卒。崇祯时从祀。

张士彦 字恢浩。性孝友，尝置义田，延塾师，以仁其族。明末，驿苦于抚兵。彦鬻产置马以应之。流寇起，修水陆二岩，俾乡里得保其妻孥。以子三异贵，赠中宪大夫。

国朝

吴有成 字大初。其先新安人，父仲依外氏，遂占籍汉阳。有成天性孝友，赡族睦邻多隐德。万历间，中官陈奉督楚矿税急，有成寓书其幕客，多所保全。以孙正治贵，赠通议大夫、刑部右侍郎。康熙中从祀。



江 浩 字肖峰。幼失怙，事母以孝称。有汪姓寄金三百两，远出，十余载始归，仍以原封付之，正浩家焚毁无余时也。明末荒歉，捐资施赈，全活甚多。以子殷道贵，赠中议大夫。孙繁贵，赠光禄大夫、太常寺卿。康熙二十八年从祀。

江殷道 字九同。顺治戊戌进士，除高州府推官，迁苏州府督粮同知，以卓异升九江守，晋分巡饶九南副使。筹策转饷无匮，省民船、蠲屯粮，兴学课士，保障浔南，多善政，升本省按察司，未任，卒。其守江州时，纂修郡志，最为典核。以子繁贵，赠光禄大夫、太常寺卿。康熙二十八年，从祀。子繁、藻、芑、莪俱登仕籍。

张仲璜 字半玉，号别麓。由廩贡选中书舍人，改授梧州司马。性孝友仁恕，同祖之从兄弟十七人已各畀腴田三十余亩，以佐膏火。内有以田出售者，复出资赎田与之。每岁底，潜以银米给其疏远之贫乏者，至苦节贞操，则更加笃摯。署府篆，有大蓉山巨盗一案，密擒渠魁，全活甚众，民赖以安。彼地绅士莫若勋等开列事迹，呈请崇祀名宦。其学问渊博，造就乡邦后进者不少。所作诗文有《焚余草》、《树玉堂集》、《廿一史弹词注》等书行于世。至如捐金以倡修邑学，岁侵而出粟赈饥，更其常矣。乾隆十一年，崇祀乡贤。

按：旧《志》载汉黄香、黄琼、黄琬，陈徐度、徐敬成，以其皆安陆人，而汉阳古安陆地也。不知郡虽先为安陆地，而安陆县治，考汉晋《地理志》，俱在古陪尾山，乃今德安府治。至五代周、陈时，安陆、甑山、沌阳各自立县，其不得扃揅无疑矣。

汉川县

元

黄元吉 字文卿。有德行，文章教授乡里。

明

卜仲铭 字仲达。洪武初，以耆民授本县知县，有善政，闻于时。

何 英 掌教肃宁，文风丕振。

陈 杰 字彦卿。洪武庚午举人，授户部主事，升吏部验封司员外。永乐五年，调北吏部员外，历江西右参议。性明敏耿介，历任勤劳，皆有治绩。

龙 章 字天宠。正德庚午举人，历鄢陵知县，通判广州。子襄，万历乙酉举于乡，初令垫江，调太昌，升新化州知州。父子历官，俱有惠政，居乡以





德行见称。

张绪 字文纶。嘉靖庚子举人。志意高远，毅然以正学自任。从邹守益、耿定向游，二公器重之。时江陵柄国，绪与同榜不少屈。尝责以伊、周大业，至相逆弗顾。历官南吏部员外，与天台、近溪、见罗辈讲学不辍。当路忌之，谪繁昌谕，移令德阳。甫一载，告归，教授生徒，萧然四壁，学者称之曰“甌山先生”。焦太史竑为志其墓。

王道直 字履之。天启壬戌进士，授保定推官。郡守欲立魏珪生祠，直持不可。擢监察御史，巡按江南。陛辞日，疏逆党霍维华等巧借边材，阴图翻案，宜严邪正之防，厘剥复之介，以安国家。时苏、松被水，请停织造，及减折色条编十之五，悉见嘉纳。晋都察院右副都御史，提督操江。时流寇数十部自豫楚来窥凤阳、瞰金陵、犯安庐，直励将士，分据采石、小孤诸要害，屡拒却之。召拜兵部右侍郎，书名御屏、列枚卜，而卒沮于权幸。遂谢病归。父母继逝，素冠终其身，寻卒。

国朝

龙裳 字载吾。少工文，贡入太学。邑旧苦赋重，裳倡义请于当事，得从减。他如捐修儒学及万魁台阁，赈饥掩骼，乡里推为长者。子纳箴、纳铭，俱成进士。以子贵，赠奉直大夫。

顾应历 邑庠生，种学绩文，尝手一编。亲没，庐墓终丧。尽推腴产于兄弟，而取其瘠薄者，时论多之。子如华，另有传。

龙纳铭 顺治丁亥进士，历任户部山西司郎中，出守贵阳，升分巡副使道，多惠政。

按：周少保嘉谟、王都宪道直，皆前明社稷重臣，今王都宪于康熙十四年置主入祠，而周少保竟不预俎豆之列，殊为阙典。又张甌山绪祀汉阳府庠，而汉川本邑竟无名，亦为阙略。今依新《通志》改正。

黄陂县

元

管如德 任江州都统制，能一手挽两弓。世祖南侵，如德先登陷阵，以功迁浙西宣慰使。上时政五条，累迁江西行省左丞，招降广东盗钟明亮。卒封平昌郡公，谥武襄。弘治间崇祀。



明

丁普郎 详《忠臣志》，洪武间崇祀。

万 钧 学识纯正，邑人称曰“万五经”。洪武初，召入史馆，上亲试《古研铭》，称旨，赐御酒。弘治间崇祀。

陈 宽 性孝友，俶傥相然诺，事父母竭力致养，岁入廩饩不私，学使优奖之。居家不愧屋漏。为司训，以朴茂先。邑人矜式，谓之陈邑博。弘治间崇祀。

王 韡 永乐甲午举人。少失怙，事母以孝闻。母卒，韡庐墓侧终制，不赴公车。有司敦迫，乃起，授户部主事。廉干著声，后督浙江储赋，清查盐灶，克殫厥职，寻卒于官。弘治间崇祀。

邓 鉴 详《忠臣志》，弘治间崇祀。

汪 颢 详《忠臣志》，弘治间崇祀。

熊 弘 少聪慧，十岁善属文，博涉文典，醇厚自持。守晋宁，劝农桑，多惠政，士民尸祝之。坚志告归，不入城市，徜徉山水间，好修饰名检，终其身无滋垢。弘治间崇祀。

徐尚彝 邑诸生。性质纯笃，尝私志“某日某事背理，当改”，“某日与某语，涉欺，当自责”。人目为迂，彝自若。尝鬻田为弟偿债，以余值分族人。弟鬻己田，召与欢饮不言。其友爱如此。家故饶，以好施而贫，至授徒自给，又不屑锱铢修脯，竟以穷老。嘉靖间崇祀。

杜 时 贡生。任扬州通判，咸以清、慎、勤称之。会岁大饥，部使者檄令赈济，时多所措置，全活甚众。后以疾予告，父老涕泣遮留，建祠尸祀焉。嘉靖间崇祀。

彭凤采 弘治己酉举人。淹贯群书，喜事吟咏。令巴县，有惠政，能折疑狱。内召为御史，卒于官。嘉靖间崇祀。

蔡 完 嘉靖丙辰进士。令兰溪，洁己爱民，以贤能征，百姓乞留不得。补御史，有直声，卒于京，囊中仅存匹紵，贫无以殓。耿御史、郑寺正为之经纪其丧，槨乃得〔归〕^①。万历甲辰崇祀。

郑 佶 嘉靖庚戌进士。两任县令，迁大理评事。给谏吴时来、主事董传策疏击严嵩，下狱。或讽佶予之以死，佶曰：“杀鲠臣以媚权幸，谓平何！”二君故得保全。出守云南，绳沐国以藩臣礼，谪判通州。征缮御倭，有俘获功，得赐金，再守寻甸，平叛酋安詮，南中大患遂解。佶历两郡，月俸悉分给族党，

^① “得”下，当脱“归”字。





家无长物。然佶所至，咸为立庙，称名宦云。万历癸未崇祀。

李悦洪 陕右人。以祖文秀任蕲州学正，因籍陂邑。悦洪文行兼优，以子诚贵，诰封奉直大夫。

李 诚 弘治丙辰进士。授户部主事，迁员外郎，出守永平，随推副使，直节立朝，不阿逆瑾，罢归。瑾诛，起广东布政司左参政。卒，以有边功，赐祭葬。万历间，与父悦洪俱从祀。

方一凤 字丹山。雅志问学，皇皇求友，足迹几遍海内，老且不衰。学者称其有风德，故号丹山。而罗文恭匾其堂曰“览德”。家居以树人善俗为己任，邑人士就正，教以切己自反、迁善改过之功。寻李见罗抚郿，为筑室于二程祠右，颜曰“丹山止水”。万历间崇祀。

王 霁 嘉靖辛丑进士。令吉水时，朝廷行方田法，时与罗文恭筹划得宜，民以不厉。补户曹，擢守保宁。采木令下，调护夫役，无扰。尝弭巨盗，多惠政。观察云南，戢黔国之横，解黎副使、林参议之狱，皆见经济。寻以太仆致政归。手一编，绝不言时事。罗文恭颜其堂曰“清白”。万历间崇祀。

任维贤 字功懋。嘉靖庚子举人。三为邑令，解归，贫甚。与耿恭简定向讲性命之学。耿尝过从，见其四壁萧然，布袍芒履，与二三门人咏歌论道，自朝至日昃，菜根麦饭。出语人曰：“功懋，今之原宪也”。著有《五经解》藏于家。万历间崇祀。

张天爵 详《孝子志》，万历乙卯崇祀。

张 涛 字元裕。万历丙戌进士。令富顺，以异等征入谏垣。诣阙上书，语侵政府，疏列储教宜先劾大司马及两经略奸欺状，又指斥大珰不法事，忤旨谪海外十五年。及储位定，召诸言事臣。起歙令，历户部郎，督饷宣大，疏边腹利害甚悉，神宗嘉纳。转光禄大理寺丞，巡抚辽东，丁艰归。卒，止遗一女。崇祯间崇祀。

黄云合 字时辟。以明经历任泰顺训导、瑞安教谕。却寒士贽，兴复初书院，与诸生讲伊、洛之学。后署柘城令，值岁荒，停征止讼。转鳌山卫，拂衣归，行李萧然，惟敝篋而已。以子彦士诰封御史。崇祯间崇祀。

黄彦士 字抑美。万历甲辰进士。初授行人，不通权要，迁御史，即条上十事，废茶马，劾权珰之横，参总宪之党，举朝咋舌。至于裁滥免、缉客兵、止汴米、募丁壮、殄土豪张万儿，名震京师。会孝定太后崩，赞神宗行三年丧，上是之，曰：“黄御史，真君子。”后按茶马陕蜀，革弊除奸。光宗践祚，复条陈十事，俱切中时



务。后按河南，见潞藩税监苛横，杖其渠数人，立撤税监，以租付有司，奏按强豪不少贯，卒以抗直左迁。归作甘露书院于程祠旁，日与其弟奇士讲求理学。崇祯间崇祀。

黄奇士 字守拙。幼颖悟，年十八，中万历甲子乡试。学于耿恭简，与兄彦士共相切磨。授寿州学正，设四科教士，首德行，次经济，三制义，四诗赋。迁南雍移户部司务。生平如聘死友遗女，还孤儿原金，及募兵寿春，修江北诸郡邑志，皆不愧所学云。崇祯间崇祀。子墀，壬午孝廉。

张大猷 字允升。九岁即善属文，万历乙未成进士。初令徐闻，调香山，试士得何如宠，延至署中数载，饮食教诲，且捐俸而为择配焉。升户部郎中，出守广平，累迁山西布政。历官四十余年，政事文章，卓然可纪。年八十四卒，祀乡贤。

吴子荣 字华轩。居白龙山阳，赋诗课子，不出户庭三十余年。素履端方，终身无遗行。崇祯间崇祀。子之皞。

吴之皞 字北阳。万历甲辰进士，授霍山令。邑荒僻，无科第，且民苦茶税，多逃散。乃请蠲税三之一，招集流亡，借存留岁额，给牛种垦荒，又请免逋赋之半，劝农课士，作《九经解》训之，士始有捷者。擢侍御，按蜀，探知奢酋欲变，疏其状，与督抚密谋御变，增城堞，修战具，饬将士，扼险要。已而奢酋叛，郡邑赖以全。升大理寺少卿，抗疏劾魏忠贤，罢归。崇祯初起用，寻卒，赠中宪大夫，崇祀。

张国勋 详《忠臣志》，崇祯十二年崇祀。

邓光舒 字葆之。万历丙午举人，授光山谕，升国子监博士，迁大理寺评事，历广南守。广郡荒远，土司普名声拥兵不逊，光舒驰檄谕之，立解。幼曾嗣于伯父，年七十六，举一子，光舒抚循教诲，既长，悉将遗产授之，其友爱如此。崇祯间崇祀。

国朝

王默 字贵一。由孝廉授凤翔府太守。祖于陂，生长于燕，素喜活人，即市中见鱼鳖虫鸟，亦以金钱脱之。子尔禄，举进士，放榜之夕，环堵闻有螺虫唧唧声，数日不散。渡蚁饲雀，报应不爽，推不忍之心，而仁不可胜用。君子不可以事近二氏，反靳之而莫为也。顺治间崇祀。

王尔禄 字天锡。先世本贯黄陂，因运粮流寓都门，以清源籍，成癸未进士。来任三楚湖北学道，衡文称得人。公父贵一，未及寻宗而卒。顺治丙戌，公督学将四年，乃访确陂族王胜系公嫡支，遂聚族捐俸，置田数十亩，以供岁享而去。





后官历太常卿、兵部侍郎。公生平戇直，好读难字古书，重刻《迪吉录》以劝世，赈贫济困，戒杀放生，其家训与生性然也。后以寿终于京师，陂人士思□□崇祀乡贤。仲子情，袭荫贡。

胡天起 字仰文。少慕宋儒之学，不竞时名。尝倾储贍里戚之贫不能婚葬者，列馆授徒，为乡里重。敬三兄如父，教九侄如子。子明垣，顺治己丑进士。康熙五年崇祀。

陈家栋 字巨任。事父母以孝闻。初游京师，杨涟死于瑯，栋为收殓，不避权幸，内外壮之。寻以上舍授建宁尉，迁平乐，有治声。康熙五年崇祀。子世昌，历官江南都督同知。

陈寿 字龙伯。幼聪颖，五岁读书成诵，九岁诵《纲鉴》，尤嗜诗。居父丧，不离柩所。雅负经济才，经略卢公延至幕中，时为出奇计，俘贼多人。及归，与邑令画策，戡叛除奸，多于寿是赖。又捐资置谷，安集流亡，里人德之。康熙五年崇祀。

谭德化 字君明。少攻举子业，性笃孝，父病危，尝粪为验。兄诬讼，以身代系，力白得脱。生平以救患扶危为己任。明末为流贼所执，骂不绝口，遂遇害。康熙五年崇祀。子忠义，顺治己亥进士。

李元萃 字潏水。天启辛酉举人，授户部主事。时巨寇啸聚梁山，运河梗塞。诏简干员督济。元萃单骑入贼营，谕以大义，因表贼情，条方略讨平之。擢天津粮道，疏奏粮运诸弊，皆议行之。迁薊辽监军右参议。及逆闯陷京师，孤军袭战，病创归里。入本朝，辟授建宁兵备道，寻告休卒。□□时崇祀。

罗明谕 字符枢。由明经授应山训，置学田以赈单寒，设斋课士，文风丕变。迁零陵教谕，值镇兵叛，明谕率绅士守城，独当贼巨炮处，曰：“此吾汛地，无所逃死。”手发佛郎机杀贼，凡三昼夜，贼窘乞降，举城获全。□□间崇祀。

姚承恩 字淮滨。性敏嗜学，幼失怙，哀毁骨立。事孀母数十年，敬养备至，贍族里，还逋券，岁饥施粥，存活无算。有受诬系狱者，（受）〔承〕恩力为解救^①，口不言德。晚年尤究心理学，孜孜不倦。康熙五年崇祀。子缔虞。

姚缔虞 字历升。顺治己亥进士，初任成都府推官，谳狱平允，辨冤，抑数十案。改令安化，捐俸代输逋赋。擢礼科给事中，戊午典试江西还，奏请蠲逋赋百万有奇。转工科给事中，因地震，请开言官风闻之禁，诏宣付史馆。晋

①“受恩”，据此传主“姚承恩”及上下文，当为“承恩”。



左佾都御史，巡抚四川，请免运楠木及白蜡诸杂税。刚凝清介，禁绝苞苴，属吏莫不凜然。卒于官。赐祭葬。康熙□□年崇祀。

按：黄、孝两邑乡贤，参之新旧《通志》，多不合，但诸人崇祀年月，细考邑乘，凿然足据，未可从略。今悉照县《志》一一登载。

孝感县

汉

董 永 详《孝子志》。

明

周 梅 洪武初，举卓行，历官福建按察司佾事。性简朴，勤于民事，冰蘖之操，始终不渝。

鲁 仁 洪武初，以笃行征授西河主簿，报最，升本县县丞，致仕。

唐 宗 洪武中岁贡，历官江西布政司参议。廉明平恕，尝督税却属吏金。致仕，家无赢余。御史徐瑛造其庐，湫隘不容。驺从属邑令广之，宗力辞。其孤介如此。

黎 灏 宣德中举贤良方正，授嘉定州知州。秩满，父老乞留，诏复任，九年致仕。

陈 鼎 天顺时岁贡，司训南丰，迁射洪教谕。课士一本经术，由是士风丕变，皆称其得苏湖遗法云。

王 琰 字廷用。成化甲辰进士，授户部主事。时寿宁侯夺河间民田，琰奉命往勘，以田归民，戚畹侧目。擢守临洮，历山西左布政，运饷馈军，颇著劳绩。后忤刘瑾，免官。瑾败，起都御史，未任，卒。

严 正 字廷瑞。成化丁未进士，授大理寺评事。时白莲教狱起，坐论死者甚众，正独议置首事于法，而释其胁附者，全活无算。擢卫辉知府，性仁厚，为政平易，不尚苛刻，九载引年去。官民建祠祀之。

吴 渊 成化庚子举人。通判常州，不避权贵，致豪民逋赋者于法，郡中大猾皆敛迹，奉约束。后权贵人挤之，竟拂衣归。尚书白圭赠之诗曰：“良才佐郡元无忝，直道于今自不容”。其节介可知矣。

刘 奎 字文瑞。弘治辛酉举人，授庐州府同知，摄邳州事。时武宗南巡，江彬恃宠弄权。奎屹然不少屈，彬衔之，调永宁。卒之日，家贫，几不能葬。





张文迪 字德敷。少失怙，事母以孝闻。弘治甲午举于乡，知威州。岁饥，赈恤有法，流民趋归之。迁永宁同知，时凤诏文作乱，迪奉檄率蛮兵讨平之。以念母老，弃官归，年才强仕。母卒，哀毁尽礼，乡人称焉。

童纶 字逢吉。正德辛未进士，令富顺，清慎精敏，士民德之。

程学博 字近约。嘉靖乙未进士，授工部虞衡司主事，擢守重庆，清严刚直，案无留牍。再守兖州，晋淮扬兵备，调贵州参议。时东川乌蒙为患，谕以利害，皆心慑散志。迁云南兵备，下直诸寨作乱，遣谍入其营，购贼内应，出师夹攻之，三日，擒贼首八人，降二百余人。擢行太仆寺卿。致政归。

汤奎 字文象。嘉靖中贡士。为人坦直和易，贫居教授，游其门者多经明行修之士。

刘伯生 字大鹤。嘉靖乙丑进士。知上蔡县，升南吏部主事，以病乞归。学益进，著有《易属》、《素言》、《烟霞》诸集，弟伯燮。

刘伯燮 字小鹤。嘉靖乙卯解元，隆庆戊辰成进士。授口科给事中。峭直敢言，劾兵尚郭乾，荐前侍郎万太、都御史张景贤等有异才可用。又疏故督臣曾铣、胡宗宪死于非罪，宜加恤录。并报可。外转广东按察使，以母老不赴。

刘应遇 字玉庸。万历辛卯举人。令永宁，邑号难治，应遇辟荒兴学，更善发奸摘伏，民吏惮之。调灵宝令，定矿贼之乱。入为锦衣卫经历，历户部郎中，补商雒道副使。白水盗起，饥民多附之。应遇檄郡县开仓赈济，饥民获安，盗首自缚请降。庚午，晋右佥都御史，巡抚甘肃，赏罚明信，边境以宁。上边防七策，报允。崇祯四年辛未正月，病卒于官。赠右都御史，荫其孙兴宗，赐祭葬。

傅伟 字梦合。由选贡授浙江新昌令，洁己爱民，甫三月，即慨然曰：“吾子已宦成，何必恋五斗米，令陶公笑我乎？”遂解组归。子淑训。

傅淑训 字启昧。万历辛丑进士，授濮州知州。濮多巨寇，训以计擒之，境赖以安。调泽州，转工部员外，出守平阳，多善政。举卓异第一，擢山西驿传道副使，旋改督学，迁商雒参政，以病归。起兵备安徽，召为太仆少卿，坐杨涟戚党削籍。崇祯初，召补顺天府尹，累迁户部侍郎。请终养旋里。复起，督南北直隶及各省剿饷。旋丁内艰，服阕，以右都御史管兵部左侍郎事，改户部尚书，致仕。子二：如圭，如金。

程註 字尔雅。万历庚戌进士，授行人，考选给事中。疏论客、魏袭锦衣世职，引祖制以裁之，不报。时同文狱起，削籍，当差。崇祯初，起大理少卿，累官户部仓场侍郎，晋南工部尚书。告归，家无长物，皆叹其清节。



程良筹 详《忠臣志》。

鲁伯溶 万历庚子举人，授钜县令。钜称难治，时有权要人挠其法，遂拂衣归。伯溶少嗜学，文章、经济，推重一时，未展夙抱，论者惜之。孙鉴。

鲁 鉴 字冰长。崇祯甲戌进士，授应天教授，迁国子助教，升礼部员外郎。厘正藩体及棘围诸弊，出为云南督学，端士习，正文体，声望翕然。报满，升太仆寺卿，旋告归。

胡其俊 字朴生。万历丙辰进士。初令永清，调固安，皆有惠政。擢山西道御史，遇事敢言，忤阮大铖，出为陕西按察使。

夏时亨 字孟嘉。天启壬戌进士，授户部主事，升郎中，督饷延宁，力主兴屯田。出守兴化，时当覃恩大赉，亲领给、核虚伍，扣存羨金，充抵京运。升河南右参政，督粮储，革委员买粮诸弊。转四川副使，升本省参政，兼摄臬篆。适流寇由兴安分路入川，亨扼要害，缮守战，出奇应变，俘获甚多。寻病归。同程良筹树寨白云山，捍御闯贼。卒年七十有五。子焯，岁贡生。

黄汉明 详《笃行志》。

程道寿 详《忠臣志》。

邓 谦 详《忠臣志》。

熊祚延 字祈公。邑庠生，少嗜学，著《希曾录》以自励，尤究心时务，乡人多倚重。时流寇甚炽，祚延诣当事，上剿抚二议，不用。因挈家避乱白云山，纠集乡勇，申禁约，整器械，贼甚惮之。后贼众袭至，为里中无赖子所卖，遂被执，不屈而死。以子赐履、赐瓚贵，赠如其官。

程学庸 字近道。由孝廉授青城教谕，迁荣泽令，罢归。嗜学不辍。卒后，京山李维桢志其墓。

彭大寿 详《文苑志》。

程学古 字太初。前母兄学曾性至孝，其母周常虐之。学古每泣谏，母感悟，遂待学曾如所生。以恩选授夹江令，升宁国通判，皆有善政，两地祀之名宦。

程大皋 贡生。孝友敦族。族子中有沦落者，皋多为治产授室，闾党间恒倚重之。

池国鼎 八岁值寇乱，祖母王年八十不能行，家人悉奔散。贼至，鼎以身障王。贼劫以刃，伤首，不为动。贼义而释之。后由明经授蒲城令，闻母丧，哀毁卒。

屠宇镇 详《笃行志》。





国朝

黄文旦 详《文苑志》。

丁之鸿 详《文苑志》。

沈惟炳 字炎洲。万历丙辰进士，授香河令，考选刑科给事中。会红丸、移宫二案下廷议，朝士有谋为李选侍翻案者，炳疏争甚力，诸奄党借熊廷弼株连楚人。炳再疏切言之。珰逡卒遍京邑，矫驾帖置立枷。炳疏入，熹宗面斥忠贤，立枷之法始废。转吏科，以争魏大中、夏嘉遇等不应镌级，触忠贤怒，遂降级调外。杨忠烈涟被逮，惟炳跨一驴往送。涟考死，鬻产以贍其母。被劾削籍。崇祯初，起刑科右给事，累迁吏部左侍郎。顺治初，仍以左侍郎掌部事，寻谢政归。子宜，镇江推官；寅，广昌知县；宽，香河知县；完，邑名诸生。

李作楹 字盈公。崇祯庚午举人。天性孝友，刻励行义，时称为真孝廉。顺治初，巡方使遵例举荐，授太仓州知州。为政廉明，迁建昌同知，未几，告归。子皇诏，分巡建昌道。

程良孺 字稚修。崇祯选贡。授行唐令，历户部主事，管凤阳仓。后以献贼犯凤陵，解任回籍。顺治初，起户部员外郎，榷关浒墅，卒于任。子正揆、正撰。

程正揆 字端伯，号青溪。崇祯辛未进士。选庶常，授编修，充经筵日讲官，历行人司正、尚宝寺卿。入本朝，顺治初补光禄寺丞，升少卿。典试山西，得人称盛。累官工部右侍郎。丙申，督修乾清宫，告成，赐表里名马。以继祖母忧解任，遂老林下。正揆天才俊逸，尤工书画，超绝一时，片缣尺幅，人争宝之。所著有《青溪》诸集。

程正撰 字异三。邑庠生。笃于孝友，少孤，事庶母极诚，敬如所生，事兄正揆如父，友爱尤挚。他如厚宗族，置塾师，赈饥周乏乡里，多以善行称。

严瑄 字崙玉。事亲色养备至。顺治壬辰，岁饥，设赈，所活甚多。城东濒河，捐千金筑堤，建桥置亭，暑则设茗饮行者，施棺掩骼，岁以为常。以子正矩贵，赠户部左侍郎。

严正矩 字方公。崇祯癸未进士，顺治初授嘉禾司理。鼎革之时，谳狱平允，禾人德之，奏最，升杭州守。值师旅频兴，正矩调度抚御多方，寻晋温处兵备，迁山西参议，以抚巨寇金光彩功，赐蟒服，升靖远副使。上民事四条，又请蠲安、通二邑荒粮八千余顷，皆允行。历藩臬，晋秩太常，擢户部左侍郎。跪请复楚省运漕，定天下炉局。后以原官致仕，年七十二卒。子仪，太学生；倬，工部屯田司主事。



程正言 字讷庵。邑庠生。性聪颖，读书过目不忘。家仅数椽，而族里有急，则殫力相助。其父有故人子无归，割给田宅，人咸义之。子大纯、大绪俱贡生，孙光巨，官翰林检讨。

王 试 字举公。少失怙，事母曲尽孝养。甘贫好学，寇乱，昆弟皆逃散，试售产为资，遍访得四弟一兄以归。笃于友爱，不分爨者凡四世。子大纶，进士。孙廷鸿，官翰林。

屠应守 字孰大。顺治丙戌举人，令五河，岁苦夏涝，为文祷城隍，水止不为害。癸卯，蝗不入境。邑人尸祝之。孙沂，浙江巡抚；洵，翰林。

武之亨 顺治辛丑进士，授凤翔令。兵燹后，民多流亡，加意招集，给牛种，免荒粮，邑人德之。升庆阳府同知，土贼啸聚，率众捣其巢，歼厥渠魁，已就平，而官兵至，仍欲进剿，且指百姓避贼而结寨者曰：“此皆贼也。”亨固争之，相持四月，奉檄撤兵，保全甚众。后升严州知府，历陕西学政。

程大用 贡生。兄卒，事嫂如所生，终身不少懈。康熙己未、庚申间，岁连歉，大用尽出所积，以贍乡里。

鲁大儒 字翼鲁。邑庠生。幼颖悟，力学工文。授徒江汉间，熊学士伯龙出其门。居恒以忠孝训子孙，修祠睦族，周恤贫乏，不吝施与。卒年八十有六，以子邦猷贵，赠荣禄大夫。

王大纶 见《仕迹》。

论曰：昔唐襄文顺之辞乡贤书，乡贤之祀，关闾巷万口公论。国家彰瘝大典，非势位可得而干、子孙所得而私。若可以势位干、子孙私，则鲁国之祭乡先生于社者，当太牢于三桓，而不当太牢于一栖栖伐树削迹之人矣；孔子作《春秋》以垂不朽，当大书特书叔纈之名于郑侨、吴札之上矣。故曰：称天以谏之，称天以谥之。此臣子事其君亲如天之心，而不敢以一毫之私与焉者也。襄文之论如此。夫人子之尊崇其亲者，孰不愿从祀于颍宫，而襄文顾为此说。岂以惊世骇俗哉！盖不敢轻视夫礼，正所以重待其亲，仁至义尽也。至罗吉水洪先以乡祠不伦，一日入城拜宫墙，奉其木主以归，似属过激，不可为法，然其高风介节，迥异恒流，亦于此可见焉。雍正初年，我世宗宪皇帝厘正祀典，于乡贤、名宦二者尤甄别加严，真足激浊扬清，亦以廉顽立懦，睿虑周详，超绝千古矣。





《汉阳府志》卷之三十四 人物〔五〕

《仕迹志》序

求志达道，体用一原，分显晦，不分品格也。自六卿专晋，三桓擅鲁，鲜识者沾沾以门阀自矜诩，抑知世禄之家，鲜克由礼，昔圣曾垂训焉。彼莘野耕夫，渭滨钓叟，虽胄本神明，当其孑然孤处，不过胼胝劳形，烟波对影已耳。迨乘时利见，建竖非常，究亦塞穹壤而光日月乎。纪汉阳往哲，但取其人之可贵、事之足传，初不计区区名位之崇庠也。

作《仕迹志》。

仕迹〔志〕

汉阳县

五代

王仁裕 汉阳人。唐废帝时，召令随驾，一时诏书皆出其手。汉初，充翰林承旨，兼知贡举，为兵部尚书。其所取门生王溥、和凝、范质，皆至宰相。周初，迁太子少保。所著有《紫泥集》、《西江集》、《入洛集》共八卷。仁裕喜为诗，少时曾梦人剖其肠胃，以西江水涤之。顾见江中沙石，皆为篆籀之文，由是文思日进。旧《志》遗。

宋

张〔锡〕〔锡〕 字贶之。其先京兆人，徙家汉阳。（锡）〔锡〕由进士知新州，迁太常博士。诏选能吏知畿县，以（锡）〔锡〕知东明。始至，令曰：“吾所先治者三：恃力、恃富、恃赇也。”岁终，以治绩闻，入为监察御史。丁谓贬崖州，议还内地，（锡）〔锡〕疏论之，由是徙雷州。玉清昭应宫灾，连系甚众，（锡）〔锡〕言天灾

①“锡”，为“锡”之误。



反以罪人，恐重天怒，愿修德以应之，狱遂解。后为京东转运使，淄、青诸州人冒耕河壩地，数争讼。（锡）〔锡〕籍其地，收租绢二十余万，讼亦息。屡迁龙图阁直学士，进翰林侍讲学士，判太常寺国子监。卒赠尚书工部侍郎。（锡）〔锡〕淳重清约，虽贵，奉养如少贱时。读书，老而弥笃。初举广文馆进士，考官任随以为第一。随卒，无子，屡赙其家。

胡霖 字作霖。由乡举任潭州通判。文章、政事，大著于时。

明

陈文通 洪武中，以国学生授广东道御史，考察江西、湖广、河南官僚有声，擢广东按察使。以服色违制，谪戍。后二年，起复彰德知府。建文时，靖难师南下，文通闭城抗守，文皇嘉其节，方欲召用，旋卒。裔孙：琬、玺。

陈琬 字延珍。成化丙午，与从兄玺同举于乡。初为睢州学正，迁杭州教授。性刚行洁，董士以正。玺官西充知县。

江恕 洪武中知福清县，调崇明。善判断，民不敢欺，历任台州知府。

曹体仁 洪武中以儒士官东平知州。廉能慈惠，绰有循声。

计珩 永乐中以贡历官御史。直谏忤旨罢。

张敏 永乐中为工部司务，以才望知曲靖府，远近怀服。升陕西苑马寺卿，致仕。

易东 字景暘。成化丁酉举人，选新宁教谕，性质直不苟。归田后，甘贫自守。楚平蛮镇远侯顾延训其子士隆，东于讲授外，一无干请。后士隆继父任，威名操履有古将风，东所造就也。裔孙：见龙，万历壬子举人；道沛，见后。

李世鳌 字宇载，万历壬午举人。为学本实用，江夏郭文毅雅推重之。初任□安县，以廉谨称。内署浚智井，得石覆白金盈瓮，亟掩之曰：“此非贫吏所宜有。”擢太仓州牧，州烦剧难治，豪强多鱼肉小民，有武弁倚阍宦势，夺寡嫂产，诬及帷箔，因私人属鳌，鳌佯诺。庭讯数其罪，置诸法，豪猾皆敛迹。久之，坐文毅门户罢。

解缆时，一道士附舟，从人不可，鳌纳之。行数日，盗至，不知其无有也。舟中皆惶惧失措，道士徐起，出两铍于袖，圆五寸许，系以铜索，迭为收放，烂若电光，击数人于水，余惊散。世鳌异之。道士曰：“吾公部民，感公廉，兹所以报也”。长揖竟去。

世鳌子自玉，见文学。





王 著 字本诚。嘉靖壬午举人，知南丰县，刁弊难理。著一本公勤，绝〔千〕牍^①、谢苞苴，剖决如流。巡方荐诸朝，以病归。

傅 兆 字以行。御史桂之子。由举人为梁山知县，耿介无私。纂修郡志，讨论搜采，多出其手。

蔡 几 字国成。以举人知望江县，修驻驄桥，筑西圩，量田均赋，县人永赖，为祀于名宦。几为人沉毅好古，尝辑先儒语录，题曰“守身通论”。子：三近，举人；三复，衢州知府。

王一麟 字景仁。嘉靖己酉举人，任台州同知，清戎伍、勾逃亡、兼海防、革冒破之弊，清各郡侵那数万金，请豁军徒百余人，录方孝孺后，以示风励。升镇远知府，均赋简讼，民彝帖服。卒于官。

萧 逵 字文谷。由岁贡授泰安州同知，以争利害于上官，不合，拂衣归。（常）〔尝〕两捐千金赈里中饥^②，少与甌山张绪游，深知性命之学，敦行读书，至老不倦。卒年八十有五。子良有、良誉，见《乡贤》。

萧丁泰 字吉甫。祭酒良有子，少从父读书京师，为顾宪成赏识。成万历辛丑进士，授行人，擢兵部主事，典陕西试，升郎中，转参政，备兵江阴，进山西右布政，移陕西左使。天启中，魏珰罗织清流，丁泰乃谢官归。崇祯改元，起陕西右布政使，改山西左使，再入觐，以交盘茶马事调广东右使，寻迁贵州左使。丁泰立身清苦，六任藩伯，历四省，丰财节用，支給边储，皆得要领。晚入黔省，值水西叛，与总督朱燮元调兵食、议剿抚，燮元仗之。以劳瘁卒。子彦骧。

萧彦骧 字千里。丁泰子，由拔贡考授通判。省亲于黔，朱总制燮元见之，壮其伟范雄概，以将材题授游击。从都督范廷弼讨苗仲阿秀等，计擒之。擢参将，屡立战功，加副总兵，镇守六广河，升都督僉事、贵州总兵官，挂平蛮将军印，镇守广东，未行而卒。

萧引萃 字正子。良有少子，以父荫入太学，授都察院经历，升户部郎中，出为寻甸知府。未任，降盐运通判。引萃天资俊异，名重一时，在部十年，清理钱谷旧额，吏胥莫能售其奸，乃以考功令中伤之。侍郎侯恂、李待问力争于朝，得镌级调任，卒。

卫士元 字子仁。以举人为平度、高唐二州知州，升汀州同知，服官廉正，州、

① “千”，当为“干”之误。

② “常”，当为“尝”之误。



郡称道不置。

刘体元 字调卿。幼时涉目成诵，为诸生有声。万历丙子中式，历定兴、良乡、淳安三县，皆有循声，升廉州府同知，致仕。

吴崇 字南纪。万历己卯举人，知全州，薄赋省刑，修筑北驼城有功，抚军以卓异荐，升平乐同知，卒。

王仪 字凤来。甲午举于乡，授清城知县，升兵马指挥、户部主事，历员外郎中，出为平乐知府，迁云南右参政。所至皆有声绩，归林下十年，卒。

秦聚奎 字仲默。万历辛丑进士，授绩溪知县，调吴江。故多贵族，饮、博不逞，一切以法绳之，邑中肃然。移周至，升刑部主事。辛未大计，疏参吏部侍郎王图及其子元忭，又举汤宾尹。于是尚书孙丕扬劾聚奎党附金明时，阻挠察典，勒令闲住。光宗即位，周家谟特荐，起光禄寺丞。丁内艰，服阕，起顺天府丞。逾年，升府尹。时魏忠贤假子良弼封侯开府，议毁京兆阴阳学广其居。聚奎疏言国家不惜茅土之封，臣何敢爱尺寸之土，但事关国体，臣死不敢奉诏。触忠贤怒，夺职归。后征拜光禄、太仆、太常卿，皆不赴。

王家宾 字献□。以举人知□□县，性刚介多忤。乙丑考选，当入南台。会有厄之者，出牧陕州，均粮薄敛，以卓异举。会新抚檄建魏瑄生祠。投笔不署，曰：“家宾楚人也，死无以见杨大洪于地下。”被劾归。

吴嘉谟 字绩可。成进士，授新建县令。邑故盗藪，嘉谟至，擒其渠魁置于法，余党骇散。戊申大水，买舟给诸村遍渡之，请赈、请蠲、请改折，请宽二百里长港禁，复筑长丰圩堤，以捍水。擢户部主事管太仓，宿弊尽洗。历员外郎中，出守扬州。入觐，便道归，疾卒。

吴极 字元无。万历丙辰进士，就南武学教授，历南国子助教、户部主事，转员外，除扬州知府，未任，调广南。历官清慎恬退，家居手不释卷者二十余年。

孙世恪 字贞白，万历己酉举人。究心理学，旁及天文、风角、兵律诸书。初任长沙教授，升国子监学正。时传熹宗将幸太学有期矣，世恪独曰：“帝座未移，期安可信。”已而果然。祭酒蔡毅中素爱其才，以此益奇之。杨涟劾魏忠贤疏上，毅中率世恪等并参奏。忠贤矫旨切责，毅中引疾去，世恪亦丁艰归。崇祯初，起工部主事，转南户部郎中。值寇警，郑尚书三俊集公卿僚属咨画兵事，咸唯诺，不敢发一言。世恪奋袂直前，谈论亹亹，洞古今，适机宜。三俊大悦，将荐之。以办铜为贾人所欺，罢免官，事得白，归卒。

吴可敷 字肩五。性凝重，善诗、古文词。万历壬子举于乡，除江西瑞金令。





兴学校、涤奸蠹，偿逋赈饥，决狱无死刑。莅官二载，以母忧归。

吴嘉言 字蒙若。以岁贡任台州通判，屡署本郡临海、黄岩诸篆，历著声迹。督粮山海关有功，升绍兴同知。归，里人以孝友名贤称。

龙 相 字立公。万历壬子举人，教授成都，升龙川知县。时邹凹鼻、邓豹子等负隅倡乱，泉猛难敌。相合兵设奇讨平之。邑产钩吻毒草，愚民忿斗不胜，辄采食相图。赖相悬赏募众，遍历山谷，掘去其根，多所全活。性甘澹泊，归田四十年，布袍蔬饭，不异诸生时。年近九十卒。弟柱。

龙 柱 膺恩贡，授成都训导，与乡试同考官称得士。升陆川知县，兴学育才，戢盗勤民，安抚猺獞，尤有声。

戴自成 字哲之。万历乙卯举人，铨涇阳教谕。崇祯辛未成进士，授刑部主事，历员外郎中，审录江南，人推平恕。除徽州知府，一切以安静治之。值己卯建阳军变，巡抚陈起龙委镇兵哗，劳瘁卒。

李国祚 字岷岳。性豁达，不事生产，读书观大意。万历中，以岁贡授潜江训导，升新宁知县。蜀中地僻民浇，国祚下车，清里甲、厘马政、理冤滞，奸猾震悚，民有“铁耳公”之号。后改襄府相，不就。

刘定勋 字谦甫。苦志好学，崇祯庚辰成进士，任常熟知县。常为漕运孔道，每遇岁终兑支，旗丁横肆剽然，莫敢谁何。勋按法绳之，卫弁敛迹，金解白粮，一祛从来积弊。调繁吴江，卒。

屠斯立 字仁伯。崇祯癸酉举于乡，特授北直成安知县。值岁旱，蠲粟赈饥，邑人戴德。调金陵。斯立祖籍苏州之西洞庭，表立宋南渡远祖元亮墓碑，置祭田、设义学，俾宗人主之。

宋 灏 字又素。以举人授徐闻知县，廉明公恕，恩威并行。

国朝

吴正治 字当世。顺治己丑进士，选庶吉士，历侍讲。出为江西参议，分守南昌旬月，剧盗尽平。岁暮，吏皆休沐，单骑行部，查刑狱非法淹系者，悉释去。迁陕西按察使，下车阅旧案，得一纸科罪，皆法所不宥，竟未理，意必巨慝贿谋沉搁，访之，果然，立置重典，百姓称快。寻擢工部侍郎，调刑部。康熙改元，江南诸生二百余人逋粮已完，犹逮拟监候。时汉官例不启奏，正治强满侍郎曰：“第言之，若诘责，罪当坐我。”皆得放遣。又议奉行赦款宜迟，丈量田地宜停，状外指扳宜禁，私嫁条例宜酌，均切中时政。丁外艰，服阕，补督捕侍郎，专司逃人。



立法最严，奸猾藉以肆毒，一经牵引，里井驿骚。因率同官陈请，除连坐十家之例。升都察院左都御史，奏止北直四州县增设官兵。进工部尚书，改礼部，朝贡庆赏，诸大典礼多所考定。拜武英殿大学士，值秋审讞决一重案几十人，圣祖顾问曰：“此囚尚可活乎？”咸对情实，正治独奏：“皇上一念好生，臣等敢不奉行德意。”退即细勘，得可矜状，遂从末减。丙辰甲午，主乡会试，得人称盛。应举博学宏词，以彭孙遹名上，遂首选，而实未识面也。《太祖高皇帝实录》成，以总裁官加太子太傅。后以病乞休，温旨慰留，赐予便蕃，屡疏陈请，着以原官致仕。年七十四薨。赐祭葬，谥文僖。

正治生平孝友，接物和易。历官四十年，不为崖异之行，取士荐贤，一秉虚中。子四人：宗郃，光禄寺丞，倜傥有材干，早卒；宗勋，国子监学正。

吴宗豊 吴宗翰见《文苑》 字揆俞。康熙丁丑进士，选庶吉士，改大同知县。性慈祥，不事鞭扑，尝拈“子为政，焉用杀”作制艺一通以自惕。徒步问闾阎疾苦，民与相忘，不知为长吏。升汝州知州，罣误未任。宗豊博雅好学，为文有典则。初罢，以事谒上官，语不他及，惟出怀中文稿一帙请政而出。诗亦清丽可诵，归里后，厨无宿粮，犹吟咏不辍。卒年八十有二。

熊伯龙 字次侯。九岁即补博士弟子员，顺治戊子，贡成均，乡会皆高魁，廷对第二人及第，授编修，历迁侍读学士、国子监祭酒。性孤介，砥砺名节。翱翔馆阁二十年，以文章衣被天下，精藻鉴。甲午典浙江试，所得士中，鼎甲者四人。督学顺天，官司成，多所识拔。弟仲龙以恩贡由县令历任汝宁知府。伯龙子正笏见“文学”。孙祖旋。

熊祖旋 正笏子，字方矩。中辛酉举人，为人坦率和易，授浙江义乌知县。尝差役十里外勾公事，役为暴于里甲，祖旋另遣人踪迹，得其实，俟归报命，诘其状，役惊为神，重惩之后，不敢肆虐于乡矣。他发奸弭盗多类此。居数年，致仕。

张三异 字鲁如。顺治己丑成进士，初授延长知县，岁旱蝗，施粥平余，每夕露祷，蝗不为灾。升南阳同知，旧有拐河响贼，负嵎为民害。三异请率众往剿，购乡导，由欹径入，捣其巢，渠魁就擒，胁从悉释归农。以他案镌秩解任，事白，补邵武，寻进浙江绍兴知府。三异才敏练，善折疑狱，历官二十余年，多所平反。归田后，置祭田，厚族党，亲串婚丧，靡不周恤，养母曲尽孝敬，至九十余始歿。三异亦年八十有三卒。崇祀延长名宦。子三人。

张伯琮 字璧九，三异长子。少承家学，文誉著闻。康熙丙午举人，考授中书，





改□□同知，内艰归，服阕，补临安。制府委以剿抚鲁魁山贼事。伯琮亲入贼垒，开诚抚慰，谕以祸福，不折一矢，贼悉归化。晋福州知府，未任，丁父艰，起补抚州，寻升陕西榆林副使。边地苦寒，伯琮捐俸垦荒，彝汉悦服。量移河南按察使，随转布政。判决疑案、筹划军需，治理精明，而民不知役。未几，以老解组。居乡赋诗讲艺，尤精法帖，四方珍惜，购求无虚日。年八十五，犹接应不倦云。弟仲璜，见乡贤。

张叔珽 字方客，三异少子。工制艺，屡荐乡闾，不售。由岁贡授徽州同知，运漕抵通，军役颂其廉平。摄东流县事，蠲除芦课。例擢知府，以病还。生平见善必为，宗族里党，颇蒙其惠。著《膝啸》诗文等集行世。

谭凤祯 字韶来。顺治己丑进士，授大理右评事，执法平允，同列推重。初丧父，两弟皆童稚，抚之成立。季弟凤祥见文学。

易道沛 字子然。顺治己丑进士，初任上高知县，调获鹿，所至询民疾苦，兴利除害，岁歉捐俸赈恤，请蠲浮粮以苏积困。奏最，升中书，转刑部主事，榷关许墅，擢本部郎中。典贵州试，公明严正，得人称盛。子：枚、敕。

易枚 字谐占。以国子生授保安知州，地近畿辅，豪民多假御廩庄户以滋弊，枚一绳以法，不少贷。阅数年解组。与弟敕友爱特至，觞咏过从，里中羡慕之。

易敕 字余斋。以岁贡授辰溪教谕，洁己爱物，为士模楷。遇孤寒，辄资给。俸满，升永宁知县。邑疲远荒陋，敕教以文事，四郊始有书声。报最，陟行人。居三年，请假还里。诗酒优游，弟兄切劘，老而不衰。

刘顺昌 字云将。己丑进士，授广宗知县，慈祥恺弟，以德化民，庭无敲朴。后因公置误，降山西按察司知事，转北直经历，致仕归。

李昌祚 字文孙。顺治壬辰进士，选庶吉士。时楚省旱，与总宪赵开心连名入告，得减田租之半。授检讨，时以翰林官教养有年，习知法度。除河北分守参议，息争讼，兴水利。迁嘉湖道，未三月，召还补大理少卿，尽心平反，解愚民聚众之诬，伸孝子复仇之议，昭雪山左逆案无辜。旋晋正卿，移病归。昌祚少以文名海内，晚勇退。卒，赐祭葬。子必果，见文学。

李奇生 字卓人。为诸生，学使者以第一人相期。试乡闾，果得元。壬辰成进士，授南靖知县，慈惠和平，不事严威，而事皆就理。中年辞疾归。

堵嶷 字诞异。举顺治乙未进士，授山东博平知县，清狱讼，减耗羨。升户部主事，以母老，请终养。母寿至九十余卒。归里二十年，始补兵部车驾员外，转职方郎中，除山西督学僉事，未任，以罢误落职。嶷老于郎署，同列皆后辈，



嶷恒易视之，不免物忌云。

汪以淳 字淶水。戊戌进士，授定安知县，平易近人，清慎勤敏。行取吏部文选主事，持衡公正。后以疾卒。

王世显 字亦世。戊戌进士，为永嘉知县，清宿弊，恤民隐，释三大冤狱。邑有虎攫人，猎者莫能制。世显曰：“令不德所致也。”为文告城隍神，翼日，虎自毙。以盐课未清解任。制府疏白其事，应开复，以母老归。世显学贯经史，为文探理奥，尤与熊学士伯龙深相契。康熙己酉，纂修郡志，世显多所裁定，至今据以续辑焉。

华生甫 字仲山。本成都蒲姓，父日华，令丰润，忤勋戚柳昌祚，降汉阳经历，晚得生甫，恐及祸，以己名为姓。后死贼难，生甫遂籍汉阳。中顺治丁酉举人，谒选得知阌乡县，捐俸建麟经阁以训士，历十二年，内升中书舍人，谢病还里。

项一经 字克赞。顺治己亥进士，为建德知县。闽藩耿(进)[精]忠叛^①，邑中不逞之徒窃发以应。一经率家健会营将，夜半缒城讨平之。行取授吏部主事，晋郎中。出典浙试，获俊者皆名宿。转南汝副使，所辖界连五省，群盗啸聚，杀人于途。一经(兼)[廉]得其巢穴^②，以清保甲为名，密擒渠魁置极典，余党悉遁。信阳民素悍，以力受役者，尤排党肆虐，婚丧家非饱其欲，不得举。一经以远近差为定值，勒于石，仍重惩横索，民皆感悦，后升贵州按察使，引年归。子翊。

项翊 字西喈。倜傥有大志，以岁贡任光禄寺丞。奸胥藉采办扰郡邑，翊重惩，无敢犯。正卿多□号廉静，不轻赴同官召，独契翊，尝过从饮饌，曰：“项君清俸所置，不可不食也。”迁刑部员外，转郎中，详慎刑狱，有爱书已具，犹力争，必更定乃已。父一经以黔臬致仕，因请终养。父卒，哀毁逾等，遂不起。遗命割腴田五百亩分给族亲之贫乏者。子钟严、钟建、□□见《懿行》。

杨 烨 字振西。己亥进士，授龙门知县，勤课艺，革滥征，新谯楼，浚城濠。山寇李三冈肆虐，率兵深入红溪捕之，寇潜逸，境内无扰。疾卒，祀于名宦。

张如榜 字宪卿。顺治丙戌举人，选普宁知县，政务和平，民呼慈父。以海逆啸聚，部议解组，后得开复，遂晦迹不出。乐善好修，年逾九十，郡中称为人中麟凤。

①“进”，当为“精”字误。

②“兼”，当为“廉”之误。





江 蘩 字采伯。康熙壬子拔贡，初任灵宝知县。地当秦豫冲要，自明季寇乱輓输络绎，人劳地荒，积逋累累。蘩下车，屡画图恳请，得减岁额九千四百五十两，蠲逐年亏额二万七千八百有奇。还定安集，遂成乐土。奏最，擢御史。疏请会试于南北中卷内皆分左右，计卷数多寡为中额，远方僻省，不致遗弃，实蘩启之。巡视长芦盐政，通积引、恤穷灶，商民感悦。累官都察院左副都御史。生平敦气谊、喜施予，推产让诸弟，俸入分给宗族亲故，奖掖士类，多致通显。卒，祀灵宝名宦。

江 藻 字用侯，蘩母弟。以岁贡知龙岩县。壤接漳平，向以地广难治，割节惠、万安二乡附漳，名寄庄。后漳民取籽粒，正供则尽委龙岩，民甚苦之。藻力请题免庄米四百四十余石，代偿积逋三百余两。以最擢陆凉知州。俗重利轻信，女已字人，复用厚聘寒前盟。藻法惩理谕，民俗顿改。升刑部员外，转工部营缮司郎中，监修太和殿。工成，奉差督坐粮厅事务，浮沉通衢几三十年，乃解组归里。

江 芑 字豊貽。康熙庚辰进士，初仕为汀州同知。岁大水，民多漂没。芑多方軫恤之。升礼部员外，转刑部郎中，擢监察御史，掌河南道，弹劾无所避，凡兴除奏议，多报可。雍正甲辰，补癸卯正科，为云南正考官。家贫，持赐帑银六百两为道里费，撤闾，即授本省粮储道。旋陟按察使，详免白土军丁粮数千两，以分赔解任。乾隆改元，起为福建延建邵道，卒于任。芑历官数十年，洁己爱民，家无储蓄，没后，僚属饮助，旅榱乃得还。所著制艺、疏稿、诗文并藏于家。

江 莪 字菁芷。与兄芑同事帖括，中康熙戊子副榜，谒选得信阳知州。民不戒于火，莪率属以拜，反风火止。妖为祟于民家，莪牒神，妖灭。又以梦洗冤狱，三办军糈，倾家以济。丁内艰，起补象州。民獠杂处，钳制土霸覃姓，不使跳梁。乔寨邨獠拒捕，单骑往谕，罪首耄服。再调永康，建义学，聘宿儒陆襄为之师，数年有中式者。升奉天治中，未赴，卒。

王 度 由副榜知灵丘县。居尝叹子产治郑、武侯治蜀，得为政大体。及莅官，宅心仁恕，济以严明，吏民无敢轶绳外，久皆爱慕。以疾卒于署，敝衣数袭。见者哭皆尽哀。

江 源 字岷自。顺治辛丑进士，除清河知县。邑有邪教惑民，愚顽依附为奸，称兵拒捕。源极力提御，会岁暮，备稍弛，贼众千余突薄城下，源亟募敢死士登陴固守，间遣人诣府请援，旋就扑灭。后以事去，官贫不能归，邑人醵金资



送之，乃还。子本淳，见文苑。

张弘杰 字特人。以举人官中书。黔抚请发干员，外补大定同知，管知府事，捐贖赎还难妇数人。大定秋粮一万有奇，草莱于兵燹无征者十七，力请蠲除。乌蒙苗妇倡乱，开诚抚绥，终弘杰任，不敢出。升贵阳知府，起补金华，振兴人文，整饬凋敝，久之，谢病归。

龚于蕃 字南式。以举人任武冈学正，著《读书要览》，士多遵守。升安邑知县，与郡守不相合，会于蕃子中乡试，省父于署，幕友欲令谒谢以解之，于蕃曰：“我清白吏，宁畏逼，使吾子作私人耶？”竟不遣往。遂罢吏议，久乃归。子四，长淳孚。

龚淳孚 字葛初。康熙庚午举人，当于蕃对簿时，力疾走京师为鸣冤于秋官，事获解。任均州学正，亦有声。

陈国祝 字如南。康熙丁未进士，知青浦县，再补永清，皆有循声卓异。升南城兵马司正指挥，乞假归。国祝性端谨，举动以礼自持。年八十有八，犹读书吟咏不辍。

魏晋疆 字甸曾。好经世之学，己酉举于乡，任黔阳教谕。滇逆之乱，委督军需，转输无误。壬戌应贵州同考聘，所得士皆名宿，学使方以能荐，遇疾卒。

李犹龙 字君御。顺治乙未武进士，任开封守备，分防杞县、光固诸邑，屡受贼氛。巡抚檄犹龙剿之，身先士卒，直抵贼垒，一举遂平。以功升固原都司。保障严密，鼠窃敛迹。调镇北直拱极城，久之，致仕。犹龙能诗，善擘窠大书，翩翩有儒将风。

彭俊 字西叔。由举人授黄陂教谕，康熙壬戌成进士，知阳朔县，调宣化。竭已推诚，案无留牍。行取赴部，以承审藩产案不准升，仍补感恩。邑偏在海隅，俊极力振兴，士民乐业。未几，改长宁，清商舶、缉海寇，民夜户可不闭。以劲直失上官意，拂衣归。俊少出继于罗，嗣母服阙后，乃复本姓。

余尚钰 字天质。康熙庚辰进士，初知桐柏县，丁外艰，补济源。政尚简朴，崇教恤民，建启运书院，集诸生亲课之，岁给膏火，虽典贷不惜。甲午充同考官，公明为时所称。以老疾致仕。

孙章 字倬庵。康熙己卯举人，历刑部郎中，出守惠州，抵任，免博罗夫役苦差。俗尚诅咒，蓄毒草以戕人，悉严禁之。建义学、革考费，擒获巨盗，其平余、赈粥二法，尤为尽善。郡多宋贤苏轼遗迹，如鹅湖书院、犀带桥、诸亭馆，皆修葺一新。制府以才守兼优，荐升左江副使，随本入都，道卒。章早有文誉，





所交皆名下士，所刻制艺、诗文、杂稿并行于世。

张颢睿 字道存。持己端方，由岁贡教谕黔阳，升安陆教授，迁安肃知县。洗涤烦苛，不为崖异之行。致政归，年九十有三乃歿。

张佐瑞 字左人。初任罗田教谕，迁施州卫教授。闻父讣，只身归里，著《思亲十二时》诗，语极悲恻。服阕，补授武昌，卒于任。

张佳瑞 字冀阶，佐瑞之弟。以岁贡选荆州训导，委修堤工，勤劳甚著，升万县知县。值大水，设舟以济，糴粟以赈，施药以解疾疠，民咸感颂。未几疾卒。

许之豫 字谦次。康熙辛酉副榜，由荔浦知县擢户部主事，监督大通仓，廉干出诸司右。差满，致仕。之豫博览嗜学，刻意为声，诗古体规摹韩、苏，出语生硬，人未之许，真山王戡独赏其神肖。

邓元正 字□□。由岁贡知射洪县，课农徼惰，惩治豪强，设塘铺稽查私盐以通商引。卒于任，众请祀于名宦。

徐克祺 字名儒。岁贡生，初授晋宁知州，擢刑部员外，旋陟郎中。有恶少夜杀人，委怨家门。同官拟罪其家。克祺疑，密踪迹得实，诬乃白。某千总杖奴致毙，其父冀全子官，挺身认罪。狱已具，克祺力持不可，卒获改正。外转江南驿盐监事，进济东参议，苏抚奏其廉能干济，请以升衔留任，并兼摄龙江西新关税务，裕课通商，甚著劳绩，以疾卒于任。

项钟严 字睦州。由岁贡授嘉兴通判，屡运米至通，军旗蒙德。在任八年，惟以洁己惠民为务，性好施予，历久不倦。后以公事罣误，解组，军民赴省泣恳题留，不果。抵家，偕二三老友觞咏者近三十年，绝不入城市，尤喜奖进后学，亲族故旧交口称慕焉。

王全璧 字两如。少厉志于学，由癸卯举人公车不第，检发湖南，以知县改授浏阳教谕，勤课读、恤孤寒，不计修脯，庠士皆称颂之。会学宫朽坏，璧捐俸以倡，不数月而更新。又署邑篆，一切催科狱讼，皆籍计以待新任，绝不染指。未几，卒于任。

夏治源 字东注。家贫力学，舌耕以养母。岁癸巳中恩科乡试，癸卯成进士，起家楚雄令，寻升师宗知州。丁内艰，制府嘉其才守，特疏入告，俾得解任治丧毕，仍赴滇候补。逾年，授建水牧，治源下车后，宽平和易，不鸣一钱，三入文闱，所拔士多为时名臣，且实心任事，绝不营私。士民绘《十政图》以纪其迹。一夕暴卒，贫不能归。旅榇在滇中五年，后例得按品给费，绅士军民同为欣助，乃得归葬焉。

杨 绣 字东麓。性伉爽，不事小节，幼即慕班定远、傅介子为人。年



十八，游京师，见知于徐将军治都，自备鞍马，随戎伍克复川巫等处。后徐公提督全楚，随征夏逆，以功劳最苦等事，题授功加都督管游击事。初任汀州右营，调广东参将，历郧阳罗宝副将。绣果于任事，不辞劳瘁，爱恤士卒，所至威惠并著，后以积劳致疾卒。

黄元溥 字圯斋，号子石，汉阳人。十一岁入武庠，年十九，骑步皆弓开十二力，选己丑科御前侍卫，分正黄旗头班行走，随围四次，叠蒙旌赏。康熙五十二年，两广总督为题请能员以靖海疆事，奉特旨放广东碣镇标守备，后改补福建将军标中军守备。康熙六十年五月初六日，闻台湾告警，元溥恳请上宪，情愿效力。奉总督觉罗满差遣，随征抵厦，趲修战舡、军器，挑验勇健，散给行粮。总督又牌委带兵前赴澎湖协防，地方遵即配舡载兵，随金门总镇黄星赴澎湖。凡有水陆要汛，无分昼夜，巡防守扼，又解军饷、炮火、器械赴水师提督施军前分投应用。全台克复，总督满以勤于军务，加等议叙功加题补诏安游击，屡以督提叠行保举，于雍正三年七月引见，雍正八年补授镇江城守参将。雍正九年，总督两江高委署江宁城守营副将。雍正十二年，以疾卒于镇江官署，年甫四十四岁。

为人质朴纯静，有儒将风，以故宦场乡党无不惜元溥之未得竟其用云。

彭商贤 字述庵。康熙壬午举人，除莆田知县，下车焚香告天，以廉洁自矢。木兰陂为一府水利所关，倾圯不治，商贤捐俸倡修之。调诏安，值旱，午夜起祷，跪赤日中，竟日不食，甘雨立降。诏人呼为“彭公雨”。丁外艰归，服阙，补永丰。痛抑豪猾，拊恤穷黎，以劳瘁卒。贫无资斧，士民争赙助之，旅〔襁〕〔榰〕乃得还^①。

项 诚 字勛存。其先歙人，父璘贸迁汉镇，因家焉。诚以岁贡循例，由内阁中书授户部郎中，警敏有才识，凡所司钱谷支給、运留款项，毫粒皆默记无或爽。大司农推重之，一月中三经保举，除四川顺庆知府。莅事精明，有以婚姻构讼十年不解者，诚片言折之。调成都守，御河久塞，诚出养廉贲疏浚，以便舟楫。壬子计典膺卓异，卸事矣，犹争疑狱，活诬服一人。至京病卒，成都士民祀于名宦。

吴允谟 字嘉言。岁贡生，任滕县知县。民悍健讼，黠者多劫人于盗。允谟缚数人置于法，抚绥驯良，开诚如家人谊，恩威大著。擢大名知府，岁侵，

^①“襁”，为“榰”之误。





以便宜动帑赈之，不给，出养廉为助。黄河溃，构席棚栖漂没家，日给以食，活人甚众。盗夜杀人，势汹汹将为变。允谟驰马召与语，潜令壮士伏盗后，出不意斫之，遂就缚。后卒于官。

吴 炯 字闇存，允谟从兄。初由岁贡任衡阳训导，抚军檄主石鼓书院，引迪有方，从游者均给膏火。循例授工部郎中，监督宝源局，核算精详。以能除广东粮驿副使，修监仓廩、整齐驿务，悉革茶果陋规。内艰归。起补金华知府。丁父忧，服阙，补刑部郎中。稿案经炯手，轻重咸宜。俄以疾卒于都，乡谥文端。有《泓碧斋四书文》行世。

张彦昌 字少文。雍正癸卯进士，试诗赋上等。明年授怀来令。邑界边，士不知向学。彦昌葺黉宫，拔敦行通经士充席，已复时加启牖，士习蔚兴。禁酿令下，点滴不得造，酒家挟重贖私诣署，彦昌正色拒之，曰：“酿于未奉文之先者，自贷汝，何私请为？”三年，以罣误去官。事白，补唐山，卒于唐。

萧永域 字界封。岁贡生，为国子监学正。康熙戊辰，充礼闱受卷官，遗失试牒，降京卫武学教授。诸生多勋戚子弟，骄惰成习。永域一裁以义，众慑服。任满，迁知诏安。县界交闽粤，民望海为田，船属于诏，税输于潮，蠹甲因缘为奸利。永域剔清宿弊，民困顿苏，勒石纪其绩。罢归后，杜门却扫，至亲罕睹其面。卒年八十有一。

项 余 字予望。少机敏，与弟全有仅、何之目。由国子生拣授河务同知，初署淮安海防，调邳睢、灵璧保固堤防。值运河溢，他工多冲决，惟余所无恙。总河高将擢以不次，遽疾卒。全字备五，弱冠贡太学，书画兼妙，亦能诗，年二十余夭。

郭 莪 字钟毓。乙酉举人，考授中书，改潜江教谕。清贫自甘，范士以正。邑令尝访以政教，莪指陈利弊，绝不干以私。莪少失怙恃，与从叔羲切劘为文，先后泮游。俄羲卒，代为羲母刘氏举节蒙旌，时称其义。

汉川县

明

尹 晋 字□□。永乐中任长寿知县，擢御史，弹劾不避权贵，人多敬惮。家居，置义宅祭田，绰有古风。

尹良任 字志伊。隆庆辛未进士，授龙川知县，讨平积寇李九标、张惟远等，



以功赐金币，调尉丹阳，人莫敢干以私。召拜浙江道御史、侍经筵，条上治河诸封事，深见采纳。巡按河东，督理盐政，奏浚大小二池，商民均便。以疾告归。子际盛，字□□，以诸生入监，好谈兵，改授指挥使。

尹应元 字乾泰。万历甲戌进士，授清丰知县，有廉能声，迁刑部主事，历员外郎中，出知凤阳府。内艰服阕，起补大名，改真定。三典畿辅剧郡，应元游刃裕如，事无遗误，累迁山东参政，备兵宁夏，当哱氏乱逆之后，皆视为畏途，应元谙韬略，洞边情，内抚将校，外严战守，士无不愿为用者。以功加按察使，晋佥都御史。巡抚山东时，倭陷朝鲜，大发兵往救，应元转饷调师，未尝乏绝。宦竖陈增以矿税横东方，诬陷益都知县吴宗尧。应元具奏劾增。宗尧被逮，增将纵党肆虐，以泄其愤。应元极力保护，宗尧竟得免。清议黜之。丁继母忧，起抚浙江，谢事归，家居几二十年乃卒。子宾商。

尹宾商 字亦庚。有俊才，喜谈兵，名动江楚间。以选贡为邑令，忤上官，罢免。所著有《阊外春秋》、《艾衲窝稿》行世。

林若企 字□□。少为诸生有声，万历癸酉举于乡，官教谕，升简州知州，进建昌同知，历任清勤，士民怀颂。晚进阶四品，致政归田，邑中故实，扣之如响应声。年八十，犹矍铄不衰。

尹大本 字伯中。以举人任广信推官，升叙州同知。居平以学行诱掖后进，居官淡然无营。既解组，训勅子弟依于法。家族中如中丞、御史辈功名显赫，皆大本所督成也。

尹心周 字□□。资性旷达，以贡生任常州通判，升广安知州，迁靖江王府长史，晋四品阶。政务与民休息，囊篋萧然，歿之日，家无余财，人皆叹其清节云。

殷时中 字虚白。以选贡入监，声噪南雍，除定南知县，迁广东化州知州。洁己爱民，檄署海防同知。海贾馈珠，峻却之。后以病致仕。

萧鸣霄 崇祯己卯武举。楚抚宋一鹤驻军安陆，辟为参军，隶卒仅千人。贼至，鸣霄选精锐，掘地夜出，潜伏桥下，横冲击之，斩获数百级，贼解，以功授辰州参将，弗就。家居，有水贼数千，夜至汉川，围城数重。鸣霄以数十骑迎贼力战，杀伤数百，余众溃溺，邑人赖以无恙。

国朝

顾如华 字质夫。顺治己丑进士，初任广平知县，考选御史。疏鹵滥委、清奏销、





请复教职，多所建白。差理浙江盐政，商民戴德。转温处副使，卒。如华学问淹博，工吟咏，与钱谦益、吴伟业、龚鼎孳辈鼓吹风雅，一时称盛。著有《艮占集》、《蜀行稿》数种行世。

黄陂县

明

梅芳 字□□。正统间岁贡生，任福建布政司理问，有平寇功，移广安州同知。致仕二十余年，非公事不出，题其壁曰：“故旧不遗，请托不许。”治家力行古礼，里人取以为法。

王坤 字□□。正统辛酉举人，清慎多才，知济宁州，有修闸功。时麦秀两穗，黎淳为之记。擢后军都督府经历。英宗命作战车数百辆，不日成之，嘉其能，赐赉极优渥。

陈伯安 字□□。弘治己未进士，英爽有大节，令章丘，寻擢御史，忤刘瑾，谪丹阳教谕。瑾败，起知灵壁。巨寇杨虎啸聚，以无城被执，贼见其伟岸，欲降之。伯安骂贼不屈，瞋目受刃，贼惊异，释去。乃城灵壁。民感其德，立祠以祀。后官至副使。

王化熙 字□□。霁之子。霁守嘉陵，称清白吏。化熙以国学授蜀中同知，克继父风，亦以清白称。

杨成性 字存存。为名诸生。万历乙酉举于乡，除易门知县。分考选士，所拔皆滇南名宿。政事、文章，并著于世。

余新民 字安止。中乙酉举人。孝友天植，居丧一循古礼，庐墓三年。后官知州，清慎廉平，擢四川兵备副使。丰采严毅，僚属无出其右。

胡宾臣 字仲庸。颖异，娴古文辞。万历戊戌成进士，授庶吉士，馆课辄第一，策对切中时弊。未几，疾卒。惜未竟其用。

傅乃根 字□□。由举人任凤阳知县。岁歉民饥，力请弛征省役。捐修城堞，功甫竣，流贼突至，邑赖以全。擢户部主事，时直省旱蝗，公卿议捐逋赋，乃根曰：“救荒不如薄敛，请蠲不如无加。今新饷日增，而旧欠是恤，何异止沸而添薪也！”在廷韪之。

段养度 字士雅。万历辛卯举人，素节俭，益检制自爱，任延安推官，政迹大著。



罗明谕 字元枢。以岁贡为应山训导，置学田以振恤多士，升零陵教谕。镇兵叛，明谕率士绅城守，独当巨炮处，曰：“此吾汛地，无所逃死。”手放佛郎机杀贼，凡三昼夜，贼窘祈降，举城获全。

范志琦 字五云。力学不求闻誉，万历庚子登贤书，授湖口知县，洁己爱人，以政最，升□□同知，清介如初，誉闻远播。还里，以寿终。

郑明城 字韦吾。恩选贡士，授大冶训导。录贫士某，捐貲养娶，逾二年成进士，治人高其义。升铜陵知县，地冲繁，明城莅治，游刃有余。每课士，辄供给，文教日盛。

詹先志 字义卿。万历己酉举人，长于会计，凡钱谷款项榷算难明者，先志能明晰明确，毫无舛误。授绥州推官，政治严明，称一时才吏。

周中极 字是行。素有品度，登己酉贤书，署泌阳教谕，以廉干著。擢眉州知州，清勤不刻，明察不扰，境内传颂。

李藏春 字石间。天启改元，中乡试，任□□教谕，课士有条理。擢深泽知县，惠政浹洽，民皆建祠以祀。升南雄同知，清慎昭著。挂冠归，足不履公庭。年八十有四卒。

周昌应 字燕及。崇祯庚午举人，甘贫力学，选彰明知县，抚字有方，父老皆颂其德。后解任，垂橐而还，途中遇贼，竟为所害。

刘 灿 字耀冕。善诗文，工楷草。天顺间由庠生膺荐为陕西督盐正使，勤慎，不名一钱。正德间，奉公踏勘灾荒，以劳瘁卒，贫不能归，客葬庆阳北门外。

周道长 字恒吾。器宇魁杰，为诸生与邑中名宿讲学，复优武略。易名昌祚，以三科武举，授援黔镇国将军，剿土寇有战功，后遂卒于黔。

国朝

张焜罗 字宁侯。拔贡生，任淮安通判，署山阳县事，复摄海防，皆有政声。值火灾，焜罗虔祷，立灭。后河决汴口，力任河工，遂以劳致疾卒。

蔡绍芳 字衡庵。尚气节，以太学生游京师，授高邮州判，通漕溉田，著《治河年纪》行世。擢陕西苑马监正，缮城饬军，复多伟绩。

彭之位 字伯求。笃志力学，由岁贡为长沙训导，修辑黉宫，生徒服教。擢信阳州判，清介著称，署真阳、上蔡两县事，所在讴颂。

吴之琯 字伯玉。岁贡生，初为徐闻知县，残黎仅数十家。之琯招积流亡，远近归业。粤多盗，惟相戒不入徐闻境。贼魁王汉，百方招之，不听，曰：“但





得吴徐闻一言，即投戈矣。”之琯往慰谕之，果降。又与诸生讲经术，因相约能招流民三家者，以两家田税输于公，以一家田税私于士，两载后起科。于是民益广，田益辟，三年田熟以万计。后坐前任粮事罢归，家居，课子督耕，岁饥，出积粟以赈，乡里蒙惠。

郑 滋 字方至。少孤，母王氏苦节抚之。中顺治戊子副榜，授新宁知县。时粤中初定，贼绣花针倡乱，滋募敢死士捕之。贼首乞降，黠民因告变以诬大姓。时议均欲勒兵搜讨，滋单骑入山，察无乱状，坐诬者罪，政声大著。

胡明垣 字卫公。顺治己丑进士，选镇安知县，时伏莽为暴，民甚患苦。明垣擒斩渠魁三人，悬馘通衢，余孽以靖。寻迁凤翔同知。

陈光龙 字二为。顺治己亥进士，任南阳推官，活冤狱七人，廉明著声。改补平乐知县，值逆藩叛，光龙率士民固守，会溃弁开门迎降，遂乘间奔军门。随征三载，有功。事平，升梧州同知，招抚流民，劳瘁成疾，致仕。

冷又煦 字东涛。戊午举人，署攸县教谕，考最，升奉天锦县知县。旗民杂处，又煦禁绝派累，申严堡规，威惠并行，盗窃匿迹，后卒于官。

黎时举 字健斋。顺治丁酉举人，为四川长寿知县，时寇盗未平，时举赴亲王营请兵剿抚，求勿轻伤一人，王嘉许之，全活数千计。事平清丈，时举以蜀民初出汤火，请毋加额。后罢官，家无长物，母歿，哀毁骨立，又以孝称。

戴治盛 字际隆。顺治壬辰进士，任霍丘知县，抚辑凋残，修举废坠，政尚宽和，不事鞭扑。三年报最，即告休归。后入霍丘名宦。

陈于璫 字商子。岁贡生，龙阳教谕，历升刑部郎中，能片言决疑狱，绰有吏才，早卒。

姚 谐 字栗冈，大中丞缔虞子。以国子学正历升姚安知府，补元江，迁东充副使，浚筑河隍。岁饥，捐赈。晋安徽按察使，廉静明恕，疑狱多所平反。后以原官致仕。

姚 让 字陟汝，谐之弟。少随父缔虞官蜀抚。父没，只身扶榇还。服阕，由岁贡任翰林待诏，历部郎，出守福州、广州、济南三郡。三郡皆省会冲要，让肆应有条，随在以明慎称。

姚 华 字实斋。中丞少子。乙酉科领乡荐，性挥霍，敦礼让，任户部主事，经理一切，奏报之事，多出宽简。及去官，囊橐萧然矣。有子三。

姚 哲 字睿臣，谐从口。初任新田教谕，迁乐安知县，以廉能荐升眉州知州，复由保举晋平阳同知，盗息民安，升黎平知府，清慎明恕，不憚勤劳。



吴 镐 字雍左。康熙庚辰进士，由徐闻知县历部郎，迁御史，以疏请建储谪发军前，后蒙宥回籍。中外想望丰采，未几，疾卒。

谢梦弼 字岩臣。岁贡生，任桂东教谕，时文风凋敝，入学多缺额。梦弼首修学宫，振兴文教，额始足。迁伊阳知县，岁歉，民逃。梦弼招来抚恤，民气顿苏。丁艰，服阙，补安平县，督修铁索桥工，捐修义学，尤善体彝情，凡苗民子弟一体入义学讲肄，录取入泮。内升都察院经历去，合邑感戴，立祠以祀。

陈 坦 字文度。壬子举人，由汉县教谕升河南偃城知县，除私派，活冤囚。丁艰服阙，补宣化县，地居边鄙，坦至，弭盗兴学。会蝗为灾，斋宿虔祷，请移谴于己，蝗遂灭。历升主事员外郎，卒。

谢云从 字龙友。初任县丞，迁永康知县，教民节俭，严治讼师，内升□部主事，差督粤东钞关，禁额外多取，商贾悦服，差满致政。

詹先定 字用二。岁贡生，授吴桥知县，俗最浇漓，奸宄窃发，又值军兴旁午，供亿烦杂。先定申严保甲，时勤讲谕，捐赈代完逋赋，民得帖息。后以老病乞休。

詹龙翔 字飞九。以举人任蒙阴知县，邑界通衢，驿苦差多马少。龙翔力请协济，驿困以苏。又丁少引多，盐课多，小民赔累，详减盐引之半。莅政十年，循卓著闻，升平凉同知，致仕。

熊正朝 字赞廷。由贡士任龙兴卫经历，署麻哈州事。苗叛，出征，生擒三百六十余人。后中蛊毒疟发，卒于军。

李子吟 字□□。雍正甲辰进士，知徽州黟县事。黟，山县，恒苦运粮费重。子吟力请改折，邑民勒石颂德，后卒于署。士民哀感，争相赙赠。

王遵度 字次同。癸卯举人，任道州学正，升寿张知县，活冤囚数人，立义学，遴拔孤寒。岁饥，不待申请，发谷以赈。疾归，出困粟赈乡里，人称颂之。

萧起凤 字汉升。康熙庚辰武进士，历任甘肃洪水营游击。边地少雨，起凤俟雪消引水溉田，建闸修堤，以时蓄泄。立义学以兴文教，足茶数以惠番民。调廉州营，计擒海盗，奸宄潜消。飓风为灾，协县捐赈。疾，卒于官。

周 崧 字文山。癸丑武进士，选福建守备缺，裁补吉州。旧有巡河陋规，崧曰：“吾安忍汛兵膏血供人色笑，宁挂冠，勿澳忍也。”尽汰革。民苦运京仓米，崧请照接运例，运速而役均。又奉调汰兵开垦，崧详汰兵非老即弱，难充开垦之数。抚军嘉之曰：“是片纸而造无穷之福者。”复议竟止。





孝感县

明

张 瓚 字宗器。正统戊辰进士，历工部郎中，出为太原知府。丁父忧，服阕，补宁波，除苛均役，兴学劝士。市舶中官纵恣，瓚条其不法事，声称赫然。升广东粮储参政，抵揽户于法，俾斗粟以上民得自输税以充羨。转浙江布政使，宁、绍二郡海溢，漂人畜庐舍无算，萧山尤甚，瓚分遣官属，瘞骸赈贫，收恤老稚，全活以万计。擢右副都御史，抚四川，奏迁泸州卫于渡船铺地，以扼诸蛮，迁者如归。以母病归养。起赞理松潘军务，松茂叠三城与董卜韩胡接壤，易骚动。巡按毛玘奏诸蛮挟吐蕃叛，命瓚往视师。瓚率万人，分五哨袭白草坝，剪其羽翼，遂渡北羊峪，而岷山、雪山、灵山皆在其境，乾海、玻璃二泉北流为洮河，南流为江汉之源，即古维州地，悉讨平之。播州土官杨辉奏称大坝千苗作乱，瓚请立安宁宣慰司，得允行。拜户部左侍郎，恳辞终养，复为郡邑，请蠲无艺，亦报可。又起总督漕运，巡抚凤阳，在任三年，粮饷不绝。卒，赐祭葬。

王 珩 字□□。景泰丙子举人，通判叙州，迁凤阳同知。精敏强干，吏不敢为奸。士民为之梓《却金集》。

万言扬 字存儒。由孝廉令浙江新昌，有祷辄应。擢南道御史，巡历凤阳仓及屯马。会移宫事，魏珰焰烈，言扬奏顾命之臣，何以不得终其信任主事万璟惩一小珰？又上疏累斥忠贤矫旨杖毙，言扬上疏谓忠贤令皇上有杀谏臣之名，语极切直。因假他事削籍。崇祯初，起补四川参议。时贼氛蹂躏蜀中，言扬冒矢石、严战守，贼不敢犯。转安绵兵备，谢病还。

杨金通 字黄理。万历己未进士，丹徒知县，有风力，理却戚畹不得轻用黄封，不附上官迁民间葬地，尤为时重。卓异入都，会党祸起，谬指为杨涟族人。或谓“曷辩诸？”金通笑曰：“大洪海内正人，余虽同祸，何幸也。”竟不辩。仅授礼部主事。奉诏讞周藩，归，卒。

胡其俊 字朴生。父早歿，力耕养母，暇即勤学。成丙辰进士，历永清、固安二县，皆有惠政。遇事敢言，忤阮大铖，出为陕西按察使，卒。

徐 壮 字中淳。万历戊午举人，有才力，善干略，为怀庆同知，治河有绩，以水旱漕粮过期，降夔州通判。

沈惟煌 字美季。端重廉介，由岁贡授惠来知县。甫断狱，有以荔枝进者，启篋，尽黄白金也。正色谓其人曰：“夫岂不知沈季子不可干乎！”以国难卒化州。



程良筠 字君卿。以门荫授翰林院典簿，擢南刑部主事，多所平反，后差恤刑，全活甚众。闯逆起，遂挂冠归。

张 淳 字国存。由知县报最，考选，特赐召对，咨询时政得失，淳慷慨条对，授工科给事。时朝政多尚综核，言路好为翕赫可喜之论。淳独引大体，切时务。旋擢太仆丞。寿终。

屠奏绩 字功逊。崇祯丙子举于乡，曾缮疏以时事入告，后为江西临川教谕，居常郁郁，旋归。

沈惟耀 字斗伯。岁贡生，授武学训导。魏忠贤用事，杨涟被逮，人莫敢钱，惟耀独往送之，以少女字其子而别。明年，涟死，惟耀为具衣冠，觅二驴归其柩。人曰：“公独不自爱乎？”惟耀曰：“我与大洪交数十年，重之以婚媾，一朝死丧，便同行路，不忍为也。”历广东平远知县。

国朝

胡 江 字山公。戊辰进士，授行人，考选户科给事。连疏劾温体仁，以建言削籍。体仁罢，起河北屯田佥事。皇清乙酉，除江南淮扬海防兵备副使。生平著作甚富，兼工草隶，士林推服。

鲁近暹 字绣林。丁丑进士，授行人，考选吏部稽勋主事，调文选。乙酉随征湖南，擢浙江温处副使。时浙地初定，近暹悉心调剂，威惠并行，莅任二年，吏畏民思。

闵依圣 字伯膺。万历戊午举人，授获嘉知县，劳心抚字。顺治乙酉，授高邮知州，公廉自励。以母老乞归，拥书督耕，字工八法。

彭清典 字畴五。明末，献贼屡袭孝感。清典率宗党，募勇士，与邑令固守，邑获全。癸未，入白云寨，遏闯贼伪将之锋，连络七十二寨，恢复德安、云梦。皇清兵下江南，授池州推官。擒山贼渠魁，池人宁息。内艰归，起补温州。时山海交江，剿抚并行，制府甚器重之。迁泉州同知，奉调入闽，督修战舰。时军务倥偬，委任繁杂，经营调剂，供亿足而民不扰。累升怀庆知府，听讼得情，叮咛劝勉，即盛怒，无重扑，驾馭材武，则操纵不测，奸宄相戒不入淮境。以卓异升管河副使，卒。

李皇诏 字月航。拔贡生，授安庆通判。顺治乙亥夏，海氛猖獗，皖孤城斗绝，声援莫通。时操抚全师赴剿，郡无守，邑无令，防江无丞，皇诏一身兼摄其任，固结人心，筑垒浚隍，以遏逆锋。七月，海寇蚁聚迫城，皇诏躬履行间，且战且守。





八月初，悉众来攻，皇诏奋勇歼之，斩首外，俘解活贼三千余人。适京旅南征，军需纷沓，皇诏咄嗟立办。事平，擢户部郎中，准世袭拖沙喇哈番一次。历升四川建昌副使，番猱错壤，率多蠢动，皇诏苦心调剂，以弭其患，军民皆得所。后卒于官。

李嘉卉 字山有。威仪修整，志行高洁，顺治辛卯举人，授茶陵教谕。值滇逆猖乱，誓不从贼，改黄州教授，秩满，升瑞金知县。地滨闽、广，多盗，计擒渠魁，群贼解散。后以老乞休，童叟攀泣。嘉卉乃熊文端舅氏，文端兄弟幼年遭乱，赖其保护，得脱于仇，且授以经。文端尝称之曰：“居心厚，行己端，事上敬，与人忠，吾舅氏其庶几焉。”

潘岭 字石文。拔贡生，任新淦知县。值兵燹后，兴举废坠，建文庙，筑城垣，修坑口渡桥，清丈荒田，招徕顽梗，境内称治。

李曙 字澂澜。颖敏好学，顺治中岁贡，除将乐知县。山邑难治，曙至问民疾苦，境无盗贼，尝责仆取道旁一桔为坏法，清介多类此。及解组，童叟遮道而哭，家为画像以祀。卒无以殓，戚串咸为经理焉。

屠奏疏 字更生。慷慨有远略。明末寇乱，仗剑从戎，冀以功名显。闯贼猖披，郡邑望风溃。奏疏闻白云寨义旅初起，挈家往赴，悉力防守，屡挫贼锋，以劳授参将。大清兵至邑，英王问白云抗贼状，奏疏率众投诚，授武昌参议，改洮岷。母丧，归庐墓三年。复捐貲修葺学宫，人重其义。

胡景铨 字次澹。辛卯举人，知南宫县，编里甲，平徭赋，禁戢强梗。公余课艺，赏识皆知名士。新河与南宫为唇齿邑，邪教谋不轨，台使者檄景铨合剿。景铨画策授计，擒歼其魁，地方以靖。其赈饥、缉逃诸善政，皆可纪。后以投抒微嫌，愤郁以歿。

胡必蕃 字畏子。由举人知蒲县，性慈祥廉洁。俗征输不随田粮，照丁起科，最为民累。必蕃力请编审，赋役始均。再补靖江，首兴水利，蓄泄得宜，升新兴知州。军民互错，事烦俗弊，必蕃张弛有序，已不劳而四境归化焉。

沈逵 字渐于。顺治乙未进士，选温州推官。时濒海戒严，修造战舰，民间供亿烦苦。逵经理两月，抚劳倍至。摄事永嘉，民胥乐利。丁艰去任，起补惠州，安辑流移，摊派潮米，清查营弊，政治卓然。后奉裁缺，解组归。

熊赐履 字青岳。八岁时，父歿于难。母李苦节，严课读，弱冠贡成均。顺治丁酉、戊戌，捷南宫，授庶吉士，首蒙眷注。

康熙初，历升至学士，凡馆阁大制作，咸出其手。应诏上书，娓娓数千言，



悉蒙嘉纳。晋阁学，一日，上命讲《大学》、《中庸》首章毕，叹曰：“果宿学也。”迁掌翰林院事，知经筵，乃以切实在于日讲，先书后经，次及子史，遂进讲弘德殿。弘德犹古之崇政也。辰入酉出，或漏下四鼓乃出，或随出随召，特命以武英殿大学士兼刑部尚书入阁办事，后因票拟偶误，罢。侨寓金陵，益肆力读书。甲子冬，圣祖仁皇帝南幸江宁，慰问咨访。戊辰，起大宗伯。先是赐履官翰林时，有司以其母节，举蒙旌，至是卒，丁艰去位。适圣驾临白下，赙恤祭奠有加。旋以原官召拜，疏力辞。服阕，晋冢宰。八年历剔铨务称治。乙卯，复以阁臣用兼吏部。癸未，引年乞休，仍住京师食俸，备顾问。甲申除日，御书“寿耆”二大字赐之。丙戌，始予告归，遣官护送还里。明年南巡，复召赴行在，款语宴赐。己丑，年七十有五，薨。谕祭葬，谥文端。

赐履历仕数十年，公明练达，海内宗仰，慎密孤介，中立不倚，恩礼勤笃，从古未有。在任教习三科庶吉士，八主文武乡会试，五充殿试读卷官总裁，《世祖章皇帝实录》、《两朝国史》、《政治典训》、《北征方略》、《孝经衍义》、《朱子全书》、《明史》总裁。自著《学统闲道札记》及诸文集，皆经宸鉴，其学最为醇正。至进退人材，虽子弟无知者。子志伊以病不能官，尝召至京，未几卒。辛丑，犹诏恤其家。

熊赐瓚 字□□。赐履母弟^①。

熊赐炤 字宗玉，赐履从弟。戊戌，与赐履同成进士，授庶吉士。癸卯，以检讨主福建乡试，得知名士六十余人。乙巳，晋侍读。请假省亲，南游石城，无病而卒，年仅二十有九。

胡必选 字简士。己亥进士，授桐城知县，厘除旧供羨余及诸弊政。邑北观音岩水射城隅，多致倾圯，捐俸筑堤，城保无虞，田滋灌溉，桐人刻石纪曰“胡公堤”。岁丁未，大江南北飞蝗蔽天，入桐境，有鸦数万，搜啄殆尽，人谓惠政所感。其为治，宽严有体，清理滞狱，兴举废坠，历九载解组。居平孝事继母，友爱昆弟，乡里中悉称为长者。

胡应瑞 字京卿。顺治丙申以举人谒选，除汲县知县。汲为河北最冲疲地，明末以来，疮痍未复。应瑞廉靖自饬，以休养生息为务，邑人歌“孔迓”焉。寻

^①熊赐瓚为熊赐履同母弟，曾任编修，其传仅数字，且原书与下“熊赐炤”传之间留空五行，似有隐情。《清史稿·熊赐履传》所载似可释疑。“弟编修赐瓚以奏对欺饰下狱，御史龚翔麟遂劾吏部铨除州县以意高下，赐履伪学期罔，乞严谴。下都察院议，赐履与尚书库勒纳、侍郎赵士麟、彭孙遹当降官。上不问，赐瓚亦获赦”。





调营山，居官一如治汲时。

梁朝柱 字公擎。顺治戊戌进士，知四会县，兵燹后，土田荒芜，民苦征输，朝柱缓催科，清狱讼，与民休息。田为藩占者，百计代赎，上不亏赋，下不困民。邑有严郎寨，地险且僻，顽民负隅逋税，武弁请发兵讨之，朝柱曰：“疲甿无知，忍令屠戮耶？”委邑尉持符往谕，皆大悦，争输恐后。内艰归里，服阕，补浙之新昌县，未期而歿。

程泽 字用汲。以荫授醴陵知县，邑中奸宄恃险梗化，泽殚心招徕，咸得安集，未几罢归。

程大毕^① 字简可。由贡士历任汝宁知府，转广东盐运使。时粤鹾政多积弊，大毕悉心厘剔。盐通课裕，商民均戴。州县以积引不销罣误者五十四员，大毕请准分限十年带销，得免处分，卒祀广东名宦。

萧秉楷 字士端。拔贡教习，授直隶邯郸县知县。邑当孔道，疲于迎送，费旧派里下，楷至，悉除之。岁大饥，楷多方赈济，无一转散者。一监生家巨万，人讼其用伪银，上官拘付县审，又私嘱罚千金，楷不应；又遣子授其意，楷曰：“彼所用银无几，且非新造，是为人误耳，奈何违理法，以贪其贲耶？”以此忤上官意，终任不睦焉。有将军公差捏盗图诈，店主愿赔偿。楷廉得其情，慨然曰：“此地差使络绎，若奸诈得行，民受累无穷矣。”通详上司，严加惩创，可杜民后累，虽重得罪不恨。差使惧，自杀，楷竟坐是削籍。去邯之日，民扶老携幼，焚香号佛，送至黄河乃还。归里时，囊橐萧然，惟闭户著书，课授子弟，国人矜式，延为乡饮大宾。年七十卒。子惟灿，癸卯正科举人；惟燮，庠生。

涂天相 康熙癸未庶吉士，历官司成，总督仓场大司马。入仕四十年，无巧宦逢时之习，学者尊其正直。

熊维祺 字□□。顺治己亥进士，授仁化知县。时盐引递年报名，富室多逃匿。维祺设法招商，杜报充之弊。己酉分校粤闈，所拔多知名士。后卒于任。

陈应伟 字士嵩。以举人选青城知县，专意拊循，痛抑豪猾。时与多士论文较艺。丙午分校得四人，皆成进士。

萧蕴枢 字持大。辛卯举人，教谕黄梅，升浮梁知县。邑多逸寇，民顽抗赋。蕴枢得其渠魁置于法，因编图，按户躬为劝谕，前后积逋顿清。丁外艰，服阕，

^①原书六十一页与六十二页之间插入“又六十一页”，将程大毕传分为两段，至此三页文字错简，本次校点，移“六十二页”前4行文字“时粤……卒祀广东名宦”上接“程大毕”条“转广东盐运使”之后。



补高安县，未几归。

屠沂 字艾山。康熙甲戌进士，除蔚县知县，迁知陇州。所至缓征薄敛，不尚威猛，惩奸捕盗，则绝无宽贷。陇苦役烦，兼多虎患。时羽檄纷驰，沂抗不加派，民困渐苏，而虎患亦息。历升吏科给事，转佥都御史，知无不言，以谏诤为己任。升顺天、奉天二府尹，力锄豪猾，一无畏避。晋都察院右副都御史，巡抚浙江，洁己惠民，陋规尽革，尤以备荒、清狱为急务。居二年所，以疾致仕。

王大纶 字慕庐。康熙己丑进士，初令新郑，平徭减税，兴立社仓，煮粥赈饥，白人冤抑，惩梗法者不少徇。河工三载，保障一方。调考城，秩满，授中书，旋擢御史，正色不阿，一岁，卒于官。崇祀乡贤。

论曰：志仕迹于乡贤，后执笔者岂容轻下哉！乡贤各有事实，稽其生平，采之舆论，考素履而察隐微，自郡邑以升大部，综核名实，然后列俎豆于宫墙，其郑重为何如也？若仕迹则异是，名家旧族，袭先世之余徽。纪勋业，则伊、吕拍肩，管、萧亚匹；述德行，则颜、闵同科，孟、韩接武。文章视六经为注脚，捍御等韩、白为厮养。又有崛起单门，致身通显，必缕述积累之厚，余庆之多。凡贤哲英豪之往迹，毕萃于一身而后已，乃为之撰著者，亦且广搜博引，极力铺扬，道古今而誉盛德，曲相比拟以悦之，稍有罅漏，卖菜求益，累牍连篇，恬不知怪。嗟乎，以盖棺论定之公，徒为蓄私贡谀之藉，所谓但欲欺后人，而不知今人之未可欺也。兹编审慎弥月，其功在旂常，名高策府，率以谨严为度，不敢过为溢美。至于郡邑有制锦之喻，师儒表垂范之模，亦酌其事绩而书之，得一二端，已堪不朽，何必过情虚誉，蹈强作解事之恶道乎？昔杨升庵读《宋史》，谓列传中有卷分上下者，牵引冗长，莫知起讫，头绪烦多，虽窥组织，求如“马逸，杀醉人于道”者，诚不可多得矣。





《汉阳府志》卷之三十五 人物〔六〕

《忠臣志》序

昔人有言：与为忠臣，宁为良臣。盖士不幸，而以沥血捐躯自效，所遇信可悲矣。然其精神勇决，足以贯金石、泣鬼神，千载而下，闻风感慨，视夫赧颡、喜起有加荣焉。

作《忠臣志》。

忠臣志

官于汉阳而尽忠者有

黄陂县

赵元有 福建举人，明末为陂令，值奇荒重疫，大寇蝟集，居民流亡。元有独宿城头，昼夜防卫，贼大至，遂以身殉。

夏统春 字元夫。明末由荐举授陂丞，时全楚被兵，邑尤冲要，贼攻益力。统春冒矢石以守十昼夜，不稍怠。贼解去，统春曰：“此懈我也，宜益备。”越五日，贼果突至，城陷，统春死战南城，被执。贼胁降，统春指贼大骂。贼怒，断其右手，复以左指，又断之。怒骂益厉，贼割其舌，剜其目。统春犹以头触贼，遂支解之。

薛闻礼 武进人，为黄陂主簿，有志节，多惠政。岁歉，漕兑逋欠，民无以应。闻礼往汉口那借千金代兑，期岁稔清偿。民感其德。张献忠陷黄陂，爱其材，欲污以伪官，挟与俱去，乘间脱归。率吏民攻伪令，诛之。令众远避，已独留。俄贼大至，将屠城。闻礼曰：“杀伪官者，我也。”贼尚欲活之，骂不绝口，遂遇害。

〔孝感县〕

郜炳元 字飞虹，直隶长垣人。顺治丙戌进士，丁亥，授孝感知县。时邑

①郜炳元为直隶长垣人，实官孝感尽忠，故补“孝感县”三字。



城郭丘墟，人烟稀少，奉朝命而至者，视为传舍。炳元抚此孑遗，盡焉心恻，乃胥吏之徒，非胜国逋奸，即党逆余孽，闻赫赫之声，莫不憚而敛迹。五年正月内，会豫寇窃发，邑六城无所捍卫，四民无所稽察，寇兼程疾趋，乘夜袭城。炳元集众，疾呼拒敌，势不能支，谓夫人马氏曰：“余读书，生平冀为良牧冠，岂意櫻此鞠凶，以此累若，为之奈何？”夫人亦曰：“臣殉国，妻殉夫，何容再计。吾已纫衣百结，俛垣方寸地，吾死所耳。”寇至，夫妇交口大骂，俱遇害。寇退，邑人封君严琯赠赙置槥以殓，行道见之，无不流涕。

本籍而尽忠者

汉阳县

宋

江旧《志》、省《志》俱作“汪”，《楚纪》作“江”涯 字万顷。贾似道宣抚江淮时，闻涯名，尝辟为客。元世祖围武昌，似道乞和。师退，欲作露布献功。涯瞋目曰：“人以利而退其师^①，又儿弄主上，何露布为？”似道怒，挝杀之。其母闻之曰：“儿以直死，我则不辱，可以报先君矣。”亦自沉。

明

萧鸣甲 字尔先，司成良有从子。万历甲辰进士，令平湖，报最，擢户部主事。时魏广微以同年欲引援入党，鸣甲坚谢。广微遂衔之。出督甘肃军储，久之，移四川右参政。丁忧，起补河南，擢右布政，寻引退。未几，以原官征入覲。归抵顺德，流贼突至，与同里通判刘亮佐骂贼被杀。

胡维昌 字曰俞。万历乙卯举人。甲申，左镇跋扈，剽劫村落。昌率众御之，多所全活，卒为乱兵所执，骂不绝口而死。

朱祚宏 字千台。万历戊午乡试〔中举〕^②，授梁山令，以卓异迁合州牧。时献贼入蜀，宏有御寇功，晋川东兵备副使，镇归州，后为献贼余党崔洪英所执，不屈而死。子国俊历二十年乃扶柩归。

谢淳培 字应侯，江夏人，著籍汉阳。天启甲子举人，博学工文，著述甚富。癸未五月，献贼陷会城，执之，不屈，遂遇害。

吴畅春 字梅初。崇祯八年，任潜山县天堂寨巡检。时贼氛甚炽，天堂为

①“人以利”上，万历《汉阳府志》“人物志·江涯”有“啖”字。

②“乡试”下，当脱“中举”字。





江皖障蔽，畅春造器械，积糗粮，练乡勇，据岩险，誓以死守。时阁部史可法备兵安庆，知畅春贤，驰札慰劳，畅春感激自命。贼犯乾坂，督兵拒之，中二矢，斗益疾。贼欲走金钟潭，闻路断，大惧，宵遁。明年二月，贼掠英山，逼天堂，畅春结草千束，深夜举火为疑兵，贼复惊退。可法手书深嘉之，畅春叹曰：“此一腔血，故当为知我者洒也。”丁丑春，劲贼十余万漫入潜，畅春再战再捷，相持久之，贼复诱战，奋激陷伏中，犹手刃数贼，力屈被执，遂遇害。事闻，赠迪功郎，祀潜山名宦。

王会篇 字治征。崇祯丙子举人，任武昌府教授，海诸生以忠孝为先，贫者资以膏火。会猷贼将逼城，或劝遁去。会篇慨然曰：“官无尊卑，食其禄者死耳”。城破，遣子澹从濠出，合门三十余口殉难。澹甫十龄，逃至黄州，遇老儒询知，泣曰：“此吾恩师子也。”留抚数岁，归入府庠。

国朝

罗鸣序 字怀彝。幼慧，年二十六举于乡，屡上公车，不第。甲辰，循例试用黔省，历令锦屏、遵义，升麻哈州牧，署黄平篆。黄平兵单城薄，鸣序详请增兵，不获。丙辰，苗叛迫城，鸣序督兵死战，矢尽力穷，城陷。鸣序曰：“嗟乎，守土而不能守其城，如皇恩何？今日之事，惟有城存与存，城亡与亡耳。”即解印绶，遣小吏王世超问道送省，与幕友陈宪缢于玉皇阁。把总黄进忠及小吏数人、州生员初震、周大任两家数十口皆死之，时四月二十七日子时事也。贼平，始得遗尸。经略张公广泗闻于朝，赠葬祭，赠参议道，荫一子入监。

汉川县

晋

朱伺 字仲文。少为吴牙门将〔陶丹给使〕^①，吴平，入晋，为〔群〕〔郡〕将督^②。平张昌之乱，随陶侃破陈敏，又随陶侃讨杜弢有功，别将击陈声于董城，平之，累功封亭侯，加广威将军，领竟陵内史。杜曾反，伺守杨口垒以拒之。垒陷，伺带重伤从水底潜出得免。曾使人招之，伺答曰：“贼无白首者，吾今年六十余，不能复与汝作贼。”退还甌山，竟以战创卒。即葬于甌山下。

宋

党仲升 金人围安陆，游骑掠汉川。仲升与同邑赵观、许〔高〕〔嵩〕保

①《晋书·朱伺传》“牙门将”下有“陶丹给使”四字，是。

②《晋书·朱伺传》作“为郡将督”，是。



守南河^①，逆击斩其先锋。遣死士焚战舰，昼夜力战，金人大败。仲升夜劫寨，斩首千余级，中流矢死。赠修武郎，官其后。

黄陂县

明

丁普郎 洪武初，征陈友谅，普郎从，授行枢密院同知。与谅战，身被十余创，首脱，犹执兵若战状，直立不仆。太祖定鼎，赠柱国上将军、济阳郡公，从祀康山忠臣祠，世袭千户，祀乡贤。

邓 鉴 永乐庚子举人，初授广东盐运提举，寻迁光禄署丞，从英宗北伐阵亡。景泰初，赐勅略曰：“陷于战阵，劳苦可悯，良切朕心。”录其子为裕州守，祀乡贤。

熊烈献 字无竞。以选贡倅济南，时流寇猖獗，兵有哗言，献多方抚绥，军乃用命。兼摄篆德州，坚守，城不可拔。济南复警，兼程而进，缒入城，粮尽，内溃，死。子三，从死者二人。

张国勋 字伯明。由明经授应城训，值献贼迫城，众谓勋曰：“公无城守责，盍避之？”勋不听，乃与邑令设奇堵截，亲冒矢石，守三月，粮尽城陷，勋从容入斋，著朝服北面再拜曰：“吾得从二祖列宗于地下矣。”遂抱先圣木主，骂贼请死。贼焚文庙，投公烈焰中。忽雷震，贼遂惊散。子世佑，年十五，闻变，截指血诣阙上疏。崇祯十二年，诏谥忠烈，崇祀名宦乡贤，荫一子，衣巾奉祀。

周正应 字思怙。天启辛酉乡举，令霍丘。霍陷于贼，公至，招徕劝垦，浚城隍，聚乡勇，数岁屡却贼，贼不敢逾霍。节钺直指交荐公。会母张氏病，给假归日，霍民如失慈母。其弟昌应以庚午榜令川彰明，亦辞官回籍。值闯逆逼京，怀宗殉国，公兄弟鬻产募士讨贼。乙酉，自成逃秦入楚，遣人招公。公斩其使，贼遂围公水寨。公弟康明有文武才，率乡兵杀贼数百。贼益兵困之，寨陷，贼执康明妻。康明怒跃入贼阵，立斩贼，并其妻。公骂贼不屈，贼丛槊刺之。公及昌应引佩刀自刎，公配段氏奉其姑投水而死。忠孝节烈萃一门也。

孝感县

唐

张 忭 张巡裨将也。尹子奇围睢阳，巡使忭如彭城许叔冀求救。冀不应，

^①“高”，当为“嵩”之误。





又副南霁云溃围告急于贺兰进明。明无出师意，爱忤及霁云勇，欲留之，为大飧，乐作，霁云泣，拔刀断一指，以示不留。忤亦断一指，竟不食，归报。及城陷，忤与霁云等三十六人俱不屈死。数日，忤见梦家人曰：“吾得请于帝，为南岳司录，行人间赏罚。”未几，进明暴死若震。

明

傅如圭 字元锡。时特行保举法，抚按以如圭应诏赴部试，授知县，移家武昌。癸未五月，献贼陷会城，如圭大骂死。子：邦霖，官生；邦贞，楚国宾，同殉难。

邓谦 字少予。崇祯戊戌进士，授大理评事，历山东粮储副使。己卯，流贼破城，帅所领血战，手杀数人，与季父有正同被害，一时族戚从死者四十六人。事闻，赠光禄寺卿，荫一子，赐祭葬，崇祀乡贤。

程良筹 字持卿。天启乙丑进士，授行人，迁吏部文选司员外，见忤时相，遂削籍归。时四方盗起，良筹练义勇，讲守御，乡里赖之。崇祯癸未，流寇陷荆襄，楚豫瓦解。筹同参政夏时亨立寨白云山，贼伪将来攻，率乡兵与战四十日，走之，遂克复孝感、云梦。俄贼众大聚，受困于白莲寨。寨溃，被执，不屈死。事闻，赠太常少卿，荫其子，崇祀乡贤。

舒显应 字孟锡，孝感人。任东乡令，历凤翔知府，归里。癸未，避献贼乱，居武昌。城陷，被创死。显应性耿介，寡交游，独与杨忠烈友善。忠烈死，哭而殓之。

程道寿 字应上。以明经令来安，多善政，旋解绶归。崇祯癸未，贼陷楚北诸郡邑。道寿结乡勇抗贼，杀其掌旅。后被执，问谁杀掌旅者，寿曰：“老夫也。”贼怒杖之，不死，系狱，令为书招降白云寨。寿骂曰：“吾恨不能助白云灭汝朝食，何招也？”遂遇害。事闻，赠太仆寺丞，崇祀乡贤。

刘申锡 字尔受。天启甲子举人，崇祯末，寇乱，申锡于二郎畈立寨，纠集乡勇保聚，旋为贼困，寨破被执，磔于市，骂不绝口。事闻，赠知州，荫其子淳。

论曰：昔宋儒谓燕丹之刺秦为挑衅，屈原之沉〔汪〕〔江〕为过激^①，岂笃论哉。必以此为过情，将世之苟且全躯、保妻子者，是为人臣之则乎？故阔迂之论，有时而隳志士仁人之心者，此类是也。昌黎之颂伯夷曰：“昭乎日月，不足为明；萃乎泰山，不足为高；超乎天地，不足为容。”所以褒忠者至矣。今一

^① “沉汪”，当作“沉江”。



郡忠义炳炳麟麟者，若而人或为常山之舌，或为太尉之头，事各不同，要其劲节高标，皆卓卓乎与两间无终极而长存也。昔许世子不尝药，赵盾未出境，大圣人笔削间有至意焉。故曰，微《春秋》，乱臣贼子接迹于后世矣。





《汉阳府志》卷之三十六 人物〔七〕

《孝子志》序

光四海，格神明，孝之时义大矣。今天子至德锡类，俾直省节孝崇祀得附学宫，盖以百行之原，固庶政之所当先也，尚有典型，辉生金管。

作《孝子志》。

孝子志

汉阳县

明

王 化 字廷宣。以贡士官孝丰教谕，力持正论，士风赖之。正德初，汉阳火，化以亲柩在堂，哭祷于神，火遂止。学使蔡潮以“孝行感应”表其门。

唐 宾 母病，割左臂及胸肉为羹救愈。知县董毅旌其门。

朱 襄 字子皋。御史衣之弟。母黄氏病亟，襄割股为汤，饮之而愈。母复病，襄为文告神，请以身代，病亦愈。书其室曰：“人能以爱子之心爱父母，则无往非孝矣。”后襄卒，乡人祠焉。

萧士美 江西人，侨居汉阳之文寺山。万历十年，父沐病泄，士美割股和羹进之而愈。

高应元 万历初，割股以疗母疾。

刘树范 树骏 母李氏遇乱死节，二子俱以身殉焉。

曾 松 汉阳府吏也，割肉以愈母疾。上官嘉之，后授高安主簿。

屠奏圣 母卢氏病笃，割股以进，病寻愈。

瞿成龙 割股愈亲，咸称其孝。

邓禹缙 字云起。郡庠生，父正谦疾笃，缙割股和羹以进，父病旋愈。督学以“纯孝格天”旌之。



国朝

徐成质 字鼎文。少时事祖母李极孝，会邻居火，父柩在堂，将延住宅，质计无所出，横卧火中，会救得免，柩亦无恙，时以为孝感所致。康熙己卯，中武乡试，由四川守备升建武游击，兼摄永宁、江安营务，开谕苗顽，戎政整肃，且洁己恤军，不辞劳瘁，以疾卒于官。蒙赐帑金归葬。

黄金阶 事亲至孝，母病，祷神求代，遂获痊。及母没，手刻像，奉事如生。庐墓六年，有白鹇来巢、灵芝五茎之异。有司日馈薪米，学使王琯拔入郡庠。康熙四十四年旌。子仪。仪父病，泣跪医前求救。父死，贫不能葬，守柩哀号，三年如一日。既葬，庐墓三年，夜有巨蟒护其庐墓，田所植瓜，一蒂二实。仪父子两世皆孝，乡人名其里曰“孝子里”。雍正元年旌。

曾思谋 性至孝，夏逆告警，思谋独与母行。贼执其母，思谋泣以身代。贼刃其臂，深寸许，哀恳不已。贼义而释之。母没，庐墓三年。父公语遭疾，思谋朝夕祷神，愿促己寿以延父年。已而父瘳，思谋年三十一卒。雍正九年旌。

李廷梓 字皇柱。天性孝友，事嫡母，先意承欢，竭力以供甘旨。母病，侍汤药，衣不解带。歿后，哀毁骨立，庐墓三年。生母张因兵乱逃散，廷梓遍访于湖南、江西，备尝艰苦，后十年得之彝陵尼舍，迎归奉养，十八年乃卒，（问）〔间〕里称孝^①，人无间言。乾隆元年旌。

项大德 字立上。成都公项诚之二子，天性孝友，母病，割股，因致疾殒，时年二十六岁。刊有《梯青集》问世。

王天一 其父立功曾贸易滇黔，复至水西国，去家数十载。天一年渐长，语及父，辄流涕，每欲往寻，以道远无资，逢人哀诉。会有秦商怜其诚，携往滇中，因抵水西。关隘险峻，艰苦万状，竟达父所，相见痛哭，扶持同归。抵家二岁卒，天一哀毁逾常，未几，亦得疾终。

汉川县

明

熊开泰 邑庠生，父兆卧疾，泰割腕肉啖之而起。

何源恒 性笃孝，二亲亡，俱庐墓终制。幼聘妻而瞽，不毁前盟。及妻死，誓不再婚，当事旌之。

^①“问”，当为“间”之误。





岳之屏 汉川庠生，事母欧阳氏必诚必敬。母病，遽斋戒吁天，愿以身代，感格果愈。教两弟及子孙皆成名。

国朝

顾膺历 庠生，侍御如华之父。亲死，庐墓六年，又分田赡弟，人称孝友。

汤大廉 字顽夫。邑廩生，性至孝，父歿，痛不欲生，勺水不入口者三日。母强起之，乃勉进糜粥，哀号丧次，足不入内庭，口不言外事。及父葬，斩衰草履，匍匐三百里，泣不绝声，道路为之感动。雍正□年旌。

黄陂县

明

邓澄 性至孝，父琮卒，庐墓三年，有鸠巢墓，木产芝一本九茎。邑令吕调阳式其庐，捐贖置产五十亩，以为供给。

李誉 邑庠生，亲亡，庐墓。正德间，贼刘六、刘七过县，士民逃散，誉独蓬首墓侧。贼欲兵之，誉泣曰：“伤哉，庐墓不终。”贼感动，赠一剑去。

陈禹道 早孤，事母甚谨。每念家贫不能供甘旨，辄泣数行下。母歿，哀毁，庐墓三年。

刘春年 事母孝，母病且死，割股进之，苏。及母卒，庐墓三年。子修文，性亦至孝。

萧芳 母吴氏苦节，值病，芳割胸以进。母歿，居丧三载，深墨如一日。

戴君钦 母病，吁神代死。终丧哀毁。父病笃，割股得愈。后歿，合葬，结庐墓所，虎狼过之，狎而不害。

闵启元 母汪氏，病几死。其妻李氏告神，割股得苏。寻复病，启元割股进之，又苏。后李氏病笃，子善保亦割股救母，李亦顿痊。一门三孝，屡被旌奖。

涂远还 方九龄，父病，尝粪味甘，乃割胸以糜进。梦神语曰：“特延尔父一年。”逾年果卒。母病危，佣工置棺，及卒，结草庐墓。有灵鸡、黄犬依墓三载不去，乡人异之。

汪颀 少孤，事母至孝。母卒，庐墓晨昏泣奠，悲号不已。有巨蛇、白兔时近其侧，群鸟绕室相依。弘治间旌，崇祀乡贤。

孙燕贻 母病，亟割股和丸以进，获愈。后数年，母复病，妻潘氏亦割股啖姑，寻愈。



刘一荣 邑富家佃也。父死，无棺，泣谋于妇，鬻身以葬。适有侯信卿者，为之贯田代赎，人两高之。

张朝选 再割股以疗亲，族党欲表其事，选曰：“吾忍以亲病为名高乎？”力辞之。

张天爵 字南湖，性至孝，母病，割股得痊。由是感激学医，常投剂活人。建生洲寺于武湖，为母祈福。崇祀乡贤。

王立份 父病，焚指求代。及居丧，庐墓泣血三年。寇乱，负老母昼夜行八十里，得免于患。

喻秉恂 父病，汤药服食必躬亲，割股和丸，祈以身代。督学杨公旌其门。

林机 性至孝，力耕养亲。亲病，寝食俱废。及卒，庐墓三年，哀号如一日。

甘大华 幼丧父，事母最孝。母病，割股、尝粪。既丧，庐墓哀毁。

乐文粹 性笃孝，侍母疾，不解衣。母卒，泣血，欲结庐于墓。直指李公表其门曰“纯孝”。

喻松 两割股以疗亲，事继母如所生，当事屡旌之。

张世祐 字公望。庠生，父国勋以广文殉难。祐年十三，觅父尸不获，号哭欲绝，因断一指，刺血草疏，诣阙陈情，得旨赐谥予荫。闾党称其笃孝。

易楚亨 母张氏病剧，亨泣祷于城隍，割股和羹以进，遂苏。数年，母复病，亨又割股疗治，得延二载。邑令嘉奖，请给冠带。

胡汉藩 性至孝，母杨氏病，吁天割股，母病寻愈。后卒，庐墓三年，哀毁骨立，邑令旌之。

孝感县

汉

董永 青州千乘人，早丧母。灵帝中平中，黄巾起，渤海骚动。永奉父来徙。家贫，佣耕以养。父歿，不能葬，贷钱里富人裴氏，约身为奴偿之。既葬，如裴氏，道逢一妇人，求为妻。永曰：“吾有父而不能养，父歿而又不能有其身，吾应愧死，奈何屈辱？”妇为恳款慰之，永谢不可得，乃与俱往。裴诧曰：“许一人鬻，而益以二乎？妇何能？吾实不能荒饱若。”永曰：“妇解织。”裴难之曰：“能为我织绢三百缞，免若仆。”妇遂索丝，才弥月，事竣。裴大惊异，放永归。妇中途谓永曰：“我天孙也，无阅人间世之理。天帝感君纯孝，而以戟然一身埤益裴富人。





富人实勤惨作，子何以偿？故不爱余一人经纬取而代之，以明冲漠之无所负子也。吾不能久稽报命。”言讫，腾空去。南宋以故名其地曰“孝昌”。永歿，葬父墓侧。相传董家湖旧有裴港，即其处也。

崇祀乡贤。子：仲。

季汉

孟宗 字恭武。少从南阳李肃学，其母为作厚褥大被。或问故，母曰“小儿无德致客，学者多贫，故为广被，庶可得与气类接也。”其读书，夙夜不懈。肃奇之曰：“卿，宰相器也。”

初为骠骑朱据军吏，将母在营，既不得志，又雨夜屋漏，因起涕泣以谢其母。母曰：“但当勉之，何足泣也。”据亦稍知之，除为监池司马。自能结网，手捕鱼，作鲊寄母。母因以还之曰：“汝为渔官，而以鲊寄我，非避嫌也。”迁吴令，时皆不得将家之官，每得时物，必以寄母，常不先食。嘉禾六年，制：长吏在官，不俟代而遽奔亲丧者坐死。宗闻母亡，犯禁委官。已而自拘武昌听刑。陆逊陈其素行，因为之请。孙权乃减死一等，复使为官。永安五年，自光禄勋除右御史大夫。宝鼎三年，拜司空。建衡三年卒。

《楚国先贤传》：宗母嗜笋，冬节将至，时笋尚未生。宗入竹林哀哭，而笋为之出，得以供母。皆谓至孝所感。

按：诸书皆云：孟宗，江夏郡鄢人。《前汉·地(里)[理]志^①》：江夏郡有鄢县。《史记》塞鄢阨即此。正义云：申州罗山县本汉鄢县。夫今之江夏县，非古之江夏郡也。汉江夏郡置于今之云梦县北，三国吴始分置武昌郡，其附郭邑至隋始有江夏之名，乃汉沙羡县地。今江夏之非古鄢县，明矣。孝感北接罗山，其东北境即汉鄢县地。陈士元以宗为孝邑人，未为无据。且邑中古迹有哭竹港，尤为凿凿。查《通志》改入江夏，今仍依《县志》录载，存考。

明

吴伯璋 字重器。郡庠生，母张病，稽颡北斗，愿以身代。母卒，擗踊绝粒，几灭性。既葬，结庐墓左，植松百余株，板枝号泣。人哀之，名曰“孝松”。后以贡历官江西德化县知县。

万以忠 字大孚，御史言扬子。父病，服食卧起必躬亲，及父卒，寝草枕块，庐墓三年。

^①“里”，当为“理”之误。



李惠 早丧母，与父同卧起，冬抱父足眠，终身不懈。父患疽，惠吮之得愈。事闻获旌。

陈霄 继母妬悍，霄克尽诚孝，母卒感悟。及母歿，哀毁庐墓，邑令薛奖重之。

陈学曾 生有至性，岁饥，随父贷米戚家。主人轻之，曾忿曰：“我弗力耕，使若辈辱翁耶？”却之，竭胼胝为养，退哺糠核，自得也。继母待之甚严，偶有挞詈，曾愉色长跪自责，俟怒霁，得善言，然后起。父穗尝被诬而逃，曾身请狱，经年乃得出。诸弟就外傅及考试，曾每不避风雪，负米蔬以给之。

傅秉哲 幼丧父，事母陈极孝。陈晚岁病目，哲朝夕扶抱。母年至九十卒，哲时已六十，孺慕哀号，庐墓终身。邑令礼以乡宾。事闻，旌表。

施文星 农家子，素以孝闻。亲歿营葬，掬土成茔，庐其侧。有青蛇日绕一匝，邑人传为纯孝所感。天启五年旌。

童儒 字道儒，割股愈母。母卒，庐墓三年。

刘廷望 母病笃，割肉、割耳煎汤以进，母食之遂起。崇祯十四年旌。

汪之滨 年十五，丧母，擗踊哀毁。家贫，佣工养父。父疾剧，誓以身代，侍汤药，衣不解带者，数年如一日。父亡，庐于墓侧，每风雨雷电，绕坟号泣。

国朝

程良符 以恩选知天台县，多惠政，升广德知州，入为户部郎中。丁父忧，哀毁骨立而卒。里人多称为死孝。

王之通 性纯孝，父病，割股以愈。

郭亮 有至性，幼读书通儒。家贫，事二亲必尽欢。母徐病，泣祷于神，愿以身代。及母愈，父病，亦泣血祈祷，头目尽肿，亲歿皆为庐墓三年。

陈孝子 名海，楚孝昌北泾河人也。无门阀，绝生产，不识文字，盖街头用汲供人厨爨者也。

孝子生而颀诚温蔼，少孤，依母氏为命。年甫冠，百计维所以事母者，不得爰肩一桶。日引水百数十担，值可八九十文。晨兴，必请母所欲，母不许，即多惶蹀状。诸衣饰鱼肉、菜蔬酒果，但母嗜好所在，必竭肩头所得者，各置少许以供母。或怒其费，欲铢累为成室，必婉为譬解。里中重其诚笃，宴会馈问，乐招之役，给以饮食，必携归奉母。人怜其志，遗之者殆倍。且朔望必奉母上坐，叩头成礼。一茶饭，必额手以进，篝灯月下，多方歌笑，以博亲欢，母竟忘其





为佣人之母。如是者，盖数十年如一日。逮母病，进汤药必跪，血泪汪汪下。及歿，附身、附棺竭蹶者万方，必经纪如式。葬讫，每食必诣墓所祭，祭必哭，虽盛寒暑不倦，大风雨必往，淋立雨中。间有樵牧者蹂其墓，必痛哭以请，人亦不忍近。盖生养葬祭，大概如此。

孝子年六十寿日，邀里中恂谨父老为称觞，半酣，请曰：“吾生平无状，佣工终母养，吾事已毕，吾身后愿以相属。”僉曰：“诺。”用是从容着衣履，启棺入就枕。半晌，僉呼不应，连呼又不应。孝子竟撒手去矣。

后数年，而有副车万君灏者独坐假寐，恍惚间，庙貌巍然，门悬金字额曰“大孝陈某”。副车时为余言衢坊古刹间，并志以笔。邑令杨君芬勒石纪其事。

孝子讳海，康熙初年人，墓在北泾之西北冈。

太守屠司垣曰：吾邑汉时有董永者，邑且以是得名。陈孝子殆其踵兴者欤？迹其所为，亦随分量以竭本真，了无惊人处，乃手舞足蹈，罔非至性，而士夫不能没其行，天地且为发其秘。呜呼，若陈孝子者，可以风矣。

悌弟〔附〕

国朝

刘再传 字乃文，黄陂县人。为汉邑文庠，性刚正，居家孝友。康熙己酉冬，有堂兄刘养度白日为群盗所执，闻信仓卒奔救，愤不顾身与群盗抵斗，力护兄难，遂遭贼害，越一日而亡。乡党叹其捐躯就义，咸称述未泯。

忠义仆附

明

萧効用 汉上诸生萧尧案以贵雄于乡，为豪猾孙景三所陷，修沟洫小嫌，遂成大狱，诬以杀人。郡守徐公竟陷不察，而置之法。值巡按大猷之日，其仆效用左手列冤状，右手刎其喉，血射如注，刀冲而人立，竟脱主死，而景三亦坐罪。事亦奇矣，当时文士费尚伊为之记，万历间汉川文人尹迥子长为传，周命作五言长古以歌咏之，词繁不悉载。

朱继登 萧瞻圣乳媪之夫也。瞻圣十余岁，独行田中，遇闯贼逸卒，执而

①本志为《孝子志》，“悌弟”内容仅此一条，故补“附”字。



欲杀之，哀号求免。继登匿傍舍，闻声赴贼所，甘代死。贼令之跪，且曰：‘将军万勿杀我又杀儿也。’言竟，刀下，头断矣。瞻圣得释，觅其尸瘞之。

国朝

严发 国学生孙圻仆。圻父抱疾，发潜割左股以进，病者挥瓯，覆不成饮，复烹右股，人无知者，随命延医者章怡清。时水大发，跣足而涉，创口为风伤，病者起，而发几不救。怡清悯其义，百计疗愈之。后十二年卒，时圻父及怡清已前亡，临绝，喃喃言在其旁云。

论曰：羊乳乌哺，异类不泯至情，矧率性修道、备五常而饬百行者乎！乃贾生敷陈《治安》，则有箕帚耰锄之诮，岂谓人性殊欤？亦指秦俗流失之故耳。汉郡自中平以来，征之往籍，或力竭于庭帟，或服勤于早暮，甚至割体以瘥疾病，间关而觅逮养，事迹各殊，均亦有足取者。夫蛄蝼思亲，蓼莪陨涕，缠绵悱恻，仁人孝子所为极不忘也。孝固难言之哉！差足以见天性之未尝一人而泯矣。





《汉阳府志》卷之三十七 人物〔八〕

《选举表》序

敷奏明试，千古选举之权舆也。举皋陶、举伊尹，咸选于众而得之。登明选公，可无遗恨矣。《周礼·大司徒》：“以〔乡〕三物教万民而宾兴之。”^①是故乡举里选，名与实副，其幸进者无闻焉。后世荐辟失真，而制为科目，萃天下之英俊，毕收于词章记诵间。高贤大儒、名卿哲士出其中，即毁方跃冶者亦出其中，彼暗里摩挲、计偕释褐而来者，果拔十得五否邪？近日乡、会二试外，更有选拔胄监、贤良方正、好善乐施诸途，虽掾吏资深亦得升为选人，搜罗道广，连茹汇征，野无遗贤，其在斯时乎。

作《选举表》。

选举表

朝代附取士制

隋

开皇□□年始置进士科，专以文词试士。士得投牒自进。

以上科名无考。

唐

取士之法有三：由学馆曰生徒，由州县曰乡贡，皆升于有司而进退之，此岁举常例。其天子自诏者曰制举，以待非常之士。武后天授元年，策问贡士于洛阳殿。此殿试之始。

以上科名无考。

^① “以三物”，《周礼》作“以乡三物”，是。

^② 原书为表，此次整理改为散文表述。卷之三十八、三十九同。



宋

有进士、有明经诸科，常选外又有制科。太宗太平兴国九年，进士始分三甲，锡宴琼林苑。淳化三年，始糊名考拔。真宗大中祥符元年，一甲始赐袍笏。仁宗嘉祐二年，亲试举人，凡与殿试者，始免黜落。英宗以间岁贡士法不便，诏三年一贡举。神宗用王安石言，除去声韵对偶之文，罢诸科，令士各占一经，《易》、《书》、《诗》、《周礼》、《礼记》，兼《论语》、《孟子》，应试者通经有文采，乃为中格。此制义之始。熙宁六年，殿试分五甲：一甲、二甲赐及第，三甲赐出身，四甲同出身，五甲同学究出身。

进士

宋

度宗咸淳□□年□□榜

汉阳 张 锡 翰林学士。

汉川

黄陂

孝感

以上可考者一人，余无考。

元

仁宗皇庆二年，诏行科举，八月乡试。明年二月，会试京师。中选者亲试于廷。延祐元年二月，会试，蒙古、色目人，第一场经问五条，《学》、《庸》、《语》、《孟》中设问，用朱氏《章句集注》。第二场，时务策一道，限五百字以上。汉人、南人第一场，明经经疑二问，《学》、《庸》、《语》、《孟》内出题，并用朱注，复以己意结之，限三百字以上。经义一道，各治一经，《诗》主朱注，《书》主蔡注，《易》主程、朱传，三经皆兼用古注疏，《春秋》用三传、胡传，《礼记》用古注疏，限五百字以上。第二场古赋诏诰一道，用古体，章表内科一道，用四六古体^①。第三场经史时务策一道，限一千字以上。蒙古、色目人，愿试汉人、南人科目，中选者加一等注授。蒙、色人作一榜，汉、南人作一榜。第一名赐及第，从六品。第二名以下及第，皆正七品。三甲皆正八品。

^①《元史·选举志》此句作：“第二场古赋诏诰章表内科一道，古赋诏诰用古体，章表四六，参用古体。”





明

太祖洪武三年庚戌，诏设科取士，各省皆三年一举。四年辛亥，策试进士于奉天殿，赐吴伯宗等一百二十人及第出身有差。按伯宗名拓，以字行，系江西庚戌解元。是科高丽生三人与试，金涛中式，授安丘县丞。以不通华言，厚给路费，送还本国。六年，以有司所取多后生，文虽可采，不能措诸行事，诏罢科举。十七年甲子，诏复设科举，颁行成式，凡三年大比子、午、卯、酉年，乡试辰、戌、丑、未年，会试以二月初九日、十二日、十五日为三场，所考文字与乡试同。

十八年乙丑科丁显榜

孝感 刘文贵

定格分三甲：第一甲取三名，第一名从六品，二名、三名正七品，赐进士及第。二甲从七品，赐进士出身。三甲正八品，赐同进士出身。

二十一年戊辰任亨泰榜

二十四年辛未许观榜

二十七年甲戌春张信榜

三十年丁丑陈郊榜

取五十一人，西北无一中式者，命再考落卷中文理长者，亲赐策问，取韩克忠等六十一人，皆北人，时谓之春夏榜，又谓之南北榜。

建文三年庚辰胡靖榜

靖本名广，以与汉臣同名，更名靖，后仍名广。

成祖永乐二年甲申曾棨榜

孝感 张 义

按：癸未年礼部上言，去年兵革仓卒，未及举行乡试省分，今秋八月补试，故会试改于甲申。

四年丙戌林环榜

汉阳 易思义刑科给事中。

九年辛卯萧时中榜

按：己丑三月应廷试，因帝幸北京，辛卯乃还，始殿试。



十年壬辰马铎榜

孝感 姚 崇知州。

十三年乙未陈循榜

十六年戊戌李骐榜

十九年辛丑曾鹤龄榜

二十二年甲辰邢宽榜

汉川 胡 敬浙江道御史。

仁宗洪熙元年乙巳诏会试，分南北取士。

宣宗宣德二年丁未马榆榜

五年庚戌林震榜

八年癸丑曹鼐榜

英宗正统元年丙辰周旋榜

四年己未施槃榜

七年壬戌刘俨榜

十年乙丑商辂榜

十三年戊辰彭时榜

汉阳 赵 蕃部主事。

孝感 张 璫

景帝景泰二年辛未柯潜榜

五年甲戌孙贤榜

英宗天顺元年丁丑黎淳榜

四年庚辰王一夔榜

八年甲申彭教榜

宪宗成化二年丙戌罗伦榜

汉川 成 实礼科给事中。

五年己丑张升榜

八年壬辰吴宽榜

汉阳 陈 福工部主事。





黄陂 朱庆云行人。

十一年乙未谢迁榜

十四年戊戌曾彦榜

十七年辛丑王华榜

孝感 丘 相余干知县。

二十年甲辰李旻榜

汉阳 胡 金刑科给事中。

孝感 王 琰山西左布政。

二十三年丁未费宏榜

孝感 严 正卫辉知府加参政銜。

孝宗弘治三年庚戌钱福榜

黄陂 彭凤来御史道。

孝感 杨 璋四川按察使。

六年癸丑毛澄榜

九年丙辰朱希周榜

汉阳 马文盛成都通判。

余 正华亭知县。

黄陂 李 诚广东参政。

十二年己未伦文叙榜

黄陂 陈伯安山西副使。

十五年壬戌康海榜

十八年乙丑顾鼎臣榜

武宗正德三年戊辰吕柟榜

六年辛未杨慎榜

黄陂 傅凤翔县《志》遗。

孝感 童 纶富顺知县。

九年甲戌唐皋榜

汉阳 傅 桂云南道御史。

戴 金兵部尚书。

十二年丁丑舒芬榜

汉阳 朱 衣江西道御史，提督南直学政。



孝感 严志迪南京大理评事。

十五年庚辰杨维骢榜

武宗南巡未廷对，至辛巳世宗登极，五月始殿试。

世宗嘉靖二年癸未姚涞榜

汉阳 董寅郎中。

五年丙戌龚用卿榜

八年己丑罗洪先榜

十一年壬辰林大钦榜

十四年乙未韩应龙榜

十七年戊戌毛瓚榜

二十年辛丑沈坤榜

汉阳 张登高

黄陂 王霁行太仆寺卿。

董威都御史。

二十三年甲辰秦鸣雷榜

是科已定吴情第一，因读卷官北音，“吴”字读“无”。帝曰：“‘无情’岂宜居第一。”遂置第三。又因幡结“雷”字，乃拔鸣雷云。

汉阳 朱宠陕西道御史。

王秩提督四译馆，太常寺少卿。

二十六年丁未李春芳榜

二十九年庚戌唐汝楫榜

汉川 郑栋太仆寺卿。

黄陂 邓佶云南府知府。

三十二年癸丑陈谨榜

汉阳 曾廷之浙江金事。

蔡结行太仆寺卿。

三十五年丙辰诸大绶榜

黄陂 蔡完御史。

三十八年己未丁士美榜

孝感 程学博太仆寺卿。

四十一年壬戌申时行榜





四十四年乙丑范应期榜

孝感 刘伯生主事。

穆宗隆庆二年戊辰罗万化榜

孝感 刘伯燮按察使。

五年辛未张元忬榜

汉川 周嘉谟太子少保，吏部尚书。

尹良任浙江道御史，巡盐山西。

神宗万历二年甲戌孙继皋榜

汉阳 李宗鲁广东金事。

汉川 尹应元金都御史，巡抚浙江。

五年丁丑沈懋学榜

八年庚辰张懋修榜

汉阳 萧良有国子监祭酒。

萧良誉广西提学副使，河南参政。

孙 瑀贵州副使。

十一年癸未朱国祚榜

十四年丙戌唐文献榜

汉阳 常道立浙江副使。

黄陂 张 涛金都御史，巡抚辽东。

十七年己丑焦竑榜

二十年壬辰翁正春榜

二十三年乙未朱之蕃榜

黄陂 张大猷山西右布政。

二十六年戊戌赵秉忠榜

黄陂 万一奇开封推官。

二十九年辛丑张以诚榜

汉阳 萧丁泰贵州左布政使。

秦聚奎太常寺卿。

黄陂 胡宾臣翰林检讨

王思善未仕。

孝感 傅淑训户部尚书。



三十二年甲辰杨守勤榜

汉阳 萧鸣甲河南左布政使。

黄陂 黄彦士御史。

张季彦兵部主事。

吴之皞大理寺少卿。

三十五年丁未黄士俊榜

汉阳 吴嘉谟扬州知府。

三十八年庚戌韩敬榜

孝感 程 註太子太保，工部尚书。

四十一年癸丑周延儒榜

四十四年丙辰钱士升榜

汉阳 吴 极广南知府。

孝感 胡其俊潼关副使。

沈惟炳吏部左侍郎。

四十七年己未庄际昌榜

汉阳 李若愚太仆寺卿。

孝感 杨金通礼部主事。

熹宗天启二年壬戌文震孟榜

汉川 王道直兵部左侍郎。

孝感 夏时亨四川参政。

五年乙丑余煌榜

孝感 程良寿文选司员外。

庄烈帝崇祯元年戊辰刘若宰榜

孝感 胡 江扬州金事。

邓 谦山东参议。

四年辛未陈于泰榜

汉阳 戴自成徽州知府。

孝感 程正揆工部左侍郎。

张 淳主事。

七年甲戌刘理顺榜

汉阳 刘成治户部郎中。

孝感 鲁 鉴太仆寺卿。

吴国斗户部主事。

十年丁丑刘同升榜

汉阳 余士瑞九江推官。

邓林枝溧阳知县。





许成钦丹阳知县。

孝感 鲁近暹浙江参议。

十三年庚辰魏藻德榜

汉阳 刘定勋吴县知县。

艾吾鼎特赐进士。

十六年癸未杨廷鉴榜

孝感 严正矩户部左侍郎。

国朝

世祖章皇帝顺治三年丙戌傅以渐榜

四年丁亥吕宫榜

汉川 龙纳铭都匀知府。

六年己丑刘子壮榜

汉阳 熊伯龙国子监祭酒。

张三异绍兴知府。

刘顺昌广宗知县，降按察使知事。

易道沛刑部郎中，降都察院经历。

汉川 顾如华京畿道御史，浙江参议。

黄陂 胡明垣兴屯同知。

杨兆仪莆田知县。

屠斯立特赐进士。

吴正治太子太傅，武英殿大学士。

谭凤正大理寺右评事。

王 辛顺天贯，黄陂人。

九年壬辰邹忠倚榜

汉阳 李昌祚大理寺卿。

孝感 杨绍光副使。

徐升长葛知县。

朱组绶肤施知县。

李奇生南靖知县。

汤衍中中书舍人。

余崛起都昌知县。

十二年乙未史大成榜

汉阳 堵 嶷陕西提学金事，未任。

孝感 沈 逵惠州推官。

朱际明中部知县。

胡 韵推官。

十五年戊戌孙承恩榜

汉阳 范其铸潞州知县。

江殷道江西副使。



张旺龄孝丰知县。

汪以淳文选司主事。

王世显永嘉知县。

孝感 熊赐履大学士。

熊赐珩侍读学士。

梁朝柱新昌知县。

严士骑华亭知县。

陶谕岚州知州。

傅 铨海阳知县。

屠 溶古田知县。

十六年己亥徐元文榜

汉阳 卢乾元翰林院庶吉士，改刑部员外。

项一经黄陂贯，汉阳人，贵州按察使。

杨 焘龙门知县。

汉川 李士竝云梦贯，汉川人，旌德知县。

黄陂 陈光龙推官。

姚缔虞副都御史，巡抚四川。

谭忠义知县。

叶 封主事。

孝感 胡必选桐城知县。

罗 诰

十八年辛丑马世俊榜

汉阳 江 源新河知县。

汉川 汪时泰仪征知县。

孝感 武之亨陕西提学副使。

屠天祐洛阳知县。

熊维祺仁化知县。

圣祖仁皇帝康熙三年甲辰严我斯榜

是榜罢八股，以论策取士。

黄陂 高昌明知县。

孝感 程良惺武缘知县。

六年丁未缪彤榜

汉阳 陈国祝黄冈贯，汉阳人，兵马司正指挥。

九年庚戌蔡启樽榜

是科复以八股取士，乡会仍试三场。

汉阳 瞿懋甲

汉川 葛言颺中书。

孝感 鲁 鏞东乡知县。





十三年癸丑韩炎榜

孝感 程大吕户部主事。

十五年丙辰彭定求榜

孝感 熊赐瓚督部左理事官。

十八年己未归允肃榜

二十一年壬戌蔡升元榜

汉阳 周寅暘

孙 皋中书。

彭 俊宣化知县。

孝感 张象升工部主事。

二十四年乙丑陆肯堂榜

孝感 李殿邦翰林院编修。

二十七年戊辰沈廷文榜

三十年辛未戴有祺榜

汉阳 李 鑽知县。

黄陂 冷宗昱鸿胪寺卿。

三十三年甲戌胡任舆榜

孝感 屠 沂副都御史，巡抚浙江。 胡 璫

三十六年丁丑李蟠榜

汉阳 吴宗丰庶吉士，改大同知县。

汉川 汪培祖知县。

三十九年庚辰汪绎榜

汉阳 吴 镐京畿道御史，汉阳贯，黄陂人。

江 芑云南按察使，福建副使。

四十二年癸未王式丹榜

孝感 涂天相大司马。

四十五年丙戌王云绵榜

四十八年己丑赵熊诏榜

汉阳 张世任江夏贯，汉阳人，岳州教授。

汉川 黄廷贵



黄陂 王肯构於潜知县。

孝感 程大聿工部主事。

王大纶山西道御史。

五十一年壬辰王世琛榜

汉阳 徐永祐武陵籍，汉阳人，古州副使。

汉川 钱 祐中书。

五十二年癸巳，恭遇圣祖仁皇帝六十万寿，特恩开科，于二月乡试，八月会试。王敬铭榜

汉川 王希洪知府。

孝感 屠 洵翰林院庶吉士，彰德知府。

朱 馥和平知县。

程光鄂南昌知县。

五十四年乙未徐陶璋榜

汉阳 张正榜

黄陂 李子吟黟县知县。

五十七年戊戌汪应铨榜

六十年辛丑邓钟岳榜

汉阳 郑佑人知县，改教谕。

靖道谟汉阳贯，黄冈人，庶吉士，改姚州知州。

孝感 夏力恕翰林编修。

夏力中庶吉士。

屠用谦庶吉士，改宁远同知。

世宗宪皇帝癸卯雍正元年特恩开科， 月会试。于振榜

汉阳 夏治源建水知州。

张彦昌知县。

黄陂 刘曰福榕县知县。

陈 惠零都知县。

孝感 刘兴第泗城知府。

陈道凝宁德知县。

二年甲辰陈德华榜

孝感 金 相庶吉士，改紫阳知县。

程光钜浙江参政。

郑登瀛

五年丁未彭启丰榜

汉川 段颖聪主事。

黄陂 张其閔

孝感 王廷鸿庶吉士，改余姚知县。





八年庚戌周霭榜

十一年癸丑金德铤榜

黄陂 向德华固城知县。

孝感 屠祖赉

今上皇帝乾隆元年丙辰 榜

汉阳 刘世佐石泉知县。

宗绍彝上虞知县。

二年丁巳于敏中榜

汉阳 邹召南

张继镜莆田知县。

汉川 程廷栋庶吉士，改户部主事。

四年己未庄有恭榜

汉阳 李芳蕃

李正揆

黄陂 刘定麟

孝感 管二象大理寺司务。

郭 滌

萧惟耀梓潼知县。

李 超

七年壬戌金甦榜

黄陂 李金台翰林院庶吉士。

孝感 夏扶章

夏扶黄

乡试·举人

隋

以文试士，士得投牒自进于有司。

唐

由学馆曰生徒，由州县曰乡贡，皆升于有司而进退之。

宋

有明经诸科。神宗罢诸科，分经义、诗赋以取士。英宗以间岁贡士法不便，诏三年一举。

以上举人科分、姓名俱无考。

元

仁宗时，诏行科举，八月乡试，明年二月会试京师。



黄陂旧《志》载元举人孙用复、保保俱中河南乡试，又载哈直。《黄州府志》又载纳臣。凡四人，俱未详科分，余俱无考。

汉阳、汉川、孝感三县，元中式姓名俱无考。

明

太祖洪武三年庚戌，诏设科举取士，八月初九日试第一场，本经义及四书义各一道；后三日试第二场，论一道；又三日试第三场，策一道。中式后十日，复以五事试之：骑，观其驱驰便捷；射，观其中之多寡；书，通于九流；算，通于九法；律，观其决断。四年辛亥，诏各省开科取士。六年癸丑，罢科举。十五年壬戌，诏设科举取士，三年一试，著为定例。十七年甲子三月，颁行科举成式，三年大比，子、午、卯、酉年乡试，辰、戌、丑、未年会试。八月初九日第一场，试四书义三道，限三百字以上，经义四道，限三百字以上，未能者许各减一道。四书主朱子《集注》，《诗》主朱传，《易》主程朱传，《书》主蔡传，《春秋》主三传及胡安国、张洽传，《礼记》主古注疏。十二日第二场，试论一道，三百字以上，判语五条。诏诰章表内科一道。十五日第三场，试经史策五道，未能者许减其二，举人不拘额数，从实充贡。次年礼部会试，以二月初九日、十二日、十五日为三场，所考文字与乡试同。应乡试者则国子学生、各学生员之学者、儒士之未仕者、官之未入流者，皆由有司申举。罢闲官吏与居父母丧者，娼优之家并不许入试。其中式者，官给廩传送礼部会试。

洪武三年庚戌科、四年辛亥科、五年壬子科俱无考。

十七年甲子科

孝感 刘文贵见进士。

二十年丁卯科

汉川 向 政南京神策卫经历。

黄陂 张益友巴县教谕。

孝感 姚 崇见进士。

张义见进士。

二十三年庚午科

汉川 赵 成高唐州判。

二十六年癸酉科

汉阳 戴景文舞阳教谕。

汉川 毛文郁长寿县丞。





二十九年丙子科

建文元年己卯科

汉川 张汝贤知县。

孝感 谢文焕教谕。

四年壬午科

成祖永乐三年乙酉科

汉阳 余麟户部主事。

易思义见进士。

吴黻州判。

汉川 彭信知县。

曾冕

孝感 鲁哲见进士。

六年戊子科

孝感 崔敏中

九年辛卯科

汉阳 陈载御史。

戴永

林俊知县。

汉川 周豫知县。

高启

十二年甲午科

汉阳 叶茂主簿。

尹思谦州同。

汉川 胡敬见进士。

谢宗善

黄陂 廖文通綦江训导。

王铎户部主事。

孝感 杨荣解元。

陈朝祖

黄诚知县。

龙澍知县。

郭愚县丞。

段思鉴旧县《志》遗，查《德安府志》补。

李盛

赵忠同知。

邓文禄知县。

马骧光禄署丞。

毛翔

孙冕

李德新成都卫经历。

汪敏荆州教授。



十五年丁酉科

黄陂 余 文长汀知县。

孝感 史 贯工部郎中。

周 俨营山教谕。

周 宏

十八年庚子科

汉川 李 必巡检。

岳 珩

陈 迪

黄陂 邓 鉴光禄署丞。

明应春

刘升远巡检。

赵 真广州通判。

徐 裕东昌训导。

二十一年癸卯科

黄陂 鄢 忠华阳训导。

孝感 殷子珩

严 肃

宣宗宣德元年丙午科

汉阳 江 恕知府。

孝感 吴 寅思恩同知。

四年己酉科

汉阳 陈 谟通判。

程 善

谢 宣

七年壬子科

汉阳 李 永

张 黻

祝 凤同知。

魏 忠

江 照

汉川 胡惟学

卢 輿颍州州同。

高 冈

十年乙卯科

汉川 岳 琥南康训导。

黄陂 朱 皞平乐教授。

谢 宪琼州照磨。

英宗正统三年戊午科

汉川 李 宣旧《志》遗，查《通志》补。





黄陂 周子昂福建盐运副使。

六年辛酉科

汉阳 李 暹教谕。

黄陂 王 坤后府经历。

九年甲子科

汉阳 张思齐检校。

孝感 姚 宗

杨 渊教谕。

十二年丁卯科

汉阳 丁秉彝

赵 蕃见进士。

余 懋知州。

吕 智县丞。

汉川 王 谏御史，湖州知府。

岳 楨陇州知州。

孝感 徐 鉴孟县教谕。

张 瓚见进士。

景帝景泰元年庚午科

汉阳 高 铎知县。

汉川 李 宣永州教授。

黄陂 刘 俊

孝感 郑 敏崇庆教谕。

祝子昌浙江海防僉事。

严 敦行太仆寺卿。

李 巽晋州知州。

程 式

四年癸酉科

汉阳 蔡 谧湖州通判。

蔡弘远推官。

黄陂 余 润知县。《通志》作徐润。

郑 玉阶州知州。

杨 瓚东流知县。《县志》遗，查《黄州府志》补。

孝感 耿 聪太平知县。《县志》载聪于本科，以上科五人同载，查《通志》更定。

七年丙子科

汉阳 王 庆知县。

黄陂 方 经泰州训导。

孝感 王 珩知州。

刘 纲钧州知州。

刘 冕崇宁教谕。

柯文显丹徒教谕。



英宗天顺三年己卯科

汉阳 刘 义训导。

程 鹰知县。

陈 福见进士。

汉川 张 俊商城知县。

孝感 史 纶

张 奎中牟教谕。

詹志文合州学正。

六年壬午科

汉阳 李 逊教谕。

李仲良知县。

汉川 雷 声安宁州提举。

黄陂 韩时省

梅 霖南安知州。

孝感 刘 晖长洲知州。

胡承谦教谕。

王 海通判。

宪宗成化元年乙酉科

汉阳 王 瓚州判。

汉川 成 实见进士。

黄陂 郑 宽南昌训导。

朱庆云

四年戊子科

黄陂 熊 弘晋宁知州。

孝感 王 琰见进士。

七年辛卯科

汉阳 黄 训州判。

孝感 严 正见进士。

十年甲午科

汉阳 胡 金见进士。

汉川 李 刚南宁通判。

黄陂 王 统沙宁通判。

孝感 袁 中

陈 晟同知。

成化十三年丁酉科

汉阳 易 东教谕。

汉川 赵 勛湖州通判。

郭 济王府纪善。





孝感 丘 相

十六年庚子科

汉阳 李 芑太和知县。

黄陂 徐 杰任恩知县。

孝感 吴 渊

郭 叶知县。

十九年癸卯科

汉阳 姚 龙理问。

汉川 熊 鉴韶州推官。

黄陂 张克恭户部郎中。

二十二年丙午科

汉阳 陈 玺西充知县。

余 正见进士。

黄陂 方大川

孝感 刘 俊教谕。

孝宗弘治二年己酉科

汉阳 胡廷杰

黄陂 彭凤来

孝感 席 正教谕。

五年壬子科

汉阳 萧 旻大足知县。

黄陂 梅 雪邓州学正。

八年乙卯科

汉阳 赵 进西充知县。

十一年戊午科

孝感 程 鹏

十四年辛酉科

黄陂 邓景春忠州知州。

孝感 杨 瑶

刘 奎庐州同知。

张 定

叶大用知州。

黄彦俊

马文盛见进士。

段 溥崇庆知府。

陈 鸾永宁同知。

陈 琬杭州教授。

李 诚见进士。

杨 璋见进士。

陈伯安《县志》遗，查《通志》补。

童 纶见进士。



十七年甲子科

汉阳 傅 桂见进士。

孝感 张文迪

武宗正德二年丁卯科

汉阳 戴 金见进士。

黄陂 张 纶安宁提举。

雷 寅涪州知州。

刘永贤新野知县。

邓 朴通判。

五年庚午科

汉阳 朱 衣见进士。

董 寅见进士。

李 蔺巴县知县。

汉川 龙 章广州通判。

黄陂 彭祺寿上饶知县。

八年癸酉科

汉阳 陈 播富顺知县。

黄陂 冯 霄沧州知州。

十一年丙子科

汉阳 陈 柏嵩明知州。

汉川 李 猷兖州通判。

黄陂 姜 茂唐县知县。

十四年己卯科

黄陂 刘 恪富川知县。

傅凤翔《县志》遗，查《黄州府志》补。

孝感 严志迪见进士。

郑 翕知县。

世宗嘉靖元年壬午科

汉阳 伍 伟湖州同知。

王 著南丰知县。

彭 钧泌阳知县。

汉川 饶 杰金华推官。

黄陂 侯天奇





四年乙酉科

汉阳 丘凤翔蓬溪知县。

孝感 杨汝荣未仕。

七年戊子科

孝感 杨 睿湖州通判。

十年辛卯科

汉川 尹大本叙州同知。

郭 凤

十三年甲午科

汉阳 傅 兆梁山知县。

朱 襄

黄陂 蔡 完

孝感 汤 星

十六年丁酉科

汉阳 朱 表顺庆通判。

黄坤正

黄陂 吴仲芳

十九年庚子科

汉阳 朱 宠见进士。

张登高太常少卿。

汉川 刘 燧户部员外。

黄陂 任惟贤平县知县。

王 霁见进士。

郑 佶见进士。

孝感 李时芳石屏知州。

刘汝化

徐南州合州学正。

二十二年癸卯科

汉阳 王 秩见进士。

吴 嵩芜湖知县。

黄陂 陶 采四川金事。

孝感 熊 丸

二十五年丙午科

黄陂 杜子乔路州知州。

二十八年己酉科

汉阳 王一麟镇远知府。

曾廷之见进士。



蔡 结见进士。

黄陂 晏应科知县。

三十一年壬子科

汉阳 蔡 几琼州通判。

吴可大

汉川 邓 栋见进士。

黄陂 丁惟诚工部主事。

孝感 万 珠大宁知州。

程学颜太仆寺丞。

三十四年乙卯科

汉阳 李崇德冀州学正。

孝感 刘伯燮解元，见进士。

程学博见进士。

刘伯生见进士。

三十七年戊午科

汉阳 艾 善云梦贯，汉阳人，知县。

四十年辛酉科

汉阳 孙 瑀见进士。

孝感 鲁近智扬州知府。

四十三年甲子科

汉阳 萧良有见进士。

穆宗隆庆元年丁卯科

汉阳 卫士元汀州同知。

汉川 周嘉谟见进士。

孝感 严惟哲

四年庚午科

汉川 尹应元见进士。

尹良任见进士。

孝感 夏相虞

鲁 恂应天中式。

神宗万历元年癸酉科

汉阳 蔡三近陈《志》遗，查《省志》补。

李宗鲁见进士。

汉川 王 隄甘泉知县。

林若企建昌同知。





孝感 余 偲
杨庆镕滨州知州。

四年丙子科

汉阳 刘体元廉州同知。
萧良誉见进士。

黄陂 王体元

七年己卯科

汉阳 王维祐知府。
孝感 蒋大孝盐亭知县。

十年壬午科

汉阳 李世鳌太仓知州。
汉川 叶东生遵义知县。
黄陂 张 涛见进士。

十三年乙酉科

汉阳 常道立见进士。
周世匡
汉川 张季彦
龙 襄
黄陂 杨成性
张大猷

孝感 邓 奎宜宾知县。

十六年戊子科

汉川 萧云际
黄陂 彭应嗣

十九年辛卯科

汉川 李时畅临湘教谕。
黄陂 王一凯同知。
孝感 刘应遇金都御史，巡抚甘肃。

二十二年甲午科

汉阳 刘邦靖

程学庸

龚作相永宁知州。
沈文荐名山知县。

吴 崇平乐同知。
高 荐应天中式，定州知州。

王肇元台州同知。

邓宦舒

李先春武缘知县。

唐 诗莱州卫贯，汉川人。

余新民副使。

鲁伯淑开封同知。

汪 宽平阳知县。

段养度推官。
谢三元清远知县。

刘成美苏州同知。



王 仪云南参政。

二十五年丁酉科

汉阳 吴 极见进士。

汉川 方懋德

黄陂 胡宾臣 黄彦士

孝感 王辅臣癸卯曾修邑《志》。

二十八年庚子科

汉阳 萧丁泰顺天中式，见进士。

秦聚奎见进士。

黄陂 周 棐

吴之皞

孝感 鲁伯溶长寿知县。

三十一年癸卯科

汉阳 程登龙

汉川 张之仁

孝感 曹方瑜

万言场四川道御史。

三十四年丙午科

汉阳 李若愚见进士。

吴嘉谟见进士。

周 阶延安同知。

黄陂 邓光舒广南知府。

孝感 胡景瑞

程 註见进士。

管九功桃源知县。

三十七年己酉科

汉阳 王家宾陕州知州。

黄陂 詹先志叙州推官。

刘有声高唐知州。

周中极眉州知州。

胡之宁江夏贯，汉阳人，知州。

尹 迴

蔡三复衢州知府。

萧鸣甲见进士。

范志琦同知。

王思善

傅淑训见进士。

舒显应凤翔知府。

余士忠黄冈贯，汉阳人。

刘一宽

沈惟炳见进士。

万同泰汾州知州。

孙世洛南京户部郎中。

王景隆未仕。

杜 迪未仕。

周若衡顺天中式。





孝感 朱 辂合州知州。

四十年壬子科

汉阳 龙德正工部主事。

龙 相龙川知县。

汉川 王用伋仁寿知县。

孝感 沈惟亮南京户部郎中。

戴 旦教谕。

四十三年乙卯科

汉阳 戴自成见进士。

汉川 胡维昌

方懋修黄安教谕。

黄陂 李藏春南雄知府。

孝感 傅彦欽

四十六年戊午科

汉阳 朱祚弘四川副使。

张 京陕西副使。

汉川 饶思明

孝感 张 淳见进士。

杨金通见进士。

徐 壮夔州通判。

熹宗天启元年辛酉科

汉阳 熊鸣盛未仕。

黄陂 李元萃福建佥事。

孝感 夏时亨见进士。

程良筹见进士。

宋之奎应城贯，孝感人。

四年甲子科

汉阳 谢淳培

刘元命

戴明玉繁峙知县。

吴可敷瑞金知县。

昌文明武昌贯，汉阳人。

胡其哲龙安推官。

刘成治见进士。

王道直见进士。

王政举

胡其俊见进士。

吴伯伦建德知县。

尹时泰电白知县。

闵依圣高邮知州。

谢美生胶州知州。

周贞应霍丘知县。

邓 谦见进士。

程良琮

余士瑞见进士。

邓林枝顺天中式，见进士。



汉川 陈秉昆知县。

黄陂 周若崧雷州推官。

孝感 胡大捷更名江，见进士。

刘申锡

李兰华

夏大夏

六年癸酉科

汉阳 秦廷烨未仕。

江如纪未仕。

黄陂 阮国允兴国学正。

邓章光未仕。

孝感 朱来仪

鲁 鉴见进士。

九年丙子科

汉阳 范克诚兵部取方司主事。

曾友颜攸县教谕。

汉川 王 度未仕。

刘之纶云梦贯，汉川人。

黄陂 王命瓚未仕。

孝感 李其先

严正矩见进士。

鲁近暹见进士。

徐 升见进士。

十二年己卯科

汉阳 王士乾长沙教谕。

黄陂 方启渭徽州同知。

李应柏益阳教谕。

孝感 张象贲池州推官。

十五年壬午科

汉阳 李昌祚见进士。

傅乃根工部主事。

程正揆见进士。

王曰卿湖州通判。

杨兆仪见进士。

刘 康

屠斯立特赐进士，成安知县。

梅 灏兰州知州。

胡应瑞营山知县。

王会篇未仕，卒。

魏晋封未仕。

段 悦未仕。

黄文旦

屠奏绩

鲁近遽

王世显见进士。

萧 芳未仕。

程良见碭山知县。

熊征泰后改名光廷。





宋 灏徐闻知县。

李以范广济教谕。

汉川 欧阳雪陈《志》遗，查《省志》补。

黄陂 詹龙翔蒙阴知县。

胡明垣见进士。

戴治盛江夏贯，黄陂人。

孝感 沈会林解元，大同推官。

丁之鸿

汤衍中见进士。

易道沛见进士。

张士美未仕。

罗世珩浙川知县。

黄 墀

杨绍先见进士。

夏 炜

国朝

世祖章皇帝顺治元年乙酉，开科取士，一因明制。

三年丙戌科

因湖南未尽归化，定中额六十三名。解元李尚隆，潜江人。

汉阳 卢乾元见进士。

邓 锦本姓曹，南阳同知。

刘顺昌见进士。

汉川 萧兴国广宗知县。

孝感 朱际明见进士。

李子翼衡州教授。

屠应守五河知县。

张如榜普宁知县。

张旺龄见进士。

吴与俦达州知州。

严 燧

乾曰生

傅 镗见进士。

五年戊子科

解元胡在恪，江陵人。

汉阳 张三异见进士。

吴正治见进士。

王 年平阳知县。

汉川 胡公寅彝陵学正。

黄陂 张国运巨野知县。

孝感 严 珽原武知县。

席光绪未阳教谕。

卢光珊榜姓王。

谭凤贞见进士。

熊伯龙见进士，京闱中式。

顾如华见进士，京闱中式。

陈光龙见进士。

潘 峻衡阳教谕。

沈 逵见进士。

武之亨见进士。



八年辛卯科

解元李奇生，汉阳人。是科加恩，中式一百二十一名。

汉阳 李奇生见进士。

何询之桂阳学正。

汪以淳见进士。

李国宁顺天中式，天门教谕。

杨 烨顺天中式，见进士。

戴汝为未仕。

万 甲郧县教谕。

刘 谦未阳教谕。

徐 湘孝感教谕。

汉川 叶 暹汉川贯，天门人，未仕。

胡允彝未仕。

汪时泰见进士。

张 鹏石门教谕。

黄陂 王国佐

杨兴学郧西教谕。

孝感 胡景铨南官知县。

李嘉卉知县。

熊维祺见进士。

萧蕴枢浮梁知县。

梁朝柱见进士。

胡 韵见进士。

叶戴天玉田知县。

余崛起见进士。

胡必蕃新兴知州。

严士骑见进士。

陈应伟顺天中式，青城知县。

朱组绶顺天中式，见进士。

十一年甲午科

解元程飞云，天门人。是科减中额九名。

汉阳 堵 嶷见进士。

堵际亨未仕。

戴扬祖

姚士伟

高 远麻城教谕。

江 源见进士。

田卜昌江夏贯，汉阳人，旧《志》遗。

黄陂 周于蕃麻阳教谕。

周 澹枣阳教谕。

姚缔虞见进士。

孝感 陈翼朋桃源教谕。

黄文暹新化教谕。

罗 诰见进士。

程良煜见进士。

陶 谕见进士。

屠 溶见进士。

胡必选见进士。

屠天佑见进士。





十四年丁酉科

解元杨辉斗，荆门人。是科再减中额九名。

汉阳 李先实

王士谦

项一经黄陂贯，汉阳人。见进士。

范其铸见进士。

华生甫知县。

徐冲度

韩 袞未仕。

吴文选未仕。

江殷道顺天中式，见进士。旧《志》遗。

汉川 杨我启

黄陂 黎时举

谭忠义见进士。

杨兆杰

叶 封见进士。

孝感 熊赐履见进士。

黄 汉允溪卫教授。

汪 铨本姓周。

宋 珩

熊赐珩见进士。

朱正绣

十七年庚子科

解元蔡寿生，攸县人。是科定湖广中额五十三名。

汉阳 解乾浚

汉川 葛言扬见进士。

汪定昌

黄陂 张启祚

孝感 张奇秘

鲁 鏊见进士。

魏 象

十八年辛丑，加湖广乡试中额十五名

圣祖仁皇帝康熙二年癸卯科

解元黄仁焕，江陵人。是科罢八股，第一场四书论一道，经题论一道，策五道，第二场表一道，判五条。

汉阳 董 礼

陈国祝黄冈贯，汉阳人。见进士。

汪应台

萧石芝

张弘杰汉川贯，汉阳人。金华知府。

汉川 王 相未仕。

汪特昌汉阳贯，汉川人。岳州教授。

黄陂 黄 熊汉阳贯，黄陂人。

王庶善

高昌明见进士。

王遵度



孝感 曾 士禹城知县。

王 章阳谷知县。

五年丙午科

汉阳 龚于蕃安邑知县。

张伯琮河南布政使。

汉川 李之材

胡公杰

黄陂 钱奇才

孝感 张 宾

徐尚达仁怀知县。

王 康新化教谕。

程大吕见进士。

七年戊申诏复以八股课士，乡会仍试三场

八年己酉科

解元简文，邵阳人。

汉阳 李昌熙 周学儒

魏晋江

汉川 张声国 吴之升

欧阳暹

黄陂 王 轩丹徒知县。

张志焜

王 煜桃源教谕。

孝感 谭继周教谕。

十一年壬子科

解元吴甫生，兴国人。

汉阳 彭 俊榜姓罗，后复本姓，江夏贯。见进士。

张 寅 田荐嘉 周寅暘

黄陂 陈 坦刑部郎中。

孝感 程大酉长沙教谕。

陈翼圣珙县知县。

周 灏

张象升见进士。

李殿邦见进士。

熊赐瓚顺天中式，见进士。

十四年乙卯科

以湖南梗化，诏停湖广乡试。

十六年丁巳科

特开乡闈，湖广副江南应试。

汉阳 孙 皋见进士。

吴宗丰顺天中式，见进士。

黄陂 姚绳虞顺天中式。

孝感 申 赓龙阳教谕。





十七年戊午科

解元宋敏求，黄冈人。

汉阳 刘 受会同教谕。

周文启

黄陂 冷又煦锦县知县。

孝感 陈世怀宜城教谕。

熊正笏

熊 愉

陈仔昂谷城教谕。

二十年辛酉科

解元刘善锡，沔阳人。

汉阳 李 鑽见进士。

孝感 赵骏奇

唐惟次

熊祖旋知县。

陈世玘

王大经知县。

二十三年甲子科

解元宋如辰，黄冈人。

汉阳 余尚钰见进士。

黄陂 邓际圣汉阳教谕。

陈 箕

孝感 杨 琛本姓胡，见进士。

饶 警

张 琛

黄仁让

杨梦佐巴陵教谕。

杨宗宸

二十六年丁卯科

解元李如闇，京山人。

汉阳 刘 恣嘉鱼贯，汉阳人。荆州教授。

罗九锡谷城贯，汉阳人。未仕。

汉川 骆体乾

黄陂 翁择庸卢龙知县。

孝感 屠 沂见进士。

吴绳琦

戴德祖

冷宗昱见进士。

王 復

二十九年庚午科

解元陈大华，黄冈人。

汉阳 胡书思仁怀知县。

龚淳孚均州学正。

何 倜未仕。



汉川 欧阳迁

黄陂 王家继沔阳学正。

詹述宜城教谕。

孝感 程光祜岚县知县。

熊志仁

李益坤 傅奇

马征奇

三十二年癸酉科

解元周士佃，本姓钦，黄冈人。

汉阳 江本淳孝感教谕。

乐宫音

汉川 王树

黄陂 王遵素监利教谕。

周才大庾知县。

孝感 丁光伟

三十五年丙子科

定湖广乡试中额七十名。解元萧莲芳，沔阳人。

汉阳 程先哲未仕。

张世任见进士。

吴镐见进士。

彭迪忱锦县知县。

江芑见进士。

陈嘉咏嘉鱼贯，本姓刘，安陆教谕。未任。

汉川 黄承勋

黄陂 张铨选

孝感 夏熙度

王心存归州学正。

杨涵六武冈学正。

王道恕同州知州。

三十八年己卯科

解元彭源，云梦人。是科定湖广乡试中额八十名。

汉阳 孙章惠州知府。

彭松年

周兆幽蒲圻贯，汉阳人。桃源教谕。

汉川 张定邦

黄嗣山

徐桐蒲圻教谕。

黄陂 吴陈言

孝感 程光祐

程光琰石首教谕。

高世系彝陵学正。

夏策谦宝庆教授。

程大聿





四十一年壬午科

解元朱和钧，江夏人。

汉阳 彭商贤知县。

汉川 王希洪 张治道

黄陂 陈 栋未仕。

胡云岚未仕。

孝感 涂天相见进士。

李 况

张正道

李士藩沅州教授。

张陈尧潜江教谕。

胡景康延津知县。

四十四年乙酉科

加湖广乡试中额十五名。解元夏庆誉，孝感人。

汉阳 徐永祐见进士。桃源贯，汉阳人。

魏朝佐

萧 昱

郭 莪沔阳学正。

孙兰苾江西副使。

龙起凤黄梅贯，汉阳人。

汉川 姚廷光 聂 烺

黄陂 梅 炜未仕。

孝感 夏庆誉仪征知县。

王大纶 魏之骐

黄廷贵

姚 华户部主事。

宋世荣永春州同。

胡仕政

四十七年戊子科

解元李澍，零陵人。

汉阳 萧作声荆州教授。

翟容銓山丹知县。

严克成未仕。

唐 冕未仕。

汉川 张 淙 岳士俊

谭养元

黄陂 冷宗暹未仕。

彭魏燮未仕。

孝感 陈道凝本姓徐。

戴 记衡阳教谕。

熊志关兵部主事。

彭 滨

汪其彬汉阳贯，徽州人。

胡兆熙未阳教谕。

吴 灿未仕。

王业任

叶廷兴本姓金，衡山教谕。

刘名扬大冶贯，黄陂人。

熊志道

王 经绥宁教谕。

程光第

(熊志道^①)

戴大德

五十年辛卯科

定湖广乡试中额九十九名。解元李天桂，湘阴人。

汉阳 王兆元未仕。

罗鸣序

张坦熊云南按察使。

张毓瑞未仕。

张坦麟江苏江西巡抚，安徽按察使。

胡良显武城知县。

陈祖义

杨从洵

汉川 钱 祐 程宗洙

刘兆杰

黄陂 姚之琯未仕。

胡舜裔

邓济清益阳教谕。

李子吟

黄 沅

周大儒本姓王。

孝感 陈国栋定番知州。

李世敦婺源知县。

程光衡

涂世煜直隶西路同知。

屠 泓

五十二年癸巳，恭逢圣祖仁皇帝六十万寿，普天同庆，特恩开科于二月乡试，各直省八月会试

汉阳 陈上治

张天谟江夏贯，汉阳人，奉新知县。

张正榜

夏治源建水知州。

朱晋秩未仕。

张坦谔

张抡元咸宁贯，汉阳人，未仕。

张坦让汾州知府。

万世良滁州知州。

汉川 李九凰 刘奇生

周滋德

黄陂 蔡成鲁未仕。

翁 晖归州学正。

冷宗晟龙阳教谕。

叶介繁未仕。

李功永闻喜知县。

孝感 金 相见进士。

李世显

屠用谦

屠 洵

黄徽心

陈心光

①孝感县四十七年戊子科有两熊志道，疑衍其一。





程光鄂

五十三年甲午科

解元韩王锡，黄陂人。

汉阳 江峤孙镇沅知府。

汉川 段颖聪

黄陂 韩王锡未仕。

姚之璧

陈 燧未仕。

孝感 管万象

程明教德安贯，孝感人。

五十六年丁酉科

解元秦惟焕，江陵人。

汉阳 劳必达昭文知县，辛丑会试中式。

靖道谟汉阳贯，黄冈人，见进士。

吴自悌更名忠。

李祖白未仕。

汉川 欧阳景至 张怀德

汪国骊

黄陂 王文燕

孝感 艾 华

李春耀

屠 江慈利教谕。

丁光文

五十九年庚子科

解元夏力恕，孝感人。

汉阳 江宗望国子监学正。

郑佑人见进士。

黄陂 冷晏照

姚之璋开原知县。

孝感 夏力恕见进士。

陈陞闇

李显迅

王侯兴未仕。

张圣夫汉阳贯，黄陂人。

向德华顺天中式，见进士。

屠用震龙阳教谕。

王德冲未仕。

严宅端

许调官

吴楚哲未仕。

屠用观瓮安知县。

夏力中见进士。

屠用贲

程光角

王 纶未仕。

张彦昌崇阳贯，汉阳人，见进士。

吴元湛岐山知县。

杨 忻未仕。

刘兴第知府。



陈陞诚华亭知县。

屠用中琼州知府。

屠用豫光化教谕。

祝 汇云梦贯，孝感人。

雍正元年癸卯，恭逢世宗宪皇帝龙飞御极，特恩开科，大省加中额三十名，湖广系大省，加中如数

解元周邦孚，麻城人。

汉阳 王全璧浏阳教谕。

黄鼎铸

郑世锦

汉川 程廷栋见进士。

欧阳景旦

黄陂 刘曰福见进士。

张其閼见进士。

冷廷丰

孝感 王廷鸿见进士。

管二象

屠用亨

萧惟煜通山教谕。

雍正二年甲辰，诏湖北、湖南分闱乡试，十府中额五十名，补癸卯正科

解元侯之信，公安人。

汉阳 杨 律

邓际时汉阳贯，黄陂人。

胡万钟未仕。

江峰孙

刘方名未仕。

汉川 刘文浚未仕。

黄作杰

姚德文

戴一霖

黄陂 冷 蔚

孝感 萧惟灿

涂天根

程光巨见进士。

程光都

郑登瀛德安贯，孝感人。

陶亮会

闵应麟

四年丙午科

解元郭孙俊，当阳人。是科五经中式副榜五人，俱准作举人。

汉阳 金文元

段汝霖

张继钟汉川贯，汉阳人。

祝 佐

江 霁

江峻孙

简华国





汪建章副榜，以五经准作举人。

汉川 萧 昕

金 鉴

黄陂 翁 炘

孝感 徐成润

夏扶鹺蒲圻教谕。

七年己酉科

解元宋楚望，当阳人。

汉阳 李正揆见进士。

左赐桓广济教谕。

刘世佐见进士。

曹复彬

李芳蓁

蔡 瑚

黄陂 冷 藩

王文掞

冷廷履

冷廷益

王豫昭

孝感 程光鉴

涂士炳

十年壬子科

解元张鳌，荆门人。

汉阳 宗绍彝见进士。

张 芸

孙绍基内阁侍读。

汪为楫

汉川 万必亨

黄陂 王文兴

孝感 戴 诰

涂士烜

李 超

夏扶章见进士。

夏扶英

十三年乙卯科

解元□□□。

汉阳 吴曰俞

邹召南见进士。

张任莘

刘乾学

李芳蕃见进士。

何 璜

张任燕

张仕邴

黄陂 胡醇悫

孝感 夏力俊

熊绍祖

夏扶云

乾隆元年丙辰，恭逢今上皇帝御极，特恩开科

解元□□□。



汉阳	张继镜	见进士。	罗蟠龙
	张志中	徐大任	宗绍闻
	张羽丰	裴 梓	宗绍泽
汉川	但准昌	李祖峤	李纯道
黄陂	王丰采		彭运昌
孝感	屠祖赉	见进士。	程光璪
	郭 滢	龚佐龙	李方萃
	李 任	萧惟耀	见进士。
	胡世华		

三年戊午科

解元郭维本，黄冈人。

汉阳	朱容极	汪若水	徐大伟
汉川	程廷楫	程廷杖	李祖材
黄陂	冷 英	姚之琅	冷廷颐
	王作朋		
孝感	程光瑄	陶象琰	

六年辛酉科

解元张梦扬，黄安人。

汉阳	戴喻让	胡绍鼎	孝感人。
	刘肯堂	张 鼎	周宗洛
黄陂	冷开模	吴夫杰	李金台
孝感	戴学焯	陈陞试	见进士。
	方大有	夏扶黄	见进士。
	朱其轼		

九年甲子科

解元向来雨，沔阳州人。

汉阳	胡延龄	蒋正校	孙 汉
	张任艺		
汉川	刘祖向	曾 海	
黄陂	刘龙光	詹世适	





孝感	胡来宣	夏扶均	
十二年丁卯科			
解元吴汧，黄安县人。			
汉阳	谢思焯	吴昭煜	张 蓊
	李自弘	孙崇实	
汉川	王任世	傅 燮	林德明
黄陂	黄 韶	王羽凤	
孝感	戴 瓚	戴 瑚	



《汉阳府志》卷之三十八 人物〔八〕

选举表

贡士

隋

高祖开皇七年丁未，制诸州岁贡士三人。

唐

由州县升于有司曰乡贡生，以为常。

以上姓氏俱无考。

宋

有明经诸科。

汉阳

胡霖潭州通判。景厚中书左丞。

汉川

黄陂

孝感

以上姓氏可考者二人，余无考。

元

武宗至大四年闰七月，增国子生为三百人。廷臣言方今进用儒者，而老成日以凋谢，四方儒者有成材者，皆擢任儒职，俾学者有所激劝。从之。

以上姓氏无考。

明

洪武

太祖洪武十六年，命天下府州县学岁贡生员各一人，自明年为始。正月至京，从翰林试经义、四书义各一道，判语一条，中式者入国子监。二十年戊辰，





更定岁贡生员例：府学一岁一人，州学二岁一人，县学三岁一人，必资性淳厚、学问有成者，方许充贡。

汉阳

陈文通	御史，擢按察司。	苏敬瞻	知县。	刘琳	兵部主事。
艾馨	卫经历。	徐文	理问。	陈昂	金士。
谢复荣	秦府纪善。	项诚	庆府纪善。	彭义	韩府长史。

汉川

胡灏	检讨。	刘镛		张辉	
李广	知府。	郭俊	典史。	范思齐	同知。
成宗政	经历。	朱观	经历。	王得新	经历。
岳从义	主事。	张黻	引礼。	吴中	训导。
陈智	知县。				

黄陂

黄中	杭州通判。	胡文用	户部主事。	陈立	新会县丞。
董暹	新昌主簿。	易应时	方田县丞。	陈清	
方矩	寿昌主簿。	甘子仪	潞州吏目。	萧升	巡检。

孝感

戴聪	提举。	廖勉	经历。	童贤	经历。
曾所教	州同。	陈瑀	户部主事。	吴荣	知县。
傅楫	户部主事。	徐勉	县丞。	丁健	通判。
刘定	训导。	王志学	提举。	殷礼	知县。
邹贵	经历。	万升	知事。	徐鉴	同知。
唐宗		王克从	经历。	江源	同知。
高寿	经历。	戴璫			

永乐

汉阳

程武	工部主事。	张敏	苑马寺卿。	朱铭	兵部主事。
辜思贤	经历。	李实	经历。	陈璫	经历。
杨澄	上虞知县。	计珩	御史。	蔡嗣谟	山东布政司经历。
凌友谅	州判。	徐琦	知县。	郑伟	苑马寺丞。



李 瑜太仆寺丞。
赵 珩同知。
胡 信知州。
章德源教授。
刘 缙知县。

汉川

张 显同知。
张 谦县丞。
张 纯吏目。
严 恪
何立中
傅 诚

黄陂

黄 伦雷州通判。
王 俨通判。
王 质宁阳训导。
刘 鑪

孝感

黎 亨顺天通判。
李文胜知县。
潘 庆知县。
郑志澄知州。
杜子谦县丞。

宣德

汉阳

向 耿经历。
汪 琰通判。
龙 琳知县。

汉川

李 华

张 浩通判。
潘 恕主簿。
方 让同知。
朱 理奉祀。
徐 玠

严 泰知县。
周 斐知县。
向以宣
漆 颐
李 祯
朱 富

曹子贞光山主簿。
姜 政扬州推官。
万 志州同。
高 风汀州检校。

高 旭知事。
陈 文典仪。
乌□谅知县。
韩 安县丞。

宋 琼同知。
丁 义通判。
朱文炳山东道御史。

陈 冈知县。

郑 琮推官。
刘 敬知县。
黄 贵光禄署丞。
雷 震知县。
刘 让经历。

潘守敬县丞。
王子义主簿。
张 义
孙 铭
尹 晋御史。
王 珩

张 用绵州州判。
杨 升巩县知县。
陈 猷同知。

范 升知事。
刘宗信知县。
胡 敏知事。
王 辅知事。

李 恕同知。
吴 缙知县。

曾 政知县。





刘 德教谕。

黄陂

彭 昌夔州通判。

孝感

赵友义知州。

李 节知县。

陈 暹县丞。

正统

汉阳

刘 鉴亳县知县。

程 绪县丞。

陈 宏

陈 宾卫经历。

汉川

蒋 鉴知县。

雷 宏经历。

毛 毅吏目。

黄陂

夏 中通州州判。

蔡 英衡水县丞。

孝感

陈 玺县丞。

汪友恭知县。

詹 轸训导。

景泰

汉阳

沈 英推官。

陈 琛吏目。

赵 升

夏继光

王 庆县丞。

喻存义

黄 新知县。

向 贤县丞。

吴得贵县丞。

凌友志知县。

徐 珩知县。

朱 海县丞。

郑守中

谢 祥

岳 祥

梅 芳广安州同。

陈 谦易州州判。

黄 宗

李子成县丞。

陈 荣

陈 实主簿。

危 旭主簿。

周 铎

梅应春闽县县丞。

张 政知县。

苏文贵县丞。

余 洪县丞。

黄 麟县丞。

陈 寓经历。

田 文卫经历。

蔡 昂

刘 海吏目。

廖 铭宝县主簿。

戴 润县丞。

张 聪知县。

伍 荣吏目。

丁 浩知事。

周 洪县丞。



汉川

潘日新县丞。

余庆同知。

蔡春吏目。

黄陂

任伯昂泗州同知。

刘玉昆昆山县丞。

王孚获嘉知县。

许敏汤阴训导。

孝感

杨文亮

吴伯璋

宋琥照磨。

胡颢

余愷经历。

董访知县。

陈鼎

天顺

汉阳

陈弘主事。

刘如凤吏目。

吴瑄广元知县。

唐思敬绍兴推官。

鲍思敬卫经历。

姚鉴州判。

宋必让卫经历。

吕瑞县丞。

夏礼检校。

杨彬主簿。

马诚吏目。

孙聰主簿。

许善鸣赞。

蒋伯庸照磨。

胡必聪吏目。

汉川

陈翰

何英

朱霆

方俊县丞。

黄陂

熊恢项城县丞。

余瑄渠县训导。

刘昭东川经历。

孝感

余鼎知县。

彭思忠〔典〕宝^①。

聂瑄训导。

李刚县丞。

胡敬忠

黄义昌邑知县。

成化

汉阳

郭坚吏目。

徐谦主簿。

赵瑄经历。

胡岳

宋宁

彭谅

①“宝”上疑脱“典”字。





徐 华吏目。

邓文俊知县。

刘 沔

杨 铭

沈永泰经历。

陈 鼎训导。

吴 琳照磨。

杨 敏主簿。

张 诚县丞。

汉川

尹 瑄知县。

姚 璵检校。

倪 珪

薛 暹

宋 器吏目。

潘 惠州判。

黄陂

侯 軫桂林经历。

陈子周昆阳州同。

张 瀛盐井卫经历。

张 纲醇高训导。

孝感

盛 聪训导。

刘 应训导。

李 贵

袁 纪知事。

陈 镛训导。

曾 辉检校。

耿 璇知县。

吴曰寿

杜 英训导。

方知高知县。

刘 魁知县。

邹 礼主簿。

苏 传训导。

周 杰

叶 懋

王 价训导。

吴 琮主簿。

李 韶县丞。

曾 芳训导。

李 庆断事。

胡曰温

余 绪训导。

彭 政温州经历。

邓 云武缘知县。

钱定兴府奉祀。

夏福宽

温 良经历。

陈 瑛主簿。

陈 懋县丞。

乌 洪断事。

周 暹县丞。

蒋 高主簿。

王 盘县丞。

詹志道

江有仁吏目。

彭 禧

熊 瑞县丞。

余 俭

雷 春

董 悦

萧 慎照磨。

张文聪经历。

胡 钦县丞。

刘士俊训导。

宋 珪州判。

李 端训导。

赵世佐

徐 珪进贤县丞。

宋 霖浪渠吏目。

盛 昌

贺 珍主簿。

徐 澜经历。

刘 显训导。

龚 政知县。

冯志善州判。

朱 琮知县。

谢文钊

刘 芳



弘治 汉阳

万 方经历。
许 亮
刘 澄
陈 璪
陈廷训
汪 本
龙 宪州判。
潘 金教谕。

蔡 谟经历。
张文昌
柳中伦
马 佐
范志高
彭楚杰
韩 贵照磨。

李 茂照磨。
鄢志学
王 鉴
易 贤主簿。
赵 亢
李 宥知州。
彭楚善教授。

汉川

姚汝霖通判。
王 璪
段 淳

傅 相
何 溥教谕。
张 冕知县。

熊 钦通判。
李 淮
岳 龙经历。

黄陂

黄 铎
周 旋临淄训导。
余习训都匀卫经历。
周 流

黄 甫
王 丞
万 访

李 魁巫山训导。
刘廷桂怀安训导。
方 用主簿。

孝感

张 晖教谕。
黄 翰州判。
陈允亨
周 俊
陈 寿知县。
曾 贤
姚 广
刘 暹经历。

黄 启
陈 暹
徐 溥县丞。
胡 寅
史 缙经历。
夏 时
张 瑀

汤 新序班。
彭 庆
朱 经
李 时建昌县丞。
李 显教谕。
张 瑛主簿。
胡 泽训导。





正德

汉阳

胡 玉

刘 玺教授。

陈东之训导。

周 冕

郭 沧经历。

陈 珏训导。

伍 琮

王 化教谕。

陈廷言

陈 璇教谕。

曾 志

董文献训导。

彭楚豪知州。

张 鸾嘉定县丞。

汉川

徐 礼

李良玉训导。

林 濬县丞。读书寒暑不辍，僚友异之。

张 昊知县。

赵世重经历。

雷 益经历。

张士俊主簿。

黄陂

王 鸾丰城训导。

杜 时

陈 宽赣县训导。

胡 升登封训导。

潘子民新安训导。

汪 俭德兴县丞。

姜钟秀新建训导。

刘廷宪卫辉训导。

孝感

耿 侑经历。

李 芳

王 东县丞。

耿 珂

丘世祥州同。

冯伯達训导。

郑志潜

夏景昌通判。

杨 鹏通判。

朱 杰

李 椿

何文俊

彭 麒知县。

布元吉照磨。

杨汝楫

嘉靖

以后始有选贡，遇恩有恩贡。

汉阳

易 堂训导。

任 秀良乡训导。

陈廷试东莞县丞。

董廷宪

陈大乐

李 铨邢台教谕。

吴 纶襄城教谕。

郑世芳荊州训导。

丁 苻

陈廷询训导。

吴元祥县丞。

蔡 芸郑州州同。

许希贤训导。

陈大谟仁和县丞。

葛 金吏目。

陈 儒训导。

蔡 葵合州州判。

朱 袞安岳县丞。



陈大教训导。

龙 逵训导。

罗 珊通许训导。

胡 定

袁 镐

朱 颢陇州知州，进阶四品。

李 轩祁门训导。

吴元仕武宣知县。

宋 禄上蔡训导。

吴元宪大竹教谕。

朱守宗达州训导。

刘方彦均州训导。

朱之臣教谕。

戴时言绥宁教谕。

汉川

曾 璟主簿。

周 鉉经历。

余 琇

林大韶知州。

李 宦训导。

余 贤

赵梦珠训导。

吴文伟教授。

胡来朝

胡宗周教谕。

华得暘县丞。

刘 烜教授。

黄陂

梅 珪陕州同知。

王 綖

蔡 兰训导。

田万钟嘉定训导。

潘 旻顺庆训导。

周尚宝蒲江知县。

王 震

罗 苇阳宗知县。

孙 木郟县教谕。

孙 晟金堂知县。

陈 择

李端本蒙城教谕。

叶 与仪封训导。

吴 岸

潘廷选

余 宝

陈 铎

王 宪

雷 鉴知县。

林大有

赵梦阳教授。

李 滋教授。

尹 衣教谕。

刘 召州判。

谢 焕知县。

陈 镠

朱必达通安知州。

席上玉

罗以礼卫经历。

沈 璇锡山训导。

万 言

李 海

李 翔

陈 清泌阳知县。

吴元卿镇远知县。

郑 晓丰城训导。

朱 寅高淳训导。

戴志荣河州学正。

凌 轩

傅 念

王 科乐安教谕。

岳钟甫同知。

余 瑶

何凤阳训导。

胡 宝教谕。

熊振肃

段 豸

王 遴教授。

林大德知县。

林大道训导。

张 俊学正。

傅本滋学正。

尹心周长史。

高 明琼山县丞。

王 寰雄州知州。





喻 里彭泽教谕。

罗尚贲镇平知县。

喻秉直

施 仁

余 镐岳池训导。

罗尚素忠州训导。

熊 治

李 乾教谕。

孝感

胡 昊汝阳训导。

丘国祥

龚大伦

周 易

王林卫

丘凤翔经历。

徐 梁照磨。

曹大武县丞。

杨 瑚教谕。

汤 奎

刘 松教谕。

严 试教授。

郑 愈训导。

隆庆

汉阳

黄廷敬中书。

周 诗郑州州同。

杨 鳌宿松训导。

汉川

林若介教谕。

杨四臣训导。

王 试平和知县。

李大华万年训导。

王 琰安县知县。

郑 鸾

王守成夹县主簿。

刘源洁扶沟训导。

陈 芹训导。

吴之杰

刘 秀知事。

陈文汉知县。

祝 贤知县。

王廷辅

王 美商州学正。

徐 栋

朱 仪忠州州同。

孙 锦

刘 俨经历。

龚继文

李阳春训导。

李 果富平教谕。

朱大功教授。

万 合

萧 逵泰安州同。

郭之藩

章 达知县。

刘 恂梁山主簿。

余 铸顺庆训导。

任尚质吏目。

冯 霖乌撒经历。

郭 田乌撒经历。

蔡 寰主簿。

黄 伟训导。

詹 驭

胡 福主簿。

唐 詮

徐 楫

徐 柏训导。

朱 乾训导。

董 兰

朱 伊

王 瑚

唐希孟

唐希皋

杨 修教授。

刘廷选南安教谕。

罗 庄秦州同知。

彭 云河阳知县。

尹心诚

陈天衢主簿。



黄陂

陈九畴河池州同。

萧应黄考城知县。

孝感

杨塾教授。

辜志德

周恩主簿。

万历

汉阳

谢文林浙川训导。

田万井教授。

吴密

孙琮县丞。

桂楫知县。

张懋德教授。

雷跃龙

黄承光

胡尧臣训导。

龚应遂训导。

尹应利

陈天街

蔡三锡昆明县丞。

杨师震德清县丞。

陈明德辰州教授。

朱宇训导。

陈同宾

汉川

殷时中知州。

周鹤知县。

王天视训导。

周诰主簿。

彭宋德安教授。

汤世儒主簿。

熊金鱼

吴岩全椒教谕。

孙瑞公安训导。

刘僎

张绩

彭电正定经历。

谢默未任。

萧丁泰见进士。

王廷彦荆州教授。

刘之纪九江训导。

罗达县丞。

周世熙

戴绍庆

蔡三近通判。

龚作楫

张世和定远知县。

程邦奇州同。

黄门

郭铤知州。

林若全教授。

王天亲训导。

王仕新津知县。

张淪庐州训导。

严詮教谕。

鲁恂

宋恩武安训导。

朱永年南昌训导。

李钦顺教授。

陈守谦教谕。

王光裕郑州同知，未任。

吴岱

刘应科博野训导。

朱芸合水知县。

尹良心

涂朋举

李日成

王祯成都同知。

王化龙崇明主簿。

曾一唯南溪知县。

王俊

杨泰然均州训导。

邝坦

万春教谕。

周道芳训导。

尹心灏训导。





尹应科教谕。

熊 兆训导。

吴学可训导。

黄陂

陈 廉平越卫经历。

周世瞻

钱九功嘉鱼训导。

王天臣

胡 泮进贤主簿。

胡 鼎教谕。

张 芹经历。

雷一声未仕。

胡纯化

孝感

杨 逵学正。

王式庐义乌县丞。

朱大教县丞。

郑用韶训导。

叶惟承

严 密

张 绪江陵训导。

杨咸和石首训导。

杨 湘抚州通判。

周维申眉州学正。

宋 郡蕲州训导。

张邦治

傅良相峨嵋知县。

宋平宇训导。

陈善乐本姓周，麻城教谕。

李逢阳训导。

陈天街训导。

林若伟训导。

张人杰紫阳知县。

黄云合教授。

傅一元

邓应旂丽水教谕。

胡元定西安教授。

胡宗仁

郑明城知县。

陈于廷未仕。

周道东同知。

刘 钱汝阳教谕。

高 荐见举人。

邹东光

张问仁教授。

舒守愚崇庆训导。

傅 伟新昌知县。

胡惟明昌黎训导。

严惟聪

梁如璧

严惟慤罗田训导。

郑一贞含山知县。

杨庆铠教谕。

王 济

李开先麻城训导。

黄一信训导。

李乘阳训导。

孙胤孔

李士元安平知县。

冯克先兴国训导。

翁 恕淳安知县

胡纯臣衢州教授。

周继初徐闻知县。

陈肖梅县丞。

王惟善通判。

李发甲

周道南武昌训导。

黄 绶

朱大举

段 绚仪封教谕。

刘廷赞

严守国华容教谕。

王 邦

杨洪范东平州同。

万言典

程学古

胡纯臣

焦克让桂阳训导。

史 记高县教谕。

李 镠训导。

程道寿知县。

程良孺



天启

汉阳

余应芳

杨拱宸宝庆训导。

朱家楫

陈文全

王尚宾麻城教谕。

谢 焯知县。

张峻升

康万化

劳日宣

汉川

陈嘉宾同知。

张 桓知县。

孙天锦

严朝述

黄陂

吴淳恭训导。

黄 城

张图南

孝感

沈惟耀

刘应济

胡 斌

崇祯

汉阳

刘崇道邻水知县。

陈葵忱休宁训导。

吴 岳

王善政广济训导。

萧镶彦

尹际寅

张 璋

魏象皋关乡知县。

傅之卿

魏应龙

谢正培

刘自然

何大佐

刘秉位

陈嘉官

李文奎知州。

彭凤阳

熊列猷通判。

程良符

刘 綸惠安知县。

赵国璧

李国祚新宁知县。

龙文正永安知县。

刘 载长史。

王胤振

熊应占河阳训导。

朱纯臣

王之藩酉阳教授。

谢上选训导。

杨 勋

程家骐

尹良栋

刘方仕

尹汤宾

王 悦知县。

彭永臣教谕。

王立先训导。

刘 禧

刘 祺

蔡溶如通判。

吴伯裔铜仁推官。

何其鲁岑溪教谕。

龙 柱陆川知县。





吴嘉言绍兴同知。

秦民汤金堂知县。

黄 袞崇仁教谕。

魏 勋垫江知县。

李若珩

刘觐光

梁天培

汉川

龙纳箴同知。

傅宾盛

张 相

陈 修

黄陂

詹先定吴桥知县。

张国勋

徐时进

王立昌训导。

邓学一

易上谦

孝感

杨兆亿见进士。

沈惟煌

李兰英训导。

杨兆侃

席其应

夏 焯

彭清典副使。

游其芬卫经历。

黄文星

罗士望

龚士弘通山教谕。

吴守中黄安教谕。

熊应台

文 炳

余伯翹

傅宾盛

叶 偕

谢 灯知县。

傅 致

尹际辰

阮一清训导。

侯王臣知县。

周士弘

张垣升

吴 高教谕。

彭 玉

夏铸鼎会同知县。

沈 林县丞。

黄文明

张豫谦

沈 寅广昌知县。

罗 纬

胡 敬县丞。

张履谦黄岩知县。

秦世春

吴可位

王旦生

计 倬

周祉延

王大缙巴陵教谕。

黄正色

段崇德训导。

郭 纶

余应芳

罗明谕教谕。

王立位

蔡士廉

韩张梗知县。

彭 瓚

张素蕴谷城教谕。

程良騄兴国训导。

夏禹谟

沈 宜镇江推官。

万以忠

程良秉安庆教授。

程正范知县。

鲁近迪监纪。



国朝

世祖章皇帝顺治

顺治五年戊子，令直省学政拔贡。

汉阳

秦廷焯均州训导。

吴开治主事。

戴必成未仕。

熊梦鹤夔州知府。

魏熙昆山知县。

汪可方安化教谕。

宋大成州同。

郑光先乌程县丞。

明道亨湘乡训导。

李以笃未仕。

喻应鹭未仕。

卢登道

吴钟藩常州通判。

熊仲龙汝宁知府。

韩章南宁知府。

刘仲

杨乾晋开封知府。

吴赓昆

胡其严

李自玉

刘一泰

汉川

张植

骆傒伯瑞州推官。

萧滋县丞。

冯希澹长沙训导。

周文煜蒲圻训导。

李国宁见举人。

蔡江如经历。

杨烱见进士。

罗位

陈汝谔武冈训导。

蔡溥金华县丞。

王寿世

谢预培宁远训导。

朱祚熙未仕。

王学可未仕。

黄序

王文林武平知县。

周敬光

蒋文范漳县知县。

秦祁文宿松县丞。

王度灵丘知县。

余世安

蔡世衍

王大维

周珏宝庆教授。

刘起福州通判。

成人美

阚从先安陆训导。

周文旭归化知县。

王家谟衡州教授。

郑显谟未仕。

唐勋陆凉卫经历。

陈逢辰德安训导。

江殷道见进士。

瞿清

朱天庆知县。

李志长

熊再昌未仕。

萧二斯

李以籍

刘士俊东安知县。

刘于相

熊叔龙未仕。

李度闽县县丞。

萧企昭未仕。

胡绍安曲靖经历。

李昌祺

刘坤受

王道亨宜川知县。

王都通判。

沈之玮松滋训导。

方堪通判。





余应诚

郑显谟通判。

黄陂

陈寿未仕。

张焜罗淮安通判。

周诜知县。

王命珣高州通判。

王名俊大冶训导。

吴之琯信阳州判。

李维世湘潭训导。

王度

傅慥

谢云从

陈松生

傅恽

孝感

舒显祚

童达行鄖阳训导。

刘文德淮安同知。

傅若训零都知县。

刘起福州通判。

熊维祺

李𪔐将乐知县。

沈宽归德经历。

李启朱叙州同知。

王应泰沿山知县。

潘岭新淦知县。

程正巽

丁嗣恪

胡玘嵯县县丞。

张藩光化训导。

龙待给事中。

李若柱知县。

郑滋新宁知县。

任惟仁州判。

方叔裔寿州州同。

彭衡岳

段蔚谷城训导。

胡惕

杨乾晋猗氏知县。

王命珪

吴懋周

傅可远

沈梓温州同知。

刘遵韶福建经历。

秦圣徒扬州运判。

汪达知县。

戴圣辉西安知县。

高骞

熊赐履见进士。

周特崇庆知州。

鲁可远瑞安知县。

鲁可参

张其精襄阳教授。

鲁铤

李湘

李皇诏

尹际勋栖霞县丞。

彭永祐鹤庆知府。

欧阳世逢同知。

黄信让会同知县。

吴瑛保定通判。

彭明古

蔡亦襄县丞。

梅先

涂世衢

韩张楠

吴珽

王国涛

涂世玮南漳教谕。

陈贞纶永年知县。

杨金声马邑知县。

傅彬待诏。

朱组绶

陈应伟见举人。

高曰旦且化知县。

鲁可知德安知县。

周洛

黄戴铉

陈子昂见举人。

陈正色

程正萃

鲁三奇待诏。



胡 沅 兰仓卫经历。

朱赞极 常德训导。

徐行芳

彭 焱 黄安训导。

胡 清

圣祖仁皇帝康熙

康熙三年，停各学岁贡。八年，诏各学仍岁贡。

康熙十一年壬子科，始以副榜单作贡生。

汉阳

李如靖 未仕，年九十乃卒。

胡翼麟

汪 僎 麻城教谕。

张佐瑞 武昌教授。

黄文珍 教谕。

朱国庆

胡树勋

彭 佐 云南理问。

张维道

万鸣金

陈志要 训导。

汪万镇 训导。

缪 陞 华容教谕。

李咸有 安化教谕。

陈嘉训 训导。

吴宗昌 长阳教谕。

王彰奇

张 洙 襄阳教授，有传，见仕迹。

张 渊 随州训导。

朱国皞 未仕。

罗世珍 训导。

鲁 钰

刘命赤 嘉禾训导。

池国鼎 清城知县。

唐 吉

刘珣鼎

王家瑜

张佳瑞 万县知县。

陈国柱 知县。

朱 英 知州。

熊正蕃 训导。

喻良臣 知县。

吴大治

萧寿昌

易 敕 行人司。

井宗周 训导。

朱地庆

胡之杰

萧永域 诏安知县。

李嘉庆 未仕。

江 沅 未仕，有传，见文学。

周 琰 未仕。

萧广昭 未仕。

岳生麟 未仕。

胡之宁 华容训导。

江澜谷 新宁训导。

李乾龄

鲁 录 江夏训导。

萧兴安

黎时雍 蓝山训导。

张灏睿 安肃知县。

孙选士

江 繁 左副都御史。

熊正节 训导。

项 翊 刑部郎中。

张仲璜 梧州同知。

吴守鲁

张淑珽 徽州同知。

张天柱 训导。

江 藻 工部郎中。

聂 铎

张天训 象州知州。

徐则裕 崇阳训导。

李俊有 天津运同。

杨之蕃 远安教谕。

朱松茂 未仕。

杨 旦 未仕。

彭 佐 云南理问。





喻之暹知县。

李必果未仕。

吴启治

谭 璟未仕。

何孔义

黄鹤鸣

黄圮尊未仕。

吴绍先

朱柏茂

易 枚保安知州。

蒋懋祖攸县训导。

吴宗翰彭泽知县，未任。

尹际铉

范之屏

黄朝辉

吴宗勋

熊祖覲

何 佩当阳训导。

彭心锦有传，见文学。

杨宗礼

谢隆翼

罗物载训导。

孙 阜汾州知府。

李西有郧县训导。

陈凌霄

黄道开有传。

李佑有

杜枕友

谢 谕兴山教谕。

张 澄

胡寿龄

周 崑旌德知县。

苏门载

杨自成

易道宪

尹明楫

胡 瀚

刘亮国酃陵县丞。

胡 灏

谢廷臣

朱 华安化知县。

蔡善元安陆训导。

熊正策

李国柱

张迪贞

蔡善备教谕。

项钟严嘉兴通判。

项钟建主事。

唐世俊桂东训导。

张坦含罗田教谕。

徐 铤教谕。

李兆云

王铨臣

许之豫户部主事，有传。

熊祖谟宜昌训导。

聂 铎

李天康

吴中垣

杜楚孙

吴定邦

郭玉麟绥宁教谕。

刘绍伶江陵训导。

张 琅

黄鸣金

蔡汪如石屏教谕。

程元昌郧西训导。

余应诚

谭凤祥未仕，有传。

余庭宣

李必畀训导。

戴率祖

郑从周

钱韩云

张问行

王世笃辰溪训导。

刘树芳

王启封杞县县丞。

谢世錡永平经历。

金祖谦武宁县丞。

唐世第郧县训导。

杨之鉴

萧元亮武昌训导。

熊正蓁

徐克祺江南参议，有传。

王 琰

洪 伟

叶遇春

张 翕

吴中瓯

吴必显

萧 棣

吴廷揆



李迪

胡浚训导。

吴曜荆州训导。

项谦郎中。

戴永联

马祐良

刘应讲

江祚崙

萧长祐光禄典簿。

彭泽琨

郭志仁枝江教谕。

黎大匡

邹之瑛

江戕副，奉天治中，有传。

孙兰芬山东布政使。

彭继彭汲县县丞。

黄元官户部福建司郎中。

萧瑞

吴允谟大名知府

刘琨大定知州。

张坦驄

孙光祀颍州知府。

徐谔刑部员外。

林志远副。

刘玉书

蒋佩思西安通判。

甘昌祺

任绍裔

刘策坤

熊正策

董正琮

叶方茂

萧文焕

萧廷相归州学正。

徐璘

项诗永昌知府。

冯天飏

戴天恩

李之尹

李钟奇

龚怀

唐裔潢

郭志道高州知府。

赵大陸

朱大材衡阳训导。

胡之晟

萧世准

许之桢有传。

杨宗孔副。

陈谷副。

孙光祖开化知府。

吴炯刑部郎中。

胡之最副。

王兆麟

黄彦安武昌训导。

萧璟崇阳教谕。

邓林

刘琮

彭琮

魏锡周

宋相度训导。

康良俊谷城训导。

刘廷瑜

李嘉质

杨熙

张坦快光禄署正。

蒋之升

钱纬云

孙卓知州。

刘铤

谢鼎铄

王戩副，有传。

彭之赐

彭一楷

程一鹏归州学正。

王元礼郧县训导。

萧元亭

陈嘉说

徐聪

项俞平武县丞。

田耕礼副。

王郢玉副。

项诚知府。

吴燮知州。

刘璜

甘昌祚蕲州训导。

谢开祚

汪采

罗天根

张报元

陈景登





严宏远有传。

王俊士

张天相

成世铎

刘经元

张良范

周英县丞，署清河马头巡检司。

刘珪

汪之冀

刘锦兵马司吏目。

夏元旦

王翰副

王廷礼

王日都

郭一裕山西副使。

李维岳

项余邳睢同知。

方禹治

刘嘉谟湘阴训导。

张士聪

朱必达当阳教谕。

江华孙

张景麟

刘卫

张受先武昌训导。

张坦议知府。

唐世皞东安教谕。

陈树翰黄州训导。

崔文元

孙光宗通判。

崔华缔鄆州知州。

向定保

张遇文主簿。

李呈序

陈正策

周淑文巴东教谕。

周淑濂

胡景圣

谢世达崇阳训导。

彭瑜

吴旭

党超先

彭彰

吴廷俊

周应麟

吴宗邵

项全

吴焯蒲州知州。

李维临

程兆华

高峻岐

蔡传道县丞。

萧瑚大冶训导。

吴世雄

张谱

姚廷禹

苏门祐

朱之琦

唐如柏

张世一咸宁教谕。

萧玘琼州同知。

王见

林长山

李俊宛平县丞。

刘安国

郑之良

段嘉梅

许攀桂

刘懿

俞伋

田耕礼

郑廷珪

刘绍传桃源训导。

李宗昉

董芳

雷镐

陈纲

萧文元

苏松

许猷武昌训导。

蔡时敏

刘良宪

李明训浏阳训导。

张坦谏汉中同知。

孙锡长阳训导。

刘余祉荆州训导。

彭之槐

萧韶潜江训导。

孙光禄鹤庆通判。

孙兰薰

查延掌南康通判。



张景星
项 喻 颍州知府。

汉川

林 荐

骆顾伯

杨橙首

王靖共

傅廷珍

王言綍

杨 璧

王业茂

许 灏

汪文显

傅之伟 训导。

聂 镛 教谕。

聂 铎 训导。

聂廷琮 知县。

黄陂

汪 金

杜 棻

王扶曦

张一珽 南漳教谕。

徐封永

汪之松

雷肇一 安陆训导。

刘之纾 知县。

谢梦弼 都察院经历。

沈之涛

黄佳瑞

胡 传 武昌训导。

邬光德

高应凤 训导。

周学颜

申道昌

萧 闾

聂 铎 朝邑知县。

张问仁

徐则淮 金匱主簿。

程 铎 有传。

方 坦 黄梅训导。

王靖共

姚德淳

林长岚

王仝昌 训导。

林之灏

沈庆元

尹际珽

汪培祖 见进士。

姚治虞

曹复参

林丛茂

邹 亨

汪寅祖

萧必焯

方钟龄 蒲圻训导。

方运古 襄阳训导。

杜 崑 教谕。

崔国章

林长嵩 训导。

聂廷瑜 知县。

吴于京

韩维翰

鲁之才 兵马司。

张正邦 通城教谕。

周鲁立

王三槐

杨廷藻 南漳训导。

姚 谐 安徽按察使。

姜起渭

刘开旭

王遵轨

李封纲

吴定鼎

冯步崧

喻广益

郑洗候

潘肇昌 郧阳教谕。

凌天阁

刘士弘 本姓陈。

安 琯 本姓张，未仕。

姚 哲 黎平知府。

谢 詮 知县。

程云路

李孚贺

张之璜

徐士悦





向 祐	詹世荣	鲁应才
王锡璜	张松年长沙训导。	张 翕
余 汲	余宏猷	李元尹随州训导。
詹士齐	闻国政	李 溥
余光然恩施训导。	涂之渊长宁教谕。	梅调鼎
许仁涵咸宁教谕。	吴陈言见举人。	周应元
王弘楹副，远安教谕。	徐致育湘阴贯，黄陂人。	吴薪传
金 榜	黎景淳	朱衣紫
徐大镛襄阳教谕。	万邦珍	刘之绅
刘 懿训导。	杨士升太康知县。	姚 让济南知府。
杨廷薰新野知县。	姚 谦铜仁知府。	杨廷燕远安训导。
姚 试教授。	姚 诚	王满川旌德知县。
任 英浙川知县。	任 晟蒲城知县。	童式度昆山知县。
杨兆亿丘县知县。	任 俊	王文浚
杨兆侨通判。	周 岫	邓宗魏城步训导。
杨兆儒通判。	周应元本姓郑。	姚之珂汇县知县。
欧阳方晟	欧阳方暹茶陵学正。	刘方夏长安知县。
郑廷璧知县。	欧阳方朗衡山训导。	周继述陇西知县。
周综锦松滋训导。	王立成均州训导。	李 珠知县。
刘曾仁武宁县丞。	刘曾毅洛川知县。	李 琼
李作栋	刘锡琼	陈 坤
王玉章	许攀桂	刘自任
彭之位真阳知县。	陈于琯刑部郎中。	夏之瑚零陵训导。
李邦彦	卢上达	卢廷弼
童世广副，眉州州判。	姚之璋	李 质
陈廷元	张垣赓巴东训导。	向在江曹州州同。
张 谦嘉兴知事。	潘 钰县丞。	庞启文岳州训导。
萧宗义南安知府。	周国滨渭南县丞。	
罗维缙	陈丹诏	黎来鉴
李奠邦	王遵惕	鲍苍龙
易 升	王立感	叶于济
		陈尚义
		刘锡瑶
		詹天颜



范振纲
姚 征
徐正升
刘之绩
谢 锐
田 泰
高乔龄
刘曾信

姚之珪
陈服义
姚之琰
姚之璋
杨绥祖
高亢宗
李 瓌
刘 寿

傅懋官
姚之珩
徐元抡
杨廷葵
陈好义
沈文葵
郑纪兰
刘 龄

徐大铨
姚之琬
姚之珣
祝 柱
高虞凯
张洪度
王本钰
刘成瑛

孝感

李光衡
万人先
熊赐瓚
熊 翔
程大毕广东盐运使。
严正律
武士恪
黄我任
熊志洛
李又启
彭希栋知县。
丁光大
萧秉阶邯郸知县。
程大章
胡觐光
胡必彧教谕。
鲁演师
熊志仁
叶子葵
刘如箕
池 瑶

傅邦相湘潭训导。
程大覃中书。
屠宇训训导。
黄榜开
熊赐烈
胡敦悌学正。
严 僖学录。
李士瞻经历。
俞之俊
江士毅
熊志实
严 偁
陈于陞
胡尔赓
陈元助
程大华
程大纯
程光琦黄州训导。

沈岐注
李嗣泌
闵有恪

严士骥
池 璠
宋以宁

胡秉鉞
程大璫
傅彦朝训导。
夏熙臣安陆教授。
程大巩
武士儔
程大肇
汤懋昭训导。
戴吉旦
彭熙梓训导。
严 侔醴陵教谕。
李经邦
程大绪黄州教授。
屠奏効
李之楠
程大卓
李计生
程光祐训导。

唐士廉
张天秩训导。
汤尚聘





程大用

胡 皋

梅嘉卉

陈心光

程大戴

马其栋训导。

程大莘

夏力恕见进士。

程继祉

彭天貽

陈建义

程光镛刑部主事。

袁国霖扬州同知。

池 琛安仁县丞。

程大纯麻城教谕。

程明涛枝江教谕。

葛尚志鄖阳训导。

马其爵长阳训导。

刘 迴

世宗宪皇帝雍正

汉阳

李 演

徐 传

周 钟

吴士锦主事。

吴绪荣黄安训导。

傅辅光

方 璲副，长阳教谕。

张天纵

秦 坛

范 相

杨 峨

闵作砺

张世基

沈岐铨南漳训导。

李世显

饶 信

程明浑州判。

唐维咨

张星拱

严 昉山西粮驿副使。

武锡彤开封同知。

谈继文碭山知县。

池上凤浙江盐大使。

程光朝崇阳教谕。

程大卓衡州训导。

傅嗣衡枝江训导。

胡世琅副。

张良范

周士廉

王文师

张天忻知州。

李廷伟

程嗣颐

罗啓人副。

吴 翱

郁成威本姓尹。

鲁邦震

鲁演观

陶志遐

陈昌期

程维祉

郭绍仪

陶志逊

郑 勳

刘愈曾

郑 郅

王 逊

吴嗣正酃县县丞。

鲁崧高

萧有誉巴东训导。

程光珠奉天府丞。

彭体仁大名同知。

李宪极番禺知县。

程光玥光禄寺典簿。

萧承澍松滋教谕。

李天耘均州训导。

王作人竹山训导。

黄 坤

赵梦更

张俊昌蕲水训导。

吴绪永横州知州。

周继唐

项大复

吴士鏊

刘应元

徐永禧

丘之成



徐守基知县。

徐 让

卫正治

陈国宝

傅辅先

黄朝晖

邓之显

陈 倬

萧 璞副。

李 纯

汉川

张人彦

张问政

王叶灿

黄陂

王 宾副。

王 宾^①

高 阳

蔡颢扬

孝感

方士尧丹徒知县。

吴来聘

夏力俊见举人。

戴廷模

程光铎

程光铭

胡观海江津知县。

卫正光

张奇弼

江崐孙

许学致

董受旋

潘其光教谕。

龙 眉副。

徐方庶

孙一柱

岳亮经

张显龙

骆 玺

黎景淳

徐大乾

刘世荣

李作栋

杨敬师

胡世琅

程大樸副。

吴集义

曾以鲁

杨灼知副。

金 枢

劳师善

孙光祺

韩 瞳

龚效遂

熊祖武

吴山秀

吴山毓

缪 奎

罗蟠龙副，见举人。

汤 震

龚纯潜

张联科

朱衣紫

彭耀祖

刘遂志

梅 萼

张世炳

熊念祖

熊绍祖

程大柱副。

冷廷升

宋腾鹏

①止已有“王宾”，此处疑为衍文。





今上皇帝乾隆

汉阳

王履泰副。

郭正霖

万迪刚副。

常生华

梁士英

刘万鉴

汉川

王业熙

熊 道

黄陂

王羽凤副。

孝感

张士枢

张可大

黎来弑

吴山齐

吴 璋

严兆梅副。

蔡传世

曹 镛候选训导。

王 前

冷廷升

鲁演文

李起冶

刘志周

劳敦善

江 瑾副。

江祚崑

魏光国

童式廓

舒遇奇



《汉阳府志》卷之三十九 人物〔八〕

〔选举表〕

辟举

汉阳

明

陈杰府学生，历官参议。

倪智府学生，任知县。

郝仲诚儒士，任国子监助教，历官参政。

何得中参政。

曹体仁知州。

王彦谦府学生，任训导，改行人。

王宗贵同知。

国朝

陈和府学生，雍正□年以居家孝友、文亦可观荐，特授永川知县。

汉川

明

曹寿天训导。

胡若虚训导。

王宏道知府。

何立参议。

国朝

马臣烈抚州通判。

黄陂

宋

程颐元祐元年。

明

张瑞洪武二年布政使。

万钧洪武二年学正。

张子贞洪武二年侍郎。

王彰洪武二年太仆卿。

王纯甫洪武二年少卿。

李本忠洪武二年同知。





孝感

明

周梅洪武元年。

颜记洪武元年知州。

黄宗泰永乐元年训导。

黄敏宣德元年。

傅如圭崇祯元年。

国朝

屠奏疏顺治元年参议。

彭履仁雍正五年，选举孝廉，如皋知县。

宴景殊雍正五年，选举孝廉，枝江教谕。

武进士

从前旧《志》无载。

汉阳

国朝

顺治己未科

李犹龙北直拱极城都司。

易德谦守备。

顺治辛丑科

胡国栋淮安大河卫守备。

康熙丁未科

孟胤

康熙庚戌科

彭继文

康熙癸丑科

解斯和侍卫。

康熙丙辰科

陈谋守备。

鲁仁洪武元年。

黎贵洪武元年知县。

涂和永乐二年。

黎灏宣德元年。

程大吕康熙元年。

黄之常镇羌游击。

黄洪造

黄焞守备。

刘铎

陈正国湖广掌印都司。



康熙庚辰科

彭天秩

康熙癸未科

万必龙

刘履圻四川守备。

苏曰亨

康熙丙戌科

苏门辉守备。

苏门辑侍卫。

康熙己丑科

黄元溥侍卫参将。

范 岑

彭应鸾守备。

石宫音

康熙乙未科

周必达

傅作相

雍正癸卯科

杨 琯

马国琯

邬弘遂守备。

雍正癸丑科

杨 琯守备。

乾隆己未科

姚方听

乾隆壬戌科

杨 琳

汉川

明

天启壬戌科

王弘猷云南副将。

崇祯庚辰科

黄正字

国朝

康熙辛丑科

马汉杰四川守备。





黄陂

明

万历壬辰科

彭益严参将。

万历己未科

韩养正副将。

天启壬戌科

熊奋渭游击。

崇祯戊辰科

韩范闻游击。

崇祯庚辰科

萧起龙游击。

国朝

顺治壬辰科

韩奕探花，参将。

康熙癸丑科

周嵎福建守备。

康熙辛未科

闵世骞千总。

康熙庚辰科

萧起凤游击。

康熙癸未科

江绪邓州守备。

康熙辛丑科

马云骧

乾隆己未科

刘宗天守备。

陈士元榜姓何，兴汉镇守备。

周于德



孝感

明

万历辛丑科

鲁美中副将。

国朝

康熙甲辰科

沈岐仪

康熙戊辰科

文 彩长沙都司。

武乡科

汉阳

明

万历辛卯科

毛炳如守备。

万历庚子科

刘 侯

万历己酉科

郑应芳

吴士彦京卫镇抚。

崇祯庚午科

朱元佐都司。

吴 山

崇祯己卯科

杨国威守备。

崇祯壬午科

艾台鼎

卢 骥

李犹龙见进士。

张 威





国朝

顺治辛卯科

彭 坦千总。

谢再安千总。

张邦宁

周陈侯守备。

顺治甲午科

易德谦见进士。

周士望

易宗义

孔宗仁

李以箴

黄 焯见进士。

顺治丁酉科

邓桂枝

孙日羨

曾绍孔

顺治庚子科

刘志勗

冯 俊

胡廷试

何敦厚

胡国栋见进士

李实先

刘铎见进士。

康熙癸卯科

胡公望

屠天瑞

许上珍

劳定国江南崇明提标守备。

张 鏊

杨 灿

解天禧

康熙丙午科

万邦宪

孙克昌

陈正国见进士。

李芳坤

孟胤见进士。

尹于野

吴鼎实

刘绍基

康熙己酉科

彭继文

冯 俨

黄之鼎

於 灏

吴尔仅

刘国相

周铭常

康熙壬子科

解斯和解元，见进士。

陈 谋见进士。

吴飞熊

漆 经

李志韩

康熙戊午科

黄帝臣



康熙辛酉科

黄鹤翔

黄钟声

周世忠

杨大经

康熙甲子科

江文泽

黄经邦

闵 騫

张姚黄

康熙丁卯科

刘树芳

康熙癸酉科

陈培植

康熙丙子科

刘履圻见进士。

康熙己卯科

苏门辑解元，见进士。

苏门祐

宋相赓均州把总。

金国俊

黄 光

徐永祚守备。

黄正璜

苏门辉见进士。

康熙壬午科

黄鼎志

黄士锦

石宫音

吴世俊钦州守备。

康熙乙酉科

徐成贞昭东总兵。

张 琰

杨大勋

徐 纲

萧再何

李之佐

康熙戊子科

杨有凤

李大秀

萧斯孔

康熙辛卯科

张朝俊

黄鼎铄

夏至刚

苏门祺

李 楷

康熙癸巳科

刘华国

崔 峋

黄士奇

杨大烈

喻大经

傅作霖

辜光国





康熙甲午科

黄 湘

胡 宋

李作楫新安领运千总。

汪 瀚千总。

康熙丁酉科

刘廷瑗

丁国昌

邬弘进

仇殿东

夏至道

康熙庚子科

崔国材千总。

邬 鹏

李之彪

雍正癸卯科

张宗房

周拱志

雍正甲辰科

戴一金

雍正丙午科

廖维藩

刘伟烈

宋 儒

严建正

雍正己酉科

韩一采解元。

雍正壬子科

贺万年

雍正乙卯科

唐 都

刘 钧

姚方昕见进士。

乾隆丙辰科

潘 超

成平治

翁正相

乾隆丁卯科

邬正英

汉川

明

天启辛酉科

王弘猷



崇祯癸酉科

王来取

魏应运

崇祯丙子科

黄公石守备。

陈 幬守备。

崇祯己卯科

刘芳鸿

萧鸣霄

黄正字

崇祯壬午科

谢光祖

国朝

顺治辛卯科

王良谟千总。

张则达千总。

黄正气千总。

曾 奇千总。

顺治甲午科

金殿臣

黄正策

顺治庚子科

严正光

江百派

程 鹏

钟 鼎

张大勋

康熙丙午科

戴本胜

朱士达

康熙己酉科

江百胜

康熙甲午科

马负图江淮副守备

雍正癸卯科

萧行健

王 玺

雍正丙午科

王德化





黄陂

明

万历癸卯科

梅魁春

天启辛酉科

韩养正

韩范闻

周秉恪

冯时中

周开祚

天启甲子科

姜周仁

吴登云

陈平裔

冯 英

吕国泰

詹用吉

段养心

天启丁卯科

杨志震

萧启兆

方承宠

崇祯庚午科

段士美

崇祯癸酉科

周无敌

阮国珍

方贞龙

韩黎伯

张 曙

崇祯丙子科

罗彦善

崇祯己卯科

杨于崑

陈三捷

王生善

萧启龙

许凤仪

熊奋渭

韩应暘

国朝

顺治辛卯科

韩 奕

张大威

杜松然

姜 疆

王猷善

韩光裕

翁镇国

丁翼圣

顺治甲午科

冯士彦

王 伟

王 锦

方可从

胡 炼



顺治丁酉科

刘 遐

袁继禹都司金书。

康熙丙午科

周 嶠

王三升

康熙己酉科

冯全德

周定鼎

向在澧

胡佐圣

康熙壬子科

夏大慧守备。

毛鼎铨守备。

彭佳章

刘士炜

熊 奎

韩 珽

康熙戊午科

何一元

刘 炳

刘宗天

刘貽孙

周 憬

康熙辛酉科

傅 燾解元。

蔡应谟

任 远

黄尔点

梁国柱

康熙甲子科

王式坦

董国典

姚 黄

燕受祺

傅 彪

周 灿

康熙丁卯科

杨 楨

王式章

余元英

冯三略

康熙庚午科

闵世骞

周综洛

黄逢春

金辅世

陈兴远

康熙癸酉科

李本茂

王 艺

杨大雄

梁国栋

王 湘

周 介

徐必成

康熙丙子科

萧起凤

王三达

钟之芳

汪怀德

章光绪

周之凯德州卫千总。





康熙己卯科

汪循圣	胡舜裔	王定邦	胡绍虞
-----	-----	-----	-----

康熙壬午科

陈裔舜	刘维山	席 珍	曾 英
韩国璜	万邦瓚	周于德	王士良

康熙乙酉科

张汉儒	江 绪	温光道	萧遇春
-----	-----	-----	-----

康熙戊子科

毛 诗

康熙辛卯科

燕贻诰	乐汉儒
-----	-----

康熙甲午科

张 纬

康熙庚子科

马云骧	赵镇鼎	甘 光温州卫千总。
-----	-----	-----------

雍正癸卯科

刘遐

雍正己酉科

杨斌魁

雍正壬子科

彭时亮

雍正乙卯科

王永清

乾隆丙辰科

彭大济

孝感

明

万历庚子科

鲁美中



万历丙午科

夏 鼎

天启辛酉科

胡忠朱

鲁羲中

天启甲子科

王三锡游击。

吴叔言

天启丁卯科

万以豫

胡嗣寅

崇祯庚午科

龙 韬

崇祯丙子科

喻 韬

崇祯己卯科

沈 浑游击。

李岐阳守备。

崇祯壬午科

胡其浑

国朝

顺治辛卯科

胡如龙

明士杰

徐凤翥

李 迴游击。

顺治甲午科

周士望守备。

顺治庚子科

胡国栋

沈岐仪

康熙癸卯科

宋 祉千总。

吴国珍守备。

康熙丙午科

严正笏

周申命

鲁邦献守备。

康熙己酉科

程大仁

曹 魁千总。





康熙壬子科

丁所琪

康熙戊午科

程正从

文 彩

康熙辛酉科

丁世仪

陈 彩

叶之蕃

沈 达

康熙甲子科

李起元

凌 统

康熙丁卯科

张 鳌

夏有度

张懋皋

康熙庚午科

张玉林

康熙丙子科

饶士毅

康熙己卯科

张 京

金国俊

丁逢年

康熙壬午科

严思弢

康熙戊子科

王 珩

王嘉循

廖 洵

康熙辛卯科

周齐武

杨应统

康熙癸巳科

汪万鉴

康熙甲午科

王思道

宋则荣



《汉阳府志》卷之四十 人物〔九〕

《笃行志》序

尝观孝弟力田之科，与贤良方正并设，所以敦实行也。读书而思笃行之士，虽未必尽蹈中庸，然其孤行特立，矢志较然，可谓难矣。彼乡党之人，有不畏功令而畏彦方，是亦励世磨钝之一助也。历溯芳型，令人神往。

作《笃行志》。

笃行志

汉阳县

宋

张昌中 处家以义，历世不分。冯当世京尝赠以诗云：“一水潏洄绕沌村，子房苗裔此间存。同居八世三千口，可惜君恩未表门。”嘉定间，孙杓守汉阳，嘉其义，捐俸代之纳税。事闻，表其闾曰“义门”。

明

胡定 字静夫。郡诸生，次当贡，不赴而隐。家屡空，晏如也。少为异母弟所侮，至讼于官，定惟哭，不辨。官召父老，直其事，责异母弟而慰遣之。

王瑚 字汝器。少读书，好义，周困扶危。万历中，两值大浸，捐谷数千石备赈，掩骼骸无算。屡请宾乡饮，皆固辞。年八十终。

熊士章 字文麓。其先进贤人，随父任楚府典宝，遂家汉阳。补诸生，与江夏郭正域、任家相友善。重义好施，至老不倦。日坐市门，见人有饥寒状，必多方济之，至家中落，弗顾也。

胡遵义 天启元年，知府周三锡以城无内附，乃运石周砌埤墙。遵义捐资督工，颇著劳绩。

廖应魁 混迹市廛，留心书史。王府争汉口地课甚横，应魁挺身力辨，至





受拷掠，终不肯诬服一辞。人称其劲正焉。

熊士奇 性慷慨，不吝施与。贫者贷，无以偿，或质子女、田宅，辄为之焚券，曰：“勿以小利折而骨肉、夺而居食。”孙征太，举人。

国朝

吴 岩 字自玉。为人光昌俊伟，心无城府，好读书，不求仕进。事父母以孝闻，亲柩在殡，邻人不戒于火，岩抢地呼号，猝反风，宅得不毁。弟早卒，抚两孤如己子。宗党不能自存者，置义田贍之。年七十八终。子正治，见《仕迹》。

项 璧 字象明。本彭氏，父小塘冒舅氏项姓。璧性质凝重，笑言不苟。喜济人急，家故无余资。遇岁歉，尝行村野间，见厨无炊烟者，即以小银封从门隙掷入，受者多不知所从来也。子一经，见仕迹。

萧箸龄 字邕孙。邑诸生，方伯鸣甲子。性仁厚，年十岁，为贼所执，倾重资获免。及长，有告以诱贼者令图报，龄不可。从兄某居毁于火，即割己宅与之。一贫友误卖婢于乐藉，龄闻，即捐金赎归。其行事多人所难者。子三人：弘荫、垂荫、丰荫，皆诸生，有文名^①。

吴国琮 字麟生。性坦易，乐施予。镇有罹水火灾者，必遍恤代谋，无致失所，咸称盛德。会祖母程年高抱恙，国琮刲股肉和药以进，遂霍然起。人以为诚孝所感云。会其子士鏊以新例应选司马，遂膺诰封父母如其官。

吴士锦 字襄文。少有至性，父国琮好施予，每为勗勤之，无吝意。会其弟补博士弟子员，士锦喜曰：“书香有起色矣。”其友爱诚笃如此。会以新例应选主政，部檄频催，并得诰封父母如其官阶。偶以微疴殒，人惜未尽其用云。

吴其鏊 字甄士。幼俊颖，受书辄成诵，人皆以千里期之。无何，父与伯兄皆丧，乃弃儒为商以养母，孝行昭著，且性喜推予，为人排患难，归旅棹，代偿国课，虽极受其累，无怨言亦无德色。持身俭约，布衣蔬食若寒素然。妻兄宦黔中，以书招之。其鏊抵署，力劝赈饥缓税，兵民感悦，勒石称颂其勋。未几旋里，优游觞咏以终。

吴 暄 太学生，居乡广行善事，捐修汉阳西门外大路五里，以便行人。乡饮大宾一次，雍正元年，以子炯官工部，恭遇覃恩，诰封奉政大夫、工部虞衡清吏司郎中，加一级。雍正二年八月内，子炯特放广东粮驿道，请假省亲，

^①原书此下至“王士谦”以上为“又四”、“一五”（当为“又五”）两页内容，当为原版刻后补刻插入，故正文亦作双行夹注挤入。此次整理，改为正文字号。



奉世宗宪皇帝谕旨：“吴炯父母高年具庆，着赏内府秋香色素缎一匹，元青素缎一匹，归家祝伊亲寿，即着吴炯带去，钦此。”又赏御书“福”字一个。配程氏，诰封宜人，生子三人。

朱蕴铤 字实茂，藩裔也。性刚介，有才气。甫弱冠，养其父故中尉武城公，慨然弃举子业，手胼足胝，动经数千里，力致丰腆。暮年专以课子若孙为务，隆冬盛暑不少辍，卒食其报，受其孙戊午科举人利津县知县朱容极荣封。子盛淮，字东侯，实茂长子。天性孝友，年虽壮，其翁或小故加怒，东侯受之恬如也。昆弟析居，田庐取其荒敝。后诸季破产，旋复周给。重然诺，好施予，虽子若弟列胶庠、登贤书、封诰有加，而自视欻然。

吴 燮 岁贡生，候选知县。居家孝友，好善乐施，终身不倦。居父母丧，俱筑室墓旁，哀毁终制。又绘望云图，以写哀思。歿后，里人嗟悼之，谥曰“纯孝”。以子山龙授光禄寺署正加五级，诰封中宪大夫。

王士谦 生有至性。乙酉，贼陷城，欲刃其父，谦以身蔽之，被数创不动，贼义而释去。父歿，与兄士乾同庐墓三年，居恒淡泊，自甘歌咏不辍。顺治丁酉举于乡，授任丘令，未任，卒。

江油然 字元白。弱冠补弟子员。状貌魁梧，多膂力，诵读喜谈方略，谙兵事。崇祯中，寇氛日炽，油然结乡勇，激以大义，为捍御计。适左帅部下惠登相有溃卒，由豫将入境，焚掠甚惨。油然率数百人相持于后襄河凡六七日，卒度不能入，从他道去。事平，抚按嘉其功，欲改授武阶，辞不就，逾年卒。子如绘，字图示，年十三，食饷郡庠。性孝友，早失怙，屡经离乱，凡一姊二弟三妹婚嫁皆身任之。从叔祖守九江，以书招致。爱匡庐胜概，恣游经年，有终焉之志，寻卒于署。子洵沅扶榇还。

孙聿修 字思文。新安人。爱晴川山水奇秀，遂占籍汉阳。生而英卓，挥霍近侠，又不为崖岸崭绝之行，闾里翕然称长者，举乡饮大宾，以子皋贵，赠如其官。

孙 皋 字鸣九。康熙壬戌进士，授中书，以亲老，恬于仕宦，朝夕省定罔懈。居丧哀毁，春秋祀奠，悲恻如初。教诸弟成立，戚属匮乏者，资给之，邑有旱涝，每倡众捐济，其首义为多云。

项钟建 字同江。年十五，补郡庠生，有声，循例需次主政。生平喜施予，岁侵，每捐谷赈饥。老友李序韩贫而乏嗣，买妾以赠。师死，抚遗孤女，倾篋为嫁士族，岁时周给不倦。年三十五，旅卒京邸。

李佑有 字敷四。岁贡生，平生以为善最乐，施药周急三十年。晚家渐贫，





犹力行不倦，乡里称为端士。

唐世华 字熙载。郡庠生，性孝友，居父丧时，邻火延其宅，世华抚柩哀号不出，火旋灭。兄世峰官泸溪训导，世华独往扶榇归葬。老谢诸生，为乡饮介宾，年八十二卒。

彭启贤 字敬庵。少孤，事继母尽欢，读书好古，日中持筹于市，夜则篝火呶唔。凡邑中桥梁、社仓、普济堂诸务，经启贤□^①，悉公忠无弊。生平乐施好善，累致数千金，手即散去。年六十一卒。

张 暹 字汝升。诸生，留心理学，居母丧，不作佛事，不入内室。既葬，麻衣要经，寝处苦块中，三年如一日。乡里多称。

胡大本 字紫荆。为人质直好义。年二十余，妻亡，即不更娶。或劝之，则曰：“吾已有二子，安用滋累为？”自此鰥居一室，以大耄终。

邹履益 字裕也。幼力学，为诸生，有名。兄履坦重交游，喜挥霍。履益安贫不问。晚年，家益落，惟闭户拥书，足迹不入城市。人有以斗升赠者，坚拒不纳。里党高之。

严宏远 字小修。诸生。年十四时，兄病亟，远为文祷于神，愿以身代兄，竟获痊。生平容止必端，冠履必整，见者起敬，多以为善人长者。

吴 曦 邑庠生，天性纯笃，教子弟存心忠厚。偶过邑南升官渡，见桥毁，不利往来，捐修大石桥一座，名曰“慈渡”，又修桥头大堤一条，长□□□□□□□，并施棺木五千四十八具。一宦与其子允谟作宦同城，相贷八百金，后其宦大显，道远未偿，复以事解组过其庐，而允谟没矣。曦命孙检其券还之，犹深缱绻相送数十里，信宿乃归。其素行盖如此，以子允谟官，诰封中宪大夫、直隶大名府知府。

汉川县

明

刘太永 字伯年。孝友笃诚，不慕荣利。父汉璧远宦，卒于任。太〔永〕扶丧归^②，徒步走数千里，哀毁骨立。友爱两弟尤笃，乡里称之。

刘尚义 正统六年，勅各郡县输谷赈饥，尚义即首捐千余石。事闻，诏旌其门，

①“经启贤”下，原书空缺一字，疑为“手”。

②“太”下，原书脱“永”字。



蠲其徭役。

成柯 督理城工，捐资助赈，屡膺旌奖。

孙伟 恂恂淳谨，训子弟以礼法，闾里化之。邑令彭造庐延请乡宾，匾其堂曰“世上难逢”。年九十九卒。

姚嘉典 字峻吾。旧《志》载：绝迹公门，不娴市局。年九十余。巡按白题旌。孝友无间，操履无瑕，年逾九旬，而不磷不缁，诚风世之标准也。

黄陂县

明

周之杰 字松冈。少失怙，事母笃孝，与其弟之化友爱，从无间言。四世合爨，室无私帑。易簣时，语不及私，惟以“力田孝弟”嘱其子焉。

杜爱洪 邑诸生。尝与余姓者为石交，余卒，托以妻子。洪泣受，为之持门户，抚遗孤，俾之成立，数十年如一日。其生平好义慷慨多类此。

张鹏远 字图南，贡生。其父初艰嗣，曾抚子鹏程，既而鹏远生，程以长而私有贮置，远惟推让嗣兄，莫与较也，人多义之。

彭明古 字崇吾。诸生，好学轻财。曾有人为贷五十金，逾年无偿，将以其女抵逋，明古即为焚券遣归。当事重其义，举乡宾，卒年八十。

陈致中 字正吾。负性慷慨，隐居响山，号休休居士。抚幼弟成名，不析箸。姊有遗孤，给以田宅。致中长子曾聘刘氏女，后刘以疾废，女家请改婚。致中曰：“弃疾毁盟，伤信不仁，何以示我子孙？”遂迎归，爱如己女。邑令武请宾乡饮，辞不就。年七十五卒。

侯信卿 字怀宇。栖隐钓台，乐善不倦。曾有农民刘一荣者，父死无棺，泣谋诸妇，鬻身以葬。信卿闻而义之，贯田代赎，随白诸邑令。令为颜其堂曰“绍董”。里人多重其义。孙王臣，以选贡为即墨令。

宁廷征 字达夫。少英异，耿恭简极推之，谓其可与言道。生平喜怒不形，有犯者，绝不与校。好为人排难解纷，里中利弊，必请于当事，至兴除后已。邑令亦雅相倚重，参议冯公为旌其庐云。

国朝

熊德溥 字瞻原。诸生。父烈猷，判济南，城破殉难，两兄从死。溥方十三岁，从寇氛中与仆扶柩归葬。每值忌辰，痛哭不食者数日，年八十犹然，作孺子泣。





闾党称之。

郑济 字方舟。生有至性，尝受业于张若仲。及张卒，哭泣奔赴，为之经纪丧事。尝置木主祀若仲于家，或问古礼有是否？济曰：“昔元顾润之葬师先茔，则置主亦可，纵古制未有，吾自称吾情耳。”其笃于师谊如此。

张朝选 字仁轩。嗜读书，每遇古人孝友遗行，辄拍案叫绝。母病，尝割股。闾党欲上闻，选正色曰：“敢因亲病得名乎！”坚辞之。他如拯贫焚券，偿还遗金，里中每称诵不置。

孝感县

明

邓林 字茂之。为兴业尉，清介不名一钱，归而家徒四壁，厨烟恒冷。邑簿尝馈以粮数斛，林却之曰：“小民不辞襁褓暑雨，转饷东南，林敢以丘壑之余，口腹累人乎！”其严于取与类此。

张绮 字仲实。诸生，有节概。邑苦烦赋，绮请于上官，词旨通辨，当事为之动容，赋赖以减，邑人德之。

高从谦 字益甫。素性恬退，教授里中。未壮，妻死，历年七十，不更娶。邑令袁光宇欲请冠服荣之，谦固辞。食贫自力，泊如也。

邓福纯 少贫，夜拾遗金数十，求其人还之。族中不能自给者，勉为婚葬。子奎，举于乡。

傅伊 字梦弼。性孝友，好义，补诸生。与杨忠烈珪友善。忠烈被逮，裹粮送百里外，已逆珪矫旨追赃，伊为募凑千金，时论韪之。宾于乡者再。

胡臣纯 字宾南。家贫力学，有声庠序。性好施予，所得县官饷，必以分给故旧。万历中，资深贡于庭。居母丧，以哀毁卒。

黄汉明 崇祯癸酉举人。孝友笃至，侍父疾，不解带。母病目数年，扶掖必躬亲，事兄如父，视侄若子，里中推为长者。任九溪卫教授，致仕归，卒祀乡贤。

屠宇镇 事继母以孝闻，抚异母弟曲尽友爱。既析箸，弟家中落，复以己业分给之。族党中不能婚葬者，捐资以助。修桥梁、施衣食，乡里赖焉。

夏珩 字声锡。邑名诸生，年未四十，即弃去。性和易，尤喜拯人困。崇祯末，流贼逼城，乡人入保多露处，珩怜而庇之，资以糜粥，全活甚众。族有苦徭者，珩为鬻产以出于险。其生平厚德多此类。



国朝

沈时燦 字文波。性友爱，姊寡而无嗣，迎归养之，有无与共者数十年。子逵，授温州司理，命之曰：“路温舒，汝师也。”后逵在任，多所平反，盖得其义方之训云。

武惟熊 字梦祥。少孤，事母色养备至。母歿，庐墓数年。伯兄勋早逝，抚遗孤如己子。明末，流寇入楚，熊建寨筑堡，保聚乡里，邑人赖之。子之亨贵，赠中宪大夫。

陈仔昂 字扶升。性孝友严重。崇祯癸未，年十岁，时流贼蹂躏村邑，其父瑞图被縶，昂痛哭匍伏，愿以身代死，贼义而释之。顺治初，贡入太学，中康熙戊午乡试，授谷城谕。

严正矰 字式公。邑庠生，性乐施与。邑人以恒河寺塞水为患，矰于邑南舍宅为寺，移置僧寮，里中便之。

周 澍 字东水。高才笃学，中康熙壬子乡试。家雍睦，四世同居，有义门之风。

胡秉弑 字彝宗。邑贡生，夙敦节行。其兄秉铨客滇，卒于帅幕。弑闻讣痛绝，徒步万里，扶柩归楚，鞠遗孤如己出。幼失恃，事继母以孝闻。子璿，进士。

论曰：昔范蔚宗传《独行》，谓失周全之道，取偏至之端，或志坚金石，克捍强御，或操严冬霜，甘情小谅，亦有结朋协好，幽明共心，蹈义凌险，死生等节，其名体虽殊，而志行俱绝。然自东汉百九十年间，见于史册者仅二十余人。欧阳子传《一行》，慨“自古材贤韞于中而不见于外，或穷居陋巷，委身草莽，虽颜子之行，不遇仲尼而名不彰”，然五季衰乱，文字残缺，其可得而纪者，又止三四人。甚矣，笃行之难也。

今以汉郡一隅论之，其笃行君子，班班可考，所得乃如此之多，岂今人遂远过于古乎？抑亦式俗维风，在于节取，其上者讲让而敦仁，次者乐施而好善，其智者多原于问学，朴者则本于天良，孔子曰：“不得中行而与，必也狂狷乎！”虽事匪圆通，其风轨有足多者，而情迹殊杂，细为条品，俾传于后，殆亦仿范、欧之遗意云尔。





《汉阳府志》卷之四十一 人物〔十〕

《文苑志》序

昔杜少陵谓“文章一小技，于道为未尊”，文胜固非儒者所尚欤？然鸿笔之人，得志则视草明廷，不得志则藏书石室，岂无原本经术，可坐言起行者。江汉人文彪炳，由唐宋迄今，代不乏士，其间戏翡翠于兰苕，掣鲸鱼于碧海，虽未能一致，要多卓卓可纪，诎得谓雕虫篆刻而轻置之。

作《文苑志》。

文苑志

汉阳县

唐

郑锡 字正则。其先荥阳人。随季父官于汉，遂家焉。大历中，举进士，能诗，在十才子伯仲间，五言乐府尤工。

后唐

王仁裕 唐废帝时，召令随驾，一时诏书，皆出其手。汉初，充翰林承旨，兼知贡举，为兵部尚书。其所取门生王溥、和凝、范质，皆至宰相。周初，迁太子少保。所著有《紫泥集》、《西江集》、《入洛集》共八卷。仁裕喜为诗，少时尝梦人剖其肠胃，以西江水涤之，顾见江中沙石，皆为篆籀之文，由是文思日进。

宋

杨大昌 字正之。与姜夔白石交好。夔怀以诗曰：“促弦调宝瑟，哀思感人多。”其人可想见之矣。

辛泌 字克清。善诗，卜筑沧浪之曲。姜白石亟称之。



元

景厚 字德载。领乡荐，至京师，中书左丞许有壬师之。

明

赵蕃 教授弼之子，服膺家学，颇有文名。正统辛酉举人，戊辰成进士，授主事，未究其用，卒。

蔡溶如 字元度。博雅工文，以贡任湘阴教谕，解归。尝大雪绝炊，作《四无》诗以见志，学者争相传写。生平耿介，不妄取，簞瓢屡空，晏如也。

吴极 字元无。万历丙辰进士，就南武学教授，历户部主事员外，出守扬州，未任，改广南，旋引归。性极恬退，在林下二十年，殫心著述，所编《石经》、《大学疏旨》诸书，扶树教道，时人以醇儒推之。

陈明德 岁贡，辰州教授，文行不愧师表。万历间，秦京兆聚奎重修郡《志》，明德为之证据辨理，盖其协助居多云。

王光裕 字谦甫，少奇俊，能文章。既长，留心理学，从甌山张绪游。绪负气节，慎许可，独与光裕往复讲论不辍，深器重之。

熊鸣盛 字彦升。问学该博，中天启辛酉乡试。座主繆昌期奇其文，深相推重。辛未下第归，忽忽不乐，语人曰：“天下事可知矣。”遂绝意公车。子伯龙，见《仕迹》。

王袵 字章甫。少英异，从萧良有、郭正域学。为诗文，性复豪迈，家擅园亭，有玉山金粟之风。一时名士如李贽、潘之恒、谢三秀、公安袁宏道兄弟时来信宿，构水明楼以居之，留连酬倡无虚日。袵诗绮丽似晚唐诸子，以贡入太学，官华州牧，迁成都同知，卒。

魏晋封 字赏延。工举业，兼善歌诗。崇祯丙子中乡试。献贼破武昌，晋封作《战城南》、《哀江南》词以写其愤，草檄计图兴复。以母老不果，旋夭死。

王廷彦 太常少卿秩之子，由岁贡授荆州训导。博学孝谨，尤介于取与。署中掘得窖金，麾而不顾。后仕者竟以金致奇祸，人皆服其廉明。

袁楫 字汝济。萧司成良有甥，少与齐名。良有魁天下，官祭酒。楫尚颓然诸生间，行歌坐啸，泊如也。时当路重其才名，争相延致。楫珥毫属草，坐上坐，睥睨杯酒，意殊不屑。晚与王章甫袵交好，谈兵究经济之学。万历中，朝鲜陷于倭，士争以韬略自见。袵微讽楫，楫为书报之，甚见识力，遂终隐不出。

王家谟 字尔范。性聪敏，读书过目不忘。年十一，补弟子员，文名甚著。





天启间，崔、魏擅权，遂绝意进取，隐居教授，寻社诸君多师事之。子世显，见《仕迹》。

劳长祚 字元锡。自少为诸生，有文名。平居行无径，立无倚，暗室独处无惰容。生平得力，尤本《大学衍义》，常为人指授源流体用，昭若发蒙。性和平，笃友爱，抚弟申锡成名。授学江汉间，与熊鸣盛、堵维垣辈为别山一社。万历丙午，得而俛失。游其门者，多成名进士。卒年四十，识者惜之。

国朝

吴宗翰 字□□。工诗，尤善绘事，布景设色，得宋元人笔意。每自矜贵，不轻作。又好篆刻，凡金石遗文，必考究摹拟，期于逼肖乃止。居常以挥霍自许，常思得一任繁剧以展抱负。后由岁贡谒选，授彭泽知县，南还赴任，过□□桥，马惊，没于水。

萧企昭 字文超。少颖异，博极群书，十行俱下。顺治丁酉副榜，贡入太学，著《燕台制义》，名动公卿。相国熊文端尤器重之。昆山顾炎武学盖一时，企昭与往复讨论，顾深服其淹贯。于《周易》、《河图图》性理诸书颇有解悟，阐五子之奥，又以学莫先于辨志，作《定志说》，学者咸服膺焉。年仅三十二卒。子元亭，岁贡生。

堵维垣 字四辅。少失怙，从世父受学，好《皇极》、《洪范》、《河洛》诸书。家贫，授徒自给。性严峻，师范凛然。寻社诸子中，必以垣为眉目。子崑，顺治乙未进士。

王士乾 字怀人。陕西牧家宾子。崇祯己卯举于乡，顺治初，两赴春官不第，授孝感教谕。久之，移长沙府授。适令有以墨被劾者，倚士乾为排解，不得，遂反噬成大狱。子戡徒步走京师讼父冤，事乃解。士乾潜心述作，以文章自任，与弟世显齐名。王司寇士禎谓崇祯中楚名士，首汉阳二王。其学湛于经术，博综六艺，海内士执牛耳，皆欲得二王莅之以为重，其见推如此。

王戡 字孟谷。士乾子，负才岸异，以千秋自命。年十二，补邑诸生，有名。游长沙，作《岳麓》诗，王尚书士禎激赏之，遂倾动一时。中康熙戊子副榜。戡工文章，生平鬻手为活，足迹遍天下。落笔千言，脱稿辄流传，颇得南丰、熙甫遗法。尤刻意为诗，上下千古源流派别，了如指掌。士禎序其集，谓根底经史，传以兴会，衔华佩实，大放厥辞。其《池阳山行》之作，驰骋笔力，过欧阳充公《庐山高》远甚，谭艺家皆赍之。后举山林隐逸中外九人，戡未赴。年逾七十而卒。



李以笃 字云田。贡生，少颖，嗜读书，九经三史、诸子百氏从衡几案间，为文多奇情异趣，不屑科举业。游京师，辇下名人争相招致，笃落落然也。久之不遇，益放诞风流，自号“老荡子”，纵游吴越，所在追欢买笑，倾囊不惜，置姬宝镜，婢扫镜，相与征歌纵酒，即景拈毫，乐而忘返。合肥龚端毅作《老荡子失意行》以赠之。以笃天才放逸，诗多绮艳。著有《菜根堂》诸集。

蒋鸣奎 字西章。幼通《孝经》、小学，长益肆力于六经、性理诸书。所坐一室，颜曰“思过”。平生不作无用之文，其著述皆身心性命切要于学者。书法最工，酷似米海岳，得者争宝之。

蒋鲁传 字东衍，鸣奎子。性澹泊，不乐举子业，究心金石文字。其所为诗悲壮，多惊人语。书法尤有师承，出入二王，尝言玩古鼎而字学益进。所著《易经备义》，尝携游江左，苏抚张公伯行见而善之。

卢乾元 字万资。顺治己亥进士，授庶常。博学能文，尤工诗，五言号长城。书得钟、王法，人争宝惜。年四十一，卒于官。子禔祺，亦名诸生。

刘贲受 字鲁浦。明季诸生，年十五随父宦留都。会学使合试天下流寓，贲受居首选，文名大振。后举康熙戊午乡试，任会同教谕。生平最嗜读书，以古文为时文，皆卓然可传，晚赋诗，亦能自运机轴，空所依傍。子一鹏、一凤皆有名。卒年七十二，王征君戡志其墓。

王三登 字来硕。邑庠生，屡不得志于场屋，遂刻意为诗、古文，能窥名家阃奥。晚参佛乘，自谓颇有会心，年七十卒。

黄道开 字圮书。贡生，少颖能文，与同里朱天庆、李以笃、王三登辈讲求古学。郡守陈国公儒聘修府志。诗似宋人，古文词亦安雅可诵。

李国宁 字万咸。顺治辛卯举人，弱岁即通六经，读书五行俱下，能一日作十数艺，屡上公车，不第，遂闭户著书，不与闻外事。郡守丘公俊孙极推重之。

朱天庆 字开子。生而颖异，工于制举义，尤精书法，年十二即见知于学使蔡公曾。与熊学士伯龙结社汉上，互相切劘，学士雅推服之。顺治甲午，以明经授知县，未任，卒。

李必果 字仁熟。大理卿昌祚子。幼敏慧，十岁入庠，博学有文名，曾预修省、郡二志。子：咸有，安化教谕；西有，郢阳训导。

熊正笏 字元献。康熙戊午举人，学士伯龙长子，胚胎家学，睥睨一世，所与皆知名士，留连文酒，风流弘长，不愧佳公子云。子二：祖旋，知县；次祖旂。

熊祖旂 字鲁观，一字松岩。学士伯龙之孙，正笏之子，邑廩生。少通六





经，阅廿一史凡数过，生平富于著述，尤工诗，清新敏捷。尝限杯酒作《玉兰》长句，吟成而酒尚温。与人交，和易坦率，数十年如一日。年五十七卒，未竟所学，咸痛惜之。

刘一泰 字亨人。顺治丁酉副榜，其学长于《春秋》，贯通四传。康熙壬午，复以副荐，遂绝意场屋，隐居教授，年八十五卒。子嘉咏，丙子举人，任安陆教谕，有文名。

谭凤祥 字韶成。少孤，尝割（殷）〔股〕愈母疾^①。弱冠，食饩郡庠，刻励于学，书法逼南宫，诗在眉山、剑南间。后膺岁荐，两为饮宾。卒年七十五，著述多散佚不传。

许之祯 字宁友，贡生。学该贯，邃于六经，其为文，证据古今。家贫，授徒，凡经口讲指画，悉有法度。郡守郝公士鐸聘主汉阳书院，一时从游最盛。其教人必先经而后史，先行而后文。古文词，生平不下数百篇，惜散佚无存。老而好学，卒之日，尚临池作字曰：“石室深藏”，遂掷笔而逝。嗣孙曷曜亦名诸生。

王宁 字子安。少补诸生，有声，士大夫家多延致为师。尝游东鲁谒孔陵，作《浮游草》。其诗清雅闲淡可喜，书法出入《洛神》，识者多赏之。

江沅 字天际。生有至性，幼孤，抚遗编辄涕泗。年十六，食饩郡庠，以资深贡太学。性孤介，舌耕奉母，不干非分。其文根底六经，旁贯诸家，屡试棘闱不利，遂恬于进取，益肆力诗古文词，得作者阃奥。年六十，赍志以歿，士林惜之。

王翰 字东自。少嗜学，工为制举业，试辄前茅，为诸生高第。康熙壬午中副榜，一时学者多以文请质，评次紧严，少可而多否，然遇赏心处，亦为击节不已。著有《四书心解》，颇发前人所未发，今人家多有抄本。

唐裔潢 字泽元。贡生，工于时文。其文与王翰相上下，两人亦深相结，学者称为王、唐二先生。汉上少年为文知派别、有师承者，不问可知其两人门徒也。年六十，刊其文稿数百篇行于世。子冕，戊子举人。

王铭臣 字于常。贡生，诗学杜甫，善画兰，有萧疏淡远之致，得者恒珍之。弟铨臣，工书好吟咏，与其兄名噪一时，里中亦有二王之日。

龚相 字轩六。勤学，夜读必达旦。食饩胶庠，有声。从游数百人，多知名士。相有至性，卜其先人宅兆未吉，言辄垂涕呜咽不已。后省兄至安邑，得风疾卒。

^①“殷”，当为“股”之误。



罗世珍 字以猷。能诗，游江左，名遂大起。由岁贡任通道训导。邑属苗夷，多梗化，世珍教之以礼，渐就范，惜未久，卒于官。

杨嗣綰 字侶山。博览群籍，为文不染时趋。年四十，始补邑诸生。教授生徒，多名俊。为人谨饬遵礼法，虽盛暑入讲席，必衣冠。口吃，言他事则讷讷不能出，至剖析圣贤精蕴，沛然若决江河。顾以数奇，惜未竟所学而卒。

文师汲 字宾门。性傲岸，为文有古法，诗亦沉郁，五律尤可诵。书法法晋人。生平负义气，喜挥擢，数十百金，缘手辄尽。晚好谈武，奋袖低昂，两腕骨珊珊鸣。欲从戎任边事，不得请，乃走吴越、豫章、燕齐、秦晋，屐齿所至，感怀吊古，悉震发于诗文，惜卒后多散逸。

彭一楷 字端树，一字秋堂，贡生。惊才绝艳，于书无所不窥，古文词绮丽，宗徐、庾，诗出入樊川、丁卯间。时放而之剑南，不名一格，著有《耕云堂集》数十卷，南海陈元孝、吴门蔡方炳序之。性好游，足迹遍天下，所交皆一时胜流遗老，其《衡岳记》最工，曾辑《天海奇观》一书，补景纯所未备。

方文启 字梅岩。邑诸生，少孤贫，至性纯孝，奉嗣母如所生。长而刻志励学，淹贯群书。性和易，无崖岸崭绝之行。好古鼎彝及法帖名画，藏书数千卷，多奇文秘册。工吟咏，意度近陶、韦，所著有《偶存草》。年八十，耽情山水，每春秋佳日，携老友二三辈，竹杖芒鞋，寻花问酒，观者以为地行仙也。居恒尝训子侄曰：“一息尚存，此志不容少懈。”乡人比之王彦方云。

汪遂于 名颖，以字行。少贫，年二十，折节向学，喜谈经济。康熙甲寅间，曾献策军门，后将叙功，固辞归。遂殫力于诗，遍游南北名胜，有《漪堂诗历》一卷，徐石城惺序之，谓在樊川、郢州之间。

涂 侨 字郑良，为张禹木表弟。尝从游，张叹为畏友。补弟子员，有声庠序。生平不欺然诺，不苟取与，尤精藻鉴，凡所许可者，后皆有成就云。

张抡元 字天一。少补诸生，砥行立名，不屑时趋，毅然以圣贤为可学，洛闽五子之书，无所不读，著有《上达下达图》，于天人理欲之分，最为明彻。闻黄州陶开九名，负笈三年，昼夜不懈。登康熙癸巳贤书。《窗课经书文》梓行于世。

龙起凤 字韶九。性疏放，不喜礼俗，人目为狂生，益自得。书一寓目，懒再读，而为文含英咀华，究莫窥其涯涘。康熙乙酉举于乡，再上春官，不第，遂淡于进取。年仅五十五卒。

彭心锦 字拟陶，幼冒熊姓。年十岁，就傅僧舍，鸡鸣即起，窃佛香照读，





师奇之。二十八，贡太学，为黄冈王少宰封濬所知，尝编次《华宝集》，商（确）〔榘〕之益居多^①。康熙己卯试北闱，几得，倏失。晚入蜀，蜀大僚延入幕，两月即以病辞。未几，大僚败，多株连，锦独免，人服其知幾。

王全璧 字两如。性循谨，为文有矩度。雍正癸卯举于乡，授浏阳教谕，偕诸生讲求性命之学，士习一振。未几，卒于官。

吴钟藩 字介仲。顺治四年选贡，廷试第一，授通判，久之补常州，职司水利，钟藩廉静如诸生时。公项微不足，即以耗羨充之，不肯一毫入私橐。致政归田，以经学训后进，逾八旬卒。

江本淳 字方山。器识豁达，才气放逸，自以家旧显于儒，视流俗儇巧辈若无睹者，人目为狂，益自喜。康熙癸酉中乡试，尝游燕、赵、秦、豫间，登临吊古，皆发于诗。扁舟溯洄吴越，往来洞庭、彭蠡，讫无所遇合。晚署孝感教谕，以文章道义奖进多士，慨然慕苏湖遗范，贻馈有无，均傲睨不屑也。后卒于任。

李必昇 字臣简。以岁贡授黔阳训导，邑杂苗彝，学宫颓废，必昇捐俸倡修，务极密实，诸生讲习其中，文教秩然，后以病致仕。

徐则裕 字益斋。岁贡生，司训崇阳时，教谕奉裁，训兼谕职，则裕开讲堂，置东西舍宇，集诸生校艺其中，授餐致腆，资给膏火，三载费逾千金，取给家财，贻币脰脯，一无所染。多士尸祝于学宫之文昌阁，后以病乞休。

张洙 字圣居。幼继伯父后，以贡官黄梅教谕，升襄阳教授。本生父母歿，请终丧，格于例，每言及辄泣下。为人宽厚有容，虽御臧获，亦无疾声厉色。同官使酒尝慢骂之，置不校。后病卒，不能归，洙尽力周恤，俾返其槨。两任教职，皆兴学课士，克举其职。

张世任 字汝肩。康熙己丑进士。少失〔姑〕〔怙〕^②，事母以志养，家徒壁立，甘旨无所缺。既释褐，署岳州教授，讲身育士，著《岳阳课艺》行于世。以疾卒，郡中绅士公请崇祀名宦。

萧元亮 字节宜。幼有才略，胸无城府。初以岁贡授安陆训导，父艰，服阕，补训武昌。岁大侵，抚军陈璘减价粜米，委元亮董其事，出纳公明，四民交赖。武昌知府章培基修葺学宫，元亮竭诚综理，一木一石，不以私扰公。总制杨宗

①“确”，当为“榘”之误。

②“姑”，当为“怙”之误。



仁创立社仓，元亮劝谕积谷备荒，一时乐输至数千石。以保题首荐入都，卒于潞河舟次。

张坦谔 字一士。康熙癸巳举于乡，再上春官，不第。益攻苦力学，于古今文体悉能别裁，追踪往哲。年仅三十二。

汉川县

明

尹迥 字子长。万历丁酉举于乡，工为古文词，尝作邑人萧效用等传，甌山比于“空同沧溟”焉。

林大德 性嗜学，涉猎群书，文章奥衍。以岁贡授吉水训，勤考课，端士习。邹忠毅元标出其门。

刘烜 字用晦。文章夙望，为云杜李维祯畏友。从嗣兄绪讲学耿恭简之门，以明经官周府教授。端方浑朴，里人重之。

张绩 甌山绪之弟也。刻志励学，为诸生高第，时称之为张季子。以资深贡大廷，试第一。耿天台定向劝留太学，绩曰：“吾兄衰老，平生苦节而贞，吾欲蚤授一官，资禄以养。”遂谢去。铨次方及而卒。定向为作《天问》以吊之，其辞甚哀。

李时畅 字□□。万历辛卯举人，除临湘教谕。虚心向学，折节待士，捐俸改建黉宫，课士有程，不沾沾为修脯计。未几，卒于官。

国朝

程铎 字冰仲。孝廉宗洙之父，庶常廷栋之大父也。天资英敏，学识淹通，年九龄，以五经应童子试，邑令傅公奇之，拔冠其侪。制艺领袖诸生垂五十年，邑中掇巍科者，多出门下。生平律己端严，居家孝友，训子孙依于礼，恂恂退让，人比之万石君云。晚以明经荐礼部，卒，赠翰林院庶吉士。

程宗洙 字师鲁。少颖悟，读书十行俱下，每试辄冠军。素履洁清，言笑不苟。康熙辛卯举于乡，甫上公车，忽叹曰：“古人一日养，三公不易也。吾亲老矣，尚忍索米长安耶？”抵京数日，遂驱车返。厥后座主张梅麓少尉、马宣臣太史屡书趣之出，竟不应。卒，以子廷栋官赠翰林院庶吉士。

魏阅 字名阅。精于《易》，会通理数诸家，于京房、王弼之学靡不研究。张中丞朝珍推重之，创清风书院，延阅主讲席，从游甚众。邑人称为清风处士。





龙文玉 字人如。以诗名，与许民部嵩瞻纵谈风雅，其派别亦同，时称“龙许”。王真山戡尝赠以诗曰：“阿龙早著江南录，大许曾闻月旦评。”其见推如此。其所刊《睫巢集》数十卷，戡为之评隲选定。以明经两授令，卒于官。

徐桐 字次桐。少俊异，弱冠举康熙己卯乡试，文名藉甚。授蒲圻教谕，士风丕变。桐少有诗声，书法出入颠素，所画芦雁，亦居神品，得者争宝之。

黄陂县

明

方与时 号湛一。年十一，补博士弟子。已而厌薄时文，好性命之学，游吴越，闻王文成《绪论》，归则手二程书，别有解悟。户外请业者履常满。唐襄文、罗文懿皆追访其庐，顾不合时宜，人目为伪学，以谤致祸。门人段成恩身任代罪，经月始解。后讲学于木兰之白云洞以终，耿恭简为之传焉。

胡宾臣 字仲庸。万历辛丑进士，官翰林院检讨。工为古文词，馆课多居首卷。凡策对，切中时弊，可方贾、晁。惜早卒，未竟其用。

丁惟和 号乐轩，普郎之后。世居石阳村，卜筑一室，讲学不倦。

翁择庸 字述六。丁卯举人，署天门教谕，升德安教授，培植学校，整肃士风，升卢龙知县，以年老请休。

段养弘 字纯白。性捷敏，为文援笔立成，未尝属草。所与交，皆一时名士。以明经谒选，未仕，卒。

郑鸾 其学精于《周易》，性纯孝，孺慕至老不衰。尝著《风木篇》以见意，最为恳至。陈伯安赞曰：“瞻象二程，有德有伦。惓惓君子，景仰斯人。”

陈铭 字敬所。性醇恣，耻以文字干时，遂弃举子业，适江右，从王龙溪、罗石莲游，阐致知格物之旨。归而键户著书。析产，丰腴者任诸弟分取，自处泊如也。年九十一终。

詹馭 字三畏。同文裔孙。十岁补弟子员，嗜读书，抗心希古，尝从学于罗念庵。念庵曰：“自吾得三畏，二程之望，不虚鲁台矣。”年仅三十九，〔借〕〔惜〕未竟所学而卒^①。

韩鸣谦 字进之。生平好读异书，诗笔近古，有和王摩诘诸作，翛然尘外。从耿天台定向讲学，为高弟子。鸣谦弱不胜衣，对人竟日讷讷不出口，而落笔

^①“借”，当为“惜”之误。



辄惊人，如倒三峡，其涯涘终未可得窥云。

杜迪 字德夫。少负才名，尝曰：“陈同甫推倒一时之豪杰，拓开万古之心胸，迪亦未敢多让。”人皆目为狂生。举万历己酉孝廉，文名藉甚，未仕，卒。

戴君赐 字廉伯。邑诸生，屡试辄冠其曹，尤究心理学。黄奇士兄弟雅相推重，尝称君赐为吾道干城。中丞林公檄修邑乘，群服其典核，惜志稿甫就而卒，年七十三。宾饮于乡者再。

王德良 字应运。邑庠生，其学以罗近溪为宗，虽皆出于姚江，而于经济、生死、仁体诸条，具有微解，西陵人士犹叹为绝学云。

章焕然 字素夫。幼好学，请业于黄奇士，得其指授。黄曰：“吾道有人矣。”年三十，补弟子员。学使葛屺瞻器之。生平为学，体认在“显微无间”、“知行合一”两语。值明末造，乃叹曰：“时事至此，吾将入白云深处矣。”未几，寇作，群服其知幾云。

国朝

陈其栋 字裔南。少嗜学，淹贯经史，结庐穷山，浩歌不辍。邑宰闻其贤，请宾乡饮者三。著有《姓氏补》等书。

姚绳虞 字孝升。性冲穆，幼攻举子业，试辄冠军，丁酉领顺天乡荐，恬于仕进。晚岁山居，杜门却扫，所著有《花萼楼》等集。

向在江 字南宗。善属文，为名诸生，兼工诗画，萧疏简远，妙在笔墨之外，士夫雅重之。

叶封 字井叔，号慕庐。顺治己亥进士，授延平推官。自矢冰蘖，平反甚众。改知登封县，一切以经术治之。创嵩阳书院，讲学置田，士多所造就。辑《嵩山志》二十卷，又搜汉唐来金石文字，别为《集记》二卷，辨证精博，论者谓在刘原父、薛尚功之间。迁兵马司指挥，其执友皆当代名流，结社都门，鼓吹风雅，号十才子。王新城士祜序而刻之。晚归樊上，称退翁，桐帽棕鞋，流连杯湖、退谷间，泊如也。卒年六十五，新城为志其墓。

陈世臻 字介繁。种学绩文，为诸生高第，从游甚众。从兄世昌镇宁国时，欲延之入幕，坚辞不赴。其性恬淡有守多如此。

梅调鼎 字文严。少英敏，为文未尝起草，顷刻千言。蒋学使永修力振颓风，得调鼎卷，亟赏之，拔冠其曹。屡试棘闱，不售，以明经终。负性傲岸不羁，人多目为狂生云。

周宗袞 字兹山。幼嗜学，长益自厉，博综群书，多钩纂手录。年九十余，





犹赋诗不辍，步履翛然。人每以“矍铄是翁”称之。

王志昌 字山曙。诸生，少精制举业，后谢去，惟肆力于诗古文辞，自出机杼，成一家言，士林重之。

张若仲 字昆友。诸生，著述甚富，有《四书说存》及《纲鉴》、《周礼纂要》，他如《管》、《韩》、《庄》、《列》诸书，皆有注释。又工篆隶，得斯、邈遗法，从游多知名士，郑济尤服膺，歿后立主祀之。

吴陈言 字伊章。中康熙己卯乡试。生平嗜读书，每与同辈谈文章利病，有不洽者，往往至于攘臂弗顾，遇得意处，亦不难俯首至地。少与兄陈赤齐名。兄早逝，兄子镐于康熙庚辰成进士，官京畿御史，侃直敢言，皆得力于其教居多云。

梅 炜 字孟晖。生而颖异，十五入泮，前后冠军三十八次，博洽淹雅，落笔辄为人传诵。潘学使宗洛尤奇之。举康熙乙酉乡试，著有《四书辟谬》、《五经要解》等书。授会同教谕，未任，卒。

刘世荣 字泰占。贡生，工文章，自辟町畦，不屑依傍前人。其教人一以心得为宗，沉潜经术，反复训诂，尤于新安《四书注》冰解的破，凡一切高头讲章，如说约、蒙存之类，概所不览。一时从游者经其指授，多登科第。

张安琯 字通文。贡士，四岁就外傅，涉目成诵。弱冠补博士弟子，试辄冠军，遂名噪一时。大湖南北，从游甚众。晚集《见闻录》，补邑《志》所未备，人多称之。

林 盛 字大林。问学该博，为文力追古人。曾试全省贡士第一。游京师，为王府教授数年，归而键户扫轨，究心诗歌古文，步武汉唐，舍筏登岸，于楚风三变之外，自成一家，著有《此观堂集》数十卷。盛学老文巨，品望甚高，一时名士从游者甚众。

王肯构 字步堂。负才颖敏，工于制举，一日能为十数艺。教授生徒，经其切劘，每后先捷去。构以晚遇，成康熙己丑进士，授于潜令，多善政，寻卒于官。

孝感县

明

严 璘 字别砭。年十六，补诸生，为文宏肆，援笔立成。曾以秋闱报罢，扁舟归里，值榷使者趣之税，问所载何物，曰：“一船愁耳。”榷者误以为“锄”也，仍趣之。璘走笔呈诗曰：“献璞归来泛上游，忽闻榷吏锁孤舟。囊中惟有悲秋赋，闻道君王不税愁。”其旷致如此。与竟陵钟惺、谭元春为石交，所著有《惩



羹》诸集。

唐希皋 字子谟。岁贡，令赣州兴国，以经术饰吏治，俗为之变。及解绶归，置求仁馆，聚徒讲学于其中。少游钱绪山之门，晚喜白沙诗，吟咏不辍。及病，或问曰：“此物如何格？”希皋曰：“启予足，启予手，得正而毙焉，即所以格之也。”遗命嘱其子勿作佛事，勿请入乡贤。著作甚富，惜多散佚。

黄文旦 字敬淦。十岁能文，崇祯丙子举于乡。治《毛诗》，著有《二南笺义》数十篇。文旦赋性慷慨，有大略，伤世乱，郁郁不自得，作《尧虑测时论》、《危言深识》，在长沙、同甫间。顺治初，走豫章收遗书万卷归，不复有仕进意。家益落，壬辰岁大旱，挑野菜和羹吹之，或啖麦饭，偃仰啸歌，欣然也。年四十八卒。有《老峰集》若干卷。

黄文星 字子威。与兄文旦齐名，尝筑怡园，读书其中，积学砥行，弟兄自相师友，其与游者，汉阳则李愚公，同里惟程雪窗，南昌则李太虚、黎博庵，皆一时名辈。授徒著书，门人多掇巍科。后以岁贡任江夏谕，归而捐租积粟，创义馆，集邑人士讲肄其中，不愧为乡先生云。

杨洪才 字拙生。少有声簪序，嗜宋五子之书，寻绎弗倦。立贞通社，与彭鲁冈、程镛庵、丁渐斋辈四时会讲不辍。曾预修邑《志》，著有《弋获录》、《正史法诫》诸书。

彭大寿 字松友。少端谨逾成人，长则留心伊洛之学，尝博采先儒语录，互考汉宋疏注编集成书，寒暑不辍。又纂《文公家礼》，参以丘文庄所订上下通行者曰《通礼》，生平所著，多扶树教道。卒年七十九，无子，门人为之营葬建祠，置墓田。

程怡孔 字钝庵。邑诸生，少嗜学，尝负笈从游于西陵邓葆之、黄守拙之门，归而倡道郡邑，与丁之鸿诸子为贞通社会，朝夕讲贯。其学屡变而益醇，学者多宗之。

丁之鸿 字渐斋。崇祯壬午举人。喜慷慨急难，诱掖后学。其学以训诂章句为末，躬行实践为本，与彭大寿、程怡孔辈为贞通社。所著有《易经象意》、《渐斋遗书》传于世。

刘南吕 字师尚。为诸生高第，工诗古文词，俊杰廉悍，蔚然作者。乱后，赋《野叹》诗三十首，语多凄楚，谢去举子业，颓然自放，年四十三卒。

夏谟 字敬陈。邑庠生，早负文名，与程学颜、唐希皋纂修邑志，颇见称于时。





国朝

沈宜 字大悟。由明经仕至镇江推官。读书自经史外，旁及内典，叩之娓娓不穷。诗宗唐人，兼工尺牍。弟完，诸生，亦有文名。

高騫 字处厚。贡生，诗文雅健重一时，书法摹钟、王，寸缣尺素，人咸珍之。

傅彬 字郁中。岁贡生，为长沙教谕。凡明末殉难诸人，皆复实详请，不令淹没。升蕲州学正，值异荒，令家僮归运租米至蕲备赈。会大兵进剿湖南，以彬摄州篆，军旅旁午，仓卒立办，民亦无扰，擢翰林待诏，未任，卒。

萧承澍 字苍霖。孝友端方，重然诺，喜推解，有肆应才，常以谈笑为人解纷，里党赖焉。以明经授松滋县教谕，例得引见。廷试，能近取譬节题。大司农赵公申乔得承澍卷，大击节，称为理学名儒，置第一。之任，邑俗刁悍，澍立课士六则，刊刻传布。澍勤考课，月旦集诸生口讲指授，以根柢六经、规模先辈为务，文风丕变，出门下者多取高第。康熙六十年，举卓异，未任，卒。识者惜之。子：惟炳，庠生；惟煜，癸卯举人，任通山县教谕；惟煌，庠生；惟耀，己未进士，任四川梓潼县知县。

彭焱 字然石。岁贡生，好读书，淹通经史，兼工书法。学使高汇旃创濂溪书院，以焱为都讲。后司训黄安，岁大旱，焱力请赈济，且鬻产佐之，黄人口碑载道。

李殿邦 字左厘。性至孝，勤学好古，为文力追大家。康熙乙丑成进士，入史馆，戊辰充会试同考官，分修《一统志》，以疾归，未一岁，卒。

夏嘉瑞 字人淑。邑诸生，诗文奥衍雄深，陈溧阳名夏序其集曰：“太白仙才，少陵人才，长吉鬼才，人淑殆兼之。”有《松云诗草》，督学彭禹峰梓而传之。弟章夏，其才名与之埒，惜早亡。

程大吕 字文载。于书无所不窥，为诗文，援笔立就。康熙丙午举于乡，癸丑成进士，归而益键户读书，上下今古，手披口吟，一如诸生时。汉阳王戩方主盟骚坛，雅推服之。戊午，膺博学弘词，荐入都门，方待试，忽以疾卒，士林惜之。

夏光沅 字兰谷。邑诸生，楚文风自熊、刘后，督学蒋永修振拔之功为最。按郧时，首拔光沅，及历试湖南北，一时著作并遴选事，皆委光沅手定。寻以病卒。

陈陞谟 字淳洋。邑廪生，读书目数行下，阅廿一史凡六过，诸子百氏及道策、佛经，无不渔猎，生平为制义几万首，诗古文称是。昌黎云“朝为百赋犹郁怒，



暮作千诗转迢紧”，陞谟有焉。所著《擒思录》数十卷。督学潘宗洛、董思凝亟赏之。年仅三十五，卒。

夏熙臣 字无易。参政时亨之孙。少孤，七岁能文，有神童称。长益嗜学，尝游白云山中，值雨，寓舍无书，仅《字汇》一部，取阅之，终身不问难字，其它记览类此。为文未尝起草，尤耽诗，尝限以百韵，咄嗟立就。家故饶，日手一编，不问权衡数，遂中落。由明经授通城谕，累补安陆府教授，卒于官。著作等身，刊有《慕严诗略》，其《紫玉箫》乐府最工。

丁光伟 字雄宙。幼颖悟，十岁工文章，淹贯五经，补博士弟子，每试不作第二人，中康熙癸酉乡试，忽以病卒，士林悼惜。

夏力中 字暎川。少勤学，每夜课，鸡鸣方就寝。以五经冠童子军。楚中穷经学者，争来负笈。后主湖南集贤书院二年，从游甚众。康熙辛丑成进士，授庶常，旋卒于京。生平孝友姻睦，与人交，不立城府。枢返乡，道路迎哭者无算。子扶邕，丙午举人。

程大纯 字汉舒。由明经司训麻城，迁黄冈谕，奖掖士类，尤敦行谊，与兄大绪友爱最笃。手一编，至老不辍，皆洛闽遗绪也。子光巨，官浙江副使。

金相 字禹简。才气雄杰，其文湛深，经纶小试，辄冠其曹。康熙癸巳乡试举榜首，甲辰成进士，入史馆，一时庆得人。后出为□□令，寻卒。未展其用，士林惜之。

论曰：傅以翼者两其足，与之角者缺上齿。是富贵、文章二者之不可得而兼也。第天之爱惜文名也，尤甚于荣华。世有登九列、位三台，而未尝有片词只字流播人间，纵势焰赫奕，要不得与文章之事。甚矣，文士之可贵也。虽然，士才矣而或不遇，遇矣而或仍不免困顿流离，甚至夭死，君子观于升沉显晦之间，不禁三致意焉。昔欧阳子谓读班固《艺文志》、唐《四库书目》，多者百余篇，少亦三四十篇，而散亡磨灭，百不一二存。自昔文人有幸、不幸，所赖后之人志其姓氏、著于简编，俾千载而下读其传者凭而吊之，企而慕之，庶几风流不与时俱往云尔。





《汉阳府志》卷之四十二 人物〔十一〕

《隐逸志》序

《易》曰：“不事王侯，高尚其〔志〕〔事〕。”^①亦各行其意而已。顾径捷终南，声虚处士，此真隐之难，而北山之所以见诮也。虽然，隐岂得已者哉！彼其胸中必有不可磨灭之气，轮囷郁勃抑塞磊落而后出于此，不然，则与老死牖下者何异哉！至于邑有寓公，以贤哲之托踪为山川增色，抚今怀古，又能无慨慕流运耶？

作《隐逸志》。

隐逸志

汉阳县

汉

廖扶字文起。习韩《诗》、欧阳《尚书》，教授常数百人。州郡公府交辟，皆不应，叹曰：“老子有言：‘名与身孰亲？’吾岂为名乎？”居先人冢侧，数十年不入城府。太守杨焕先为诸生从扶学，后临郡，修门人礼甚谨，欲擢扶子弟，固辞。时号为北郭先生。

宋

郑仁举字次皋。隐居郎官湖上，不求闻达，善言名理。姜尧章夔赠句云：“文章作径庭，功用见造次。无庸垂磬嗟，遗安鹿门意。”

明

萧逊字于敏。隐居自适，品行重于乡里。郡太守屡请宾乡饮，不赴。张绪、

^①“志”，据《周易》“随卦”上九：不事王侯，高尚其事，当作“事”。又，《周易》“需卦”，王弼注有“居有丰之世，而不以物累其心，高尚其志”一语，此序作者或涉此而误。



王秩雅敬之。孙鸣甲，进士，官河南布政，以忠显。

高文誉 少业儒，以亲老不应举，为菽水之养。栖迟偃仰，啸歌自适，足不窥户者三十年，间党高之。

方镇 字名藩。贡生，崇祯时，由江夏徙居于汉阴乡。时丁未造，绝意仕进，有山田数亩，躬耕自给，足迹不履市廛。风雨蓬庐中，辄手一编，歌声若出金石，翠竹红泉，翛然自得。当事闻其名，每物色之，即凿坏以遁，真不愧古高士云。

国朝

姚熊载 字西卜。明侍御朱衣裔孙，冒姓姚。性澹泊，不乐荣利。以医隐，精于灵素诸书。郡北月湖建堤，乃熊载倡义首功。孝廉张抡元为作记，欲镌诸石，辞曰：“吾已老山泽，留微名何为？”乃止。年七十九卒，遗命必依嗣父虞卿，墓志存姚姓也。

流寓附

汉

祢衡 字正平。平原人，少有才辩，尚气节。孔融数称于曹操。操使为鼓吏，衡恣言辱之。操怒，遣使送刘表。表不能容，江夏太守黄祖性褊急，乃送衡于祖。祖长子射尤善衡，时大会宾客，有献鹦鹉者，射举酒属衡曰：“愿先生赋之，以娱宾。”衡笔不停辍，文不加点。后以辱祖，祖杀之。射奔救不及。时年二十六，葬鹦鹉洲上。

唐

于鹄 贞观间诗人，尝为诸府从事，隐居汉阳，作《买山吟》以见志。

杜诜 字谨夫。江夏令，清介，不爱一钱。罢官，筑别业于汉上，自号汉阳老人。烈日笠首，自督耕锄，尝曰：“忍耻入仕，不缘妻子衣食者，举世凡几人？彼忍死，我劳力，等衣食耳，顾我何如？”后授复州司马，不就。卒年六十，仍返葬长安。

宋

欧阳修 字永叔。庐陵人。少孤，依季父都官员外郎晔家随州。年二十，以所业谒胥偃于汉阳。胥奇之，留置门下，妻以女。天圣中，以广文馆生举，中甲科，累官太子少师，卒谥文忠。

姜夔 字尧章。鄱阳人，姊家居九真山下，夔尝省之，爱郎官、大别山水，因寓焉。《白石集》载汉阳诗甚多。





真山民 建宁人，西山之孙。常往来湖湘间，最后隐居汉阳。诗甚秀洁，仿佛永嘉四灵。

元

陈益稷 安南国王日暉弟也。元至元间伐其国，日暉败走，益稷率妻子官吏以降，乃封为安南国王。命镇南王脱欢等引兵送之归国，不纳，益稷仍随师还楚，遂留于鄂。尝往来汉阳，寓居凤栖山之梅岩，自号“梅岩叟”。天历二年卒，谥忠懿。益稷以羁旅降王，能为诗歌，与中朝文士相颉颃，史册称之。

黎 崱 字景高。安南人，为本国侍郎，至元中随益稷内附，后至楚，居汉阳，累加奉议大夫，金归化路宣抚司事，与同人赖岩吟咏甚多，惜不尽传。

赖 岩 字益归。安南人，益稷内附，岩遂安置汉阳。工诗，其《送傅》与《砺作》最传。

国朝

毛会建 字子霞。武进人，自仪曹郎罢官，不归。性好佳山水，晚至楚，爱晴川、黄鹤之胜，乃预筑生圻于大别南，刊石颜曰“万里青山”，建一杯亭于其侧以居之，因自号“客山”。久之，竟卒于汉。会建好奇，嗜古书法，苍劲类鲁公，尝游南岳至岫嵎巔，摹禹碑，重刊于大别峰头，又尝倾貲为晴川补树，皆称韵事云。

汉川县

明

邓汝文 隐居独善，恬于名利，生平不至郡邑公堂，当事旌之。

高 登 质性淳朴，行谊端方。训子弟必以孝悌。扫轨杜门，从不干预外事。年九十七卒。

张 懋 诸生，以资深当贡，不赴，仕进恬如，隐居教授以终。

余 庠 性高介，躬耕陇亩，孤情绝照，好吟咏，其《渔》、《樵》、《耕》、《牧》四诗为最工。

王一善 庠生，介石自守，栖隐衡门，足不履城市，侍二亲菽水承欢，甘贫养志，泊如也。



黄陂县

明

邓云和 敦笃醇谨，居乡不持人短长，在家无疾声厉色，栖迟丘壑，吟啸自适。祝世禄尝造庐，语竟日，赏其高致，称为鲁山樵隐。

韩允嘉 号莲溪。卜筑翠林山下，凿池治圃，种竹蒔花。宾至，则网鱼拨醅，啸歌竟日，绝不谈及俗务，有古隐君子风。

傅 宾 字国卿。沉潜嗜学，不求闻达，善楷书、鼓琴，每于月下花前，焚香啜茗，一弹再鼓以自娱。屡举乡宾，不就。

易 宝 字楚珍。诸生，名重一时，结庐乌泥港，建小〔斋曰〕“过庭”^①，积古书数千卷，蒔花课子，招致诸名流骚客倡咏于其中。邑令高之，屡举乡宾。

王之梅 字泰汝。博学能诗，世隐西城。时人多传其《中秋》句云：“山斋喜见月生华，有酒无钱不肯赊。试掩柴扉推月出，请君去照五侯家。”其旷致可想见矣。

李自发 字春寰。世居前川理趣林侧，方塘修竹，绝远嚣纷，足不入市，喜读秦汉以上书，与山中戴养怀谈心讲艺。年七十一卒。

刘正暹 字方晨。工诗古文词，生逢明季乱离，负才不偶，又痛母刘氏以劲节毙于贼，遂高蹈烽山，隐居教授，率子弟以忠孝。其清标远致，真不愧逸民云。

国朝

魏 恺 字公溥。庠生，性恬淡，少工文，晚年谢绝举业，徜徉山水间。邑侯魏雅重之，赠以诗，有“幽居不染世间尘”句。年八十卒，黄冈曹大护为志其墓。

流寓附

宋

程 颢 字伯淳。世居中山，徙河南。父珦，仁宗朝为黄陂尉。颢举进士，用吕公著荐为监察御史。哲宗立，召为宗正丞，未行而卒。年五十四。文彦博采众论，题其墓曰“明道先生”，赐谥曰“纯公”。旧《志》云：先是，珦父遁令黄陂而卒，珦不能还，后为黄陂尉，遂家焉。时颢母侯夫人梦双凤投怀，遂以

^① “小”字下两字，原书漫漶难识，似“斋曰”二字。





明道元年壬申生颢、明年生颐。今邑中程乡坊、望鲁台皆其生平游息处。后仍归洛中。

程 颐 字正叔。哲宗初，司马光、吕公著共疏其行义，召见，擢为崇正殿说书郎。绍圣中，削籍窜涪州。徽宗即位，徙峡州，俄复其官。卒年七十五。世称为“伊川先生”，谥曰“正公”。

明

罗洪先 字达夫。吉水人。嘉靖乙卯，尝偕王畿游楚，寓黄陂深山中。畿先返，独留一小楼，日夜〔跌〕〔跌〕坐^①，凡五月余，自觉有省，赋《夜坐诗》十首，贻蒋道林。

孝感县

明

邹谦所 清贫有操，工古文词，执经从游者甚众。征为邑博士，不就。大学士杨士奇贻以诗曰：“赠尔淇园绿玉竿，临岐若叹别离难。郢城民俗从来厚，但守清风到岁寒。”

舒显祚 字于长。贡生，性孤峭畏俗，尝结一斗室，题曰“乱云堆蕉团”，隐几清茗，素琴焚香，独坐于其中，虽家人亦罕见面。著有《湘山草堂集》，程青溪序之。

张其志 字菊偶。少攻举子业，忽弃去，结庐栖隐，有五亩园，多植菊，自叶而黄，酌酒相对，每高吟采菊东篱诗，翛然自得。其著述甚富，金会元德嘉叙其集谓“抱道怀真，不愧古隐君子”云。

流寓附

后梁

王彦章 字子明。寿张人。少负其母避乱居孝感九峻山。母卒，仕梁为行营先锋，骁勇绝伦，每战持一铁枪，骑而驰突，奋疾如飞，军中号“王铁枪”。后唐兵攻兖州，与夏鲁奇战败被擒，庄宗爱其勇，使明宗往谕之。彦章顾明宗，呼其小字曰：“我岂苟活者！”遂遇害。晋天福二年，赠太师。

^①“跌”，当为“趺”之误。



元

李孟 字道复。潞州上党人，徙居孝感。生而敏悟，倜傥有大志，贯通经史，远近之士多从之。至元三年，召拜中书平章政事。奏罢僧道官，天下称快。〔皇〕庆二年^①，仁宗赐以孝感地二十八顷。入见，必赐坐，进爵秦国公，卒谥文忠。

察罕 西域板勒纥城人。博览强记，通诸国字书。仁宗时，累官参知政事，得大臣体。暮年居孝感白云山别墅，以“白云”自号。尝入觐，帝望见曰：“白云先生来也。”其被宠遇之隆如此。

萨天锡 幼时侨寓孝感，博学，工诗古文。登泰定进士，知襄阳县，终燕南道廉访使照磨。

明

朱英璲 楚东安王四世孙。初授宗正，猷贼破武昌，璲削发为僧，避止邑之李家庵。及李自成陷京师，遂自缢死，藁葬庵右。

论曰：天地闭，贤人隐。此“天”、“山”所为“遁”也。然世际唐虞，不屈颖水，时当盛汉，亦有严陵，想其群木石、亲鸟兽，逸性遥情，岂以矫饰鸣高哉。鸿飞冥冥，弋人何慕？其贤于世之蝇营狗苟、饰智巧以逐利名者，固已远矣。若夫侨寓诸君子，如王粲之依人，子山之筑宅，少陵客于灊西，青莲赘于白兆，地以人传，方为足据。不然，鸿爪雪泥，偶然信宿，又何可以兼收滥采，甚至附会无稽，更资笑柄矣。

^①“庆”上一字原书漫漶无字，据上文“至元三年”，下文“仁宗”，当是“皇”字。元仁宗皇庆二年为公元1313年。





《汉阳府志》卷之四十三 人物〔十二〕

《方技志》序

自司马传《仓公》、《日者》，蔚宗因之，立《方技传》。后之史家相沿为例，自岐黄书画，下逮星卜术数，卓卓名家。虽云致远恐泥，要之小道可观，有不得尽略者焉。

作《方技志》。

方技〔志〕

汉阳县

国朝

陈五太 字健夫。精岐黄术，预知人死生。凡诊视，随手辄应，不趋权贵。御史吴达及守令屡请，俱凿坏而避。年八十卒。子泌、孙梦龙俱善医。

李序韩 字原汉。善画花鸟，画成，张壁间，蹲立四旁远近，静窥其偏反飞鸣之态，身自作势，以曲摹之，少不如意，即碎去。性介洁，畏见俗人，片语不合，辄作色而遁。晚年能书，工作诗，季炼月煅，有唐人风。年六十卒。无子。

余文楚 字南珍。诸生，性好学，凡山经海志、医药种树之书，无不究心，尤善青乌术，相葬地、卜祸福，纤毫不爽。邑学宫旧以朝坐失宜，士多螻曲。康熙庚午，郡守戴延文楚为择期辨方，命工改正，科名遂盛于昔。晚年三举乡宾。子尚珏另传。

黄云 字眉山。工画，宗董北苑，用笔苍润，摹云林及大小米，几足乱真。尝有邑令招致，具厚资，令画灯。云曰：“灯可久传耶？”遂掷笔而出，其孤介如此。



汉川县

国朝

王元 明总宪道直裔孙。跌宕多才，善丹青，尤工于画马。笔力瘦硬，骨肉停匀，不减赵松雪。尺幅寸缣，得者真如拱璧，惜传者绝少。

黄陂县

国朝

陈西观 少业儒，精于素问之学，治奇疾，往往多应。尤通脉理，一士人素无恙，观偶为诊脉曰：“君疾入膏肓矣。”其人不之信。后数月，一病遂亡。人皆传以为神奇。性高介负气，志在利济，不妄取人钱，故卒以贫困老云。

纂成周 字予有。邑诸生，嗜学能文，尤善草书，在颠、素之间。有持缣素相乞者，濡墨便书。僧房、邮壁、茗舫、酒楼，其笔迹为多。晚谢诸生，益放诞不羁，颇得晋人风趣。

孝感县

唐

董志高 有异术。一日，以旱刺泉范公塘，谓其弟子曰：“吾若驾龙入泉窟，当索符，亟与我。”及志高从水中出索符，手有毛，弟子骇走，志高遂没不出。土人祀之，至今祷雨多应。

论曰：道成而上者也，艺成而下者也。顾一艺之末，亦非漫然以为者。盖必神完守定，机应而气不挫，物至而气弗胶，如运斤成风，有指与物化，而不以心稽之乐，乃能造其堂而诘其蔽。僚之于丸，秋之于奕，越人之于病，张旭之于草书，吴道子、陆探微之于画，神乎技矣，殆艺而克进于道者也。能尽乎物曲，自有裨于人，官又何必强分畛域而歧视之也欤？





《汉阳府志》卷之四十四 人物〔十三〕

《方外志》序

韩愈氏曰：“（佛）〔释〕、老之害，甚于杨、墨。”^① 近日僧、道之害，又甚于佛、老。大都不过藉口福田，诬民惑世，其流弊诎可胜言哉。顾逃禅游仙，为学士大夫所不废，而缁流、羽客亦间有迴绝尘俗者，如太白之于元丹丘，昌黎之于大颠，子瞻之于了元、参寥辈，往来酬答，形诸歌咏，是又何得以游方之外而尽屏之也欤？

作《方外志》。

方外志

汉阳县

唐

九真仙女 九真山有九仙女飞升石及炼丹井。

骆 僧 嵩阳有骆禅师坐禅石，石旁有泉，相传师卓锡于此，泉水涌出。

宋

心 道 眉州徐氏子。年三十，诣太平佛鉴懃禅师参学，一旦豁然，懃深许之。后居大别山文殊院说法，高宗建炎三年春，示众曰：“《正法眼藏》瞎驴灭，临济何尝有是说？今古时人皆妄传，不信但看后三月。”至闰三月，贼钟相叛，其徒欲举师南奔。心道曰：“学道所以了生死，何避之有？”贼至，师曰：“速见杀，以快尔心。”贼即举槊残之，血皆白乳，贼惊异，引席覆之而去。

明

明 彻 洪武初，挂锡兴国寺，为都纲司。遭元末兵燹，彻经理营构，遂再盛。

^① “佛”，韩愈原文作“释”。



有戒力，通书义，尝赋《梅花》诗三十首。老年退居阳台，一日微恙，具汤沐更衣，索笔书偈，从容而逝。

陈孝子 江西人，着麻衣孝服，往来江汉间，不知其名氏，但肩一画幘，云其母像，所到处即自卜，伺其母之喜怒，喜则留，不喜则去。饮食啼笑皆在焉。尝馆于李太常宗鲁家，久之，告李曰：“吾当解去。”已而玉柱双垂，曰：“吾心头苦热，当返。”至期果返，叹曰：“大道之难言如此”，遂瞑。后七日，李使遇之刘家隔，以扇书七言绝句附谢。太常始知其尸解也。

杨炼师 字易生，蒲圻人。游江汉间，自言年已百岁，黄齏白饭，海人以修身明道之学。游太和，未几即返，曰：“山中人具杀机，不可与处。”遂结庐于月湖中，自此绝粒，惟日啖泉水一勺，久之，端坐化去。炎暑三昼夜，颜色犹有生气。

国朝

生生道人 不知姓氏，或曰汉阳人。行符水方药于咸宁、蒲圻间，多奇验。有郭孝廉宅东地，忽软如绵，不可下足，屋瓦欲倾。请于道人，乃罡步置符，而地如故。顺治初，蒲圻周生见道人负葫芦行卖药，问之，曰：“吾偶寓迹仙枣亭，诒朝可相访。”次早，登亭无所遇，不知所之。

李奥几 不知何处人，寓汉阳，初不著名。顺治末，有黄孝子者，母病，乞救于乩。乩曰：“须悬李奥几。”因言奥几形状，旦日当出朝宗门跪候，直呼其名求救，彼自有说。翌早，孝子果遇奥几如乩指，呼救，奥几愕然曰：“谁为尔言我姓名？”时冬雪甚盛，奥几率孝子至大别山岩中，觅草一茎若兰者，授之曰：“服此可延寿一纪。”自是人多异之。奥几惟终日〔跌〕〔跌〕坐^①，闭目不言笑。尝经月不食，貌虽奇古，而颜若婴儿，好食死鼠、腐蛇、生鱼肉。康熙丁丑，张真人祀武当，过见奥几，举手曰：“道兄清福。”几怒目不应，食蛇鼠自若。人问真人，真人笑曰：“渠食者，碧藕也。”康熙五十六年夏，不知所往。

汉川县

明

刘邇邇 邑周陂乡人。遇异人授以秘诀，能知未来事。尝往来江夏，人多

^①“跌”，当为“跌”之误。





贻以财帛，悉不受。于贡院侧聚板为屋以居，坐卧惟一片石。好骂人，辄中其隐。诸生有应试问题者，骂曰：“一部四书，从头至尾都是题，却来问我。”及试，题果“大学之道”、“然而无有乎尔”二句。癸卯乡试，有问场屋题者，不应，复自语曰：“好一个彬彬的君子。”后闱题果“文质”二句。万历己酉，诸生有问中试者，骂曰：“举人都是王孙公子占去，那中到你。”及开榜，果中王家宾、孙世恪。其奇中多类此。明末以疾逝，玉柱双垂。后有人于仙枣亭遇之，如故。

黄陂县

国朝

正义 邑李氏子，参天童和尚，以闻爆竹声得悟，晚年归楚，开法席于素山。年七十，预定辞世日期，自举火为偈，合掌坐化。

李道人 江南人。康熙间不知从何方来，居邑北夫子山石洞中。大雪覆山，冰结不解，人疑其死，竟无恙。有赠以薪米衣履者，辄给贫人。至叩以休咎，发言无不奇中。后上木兰山，告众以羽化日期，遂闭目端坐而逝。

孝感县

汉

董仲 永之子，相传织女所生。幼即灵异，能使鬼。京山潼泉地多毒蛇，仲书二符镇之，其害遂绝。岳州安乡县苦水，仲书符石上，立县治东南隅，水遂不至。

明

知隐 邑张氏子。黄陂仰山素多毒蛇猛虎，知隐孑身持钵往，〔跌〕〔跌〕坐念佛^①，卒无害。居六载，徙居大胜关之三清庵，忽贼至，见执，刃之不能入。贼渠异之曰：“圣僧也。”转罗拜供奉。晚驻锡龙泉寺，每一昼夜诵《法华经》一部，及示寂，召徒众曰：“吾将西归矣。”乃沐浴更衣，〔跌〕〔跌〕坐念佛而逝。

祝海韦 江西人。万历中，至孝昌主二郎畷刘申锡家，工养生家言，貌常似四十许人，言后事多奇中。与应山杨忠烈涟善，时忠烈尚在诸生，韦尝赋诗云：“曾到蓬莱第一关，卿云扶我下尘寰。看残海上千秋月，醉卧江南万里山。庭燎

^①“跌”，当为“跏”之误。下同。



苍茫传火罢，官声磊落步虚还。唐封深夜灵奇事，分与刃圭驻旧颜。”杨、左之事，海韦盖先言之矣。久之，去，更姓名彭幼朔，遨游天下数十年，人或见之扬州兴化县寺中，其颜如故也。

论曰：考之诸史，多不载仙、释。惟《晋书》纪麻襦、佛图澄、鸠摩罗什诸人，附于《艺术传》中。后世志郡邑者，嗜奇炫异，往往采其事迹，列诸编简，毋乃援墨入儒，又何可以之训世型俗乎？今志汉郡，亦仍沿旧例，未能概从删削，但直名之曰“方外”，于纂述之中寓屏绝之意，不斥而斥，录而非录，其间不无微旨云。

寺观附

汉阳县

太平兴国寺 在县北大别山下，唐建，宋太平兴国中奉敕重建，因名。元丰时，苏轼自黄州诏还游此，作《方丈铭》，寺僧刻于石，今毁。明洪武、正德、嘉靖年间，相继修葺。万历二十四年，知府喻三元重建，慈圣太后施金铸像，长丈有六。天启元年，成接引大殿，敕赐“慈济太平兴国禅寺”。郡人刘体元构大雄殿。明末，兵毁。顺治间，总督佟公养和修葺。康熙四年，总督张、巡抚刘各捐资赎产还寺焉。

附宋苏轼太平兴国寺《方丈铭》

闭目而视，目之所见，冥冥蒙蒙。
掩耳而听，耳之所闻，隐隐隆隆。
耳目虽废，见闻不断，以摇其中。
孰能开目，而未尝视，如鉴写容；
孰能倾耳，而未尝听，如穴受风。
不视而见，不听而闻，根在尘空。
湛然虚明，遍照十方，地〔狱〕〔岳〕天空^①。
蹈冒水火，出入金石，无往不通。
我观大别，山门之外，大江方东。

^①“狱”，嘉靖《汉阳府志》作“岳”，是。





东西万里，千溪百谷，为江所同。
我观大别，方丈之内，一灯长红。
门闭不开，光出如隙，晔如长虹。
问何为然，笑而不答，寄之盲聋。
但见庞然，秀眉月面，纯漆点(同)[瞳]^①。
我作铭诗，相其木鱼，与其鼓钟。

双莲阁 在大别山左莲花堤上。

妙莲庵 在城北，与双阁对，后有石壁仄径，而上得隙地，藤树交映，月夜危坐，钟磬徐来，忘为城市也。

水月庵 在晴川阁下。明知县陈尧钦建。庵外有“烟波石”，江夏程封题。

附明方镇《过水月庵》诗

曲径入苍翠，弥深世外情。
门前沙鸟乱，树杪野航轻。
月自瓶中出，龙从杖底生。
老僧闲话永，烟际一钟鸣。

长生阁 在晴川阁南首。康熙初年，绥远将军蔡毓荣建。造有救生船，并置有田地，以作撑架救生船水手工食之费，故名其阁曰“长生”。今其事皆为人所泯，而阁尚存，然不可不存此以彰前人之善也。

洛伽庵 在禹王庙侧，康熙八年县尉李允发创建。

大士庵 在大别山上，康熙五年巡抚刘兆麒建。

香瑞庵 在城东一里，临江，明万历三十一年建。

玄妙观 初在县治东，宋贞宗大中祥符三年赐名“天庆”。理宗淳祐间，冲妙宏道贞人叶靖庵修。元仁宗皇庆元年始改今名。元末兵燹不存。明洪武初，和州赵廷兰为县令，始改观于城西，道人常自然重修。十六年，楚昭王有疾，大修境内名祠。有羽士王智明行术兼至，举为副都纪，修葺益壮。正德末渐圯。嘉靖中，朱御史衣募修。年久颓坏，万历间李给谏宗鲁重修。崇祯末毁。顺治、康熙中，屡次修葺，未复旧规。

^①“同”，嘉靖《汉阳府志》作“瞳”，是。



福圆庵 在永丰堤，贡生崔文元募修。

天符庙 一在西城外，名祖岳庙。一在铁门关上。一在汉口大智坊。

归元寺 城西二里。顺治初，僧白光即王章甫袪葵园故址建。

双眉庵 在归元寺前，康熙癸卯，里人饶思玉复葺，又创建大悲殿，熊学士伯龙为之记。

凤栖寺 在城西五里，宋建。旧有韩忠献、赵清献、苏文忠诸公题咏亲笔石刻。元末兵燹，嘉靖中重修。明末毁于兵，顺治中始募建。

桂香殿 一在大别山，明知府王学古建，名文昌殿。后知府喻三元重修，改桂香殿。崇祯中，知府王燮元再修。一在玄妙观旁。

东岳庙 一在洗马口。一在汉镇。一在旧十里铺。一在长乐坂。一在文寺山前。一在柏泉。一在蒲潭。一在崔家铺。一在九真山前。一在索子河西北。

栖贤寺 汉口南岸崇信坊，明崇祯末年建。

森森林 在汉口南岸。

宗三庙 在汉口居仁坊。

太平庵 在汉口居仁坊。生员劳抚夏康熙癸卯年建。

五显庙 一在县西永安桥。一在汉口居仁坊。一在蔡店。

老官庙 在由义坊，嘉靖六年建。

十方庵 在循礼坊。

西来庵 在居仁坊。

回龙寺 在汉口大智坊，明永乐二年建。初名塞口寺，世宗临幸，勅赐“回龙”。

禹王阁 明时建在汉口接驾嘴渡口，后毁于火。湖北中丞晏公倡捐重建。贡生崔文元劝捐董修成功。

普照寺 在大智坊。

附明戴金《普照寺》诗

汉原发秀拥洲沙，此地曾开锡杖花。

老衲不知何处去，钟声遗韵在山家。

栖隐寺 在汉口接官厅普济堂后，向有草庵，康熙初僧归仁起建禅林接众，往来称盛。





四官殿 在大智坊。
嵩阳寺 在城西一百里，为八大寺之一，其境最为幽胜。
文山寺 县西南四十里。

附明萧良有《文山寺》诗

萧寺吾家旧，祇园此地偏。
敢云祈善果，聊以证心田。
但有俱为幻，能空即是禅。
灵光知不灭，何事觅西天。

宝盖寺 县西五十里，即古慧光寺，乃八大寺之一。

汉川县

皇恩寺 一在县南大赤乡，嘉靖年建。一在县一里，万历年建，康熙二年重修。
鸡鸣寺 在县西。
泰安寺 在县南六十里，明建。
云水寺 在县南张池口。
迎龙寺 在县南，明嘉靖年建。
天安寺 在县西南梅城乡。
沙台寺 在县西小里潭，明建。
西峰寺 在县西周陂乡，明建。
百祥寺 在县北一里。
龙象寺 在县北二十里。
阳台寺 在县治后五里铺，明洪武年重建。

附唐韦庄《阳台寺》诗

乱猿啼处访高唐，路入烟霞草木香。
山色未能忘宋玉，水声犹似哭襄王。
朝朝暮暮阳台下，为雨为云楚国忙。
惆怅庙前多少柳，春来空斗画眉长。



观音前寺 在县治西南，万历年建。山腰有灵泉，又有古松二株，大可数十围，黛色参天，宛若(蚪)[虬]龙^①。

圆通寺 一在刘家隔，即宝化寺，宋、元兵燹，明宣德中重建，成化壬辰衲僧创观音阁。一在十八垵。

万果庵 在县西，里人林腾莘重建。内有银杏一株，大可合抱，唐宋年间物也。

萧公庙 在刘家隔。

仙女庙 在鸡鸣乡小里潭，明永乐年建，万历二十年里人欧阳待、李思祖重修。

青林庙 在南河渡，万历年建，顺治十六年修。

三义庙 在鸡鸣乡，明万历年建。

祖师殿 一在县一里，万历年建。一在鸡鸣乡，嘉靖年修。

东岳庙 在县治西伏龙山。

千佛庵 在城三里。

黄陂县

木兰寺 一名西寺，在县西。唐贞观时建，明洪武间重修。昔人以“西寺晓钟”为十景之一。

附明狄同然《木兰寺》诗

鸡鸣曙色动城闾，野寺疏钟送远声。
霜月几敲春梦断，家山千里旅魂惊。
烟笼慧照禅灯细，雾散昙花佛供清。
吏事笑人成鞅掌，抠衣几欲问三生。

东山寺 在县治东一里，有玉皇阁。

附夏廷芝《东山寺》诗

山色嶙峋四面开，无边清景锦成堆。
云林出没照前代，草树凄迷接鲁台。

^①“蚪”，当为“虬”之误，今作“虬”。



寺隐溪田环绿野，碑残龙篆掩苍苔。
暂停车盖日停午，暮见僧从塔下回。

- 甘露寺 在县东十里，隆庆元年重建，内祀二程夫子。
白龙寺 在县东三十里，明嘉靖元年建。
三台寺 在县东北四十里。
竹林寺 在县东北五十里。
上古寺、下古寺 俱在县东北六十里木兰山上，唐贞观中建。
响水寺 在县北六十里。
塔儿寺 在东北六十里。
磨盘寺 在县东北七十里，明成化年建。
禅定寺 一在禅定山，一在潏口。
柏叶寺 在县北九十里。
顺山寺 在县北一百五十里。
羊角寺 在县北一百五十里。
峰子寺 在县北一百八十里。
金台寺 在县西北一百八十里。
云封寺 在县北一(里)[百]七十里^①。
云影寺 在县北一百里。
岢山寺 在县西北九十里。
铁佛寺 在县西南五十里。
嵯峨寺 在县北一百三十里，洪武年建。
罗汉寺 在县西三十里。
潏口寺 在县西南四十五里，唐勅建。
马鞍山寺 在县西北九十里，明万历年间重建。
华盖寺 在县西九十里。
宝塔寺 在县西南二里，有古塔。
东泉庵 在县北五十里。
北泉庵 在县北五十里。

^①“里”，当为“百”字误。





大生宫 在县西。

通明殿 在县西一里。

三清观 在县西一百里。

三官殿 在县西一里。

紫霄宫 在木兰山。

深隐寺 在县西北一百里。层峦叠嶂，双峰竞秀，静杳深邃，郡山莫及。
 顺治己丑间，有临济三十二世禅师冲然说法于此。

孝感县

广化寺 在城东南一里，宋建。

石塔寺 在城东南三十里。

圆明寺 在九峻山下。距城八十五里，宋时为圆明禅师创建。

附王章《圆明寺》诗

重来古刹望峻山，瀑布诸峰指顾间。
 雨歇寒岩晴欲滴，云封冷阁昼常关。
 蚕丛曲曲几无路，石磴磷磷尚可攀。
 梵响夜深听不住，松涛淅沥和潺湲。

天台寺 在城东北九十里。

附黄世勋《天台寺》诗

宝地拟天台，人如采药来。
 偶因红叶观，而作赤霞猜。
 一瀑明飞练，双峰落剪裁。
 庭前柏子树，印可独徘徊。

双峰寺 在东北一百里。

黄湖寺 在城北一百二十里。

观山寺 在城北一百二十里。

大山寺 在城北一百九十里。





- 仁王寺 在县东。
三山寺 在三山下。
大雄寺 在双峰山。
松山寺 在北松山。
盖顶寺 在白云乡。
黄龙寺 在黄岩山下。
白云寺 在勺云山上。
会真观 在凤皇冈上。
南华祠 在县河南岸。
了心庵 在县境内。

附明傅淑训《了心庵》诗

浮生泡影亦何凭，弹指虚花一盏灯。
却向万重山色里，就中闲杀看云僧。



《汉阳府志》卷之四十五上 人物〔十四〕

《列女志》序

昔《柏舟》见美于《风》什，伯姬特笔于《春秋》。读其书者，千载而下，犹足以式闺阁而愧须眉，故或艰难矢志，或慷慨奋身，虽常变不同，而归于义则一矣。唐李习之工文章，而自爱其《高愍女碑》：明归熙甫富著述，而独重其《张烈妇传》。以此知奇节伟行之得传于今古，皆赖简册以不朽也。

作《列女志》。

列女〔志〕·汉阳县

节妇

元

陈氏，武金士妻。武卒，父母迫氏嫁，氏对镜以墨刺“痛念夫情”四字于面，誓死不二。

梁氏，刘通判妻。夫早卒，纺绩自给，终身不出户。事闻，旌表。

明

廖氏，郑必真妻。年十六，夫卒，姑哀其少寡无子，欲更嫁之。氏剪发立誓，养姑至老不衰。洪武中题旌。

黄氏，李真妻。夫死，家贫，苦节养姑。姑亡，殡葬成礼，教子暹勤学，发身科目。孀居四十二年，贞洁如一日。景泰中旌。

周氏，生员李纯妻。夫亡，养姑。姑亡，拮据殡葬，教子恕成名，历官同知。守节五十余年，成化中题旌^①。

梁氏，刘省川妻。夫从军去，誓不嫁，纺绩自给，终身不出闺门。事闻，特旌表。

^①“题”下或脱“旌”字。





董氏，张敬妻。夫疫死，氏年二十一，无子，苦节，至七十一岁卒。

陈氏，舍人胡镇妻。十九丧夫，遗腹生子端。甘贫守节，抚孤承荫。弘治中题旌。

唐氏，戴惠妻。〔惠〕卒^①，唐年二十五，抚孤伯宣成立，娶苏氏，生女，方周岁，伯宣又卒。姑妇守志，一门双节。

萧氏，生员杨国宁本姓王妻，泰安州同逵长女。年一十七丧夫，矢志不嫁。家贫，训孤成立。张介肃绪登其堂辄下拜。

萧氏，生员朱之采妻，泰安州同逵次女。年二十五丧夫，守节，三十岁卒。司成良有铭其墓。

易氏，生员胡化中妻，百岁节妇。年十九，化中卒，遗子遵道、遵义。氏以义方训之，家徒四壁，母子相依。尝锄园得金，不顾而掩之。（毋）〔母〕问故^②，对曰：“兄弟两孤稚，金多非福也。”江夏郭文毅、天门谭友夏高其义，赠以诗歌。太守王公旌之以额。苦节八十一年，督学高世泰著有《百岁节孝传》。今孙瞻圣、翼麟皆有声胶庠云。

王氏，生员蔡三命妻。年十七，夫死守节。卒，张介肃绪铭其墓。

姚氏，李若英妻。年十九，夫亡。遗孤贞才一月，拮据奉姑，极尽诚孝，教子入泮，有文名，举五孙，列胶庠者二。年九十四无疾而逝。

雷氏，李若谷妻。谷卒，氏方十八岁，子应柏甫数月，守志训子。柏后贡入成均，夫妇复相继死。氏痛甚，不食，卒，年六十七岁。

宋氏，王俊士妻。年二十四而寡，子征奇四岁，家无担石储，氏纺绩抚子为名诸生。守节四十余年。

李氏，王道立妻。夫歿，抚子会篇登贤书。苦节三十余年。

张氏，舍人吴佺妻。夫歿，誓死抚孤，年八十八卒。

王氏，邓升妻。年二十二，夫歿，抚孤。苦节七十载卒。

罗氏，生员朱襄妻。罗年二十五岁^③，抚子之藩成立，袭职千户，娶江夏牟盛女。未几，藩复死，牟年二十二，矢志奉姑，抚子昌为诸生，有司颜以“双节”。

高氏，王武英妻。年十八守节，至八十一卒。知府王公世初礼葬之。

许氏，张濂妻。年十八适张，二年而夫歿，遗一女才半岁，抚之。长归吴，

①“卒”上当脱“惠”字。

②“毋”，当作“母”字。

③此句当有脱文，或“罗”上脱“朱襄卒”，或“岁”下脱“夫歿”。



乃依女抚外孙伯裔，甘贫茹苦。巡按应朝卿旌其门曰“高年俊节”，年七十七卒。

田氏，张瑚妻。年二十二，夫以救父死于盗。氏割发截耳，誓志抚孤。年八十余卒。

彭氏，陈岱妻。年十七，夫死，子甫数月。节妇鞠幼孤、事尊章四十余年，卒。

黄氏，监生吴守一妻。年二十五，夫故。事姑恭人伍氏孝养无倦，抚孤绍先、绍名补弟子员有声，守节四十年。事闻，旌表。

王氏，生员张完妻。年十七归完，四年，完卒。抚二孤。次子博先成弟子员。屡值兵燹，贞操益励，年七十卒。

朱氏，生员许元赠妻。年二十七，夫卒，遗子国俊甫三岁。氏奉姑教子，时值兵燹，以一身保护于干戈流离之中，安全无恙，后子为邑诸生。

许氏，生员俞泰生妻。夫歿，氏年二十六，遗腹生子名都。家贫，依孀母卢氏以居，教子早年入庠，苦节四十余年。

汤氏，江起龙妻。年二十一而寡，遗孤甫一岁，冰霜自励，奉孀姑彭氏生事死葬如礼，教子中盘列庠序。

袁氏，樊维极妻。袁年二十六，夫歿，遗孤仲三岁。家贫，矢志奉姑抚子。及仲长，娶媳张氏，生孙林锦，甫六龄，仲复死，张年二十二，同孀姑共勸林锦成立为诸生。

吴氏，吴永镇妻。生子文选，甫八月，夫亡，茹贫抚育，百苦备尝，训选中顺治丁酉乡试。

金氏，知县蔡几妻。年二十九守节，教子若孙俱成名。以子贵封恭人。年八十卒。

瞿氏，罗嘉宾妻。年十七守节，至七十三卒。

叶氏，丁思锐妻。年二十五守节，至九十五岁卒。

徐氏，赠知府王昇妻。守节抚孤一鹏成立。历五十九年卒。

陈氏，蔡璜妻，陈义吾女。年十七归蔡，未五年，夫死。陈年少无子，刻志守节，织纴自给，年六十余，冰操如一日，乡党敬之。旧《志》。

崔氏，黄语妻。适语，事舅姑尽礼。生子承命，甫岁余，夫病卧床数载，氏侍药饵不懈。夫卒，苦节抚孤。同知王光裕为立传。

李氏，王文魁妻。年二十一，夫亡。抚数月孤，饥寒困苦，历久不变。至孤食饫于学，且有孙世显，氏乃无疾逝。

王氏，胡楠妻。二十七岁守节，年七十卒。





蔡氏，生员吴元嘉妻。早寡，甘贫守节，年九十余卒。子崇，孝廉。

熊氏，张仲武妻。夫死，无子，抚侄及幼孙成立。年七十余卒。

张氏，吴榛妻。夫死，抚遗孤有成，守节三十年。

易氏，王之凤妻。夫死，抚遗孤成立。年八十有五，有司给以米布。

王氏，高岑妻。夫以吏客死京师，氏破家归葬，茹贫抚子，年八十余卒。

龚氏，生员李锦妻。夫死无子，苦节四十六年卒。

张氏，傅念妻。

萧氏，朱赞皇妻。

张氏，王大文妻。俱守节，旌表。

李氏，孝廉江如纪侧室。年十八，同如纪避难舟中，陷于贼。氏不屈赴水，流数里遇救，得不死。逾半载，如纪亡。子南材被掳，不知所在。氏筑室守志，哭不绝口。邻媳劝之曰“儿归”，乃已。后十二年，子果归。氏以完节终。

国朝

吴氏，生员萧兴秀妻。闯贼寇汉上，掠其夫以去。氏年甫二十，子寿昌方在襁褓。抚育教诲，苦节四十余年，人无间言。顺治年旌。

朱氏，胡世珍妻。年十九生子绍安，甫一岁，夫亡。氏矢志事姑。姑歿，奉柩葬于世珍墓所。壬午乱兵屠城，被执，胁以刃火，不屈，受创气绝，次日始苏，逃匿山间乃免。时绍安年十一，被掠。氏以儿散失，复自经者数。母戴密防之，得不死。弟天庆感动，冒白刃，迹至浔江，获绍安以归。后中庚子副榜，仕曲靖府经历。康熙三十二年旌。

刘氏，郭维甸妻。年少失夫，家徒四壁。昼夜纺绩，奉养舅姑，甘旨无缺。抚孤子成立，及子夭，复育其孙。守节数十年，备历艰苦。康熙四十六年旌。

萧氏，姚士伟妻。夫亡，家贫。舅姑年老，子恪在襁褓，氏竭力支持。舅姑相继歿，尽鬻奁资以办丧事。夫弟亦早卒，遗子女俱幼。氏抚之无异己出。康熙四十六年旌。

黎氏，刘燕臣妻。夫亡，守节奉姑。夫弟卒，抚幼侄成立，至老不懈。康熙四十七年旌。

尹氏，胡弘文妻。夫亡，家贫，勤纺绩以养舅姑。舅姑歿，殡葬尽礼。康熙五十三年旌。

邹氏，生员张之璧妻。年二十适之璧，事舅姑得欢心。夫卒，遗腹生子行宽，既长，教以义方，卒成端士。其翁晚年纳侧室生二女，尚在襁褓，翁逝，抚而嫁之。



康熙五十六年旌。

鲁氏，生员张大成妻。夫卒，家极贫。姑歿，尽脱簪珥以营丧葬。晨昏纺绩，事衰翁、抚弱子，零丁孤苦，相对凄然。康熙五十六年旌。

陈氏，梅长春妻。夫亡，氏悲号泪尽，双目几枯。训两孤弘俊、弘儒成立，未几，相继夭。偕两媳苦守，抚诸孙有成。康熙五十六年旌。

万氏，程天成妻。夫卒，孝事孀姑。家贫，值歉岁，尝食野菜，冬无重衣，困苦备尝。教子濂为诸生。康熙五十六年旌。

胡氏，生员袁方宏妻。幼慧聪，授《列女》诸传，晓大义。适袁，敬事舅姑。夫早卒，无子，抚侄训课成名。康熙五十六年旌。

涂氏，陈仪彩妻。年及笄，归仪彩。事嫡庶祖姑，咸得欢然。姑病，吁天，愿以身代，姑获痊。夫歿，抚孤尽瘁，卒。康熙五十六年旌。

夏氏，生员周光侯妻。夫卒，事公姑尽孝。及歿，典衣鬻仆，营葬尽礼。苦节终身。康熙五十九年旌。

鄢氏，生员王维贲妻。年二十四而寡，遗孤弘锡甫六岁。舅姑老病，扶持之，十年如一日，昼夜纺绩，督课孤儿有名于国学。康熙五十九年旌。

朱氏，彭灿妻。夫早卒，奉舅姑、抚孤子，昼夜织纴，自忍冻饿，积资以备舅姑棺衾。子偶嬉游，即垂泣海责，卒能有成。雍正元年旌。

周氏，生员李家祥妻。夫早亡，勤纺绩，奉舅姑甘旨。姑歿，敬事继姑，情谊弥笃。雍正元年旌。

曾氏，黄中和妻。中和早世，曾罄妆奁治丧。抚孤文宪，既娶而夭。自啖藜藿，购甘旨奉姑。姑病，涕泣默祷获痊。幼知书，教孤孙，每篝灯口授，因以有成。雍正元年旌。

彭氏，生员黄文宪妻。夫卒，氏自食藜藿，竭力谋甘旨以奉孀姑。姑病，祷天愿以身代，疾获痊。幼知书，口授孤子，毫不姑息。雍正元年旌。

吴氏，生员曾镕妻，夫亡，事姑纯孝，定省扶持，无间晨昏。尝疾，姑命延医疗之，泣曰：“未亡人生死俟天命，何用医为？”雍正元年旌。

陈氏，萧正烈妻。于归后，正烈从军于滇，令楚雄，以兵燹不通音问。氏纺绩自安。久之，正烈死，遗妾子作声。氏书誓词曰：“妾去妻当留，夫亡妻应守。”鞠育恩勤，白首不懈。雍正元年旌。

李氏，周锡藩妻。夫亡，舅姑老病。氏寒暑织纴，奉甘旨、购医药，无不周至。抚孤为诸生。雍正元年旌。





朱氏，生员劳宁国妻。年二十九而寡，子必达甫周〔晬〕〔晬〕^①，会吴逆煽乱，氏抱孤匿亲戚家得免。后值家难，濒死者屡。必达长，纺绩教育，备极艰苦。及登第，令昭文，氏已先逝。苦节四十年，雍正三年旌。

洪氏，生员徐合度妻。夫早卒，子幼。家故贫，复遭回禄，庐舍荡然。氏纺绩支持，仰事俯蓄，备极艰虞。雍正三年旌。

彭氏，周士昌妻。年二十三，夫卒，子易甫三岁。氏苦守课子。子小不检，则涕泣执其手曰：“汝父早歿，汝若无成，吾枉留人世矣。”子感愤，弱冠入庠。年六十七卒。雍正四年旌。

王氏，文琬妻。夫歿，哀毁绝粒，誓不欲生。家人慰劝之，乃勉抚幼子成立。雍正四年旌。

李氏，生员许邦屏妻。夫勤学，不欲以家计纷其心，凡饔飧膏火，皆纺绩供之。夫亡，水浆不入口者数日。奉翁姑、育稚子，缟布二十余载，绝无笑容。雍正六年旌。

程氏，吴念祖妻。年十九归吴，未几夫病，氏躬亲药餌，愿以身代。夫卒，毁不欲生。时氏年二十一岁，遗孤康生甫三月。氏自誓苦节，抚孤事舅姑，生养死葬，尽力尽礼。守节五十三年，于雍正六年题旌，以子康孙职封恭人。

张氏，孙景懋妻。姑汤守节抚景懋。氏归景懋，五年而寡。抚遗孤昌裔、昌琦，为之婚娶，而子及媳又相继亡。遗孙廷桂娶孙媳，媳又夭。姑年逾六旬〔亡〕^②，身理七丧，而丧葬皆如礼，劬劳三世，茹蘖五十八载。雍正七年旌。

王氏，生员周肇岐妻。年二十八，夫歿。遗子有乾方二岁，有豫甫三月。氏矢志苦守，事舅姑生养死葬，竭力尽哀。二子皆课读有成。雍正七年旌。

杨氏，曾曰忠妻。夫病笃，誓死相从。夫嘱曰：“母衰弟幼，吾早死，罪人也。赖汝以妇代子。”语未及终而瞑。时氏年二十八，无所出，含泪奉姑。姑歿，经营殡葬。为夫弟〔娶〕妇有子^③，弟复夭，三世一线，孤嫠双守，现年五十五岁。雍正七年旌。

董氏，张坦咨妻。许字后，咨婴恶疾，两姓愿寒盟，氏誓死不可。十八，竟归张。夫病愈厉，腥秽淋漓，绝无怨嫌。五载，夫歿，无嗣，祖姑及尊章相继丧，鬻田房为殡殓，构茅舍迎孀母依之。母卒，孤苦益励。张族众为公制一衣，各书

① “晬”为“晬”之误。

② 据下句“身理七丧”，“六旬”下当脱“亡”字。

③ “弟”下原无“娶”字，据文意补。



名于上，春秋祭祀则著以入祠，使众共观之。雍正七年，族徽州司马叔珽为闻于官，获旌。

马氏，李俊云妻。年二十六，夫歿，翁姑衰老，二子俱在襁褓。氏断发自誓，家贫，竭力养教，守节五十四年。雍正八年旌。

彭氏，曾思谋妻。性淑善，夫与弟已〔柝〕〔析〕居^①，弟贫，力请于夫，复合爨。年二十九，夫歿，当翁衰子稚，供甘旨、勤教育，致登上寿，二子克底成立。雍正八年旌。

萧氏，监生熊正蓁妻。年二十九，夫歿，事孀姑尽孝。姑病，祈以身代，疾旋瘳。课孤祖武读书，自坐案旁，中宵不倦，卒成立，应岁荐。雍正八年旌。

高氏，刘弼贤妻。性至孝，姑病笃，卧不能起，氏以口哺食，久而不懈。年二十五，夫歿，柏舟自矢，教子国成、国任俱游泮，抚夫之弟妹，婚嫁皆身任之。寿八十三岁，雍正九年旌。

苏氏，马□□妻。夫亡，纺绩度日，绝无怨言。每祭必亲诣葬所，尽哀而归。雍正十一年旌。

田氏，王□□妻。夫歿，无子，奉翁姑孝谨备至。雍正十一年旌。

李氏，罗□□妻。夫病，尽典钗环，以供医药。夫亡，孝事翁姑，抚教孤子，数十年无懈。雍正十一年旌。

李氏，监生高尔凤妻。夫病，呼天愿代。歿后，哀痛不欲生，谕以大义，乃起，奉姑抚子，孝慈兼至，苦节终身。雍正十一年旌。

卢氏，监生李必思妻。夫在时，相敬如宾。及歿，哀痛几不欲生。事翁姑尽其孝敬，贞操数十年如一日。雍正十一年旌。

曾氏，汪□□妻。夫亡，呼天哭泣，几不欲生。抚前氏之子无异己生，教育特至，孝事翁姑，矢志不渝。雍正十二年旌。

曾氏，罗三位妻。初归罗，家贫。日夜纺绩，以奉舅姑。舅姑歿，哀毁几毙。夫亡，氏年未三十，破面泣血，誓不欲生。以子幼，苦志拊教得立。雍正十一年旌。

项氏，生员刘昌裕妻。性贞静，克修妇职。夫亡，截发毁容，矢志苦节。雍正十二年旌。

张氏，生员徐珩妻。归珩九年，夫亡，矢志守节。居一室，虽至亲莫窥其面。子则舒就傅，岁时脍脩，必腆必诚，卒教则舒为名诸生。年八十九卒。雍

^①“柝”，当“析”之误。





正十三年旌。

王氏，刘乾佑妻。夫亡子幼，绝粒呕血，屡投缳。以翁姑年老，勉起侍养，抚遗孤成立。雍正十三年旌。

黄氏，刘芳京妻。夫病，衣不解带。歿后，毁容守志，奉孀姑孝养维谨，抚孤成立。雍正十三年旌。

尹氏，生员胡泽远妻。夫病，吁天求代。及歿，哀毁欲以身殉，以姑老子幼，乃强起。抚孤完娶，子复夭，与孀媳汪氏同矢贞操。乾隆元年旌。

张氏，吴□妻。性婉顺，姑取严峻，氏能得其欢心。姑歿，祭奠如礼，以完节终。乾隆元年旌。

蒋氏，监生刘士班妻，贡士之升女。幼颖慧，娴女训诸书。年十七归刘，五载生二子。士班故，氏饮泣拊孤，延名师课读，以继夫志，年四十一卒。乾隆二年旌。

李氏，吴□□妻。夫亡，从舅姑年老，十指所出，尽为甘脆贐，而以藜藿自充。乾隆二年旌。

张氏，吴正国妻。居本城建中坊，父候选州同汝健，母任。年十五适正国，居十三年，正国卒，氏抚孤子、事寡姑，俯仰无憾。尝为姑葬父母，及姑卒，皆氏经营丧葬之事。后己母无归养，送之皆尽礼。家素贫，悉取资于簪珥女工之入。教二子邦宁、邦治。邦治，国子生，有诗名。乾隆二年旌。

杨氏，李□□妻。归李，家贫，勤纺绩以佐饔飧。事翁姑孝，甘旨偶缺，必典服饰以供。夫歿，事之愈谨，以完节终。乾隆二年旌。

马氏，金祖勋妻。于归六载，夫亡，无子。截发毁容，与孀姑同寝处三十五年。侄文瑞嗣。乾隆二年旌。

张氏，郭应斗妻。十九归郭，六年，子立宗方岁余，夫亡。养老抚孤，备尝辛苦，守志三十一年。乾隆三年旌。

王氏，易敏兹妻。年二十适易，二十八夫故。抚侄罔承祧。守节二十二年，卒年四十八岁。乾隆三年旌。

余氏，生员尹正言妻，贡士应诚女。年二十归尹，甫二载，夫故。氏哀痛几绝，因堂上衰颓、遗孤幼稚，仰事俯蓄，兼尽其道，年五十二岁卒。子成威，岁贡生。乾隆四年旌。

熊氏，生员萧燕春继妻。十五归萧，未几夫卒，抚孤国宁游泮。寿七十七岁卒。乾隆四年旌。



项氏，举人吴灿妻。幼知书，娴《内则》。十六岁归灿，事上接下，悉中礼法。灿卒，遗孤山斗，娶媳有孙。未几，父子俱逝，氏频索死不获。族党悯其苦，以族孙振巨承祀焉。现年四十三岁，乾隆四年汇题旌。

许氏，举人吴灿侧室。年十六归吴，十九岁同嫡项氏苦志守节。抚孤孙振巨，现年五十四岁。夫妾无所出，而能同嫡抚孤三十余年，宗族无间，君子以为纯节矣。

程氏，蒲州牧吴焯妻。年十六归吴，习礼明大义，事舅姑尽孝。夫质弱，恐艰于嗣，劝夫以侄山齐为子。后夫牧于蒲，得寒病致仕归，不起。氏年二十九，屏除膏沐，截发毁面，以节自誓。现年五十。乾隆四年汇、题旌。

魏氏，曾子藩妻。二十一岁，夫卒，遗孤方晬。及公姑亡，子亦继夭，氏茕茕孑立，苦节至五十九岁终。乾隆三年旌。

萧氏，主事项钟建妻，光禄典簿长祐女。性敏慧，知书史，年十八为建继室。十年，夫故，氏恻绝不欲生。长子俞方九岁，哭曰：“母若此，儿安之？”以首触床柱尽肿，乃强起。是时建兄严官于浙，母以道远未赴，氏迎室中偕食。寝病，亲调汤药，不假手奴婢。教子严峻，稍不检，榎楚随之，卒以勤劳成门户。长喻，官平武丞；次俞，苏州同知，令候选州同。乾隆六年旌。

陆氏，儒童高昶妻。守节三十年。乾隆六年旌。

吕氏，儒童倪早荣妻。守节四十二年。乾隆六年旌。

李氏，周用吉妻。守节二十三年。乾隆六年旌。

叶氏，夏恒吉妻。守节五十七年。乾隆六年旌。

王氏，夏承贤妻。守节四十二年。乾隆六年旌。

丁氏，张怀俊妻。守节三十五年。乾隆六年旌。

刘氏，韩绮妻。守节三十六年。乾隆六年旌。

丘氏，生员杨清妻。守节三十六年。乾隆六年旌。

沈氏，邑庠生汪之晋妻。年二十于归汪氏。三载，夫亡，子汪静甫一岁。守节三十年，五十三岁卒。乾隆癸亥年旌表建坊。

张氏，儒童汪能哲妻。年十九归汪氏，三载，夫亡，遗腹阅半月生子，名任重。教养成立，入邑庠生，守节四十三年，现今六十五岁。乾隆己未年题旌建坊。

董氏，邑庠生汪航妻。年十八于归汪氏，四载，夫亡，止遗一女。守节四十三载，现今六十五岁，立嗣子祖赐^①。

^①“祖赐”下疑有脱文。





余氏，徐志进妻。年十六归徐，二十九，夫亡。抚幼孤，累被回禄，赖十指以出高堂菽水之资。及姑卒，哀毁尽^①〔礼〕，致丧葬且如礼焉。现年七十六岁。乾隆九年旌。

戴氏，原任直隶大名府知府吴允谟之妾。

马氏，儒童熊必翔之妻。

胡氏，儒童萧仆之妻。

余氏，儒童裴廷扬之妻。

舒氏，儒童汪锦文之妾。

甘氏，儒童张之培之妻。

章氏，候选知县张坦谔之妻。

以上七人，俱乾隆十年旌。

（列女）贤母 烈妇（贞女 孝妇）

宋

江旧《志》作“汪”，《楚纪》作江母，子涯以忤贾似道挝死。母哭曰：“汝死于忠，我则不辱，可以下报先君矣。”亦自沉于江。

明

江氏，周伏受妻，孝感人。嫁伏受四年而寡，护卫林宽欲聘为妾，江闻而呼翁与夫兄曰：“老官、大哥，不得轻易陷我。”宽迫之，江遂整衣，毁园篱，走夫坟，痛哭，沉漳湖死。翌日，得走迹于坟间，乃出尸。知府刘公本用迁伏受，与江合葬于汉阳西桥之西，为作赞曰：“美哉江氏！一死就义，追躅古人，流芳百世。”又表其门曰“江节妇门”。

石氏，王某妻。生一子，夫卒，一子遗腹未生。有豪民某慕其色，计夺之，不从。一日，氏舟过南湖，豪民于湖中劫之。氏抱其子投水死，院司以豪民拟辟，立有烈妇碑，在么铺路侧。

吴氏，举人魏晋封妻。晋封病笃，谓曰：“丧乱之乡，为嫠甚难，能从予地下乎？”氏曰：“有志士，宁无志士妻乎？”封卒，日夕号痛，死而复苏者数四。百日后，缢于柩旁，遂同穴之志云。

①“哀毁尽”下，疑脱“礼”字。

②以上括号内文字为衍文。后同。



程氏，王旦生妻。年二十适王，王中崇祯己卯副榜，例赴部肄业。癸未，献贼破会城，氏乘舟避难，道梗不能出。兵汹汹且至，氏急呼老仆，属子女别逃，自立舟尾目送。俄贼四集，氏大呼跃水死。子家琰，孙履鳌、履密俱庠生。

张氏，郭一作刘兴妻。夫业渔养母，为流寇所获，穷诘财物无所得，怒欲杀兴。氏跪请曰：“姑年老，夫死无以养，愿身代之。”寇释兴而杀氏。逾三日，尸跪不僵。

任氏，举人熊鸣盛妻，江夏待诏家相女。夫歿，孀居教子。癸未，献贼破武昌，氏适避乱季女家，闻贼至，死之，女亦从死。以子伯龙贵，累赠一品夫人。

陈氏，易可久妻。年四十无子，劝夫纳妾，生子兆羲、开羲，抚之如己出，俱游泮。献贼陷汉阳，氏被执，骂不绝口，贼磔杀之。顺治中旌。

周烈妇，李大理宅婢也。为贼所挟，至梅子山别墅犯之，不可。临以刃，氏伸颈就之。突起，抓贼面流血，遂遇害。

徐氏，生员李珠妻。闯贼之乱，偕女避于储山。贼突至，欲犯之。俱不从，被杀，藁葬山麓，过者怜之。子生员如琬列其状。

喻氏，罗汉鼎妻。左兵侵掠，氏挟二子避月宫桥水边。贼劫之，加以刃，血流被面而死。

李氏，刘对生妻，太仆若愚次女。闯贼败走入山，李徒跣奔窜，遇逼者至，投水死。二子树范、树骏殉焉。

余氏，王维侃妻。献贼乱，夫妇俱为贼所掠。氏给兵释夫远去，乃引颈就杀。侃感其义烈，终身不娶。

何氏，生员周谏母。癸未被左兵掠获，大骂不屈，被杀。

吴氏，杜皖妻。避流贼，闻兵声，急语夫曰：“少缓，无及矣。”遂投水死。

郑氏，生员李克柱妾。明末流寇破汉，家人俱逸。氏遇贼将，掳与同行，骂不绝口，贼支解之。至今堂楹血迹犹存。

邬氏，蔡店民家妇。明末随夫避乱，毁容衣秽，栖江夏长山破屋中。夫病，死三日，无棺。烈妇遇一村农，泣请曰：“良人不幸道毙，望君子哀怜，藉一板藏沟壑。”因献双环。农惨然为殡于小麓水溪，甫畚土，妇投身抱夫骸，呼曰：“我从君泉下矣。”农惊去。翌日，里人争至，扶令起，卒不动以死。众感动，大其冢。后十余年，邑贡生萧企昭过其墓，伐石表之。

周氏，张伯祥妻。有殊色，归张未一载，贼至，将辱之。妇触墙而死。半月方殓，颜面如生。

高氏，李君爱妻。随夫避乱，遇贼，掳缚舟中。氏私谓夫曰：“望君自为计，





吾义不辱身也。”夫去，诡云渴，乘隙投水死。

国朝

潘氏，吴大申妻。年二十四，夫歿无子，决志从死。衰翁劝谕之，乃依夫灵几泣守者三年，服除，投缳死。康熙五十九年旌。

王氏，熊正筭妻，名希贞。幼时，父孝廉士乾教以女史。适熊，事翁姑极孝谨。夫死，欲殉。姑语之曰：“孝顺妇犹吾女也，既失子，又失女，我且从汝逝矣。”氏乃强起执丧，不敢夜哭。服阕，麻衣未尝去体。越数年，姑歿，遂不食数日，抚棺一恸而绝。

田氏，王文纶妻。田生兰次女。幼爱读《列女传》，年十七适王。王寝疾，氏哀毁吁天，愿以身代，谓王曰：“若不起，予稍知礼义，又无子息，敢背所天耶？”王卒，视含殓讫，泣语母曰：“儿已许从王郎地下矣。”母留二婢守之，氏伺婢倦，乃自束发纫衣，书绝命词三首，自缢死。其词曰：

与君白首共为期，谁料分飞惨别离。
我命岂同风絮落，矢从泉路更相随。

辞予父母与诸昆，莫话伤心早断魂。
儿是西原陌上草，雪寒霜妬已声吞。

冥路悠悠可缓行，君归我肯惜微生。
宁甘地下同埋玉，岂学啼鹃怨五更。

贞女

明

易贞女，孝感人，许字汉阳诸生刘宏子养恬。未嫁，恬死。女往哭之。恬就窆，女欲身殉。姑泣曰：“若念吾儿，亦知吾儿有垂白之父母乎！”女遂剪发瘞穴中，不复言死，躬纺绩，事甘旨，不出户者二十三年。舅卒，鬻衣治殓具。居姑丧，日饮清水一瓯，碎香末少许吞之。葬姑毕，遂绝粒死，后姑仅十二日。与恬合葬。

李烈女，新宁令国祚女。闻猷贼警，旬日不解衣带。贼至，仓卒出走，与贼遇，欲污之。女且走且却，身被数创，至马家湖遂遇害。后得尸于湖中，爪痕透掌，



肤色如生，衣表里缝密有字曰：“海水群飞，士贰其行。湖水澹澹，之子澄清。视刃视饴，见衣见心。”

仲烈女，湖州人，随父节贾于楚，有殊色。献贼破汉阳，仲从群妇出走，门者止之。有顷，贼索妇女，首执仲，仲破面披发大骂。贼命二人挟上马，力坠伤额，终不肯往。乃露刃迫之，曰：“头往何如身往。”仲笑曰：“头也。”贼遂取其头驰去。

李烈女，诸生友桃女。癸未献贼乱，女年甫及笄，随父避虎头山湖上。兵至，女知不免，豫自缝纫衣履。甫讫工而遇贼，驱入舟。女给贼登岸，跃入水，未即死，贼怒引佩刀砍杀之。数日尸浮，肤色如生。藁葬张大渡旁。

国朝

宋贞女，千总相赆女。幼字江德滋，未适，江卒。女闻之，求随祖母往吊。至殡所，呼抢欲殉。祖母劝之归，朝夕哭奠，守贞以歿。雍正三年旌。

胡五姑，陈御兆聘妻。未嫁，夫卒。女哀毁绝粒，强往吊，遂不归，衰麻未尝去体，与姑同寝食，事之如母。服阕，缢死。雍正十二年旌。

周贞女，父文选，幼字刘正璜，迨吉而正璜夭。讣至，女绝粒，哭不止。父母劝之，曰：“得往吊，乃已。”既去，遂誓终身。时姑以上三世俱在养，女事之皆欢。曾王姑高孀居，年九十，垂歿，执女手曰：“汝孝，我无以报，愿汝节孝如我。”后高获旌，女叹曰：“吾愿继曾王姑节，不愿享曾王姑寿也。”未几卒。乾隆四年旌。

俞氏，生员李邦有聘妻。问名后，李以攻苦致疾，遂卒。氏闻讣悲号，嘱兄嫂善事老母，绝粒而死。雍正十一年旌。

孝妇

明

徐氏，汪卷妻，汉阳人。崇祯中，姑病，剜肝救之。知县杨四知旌焉。

丁氏，庠生瞿犹龙妻，汉阳人。龙贫，氏奉继姑王氏曲尽妇道，每冻馁自甘，而供姑衣食如礼。值天暑，姑患恶疾，人所难近。氏奉盥洗，具汤药饮食，床褥必亲，历久不倦。年五十九卒。子谦，有声庠序。

倪氏，周文郁继室。以恭谨称，夫故，抚前妻子新命，茹苦操家。翁老病，扶掖起居，身亲汤药。危笃时，忽呼新命曰：“汝母举孝呈至矣。”觅之，则私





割臂肉正烹也。家人惊异之。后新命入邑庠，母七十一（乃辛）乃卒^①。

国朝

周氏，邑庠生宗德裕妻也。性方正，事夫教子，能尽礼法。德裕病笃，剜臂肉愈之。巡抚、学政以下皆褒以诗文。子四：绍憲，邑诸生。绍泽、绍闻，举人。绍彝，丙辰成进士，授保昌知县。氏遇覃恩始卒。

孙氏，壬戌科进士中翰林孙皋第四女。家素封，年十九，适项生诚。诚家亦巨富，氏衣粗食粝，勤俭持家。及由民部郎官出守蜀之顺庆，迫于简书，诚遂轻车减从，先由栈道抵任所。适姑李氏陡染危证，诚不知也。氏亲侍汤药，卧起不离。姑病笃，氏祷天愿以身代。果天鉴其衷，姑病随愈。后诚迁成都，旋卓异入觐，卒于京师。氏呼天抢地，誓不欲生。其子大复、大德跪泣力谏，始强起，携二子由蜀归汉，不致流落异方。诚居官时，惟以清白自矢，及没，家无隔宿粮。氏拮据辛苦，篝灯课读，达旦不休。二子年方弱冠，一时同入胶庠，人皆以为贤孝所感云。壬戌年卒，时四十九岁。

^① “七十一乃卒”足句成文，“乃辛”为衍文。



《汉阳府志》卷之四十五下 人物〔十四〕

列女〔志〕·汉川县

节妇

明

黄氏，张一鲁妻。夫亡，氏年十六。父怜其幼，改聘涂姓。氏闻自缢，婢许氏救之，寻自刎，嫂杨夺刀乃免。守节终身。有司旌奖，岁给粟帛。

龚氏，马天庆妻。夫卒，抚幼子，家贫，纺绩养姑，晨昏不倦。洪武二十三年，有司表其门，蠲其徭役。

郭氏，李昂妻。年二十三，夫亡，苦节终身。有司岁以银米给之。

岳氏，李和妻。夫卒，抚孤，饮冰茹蓼四十余年。邑令及上宪屡旌之。

李氏，雷溥妻。年二十五，夫卒，艰节育孤。邑令请于上宪，屡给粟帛。

张氏，龙天雨妻。年二十四，丧夫，有以改适讽者，断一指示之。抚子衣补弟子员，生男女各一，而衣卒，男亦殇，张独与姊女相依，持节益励。万历中旌。

胡氏，龙大汉妻。夫歿，年二十五，遗孤制甫三月。家贫，织纴自给，课制列诸生。事闻，旌表。

潘氏，生员林若金妻。年十九而寡，自少至老，槁如骨立，抚数月遗孤茹有成。后旌表。

米氏，生员李时妻。时以苦学病亡，氏哀毁几绝。舅姑怜其少，欲嫁之，不可，乃止。苦节六十年卒。

魏氏，生员尹应龙妻。夫歿，事尊章以孝闻。训二子成立，三孙皆补弟子员。年七十四卒。

曾氏，尹应祥妻。年二十二，夫卒。外亲欲夺其志，氏以死拒之。教子迥为名孝廉。卒年六十余。宗伯李维桢为之传。

王氏，生员郑应麟妻。年二十而寡，无子，仅女二。父母逼其改适，氏矢死不渝，自是终身不复归宁。有司旌之。

郑氏，生员王文蔚妻。年二十五，夫亡。一子在襁褓，日抱以泣。荼苦辛勤，





抚孤成立。至八十余，以完节老。

王氏，生员龙纳约妻，总宪道直妹也。年二十二，夫病，刲股疗治，不起。矢志冰霜，育孤循成立为诸生，卒年七十余。直指题旌。

曾氏，生员龙御妻。年二十六，夫亡，事姑至孝，抚子文光入庠。年逾八十卒。有司奖之。

王氏，生员葛生楚妻。年二十一而寡，抚遗孤，艰苦课读，持躬言笑不苟。尝病晕，儿辈延医〔胗〕〔诊〕视^①，及寤，欲引刀自断其腕，曰：“奈何令我手为医者持乎？”操厉冰霜，三十余年如一日。子言颺，康熙庚戌成进士。

郑氏，丁元正妻。年二十二，夫亡无嗣，抚侄孙鼎承祀，完节而终。

方氏，左起妻。夫亡，年二十一，节守五十余年卒。

龙氏，王道正妻，纳铭之姊。夫早逝，苦节五十四载，孝事尊章，课子都由贡选通判。年八十九卒。

国朝

周氏，生员王恂妻。年二十五，夫歿，舅亦随逝。氏拮据，丧葬尽礼。训遗孤为武陵广文。因困军差，捐田数十亩，刊册请印，为族中助运费。子卒，与媳偕守，抚孙成立。雍正四年旌。

王氏，生员萧文起妻。年二十三，夫亡，遗二女。氏抚棺哀恸，忽邻居火，将及宅，家人悉走，氏抚棺哀号惨切，忽风反火灭。奉尊章至孝，生养死葬，心力俱瘁。抚侄昌运为嗣，苦节四十五年。雍正七年旌。

黄氏，胡铎妻。年二十三，夫故。氏冰蘖自矢，苦节五十余年，抚子之翰成立。乾隆元年旌。

金氏，陈铨妻。

高氏，陈煊妻。

王氏，晏士灿妻。

李氏，顾滋远妻。

陈氏，黄镐妻。

汪氏，田种玉妻。

以上六人，俱乾隆十二年旌。

刘氏，陈天栋妻，广文烜之长女也。及笄归陈，勤操作佐夫，诸姒化焉。夫歿，

^①“胗”，当为“诊”之误。



奉姑尽瘁以节终。旧《志》。

宋氏，诸生刘世泰妻。泰以数奇不第，愤郁夭卒。氏绝饮食数日，愿从地下。其兄宽谕之，乃强起，进糜粥。教二孤励学，恒脱簪珥、弃生产，以供俸饩，卒致成立。氏以完节终。旧《志》。

程氏，萧□□妻。于乾隆三年三月内题旌建坊。

林氏，洪□□妻。于乾隆三年三月内题旌建坊。

刘氏，岳□□妻。于乾隆三年三月内题旌建坊。

汪氏，马□□妻。于乾隆三年十月内题旌建坊。

许氏，黄□□妻。于乾隆四年二月内题旌建坊。

马氏，刘□□妻。于乾隆四年八月内题旌建坊。

胡氏，胡□□妻。于乾隆四年十一月内题旌建坊。

潘氏，李□□妻。于乾隆四年十一月内题旌建坊。

郭氏，殷□□妻。于乾隆四年十一月内题旌建坊。

王氏，刘□□妻。于乾隆四年十一月内建坊。

程氏，方□□妻。于乾隆五年五月内建坊。

方氏，吴□□妻。于乾隆五年八月内建坊。

向氏，邹□□妻。于乾隆六年八月内建坊。

喻氏，陈□□妻。于乾隆六年八月内建坊。

胡氏，陈□□妻。于乾隆六年十一月内建坊。

刘氏，张□□妻。于乾隆七年三月内建坊。

杨氏，马□□妻。于乾隆七年十一月内建坊。

张氏，蒋□□妻。于乾隆九年八月内建坊。

林氏，生员程宗绣妻。乾隆九年八月内建坊。

骆氏，生员程宗洛妻。乾隆九年八月内建坊。

屈氏，杨□□妻。于乾隆九年十月内建坊。

万氏，李□□妻。于乾隆九年十一月内建坊。

毛氏，胡□□妻。于乾隆九年十一月内建坊。

王氏，晏□□妻。于乾隆十年正月内建坊。

李氏，顾□□妻。于乾隆十年九月内建坊。

高氏，陈□□妻。于乾隆十年九月内建坊。

金氏，陈□□妻。于乾隆十年九月内建坊。





陈氏，黄□□妻。于乾隆十年十月内建坊。

夏氏，尹□□妻。于乾隆十一年十一月内建坊。

周氏，王□□妻。雍正五年入祠。

（列女 烈妇 烈女 孝妇 贞女）

烈妇

明

万氏，生员张采妻。甫婚数月，值左氏肆掠，投塘中溺死。

成氏、唐氏，生员王明俭妻。左兵南下，与妾唐氏恐为贼污，俱结帛死。

骆氏，生员李正开妻。流寇掠乡，氏被执，众以刃胁之。引颈受戮，骂不绝口而死。

殷氏、杨氏。殷氏，生员杨敦义妻。杨氏，马呈祥妻，敦义姑也。义与祥相继卒，二氏哀毁骨立。杨死于祥之忌辰，殷亦于义之忌日自经。事闻，旌以双烈。

胡氏，罗□□妻。癸未，白贼肆掠，氏为所执，骂不绝口，贼大怒，乱刃之而死。

烈女

明

曾烈女，未嫁，值乱，为流贼所掳，大骂不从，遇害。

王烈女，幼聘某，闻夫死，闭户自经。事闻，获旌。

罗烈女，乡民罗瑚女。明末为流贼所执，以首触地，取石自破其脑，血流满面。贼怒杀之，时年十八。

孝妇

明

龙氏，尹大任妻，诸生龙之琦女。姑刘氏病笃，割臂肉杂汤药进之，姑遂愈。



贞女

国朝

戴贞女，大司马金孙女也。年十八，受汉川诸生李霄聘。霄抱疾将革，戴愿往奉汤药。未半月，霄卒，竭妆资营葬，无姑可依，仍归侍寡母守贞，至五十五岁卒。

劳贞女，昭文知县必达女，许字汉川王希仁次子王业嶠。年十九，王以病故，氏矢志不二，完贞三十二年，现年五十六岁。雍正十一年旌。

万姑，于乾隆三年四月内建坊。

金姑，于乾隆六年十一月内建坊。



《汉阳府志》卷之四十六上 人物〔十四〕

列女〔志〕·黄陂县

节妇

明

盛氏，邓鉴妻。鉴任光禄署丞，殁于土木之难。氏年二十七，守节抚孤琮，后以恩录仕为裕州牧。氏年九十余卒。事闻，旌表。

彭氏，丁侗妻。年二十七，夫卒。贫且无子，事姑尽孝。兄欲夺其志，遂终身不至兄家。及卒，邻里怜而殓之。督学陈凤梧题其墓。

王氏，黄香妻。年二十一，夫卒，无子。家贫难支，守死自誓，族众莫能夺。苦节八十余年。

刘氏，生员郑伟妻。年十九而寡，家贫抚孤，以缁紵自给。年九十余卒。

王氏，刘灌妻。夫卒无嗣，与其妾侯氏共抚一仆男为义子，市薪供给，影形相吊，年俱八十卒。

李氏，生员喻侍妻。早寡家贫，抚孤成立，以完节终。邑令狄旌之。

张氏，生员韩邦旧妻。夫沉痾四载，侍药饵不懈。夫歿，甘贫矢志，择师训三子有成：长榘以明经授阜城令，仲、季及孙皆列胶庠。

秦氏，诸生张玉驰妻，顺天府尹秦凌虚女。年十八适张，二十二夫亡。氏截指断发，抚六月遗孤，历危乱不渝。每当舅姑诞忌日，必八拜曰：“未亡人谨代阿夫四拜。”有司议旌之，辞不受。

吴氏，生员萧森妻。年二十五，夫亡。氏矢志艰贞，抚孤芳成立。氏病，芳刲胸和羹进。氏苏，知之泣曰：“吾愿得早见汝父于地下，儿何苦自残！”逾年疾复作，呼芳戒曰：“人生皆有死，慎勿复然。”遂卒。芳居丧三载，深墨如一日，人称其一门节孝。

倪氏，吴大理继室。年十六适吴，事舅姑孝，待宗族长幼俱有礼。夫亡，氏年三十，矢志冰霜，以完节终。

孙氏，李正英妻。年二十一，夫歿。舅与继姑皆衰耄，氏竭力奉事不懈，





遗孤清珠三岁、赤珠六月，皆抚成人泮而夭，复抚诸孙成立，补弟子员。苦节五十载，当事咸旌之。

郑氏，陈某妻。夫亡，年仅十九。勤俭持家，训子有成。年七十余卒。

贺氏，郑当时妻。江夏贺文忠女。氏夙承父训，善事尊章，治家仪节井然。夫歿，值流寇乱，携一女避乡庄，零丁孤苦，坚节以老。

戴氏，王鼎铭妻。生而幽贞，年十六适王，克尽妇道。二十八，夫亡无子。抚嗣子，娶妇张氏。举一孙，而嗣子又亡。越三年，媳又歿。独抚弱孙成立，集蓼茹蘖。年八十余卒。

李氏，吴逊斋妻。年二十一，夫亡。织纴自给，教孤鼎有成，食飨县庠。年七十余卒。

郑氏，张垣妻。年二十，夫陷贼死，无子，苦志茆守二十余年。舅姑歿，力营归窆，逾年亦卒。

左氏，陈少峰妻。年二十二，夫卒无嗣，立伯氏子承祀。有谋娶者，氏以死捍强暴。年七十余卒，闾党称之。

郑氏，陈善妻。性贞淑，事尊章，贫而能孝。年十九，夫故，孤丹赤方一岁。后取夫遗书朝夕课读，得游胶庠。事闻，旌表。

吴氏，李世龙妻。夫早亡，遗腹生子辅。值流贼乱，携子与姑远避，流离播迁，艰辛备历。后抚孤有声庠序，邑令旌之。

萧氏，李珍妻。年二十四，值猷贼乱，翁与夫俱亡，氏营葬二棺。姑病笃，割臂疗之，孝节兼至。姑死，依父以终。

丁氏，万一洵妻。年二十二，夫歿，遗孤周岁，贫薄无依，以女红易米奉姑，自啖糠粃。姑病笃，剪发市药饵。及卒，氏一恸而绝。

梅氏，王循武妻。年二十二，适王。甫五月，夫亡，遗腹生子，誓死守节，织纴抚孤。值流寇入境，被执，不从，刺其面。年六十余卒。

冯氏，朱国臣妻。早寡，有富豪吴某强婚。氏断发毁容，矢死不屈，邑人为鸣冤，坐豪遣戍，直指表其门。

国朝

王氏，侯希哲妻。夫歿，家贫拮据，冰霜自矢。训三子皆有成。顺治十四年旌。

万氏，周若衡妻。年十九，夫亡，遗孤四岁，辛勤教育，得列胶庠。子又早逝，氏年七十余，与孀媳黄氏苦守，饮冰茹蘖，一门双节。顺治间旌。





方氏，儒士张文灿妻，生员张珩母也。于归二载，生珩甫一日，夫歿。家贫无依，氏纺绩事七旬衰舅，下抚孤儿，守节六十年。乾隆三年，县详申院请旌，尚未奉文行知。

梅氏，蔡某妻，生员蔡翰之高祖母。年二十二，夫亡，苦节抚子。媳姚氏年二十，夫亡，亦茹苦守节，训子成立，皆以完节终。

徐氏，江夏徐守先女。年十五，适淝源乡李之秀，生一子邦俊。氏年十八，之秀卒。氏扶老姑、守孤子。姑病，贫不能医，氏割股救姑。昼夜纺绩，以供饘粥。姑歿，率孤子亲负土以筑坟。孝动乡里，童叟相助。家贫子幼，有以改志（动）〔劝〕者^①，氏佩刀自待，劝者莫敢近。寿九十二，卒时目见六代之孙，里党绅士公颜其门曰“贞寿之门”。

徐氏，儒士吴国桢妻。

周氏，儒生刘名智妻。年二十一，夫亡。姑老子幼，氏纺绩仰事俯育，孝慈兼尽。守节三十八年终。

汪氏，庠生李伯占子媳也。适李未久，值夫病不起，欲先死以绝夫念。夫曰：“我万一不死，汝不枉死乎？且汝先死，是速我死也。”氏姑忍之。既而夫死，次日即以嫁时冠衣叩奠于灵前，并辞舅姑，从容就义。乡人公请邑侯钮公转详上宪题达焉。

徐氏，儒士吴国珍妻也。于归未久而夫病，氏跪祷于天，割股啖之，得延四载。始卒时，姑尚未老，氏以妇道兼子道，生死养葬，无不如礼。女适叶，先氏死。立女之子为孙，又死。迨九十寿终，仅曾孙承服。

冯氏，儒士刘益周妻也。适刘未数载，夫死，族中觊绝产者已有成议。五月后，氏生遗腹子，众心稍缓。久之，子渐长，原议乃毁。后入郢阳泮宫，诞生多子。氏以麻木之疾，不能起止者数十年，其前此之艰难辛苦，御外侮而存宗祀，固干国之贤臣也。

张氏，儒士钱文涛母也。生一子一女，夫卒，守而抚之，完其婚嫁，三十年如一日。己丑六旬，邑侯特匾，士大夫咸为诗歌，以美其德、祝其寿云。

欧阳氏，庠生欧阳方鼎女，儒士张觀光妻也。己巳适张，至甲戌而寡。长子三岁，次子在腹，而氏抚少子、养孀姑，夜月孤灯，惟勤纺绩以供家用。姑歿，吊客酒食，一一自办，族戚贤之。

^①“动”，当为“劝”之误。



杨氏，儒士万孙纘妻也。纘生二子，未三十卒。长者三岁，幼方一周。氏抚育教诲，历四十余年，足不出户，外不闻声，洵苦节之可表者也。时居武昌城，内外绅士将合词请于学院恳题达焉。

王氏，武昌府庠范华域妻也。夫亡时，子方三岁，氏教之有道，言动皆必以礼，族党称为严母焉。寿八十又八而终。

李氏，庠生李元之妹，孝廉吴陈言之八子媳也。性慈仁，乡里称之。于归三载，生二女而失所天。氏年二十一，矢志靡他，苦节十九年而卒。

胡氏，邑庠生胡之宁女，麻城教谕黄熊之孙媳也。夫名国选，弃腹子而夭。其叔妹适董门，亦不幸而寡。氏相与誓志，苦节终身。今其子皆娴文艺，克继家声，是天所以福之也。

刘氏，业儒傅照妻也。年二十外生一女，而夫弃世。贫困难堪，抚女犹子，惟朝夕纺绩以为营生之计，治嫁之资，洵苦节而贞者矣。

林氏，南漳训杨廷藻之长子梦赉之妻。梦赉早饬于庠而享年不永，生子函筵，氏以母道兼乎父道，教之成名，克继先人世业，士林咸高其节行。乾隆八年，奉旨建坊。

刘氏，陈巨任妻。孝事公姑，内外无间。从夫至京师，时魏瑄杀杨忠烈，氏愤激，赞夫收尸，朝野为之咋舌。后夫官歿闽中，氏苦志抚子世昌有成，为浚吏。值猷逆乱，氏勉子以大义。昌遂募千人击猷贼，累功授后军都督同知。氏诰封夫人，年八十九卒。顺治间旌。

邓氏，周若岫妻。夫歿，孝养公姑，勤督诸子皆成名。力行赈贫、瘞骨诸善事，五十年不倦。顺治间旌。

朱氏，黎嗣昌妻。夫歿，氏年二十五。苦节五十年，教子时举登贤书。康熙十年旌。

乐氏，王軫善妻。軫善孝养竭力，亲死庐墓，皆氏佐成之。年二十四，夫亡守节，训子轩登己酉乡举。康熙十八年旌。

刘氏，生员李继邨妻。年十九，夫亡。历事三姑，克尽妇道。苦节五十五年。康熙三十六年旌。

熊氏，生员钱奇勋妻。夫亡，年二十五。敬事尊章，抚孤子成立。康熙四十九年旌。

黎氏，生员邓世珍妻。年二十八，夫歿。遗孤际清，艰难教育，登辛卯贤书。苦节五十余年。康熙五十二年旌。





王氏，生员邓世盛妻。夫歿，年二十五。遗腹生子际泰，抚之成立。事孀姑以孝闻。苦节四十二年。康熙五十二年旌。

王氏，杨廷菁妻。夫病，吁天祈代。及卒，触棺几绝，家人密护得全。时年甫二十一，无嗣，立从子士捷承祀。妣彭氏、张氏亦先后丧夫，氏抚慰曰：“我三人当共矢冰操，以报良人于地下。”遂俱以完节终。康熙五十四年题旌。

周氏，生员桂蕃妻。年二十一，夫亡，遗孤二岁，誓死抚之。奉孀姑惟谨，姑疾笃，氏哀痛绝粒，及歿，殡葬如礼。康熙五十四年旌。

彭氏，监生杨廷锡妻。年十八，夫亡，遗孤七龄而殇，母家欲夺其志，氏断指刺面，誓以死守。抚从子绍弼主夫祀，以完节老。康熙五十四年旌。

沈氏，生员杨绍裔妻。夫歿，年二十一，艰苦抚育遗孤，将婚，复夭。立从子学典为嗣，壶范之严，虽三尺童子无敢窥户外者。康熙五十四年旌。

刘氏，生员杨绍统妻。年二十七，夫亡。冰霜自矢，奉尊章得其欢心。及歿，哀毁尽礼，节孝两全。康熙五十四年旌。

刘氏，生员杨绍纪妻。夫卒，年二十五。事姑最孝，姑病煎药，火燎其发，姑惊止之。对曰：“姑疾势至此，发何足惜！”因祷神，以身祈代，病寻愈。苦节二十八年。康熙五十四年旌。

谢氏，生员黎来铨妻。年二十，夫亡。守节三十年。雍正四年旌。

陈氏，李玉妻。夫亡，年二十八。舅姑垂老，氏竭力奉养，抚孤成立。雍正四年旌。

徐氏，余国式妻。年二十六岁而夫亡，苦节三十年。雍正四年旌。

萧氏，杨新都妻。年二十六，夫歿，奉翁姑极孝，饮冰茹蘖，以苦节终。雍正六年旌。

胡氏，生员刘应魁母。年二十二岁，夫亡守节。雍正十年旌。

喻氏，生员黄日炳妻。

沈氏，胡世钟妻。夫歿数年，姑老病不起，氏割股奉之，得愈。

高氏，监生姚徽妻。

方氏，刘□□妻。

高氏，姚□□妻。

以上俱于雍正十年旌。

詹氏，刘浑之妻。年二十一岁，夫亡。姑老子幼，艰苦倍常，守节四十一年。雍正十一年旌。



杨氏，章政治妻。雍正十二年旌。

吴氏，雷声发妻。雍正十三年旌。

周氏，生员杨峰妻。夫亡，零丁孤苦，人所难堪，氏冰操弥厉。守节二十九年。乾隆元年题旌。

方氏，胡云志妻。乾隆二年旌。

蔡氏，生员王谟妻。乾隆二年旌。

刘氏，李群林妻。事夫克尽妇道，奉姑敬养兼至。夫歿，哀毁。值姑继逝，丧葬如礼。乾隆二年旌。

潘氏，王士璠妻。纯孝性成，事尊章及继姑曲尽孝养。前姑早卒，家贫不能卜葬。氏脱簪珥以助。乾隆二年旌。

胡氏，王士晟妻。年十八，适王。夫卒，冰蘖自甘，持己言笑不苟，闺范甚肃。乾隆二年题旌。

徐氏，生员钟廷九妻。

彭氏，闵洪妻。

刘氏，朱大受妻。

以上俱于乾隆三年旌。

朱氏，潘肇基妻。夫病笃，日夕祈祷，愿以身代。及歿，恸不欲生，因遗腹强起，矢志苦节，历四十二年。乾隆四年旌。

朱氏，李元奎妻。夫亡，逾二年祖姑与两姑相继而逝，遗孤立辉亦夭，茆茆苦守冰操，历五十九年，八十二卒。乾隆四年旌。

王氏，陈丹诰妻。

白氏，杨德光妻。夫早逝，氏生遗腹子，抚养教诲，有古贤母风。今其子定蜚声黉序，亦以母训矣。

闵氏，严方志妻。

胡氏，骆梦熊妻。

以上俱乾隆四年旌。

刘氏，生员徐大锡妻。年十九适徐，夫歿欲殉。舅姑泣劝，乃止。遗孤正莲仅七月，教育有成，得列庠序，历四十一年，以完节老。乾隆五年旌。

张氏，李之节妻。夫死，誓死。克勤克俭，抚孤子成立。其妹亦未三旬守节胡门，氏有以倡之耳。

彭氏，胡备封妻。





黄氏，邓文铨妻。

刘氏，邓洪业妻。

梅氏，童志学妻。

刘氏，童林芳妻。

陈氏，严时霖妻。

以上俱于乾隆五年旌。

姚氏，张文宪妻。

罗氏，儒童刘应隆妻。

周氏，儒童彭同祥妻。

王氏，李伋妻。

萧氏，李天桂妻。年十七于归，甫十二载，夫故。氏绝粒五日，舅姑救挽。氏曲尽孝养，和丸课子。舅姑身后，鬻妆安葬，里党咸称节孝。乾隆十二年奉旨建坊旌表。

刘氏，儒童沈钟岳妻。

以上俱于乾隆十二年旌。

烈妇

明

林女，黄自诚妻。年十七适黄，有黄绶者乘间调之，妇恚自经。邑令萧应儒白于上官，给银祭葬。

杨氏、黄氏。杨氏，谭德化妻。夫早亡，值流贼警，谓子忠义曰：“吾宁死于家，不弃尸道路也。”乃与媳黄氏匿复壁中。贼至，破壁，牵出杨，先被刃。黄急投塘，水浅不能没，贼乱石击之，脑裂不起，贼怒碎其尸。忠义后成进士。

张氏，袁遵妻。明季流寇溃城，氏与媳段氏及长女俱被执，将肆辱，张大骂不止。贼欲刃，媳氏环跪请代死。贼曰：“若欲活者，从我。”张因厉色正容，相勉以死。贼益怒，乱刃之，俱遇害。

向氏，向荣赤女。幼至孝，年十七，适王。逾年，流贼至，见执，胁之以兵。氏正色请死，贼指其戚属恐之曰：“当尽屠而后及汝。”氏因仰天长号，夺贼刃自杀。贼怒，碎其尸去。

涂氏，王立郁妻。避乱武昌，贼于复壁间收执之。氏愤咬贼断指，贼怒极，



碎首屠肠而死。

庞氏，贫家女。美姿容，言动不苟。夫袁三才酗酒游食，氏力劝不悛。一日债主责负，才无计立身，约为质。逾年不偿，才向氏白其事。氏度不免，泣曰：“我虽死，不甘为人奴婢以貽辱。”遂手刃七岁女，身有孕，旋自刎。数日未殓，颜貌如生。按台以其事闻，建节烈坊。

国朝

田氏，庠生田垣兰女，适生员邓之正之三子杰。杰以攻苦成疾而歿，氏面誓同穴，遂投红炉中熬几死，旋以首触石，家人救苏。少顷，礼拜夫灵毕，登楼从窗坠下，气绝复苏。父母舅姑再四劝慰，氏曰：“儿有三不可留，誓从夫地下矣。”自此水浆不入口者七日，夜半投缳，家人密防得救复苏。又托疾卧床以缓防守，遂自缢而绝。卒年二十四。

彭氏，邑庠彭焕章之姑也。氏少方正，及适人，值夫不才，数泣谏，不从，遂自刎。邑侯魏公以匾旌之。

某氏，河口熊门媳也。年二十，夫以病卒，氏即死之。邑士大夫多吊以诗。

傅氏，生员傅大铨妹，国学范振纲长子媳也。适范五载而夫亡，屡求自尽不得，乃许奉姑雷氏生死。而室置夫灵，每食泣祭，舅怜之，使族媼讽以服满当火。氏曰：“俟姑后同日火耳。”又商其母家，制新衣令试，氏泣曰：“吾终不及奉姑矣。”遂腹夫灵而死。

张氏，涂门媳也。年二十二，夫卒。自矢柏舟，而父母、舅姑私许人。氏不从，强之，遂自缢。魏邑侯特匾旌焉。

孝妇

明

胡氏，武昌司训胡公传之妻，经魁胡云岚之母也。事舅姑极孝，舅病不能起止，氏与姑同扶持，一饮食便溺，俱不避嫌疑，君子以为难。

烈女

明

方氏，女名明。年十六七，父母以贼乱避居木兰山，忽传贼至，明自度不能逃，赴潭水。父母强阻之，明哭曰：“任我死，犹得为父母女也。”遂死。贼





去后，乃觅其尸，犹如生焉。邑士大夫多以诗吊之。

赵氏，崇阳贡生赵廷璧女也。邑南生员卢镐聘为季子媳，未字而季亡。女闻之，即痛哭于母家，必欲登卢之堂。父母不能禁，比至，为之殓，因从夫死所自缢。时卢居武昌，街邻及绅士固请题达，奉旨建坊旌表。

贞女

国朝

黄贞女，庠生士宠女。许字举人李士藩之子端，未嫁而端歿。女年十九，闻讣哀恸。请于母，匍匐谒夫灵，抚棺长号，誓执夫丧终舅姑养，遂立夫弟金台之子莲为嗣。莲三岁痘殇，女哭泣丧明。一日告姑曰：“莲死，望已绝。儿将从泉下人逝矣。”自此绝粒而歿。时舅谒选都门，母党舁其棺归葬。舅归，吊其墓，墓忽裂，众皆异之，金谓同穴乃女志也。遂迁与端合葬。雍正十年旌。

江贞女，幼许聘沈炬。炬故，女年二十一。闻讣，衰经往奠。守贞不字，留侍翁姑，竭尽孝养，历久如一日。乾隆五年旌。



《汉阳府志》卷之四十六下 人物〔十四〕

〔列女志〕·孝感县

节妇

明

杨氏，陈正三妻。年二十七，夫亡，矢志抚孤。岁余，舅姑相继而逝，杨竭力营葬。家甚贫，教诸子皆成立。正统五年旌。

黎氏，监生张瑀妻。生子文迪，二岁而瑀卒。母欲夺其志，不可。以女红自给，教文迪登贤书。正德十三年旌。

王氏，张楚英妻。夫亡，抚子霍。绩纺自给，足不出闺阁，数十年如一日。诏旌之。

刘氏，谢铭妻。适铭四年，铭卒，子惠仅八月。父兄欲夺其志，刘誓死不回。嘉靖十年，有司以舆论请旌。

舒氏，举人汤星继妻。年二十六，星卒，无子。舒抚尸一恸呕血数升，欲引决不得，立星兄子民惇为后。每宵旦蔬水必荐，荐必哭，里人哀之。

李氏，监生程稽妾。生子学思二岁而稽卒，李年二十四。嫡唐氏欲嫁之，不可，事唐尤谨。嘉靖中旌。

方氏，刘廷相妻。年二十四，守节。事舅姑克孝，抚二子伯生、伯燮皆成进士。隆庆二年旌。

曹氏，生员丘山妾。年二十五，子余庆二岁，山病革，命嫁曹。曹泣曰：“君谓妾不能从死耶？”誓死不嫁。山卒，即毁容操作，奉舅姑、抚孤子，孝慈兼至。知县刘昆为之传。

萧氏，生员邓文焕继妻。年十九，守节。家甚贫，事舅姑，抚前妻子如己出，教之有成。知县刘昆表其闾。

戴氏，李含芳妻。守节艰苦，事公姑至孝。姑卒时年九十矣，戴亦年七十，哀毁成礼。知县余桂萼旌其门。

周氏，生员严谊妻。年二十四而谊卒，时子惟殷甫三岁，惟勤甫岁余。周





哀恸几绝，日夕抱两孤哭柩前。拮据丧葬，家道益落，艰苦备尝，五十载如一日，卒年七十有四。

鲁氏，生员高擢妻。夫死，鲁年方二十一。哭踊不肯独生，以家人左右之，得不死。封面散发，数十年如一日。万历年间旌。

夏侯氏，夏彝妻。彝早卒，夏侯欲殉，念姑老，下有两孤，乃强起持门户。事姑孝，抚二子俱成立。次子应书夭亡，其继妇王氏割发投缳，夏侯泣劝乃止。家奇贫，王日鬻织以奉姑，且为姑教养，自食糠粃，至日不再举火。母欲夺其志，遂终身不还母家。抚孤侍姑，倍尝荼苦。夏侯年七十五卒，王一恸几绝。自是身首麻縗，日夜号泣，寻卒，年四十有二。万历丁巳，直指闻于朝，诏表其闾曰“一门双节”。孙时亨，进士，官参政。

梅氏，生员杨洪楫妻。生子同善甫七岁，夫亡。梅竭力抚孤，事姑以孝闻。当事旌之。

祝氏，程怡妻。年十八适怡，二十五怡卒。事孀姑以孝闻。苦节四十九年。崇祯七年旌。

乐氏，沈自充妻。年十九，自充卒，遗孤性甫一岁。力织课耕，奉舅姑尽欢，教性成立。守节四十八年卒。

张氏，生员辛鼎妻。年二十八，鼎卒，无嗣。与姑相依为命，勤纺织，菽水奉姑。姑亡，张哭泣丧明。又八年乃卒。

沈氏，生员刘提妻。年十六适提，逾年提卒，遗命立兄子兴义为后。沈抚育教诲，以致有成。后兴义补邑诸生，性尤孝，母死，哀毁骨立，里人称贞妇孝子，无异词云。

黄氏，明末寇至，夫张挺然从贼。黄泣止之不听，贼疑挺然，令取妇为质。黄携十岁儿匿青山寨，挺然诱以富贵，不去。劫以兵，终不去。挺然怒，破寨焚故居以窘黄。黄逃匿愈深，竟不可得。挺然寄儿金簪，儿以绾发，黄曰“贼物也”，拔弃之。后挺然不知死所，黄抚子成立。邑令张擢士表其门。

李氏，谈微言妻。年二十七，微言卒，遗孤继周五岁，继程二岁。家徒壁立，纺绩课子二十余载。继周登贤书，选郧西广文之任，卒于途。妻邓氏年二十九，闻讣痛绝，欲从死。李哭曰：“尔殉夫死，得矣，复以藐孤累老寡妇耶？”邓乃从命，抚子成立。姑妇皆苦节终身。

彭氏，武立名妻。年十八适立名，生子惟勋二岁，次惟熊甫七月，立名歿。氏年二十三，勺浆不入口，触棺绝而复苏者数四。戚党泣涕，解说至再，强起



持门户，教子以义方。长子既娶，复早世。次子相倚为命。茹蘖饮冰，苦节四十余年，年六十三卒。

萧氏，廪生游曰吉继室。年十四适吉，未八年而吉死，有子二。氏抚棺哭曰：“吾非不能死，其如二子何？”家贫，键户纺绩，以鞠二子。抚前子天朝以读书，教己子天衢以躬耕，尤人所难。

詹氏，明生员严正色妻。正色死于贼，氏年二十四，孤儿任方三岁。值兵火凶荒，万死千生，教子成立。及任补诸生，携儿洒洒哭于墓前曰：“前之不死，为此子也。今可相从地下矣。”以头触坟几死。任扶归，少苏，未几卒。

戴氏，夏焯侧室。年十五归焯，生子熙臣甫九岁，焯卒。氏年二十六，触棺号泣，誓以身殉。宗党百计劝解，不听。继姑李日夕抱其子以啼于前曰：“而夫死，余此一线。尔若死，谁为恤此子者。吾老矣，将以累白发耶？”氏乃强起理家政，备尝荼苦，蔬食终身。卒年六十八。子熙臣，明经，授博学，诗文擅长。

饶氏，庠生高驾妻。年十八适驾，驾卒，氏年二十九，欲以身殉。母聂氏苦劝之曰：“尔死，孤亦死。高氏之鬼馁矣。”氏亦恸藐孤无托，因忍死，艰苦备尝。子卿云，年二十补弟子员，食饩。苦节三十余年卒。

聂氏，庠生饶始亨妻。年二十七，始亨卒，止遗一女。家产尽付伯氏，矢志靡他。女长，适诸生高驾遂依之。驾早世，未几女又歿。衰老无归，茹苦于高氏外孙家，年八十三卒。

汤氏，年二十适傅于宣，九年，于宣死于贼，室庐俱烬，汤先期奉姑避于山得免。止生二女，无子，乃立侄世达以嗣夫，而迎其聘媳归，与两女偕侍孀姑，躬勤纺绩，以佐甘旨。岁侵，则自食秕稗，不令姑知。姑年八十二卒，子媳又先汤歿，抚其孙奇，教以有成，登贤书。年七十余卒。

程氏，诸生胡骏妻。明末，骏抗贼死。程闻难，号泣捐生，所亲百方开譬曰：“烝尝无主，非孝也。”乃稍自抑哀，每上食灵前，辄蹀躞以为常。子景锡有成。卒年九十。

吴氏，晏仲义妻。义早逝，吴年二十五，子养晦在襁褓，矢志柏舟。课孤严，无姑息容，后得补弟子员。年六十卒。

唐氏，年十六适诸生夏崇鼎。值贼乱，崇鼎鸣众倡义拒敌死。子廷仕未离襁褓，唐矢志抚孤，历五十年如一日，训课廷仕成名诸生。寿八十终。

周氏，卢立言妻。年十五适立言，二十七，立言歿。周以首触樯晕绝，家人泣劝弗苏，乃挽遗孤投诸怀曰：“而夫所恃以瞑者，此二孤耳，殉以身，孰若





慰以志。”周始长号入闾，闭户终丧，坚贞自矢，越四十年卒。

郑氏，诸生汪焕妻。甫笄归焕，年二十八，焕卒。遗子映声，四岁而瞽。郑哀痛不欲生，父母姑妯群泣而解之，谓“汪氏一线之系，悬于瞽子，若朝而殉，子必夕亡”。郑乃强起，毁容茹素，服缞终身。与瞽子形影相吊，艰辛万状。年九十三，无疾而卒。

凌氏，诸生胡尔明妻。年十八归尔明，阅三载，尔明歿，生子效愉，尚在襁褓。凌氏矢冰茹蘖，鞠育教迪有成，食飨庠序。效愉又蚤世，凌氏抚其孙，苦节五十年。

张氏，陈琐妻。年二十适琐，越七年琐歿，遗孤甫周。家奇贫，纺绩度日，誓死抚孤，年七十卒。

黄氏，诸生丁其喆妻。年十八归其喆，辛勤攻苦，躬织纴、斥簪珥，以相其夫。其喆病歿，括发毁容，躬执井臼，以事舅姑。遗孤世仪稍长，于纺绩间勤督诵读，不使有暇，人称贤母。

万氏，诸生鲁楷妻。蚤适楷，楷死，励志靡他，刺目示贞。三月遗孤，相依为命，服缞茹荼，垂五十年。

张氏，黄勉妻。少适黄，拮据营家。年逾二十九，勉亡。张(舍)[含]辛茹荼^①，抚孤四十年，以完节终。

程氏，杨甲妻。年十六适甲。明季贼乱，甲与程奉母走，冲锋散失。程独掖其姑，仓皇避农家箬篷中以免。岁壬辰大歉，程出粟济乡人，全活甚众。甲卒，程年二十八，遗孤长三岁、次一岁。姑逾七旬，孝养葬送备至。课子宗衡成名，孙祈文亦游泮。苦节四十九载，卒年七十有七。

沈氏，庠生聂公甫继室。原配张氏生子尔楨，沈抚育若己出。七载，公甫歿，越四月生子斌元。茹蘖饮冰，从十指中供饘粥，课两子有成，得列胶庠。沈年七十有六，以完节终。

汤氏，庠生聂斌元妻。年二十四，斌元客死闽南。柩至，遽引刀自裁，姑妯苦劝，乃强起而哭泣失明。教子光先游泮。闺门清肃，事孀姑以孝闻。年五十二卒。

易氏，廩生程澹妻。赋性淑顺，年十五适程。夫以病亡，氏年二十七，抚遗孤良喜成立，为名诸生。率媳纺织，治家严肃。遇族戚贫乏者，罔不周恤。守节六十一年卒。

罗氏，余以芳妻。年十九适余，九年，夫病，药饵无资，氏晨昏请祷，愿以身代。

^①“舍”，当为“含”之误。



夫歿，哀痛几不欲生。母家欲夺其志，氏引刀文面，矢死不从，见者骇然。事翁姑生养死葬，竭力尽礼。守节四十五年卒。

朱氏，邑民刘某之妻。许字未嫁，夫病垂危。氏奉舅姑命过刘门侍夫汤药，仅八日，夫亡。父母怜其少，欲改许，氏矢志不从。事翁姑晨昏定省，得其欢心。翁姑歿，尽哀尽礼。年三十岁，始立嗣子发昌，督课成立。守节三十五年卒。

张氏，庠生黎文训妻。年十九适文训，三十岁，夫以病歿，遗孤洪德甫三岁。家贫甚，氏矢志苦节，纺绩课子成立，生孙士俊、士传、士杰、士灿，俱列胶庠。守节七十一年，年一百一岁终。学宪王表其闾曰“节寿双高”，入节孝祠崇祀。

陈氏，庠生王大绩妻。绩早卒，氏柏舟矢志，纺绩轧轧不辍手。年六十余，坚节如一日。子廷灏，国学生。

杨氏，杨逢妻。年二十七，夫亡。岁荒家匮，伯舅逼更嫁，以死辞。自食糠粃，而饭舅姑。教遗孤庆乔成立。年六十，以苦节老。

华氏，徐秉衡妻。年二十七，夫卒，矢不再适。率两女织纺自给，苦节艰贞，终身无笑容。

晏氏，程文明妻。年二十五，文明卒。冰蘖自矢，抚子启祥成立，为诸生。邑令雍鸣鸾旌其门。

李氏，杨嘉善妻。年十八，夫亡，子兆应甫数月。李因家落，归依父母，朝夕勤女工以育遗孤。父母怜之，为给田宅。以完节终。

宋氏，吴士望妻。年二十四，夫卒。无嗣，抚从子如己出。纺绩自给，奉舅姑极孝，丧葬如礼。

留氏，刘相明妻。夫亡，矢志守节。艰苦操持，抚两孤婚配成立。卒年四十有五。

程氏，举人傅彦钦妻。年二十八，彦钦卒，程泣血丧明。事孀姑孝，抚二子世淳、世杰补诸生。卒年七十有一。

吉氏、陈氏，生员夏鼎妾。鼎歿时，吉、陈年各二十余。吉生子祚典，甫七月。陈鞠若己子，冰霜共励，抚孤成立，备尝荼苦。邑令王骥旌其闾。

马氏，李养朴妻。年二十七，夫亡，遗孤甫岁余。家贫，或劝再适，因割发封面，誓死以守。明末，岁荒备极，僞〔离〕^①，事继姑涂氏尤谨，私食榆叶，竭力奉姑。姑歿，躬自捧土成坟。各宪旌之。

傅氏，程大年妻。

^①“僞”，宜作“离”。





程氏，傅邦霖妻。俱守终旌表。

国朝

李氏，熊祚延妻。性贞静，通《孝经》。笄归祚延，尽妇道，生二子赐履、赐瓚。甫成童，流寇大起，祚延死于难。李得凶问，恸绝不欲生，强起抚孤，冰霜备历。每夜篝灯督课，凜若严师。顺治戊戌，赐履成进士，历官大学士。康熙丙辰，赐瓚魁南宫，授庶常。兄弟相继登科第，家门鼎盛，皆母教有以成之也。卒年七十四。谕祭一坛，累赠太夫人。康熙二十三年旌。

萧氏，夏光湘妻。湘有俊才，年二十五卒，遗孤襁褓。氏哀痛求死，不获。家贫，勤织纴以奉舅姑，教子策谦克成，于康熙己卯中乡试。孙力中、力恕辛丑成进士，同入翰林。卒年八十八。康熙四十一年旌。

向氏，陈叔理妻。年十九，夫亡，长子允寿在抱，次子允谦遗腹。家贫，勤织纺奉姑。姑患痢，以舌吮而愈。姑年八十二卒，祭葬皆如礼。允寿复早逝，孙廷玺尚幼，氏与媳相依苦守。康熙四十二年题旌。

鲁氏，生员熊祚荫妻。年十八归熊，生子方三岁，夫亡。氏年二十七，毁容断指抚孤。未几寇乱，舅姑叔季相继而歿，衣冠安厝，皆氏力办。乱后家益贫，忧患伤心，两目俱盲。子赐烈日夜泣祷，遇异人以针拨之复明，人以为苦节之报。年六十七，卒。康熙四十三年旌。

蒋氏，周明宇妻。年二十三，夫死，守节抚孤。孤复夭，又抚五岁孙士奇成立。孀居六十五年，卒。康熙四十四年旌。

徐氏，赵辉廷妻。年二十七丧夫，家贫，勤女红以奉孀姑。或讽其再嫁，氏破面剪发，示无二心。年七十三卒。康熙四十四年旌。

刘氏，杨泉宗妻。年二十九，夫亡，三孤俱幼。氏奉姑抚子，戢守五十四载。次子夭，妇某氏励节相依。康熙四十四年旌。

陈氏，杨庆铨妻。年二十四，夫婴疾久卧床第，氏调侍无倦。一日，夫探其意曰：“尔少子幼，我不起，尔父必夺尔志，如吾亲何？”氏泣下，不能言，截发以誓。及夫卒，养葬舅姑，抚子成立。康熙四十四年旌。

宋氏，生员叶菁妻。年二十四，夫卒，事姑至孝。姑病，截发易药不效，割股以进，姑得痊。抚二子锦、钰有成。艰苦数十年不渝。康熙四十四年旌。

胡氏，举人刘禧妻。年二十，夫歿，哀毁几绝。事继姑沈生养死葬，如礼尽哀。母手足痿痺，迎养于家。抚庶子兴宗若己出，督课得补诸生。苦节三十六载。



康熙四十六年旌。

郝氏，生员刘兴宗继妻。年二十八，夫亡，奉待两姑晨昏不倦。夫前妻沈子三、氏子二，教养倍至，两人胶庠，人以为节孝之报。康熙四十六年旌。

汪氏，生员姚运昌妻。运昌早丧，遗子希仁尚在襁褓。氏教子义方，得列黉宫。未几子又夭，遗孙际泰。氏志愈坚，教孙成立，入县庠。康熙己丑，氏年八十，孙特建延寿亭以表母节。凡苦节四十余载。

涂氏，刘天佑妻。夫亡，氏年二十七，破面毁容，矢志贞坚。家极贫，朝夕绩纴以供老姑、抚弱子。康熙五十六年旌。

彭氏、段氏，严敞妻、妾也。彭年十八归严，五载无出，为纳段。甫一月，夫亡，一投缳，一绝粒。孀姑泣劝，乃止。越五月，仲姒举子，二氏育之，恩勤无异己出。妻妾相依，数十年无间言。康熙五十六年旌。

闵氏，程光灿妻。夫亡，氏年仅十九，遗孤旋夭，乃立嗣明润主夫祀。事孀姑，先意承志。姑病，躬亲汤药，朝夕不懈，人称“节孝两全”云。康熙五十九年旌。

钟氏，徐日迪妻。年二十四，夫亡，遗孤“环方半岁”。会大饥，数日不举火。或劝其改志，氏曰：“饿死事小，失节事大。宁死作徐氏馁鬼也。”其弟赙给之，赖以全活。后携子鬻饼□度日。雍正元年旌。

杨氏，戴梦妻。年二十三，夫亡，遗孤俱幼。翁姑早丧，祖姑衰病待养。氏忍死，勤操作，以供甘旨。苦节数十年。雍正元年旌。

罗氏，生员郭如玫妻。夫死，年二十七，割发投棺，以代身殉。舅姑见氏子女俱殇，讽其改适。氏遂毁面断指，泣血以辞之。纺绩供甘旨不缺。翁姑相继卒，丧葬尽礼。雍正元年旌。

吴氏，贡生熊志洛妻，故大学士吴正治女。洛有俊才，伯父相国赐履深器之。氏年十九于归，甫三岁，夫亡无子，事姑夏宜人如母。姑患乳痛，医谓需人以酒吮其毒，氏即自吮。及姑歿，哀毁骨立，以十指经营奉祭祀。相国赐履卒，家侨金陵，氏亲往择立，初未允，哭于熊氏之庙，三日不食，乃许之。立嗣子绍祖，教之成立，乙卯举于乡。一女，适翰林夏力恕。雍正元年旌。

张氏，生员熊蠹妻。年二十二，夫亡。事两世姑尽孝。抚孤念祖为名诸生，每训之曰：“我所以不忍死者，病两姑缺养，又恐汝之不克承父志也。”雍正元年旌。

罗氏，生员胡世瑛妻。夫亡，年二十七。无子，立从子承祀。奉孀姑孝谨。姑卒，拊棺一恸几绝，祭葬皆如礼。雍正元年旌。

刘氏，生员喻世显妻。年二十七，夫亡。哀毁骨立，抚遗孤铭为名诸生。





娶妇生孙，铭复夭。氏复抚孙。两世劬劳苦节，凡五十四年。雍正四年旌。

傅氏，张敬伦妻。年二十六，夫亡。无子，立侄光原为嗣，教以力学有成。姑多疾，亲奉汤药，经年不懈。姑卒，哀礼兼至。苦节二十五年。雍正十一年旌。

鲁氏，生员李泰生妻。年二十，夫亡。氏欲以身殉，遗孤甫弥月，乃强起。未久而殇，矢志艰贞。饘飧取给于十指，奉翁姑得其欢心。苦节四十七年。雍正十一年旌。

陈氏，黄正彝妻。年二十三，夫亡。散发毁容，誓以死守。抚遗孤应麟成立。苦节五十年。雍正十一年旌。

夏氏，黄正诏妻。年十八适黄，甫两月，夫故。氏以首触棺，流血几死，复苏。遂髡发闭户，虽子侄不得常见。立夫兄子为后，茹苦五十年。雍正十一年旌。

闵氏，黄正爵妻。年二十五，夫亡。长子承先出继，次子随夭，零丁孤苦，与娣姒夏共抚一孤，艰苦备尝。一门双节，闾里称之。雍正十一年旌。

夏氏，生员吴敦素妻。年二十三，夫故。遗孤随夭，抚嗣子成立。奉翁姑至孝，人无间言。雍正十一年旌。

黄氏，鲁演周妻。年十九适鲁，甫数日，夫歿，氏悲恸不欲生。母力劝，始进饘粥，足迹不出闺闼。事孀姑至孝，立族侄光节为后，教育有成。雍正十一年旌。

马氏，屠浑妻。年二十八，夫亡，哀毁欲绝。家贫，奉继姑、抚弱子，拮据操持，日用俱从十指办。茹苦四十三年。雍正十一年旌。

夏氏，黄天衢妻。年二十七，夫远馆客死，氏亲往扶柩归葬。艰难辛苦抚遗孤，中道夭折，又抚孙成立。守节四十二年。雍正十一年旌。

李氏，黄廷绶妻。年二十一，夫亡。绝粒七日，誓以身殉。翁姑泣劝，乃起。家贫，亲操井臼，竭力织纴，以供甘旨。翁姑卒，丧葬尽礼，人称孝妇。雍正十一年旌。

夏氏，李兰妻。夫亡，年二十九岁。家无余赀，奉姑教子，惟以女红自给。后子妇死，又抚孤孙。孙妇死，又抚其曾孙。三世零丁，影形相吊，茹苦四十五年。雍正十一年旌。

程氏，沈必第妻。年二十七，夫病，祷天刲股以救。夫卒，欲殉，强起，抚孤成立。雍正十一年旌。

胡氏，贡士程大何妻。年二十八，夫卒，氏哀恸欲绝。祖姑泣劝曰：“汝夫虽没，尚有孤儿，且诸舅在殡，奈何以一死塞责？”氏乃勉从持操家政，课子光



朝有成。雍正十二年旌。

刘氏，熊存恪妻。夫亡，年二十九。奉翁姑孝养备至，教子成立。守节三十五年。雍正十二年旌。

乾氏，生员张磊妻。夫病，吁天祈代。卒后，痛不欲生，以姑持之，不死。朝夕奉姑，竭尽孝养，抚三孤俱克有成。雍正十二年旌。

胡氏，鲁演济妻。夫死，足不逾闺阁。奉舅姑敬养兼至，茹荼食蘖，甘节如饴。雍正十二年旌。

张氏，生员熊存烜妻。年二十五，夫亡。教遗孤力学有成，事舅姑至孝，殁后丧葬尽礼。雍正十二年旌。

徐氏，生员游嗣儒妻。夫亡，破面哀毁，勉强支撑，家政井井。奉姑竭尽孝养，抚两孤咸列庠序有声。雍正十二年旌。

李氏，王道远妻。夫亡，年二十四。闭帷菫守，绩纺自给。抚嗣子如己出，婚娶皆取足于十指，苦节三十七年。雍正十二年旌。

王氏，管大可妻。夫以授经客死，氏闻哀恸欲绝。抚遗中道夭折，偕孀媳幼孙相依为命，艰苦备历，数十年不渝。雍正十二年旌。

管氏，生员唐维凝妻。性聪慧，人称女博士。年二十九，夫亡。事姑孝谨。遗孤二相继卒，抚育诸孙，教之成立，正邦中雍正丙午乡试。雍正十二年旌。

管氏，王尚道妻。夫亡，哀毁泣血，三年如一日。姑病，割股和羹以进，姑得痊。抚孤晃成立，有文名。雍正十二年旌。

唐氏，生员鲁演升妻。年二十一，夫亡。守节五十年。雍正十二年旌。

聂氏，李仪若妻。夫亡，年二十九。奉姑训子，茹荼集蓼，历四十一年。雍正十二年旌。

刘氏，吴杰士妻。未归时，夫染恶疾，夫家力辞姻事，氏誓死不二，卒归于吴。躬亲扶掖数年，犹然处女。夫亡，痛不欲生，苦节二十五年。雍正十二年旌。

夏氏，生员程大巩妻。夫亡，矢志抚孤成立入泮，不幸早世，与孀媳方氏共抚孤孙。两世冰操，闾党共称之。雍正十二年旌。

任氏，生员汪涣妻。年二十八，夫亡。奉尊章甘旨无缺，抚孤子荼苦备尝。雍正十二年旌。

潘氏，张有常妻。年二十九，夫亡。守节十六年。雍正十二年旌。

刘氏，雷辉公妻。夫歿，事舅姑尽孝，抚遗孤有成。雍正十二年旌。

叶氏，程大忠妻。夫以苦学，遭疾而亡。氏教育孤子，督课如严师，得游庠序。





雍正十二年旌。

夏氏，余则鲁妻。年二十五，夫亡。家故贫，奉舅姑，教遗孤，皆取给于织纴。庭前有孤燕巢梁，春来秋去凡数十年，氏歿，燕撞棺而死，人皆异之。

雍正十三年旌。

张氏，李兴之妻。夫亡，年二十七。嫠居毁面，足不逾闺。抚三孤，后皆成立。守节三十九年。雍正十三年旌。

丘氏，王大绶妻。夫亡，氏年二十五。守节三十八年。乾隆三年旌。

华氏，程良坊妻。夫亡，氏年二十四。守节六十九年。乾隆三年旌。

刘氏，黄宗健妻。夫亡，氏年二十二。守节四十三年。乾隆三年旌。

吴氏，李梦龙妻。夫亡，氏年二十。守节四十三年。乾隆三年旌。

刘氏，万大升妻。夫亡，氏年二十六。守节三十二年。乾隆三年旌。

吴氏，胡康义妻。夫亡，氏年二十五。守节五十四年。乾隆四年旌。

涂氏，张又载妻。夫亡，氏年二十三。守节四十年。乾隆四年旌。

高氏，萧惟丹妻。夫亡，氏年二十七。守节三十一年。乾隆四年旌。

严氏，王之聪妻。夫亡，氏年二十八。守节四十三年。乾隆五年旌。

郭氏，鲁邦谟妻。夫亡，氏年二十一。守节四十五年。乾隆五年旌。

夏氏，程开泰妻。夫亡，氏年二十七。守节三十三年。乾隆五年旌。

李氏，王嘉会妻。夫亡，氏年二十四。守节四十三年。乾隆五年旌。

黄氏，汪博妻。夫亡，氏年二十三。守节三十八年。乾隆五年旌。

姜氏，杜光俊妻。夫亡，氏年二十六。守节三十九年。乾隆五年旌。

何氏，杨士藩妻。夫亡，氏年二十三。守节三十五年。乾隆五年旌。

田氏，鲁良律妻。夫亡，氏年二十八。守节三十四年。乾隆六年旌。

余氏，陈纯仁妻。夫亡，氏年二十四。守节三十一年。乾隆六年旌。

李氏，余铉妻。夫亡，氏年二十二。守节三十一年。乾隆六年旌。

徐氏，胡德麟妻。夫亡，氏年二十八。守节十九年。乾隆六年旌。

米氏，寇秉义妻。夫亡，氏年二十一。守节三十五年。乾隆六年旌。

武氏，胡之栋妻。夫亡，氏年二十三。守节二十九年。乾隆六年旌。

王氏，高世钟妻。夫亡，氏年二十二。守节二十六年。乾隆六年旌。

萧氏，彭商贤妻。夫亡，氏年二十九。守节三十四年。乾隆六年旌。

石氏，余鹤年妻。夫亡，氏年二十五。守节三十七年。乾隆六年旌。

华氏，儒童邓为珠妻。



周氏，儒童李绪九妻。

朱氏，儒童邓耀娄妻。

王氏，儒童舒任彦妻。

廖氏，儒童张天寿妻。

以上俱乾隆十二年旌。

魏氏，王惟定妻。年二十六，夫亡。家贫，孝事翁姑，心力几敝，教遗孤就学有成。

（烈妇 烈女 贞女）

烈妇

明

席氏，武邑典史徐继迁妻。迁卒于边，氏闻信欲死，翁曰：“孤儿无托，旅櫟数千里，谁其尸之？”席强起，及扶柩归家，禫祭一恸而卒。

汤氏，唐在衡妻。年十六归唐，明年夫客死，遗孤三月。鬻产迎夫丧，至则枕棺大痛，呕血自缢，不死，复自刎，深寸许。诸母营救，又不死。乃绝食五日，且死。诸母泣谓曰：“汝死，置孤儿何地？”因取儿投其怀，相向悲号，氏乃强起，厝夫柩斗室，寝食其侧。儿稍长，衣食教读之。及子入庠且举孙，值夫忌日，氏集诸母曰：“孤儿赖父之灵，以有今日，可行吾旧志矣。”乃抚棺哀号。子妇进汤水，不纳，数日死。直指具题旌表。

乾氏，高文焕妻。年十九，夫亡，无子，誓拔刀自裁。母姑救之三日，复苏。自是断荤，日不再食。崇祯癸未，流贼陷德安，从子高骞将扶避山岩。氏曰：“吾老矣，岂复出此门求活耶？行吾夙志可也。”遂投后园池中死。

汪氏，生员邓张妻。年十八，夫卒。晨夕泣血，两目为盲。训子有杞、有梓俱为庠生。及舅姑逝，氏曰：“吾事毕矣。”于腊祭日号哭灵前，数日不食死。

郭氏，陈可化妻。岁祲，可化客外久不归，相传已死。伯叔议许桂姓。氏以死拒之，后七年，诸奸复定计，氏度不免，遂闭户自缢。巡按李贞题旌，治诸奸如律。

汤氏，生员刘应麟妻。年二十四，夫病笃，遗命嗣其犹子科，母老，愿以菽水为托。氏曰：“君有弟在，奚患？”应麟卒，氏衣衰经，哭于祖庙，改科名承，





检笥篋，省生计。给侍婢曰：“吾疲甚，思寝，毋哗也。”诘朝，扉不启，发视之，则自经坐逝矣。事闻旌表。

傅氏，户部主事程良孺妻，新昌令伟女也。事祖姑汤、姑熊以孝著。崇祯甲戌，良孺司凤阳仓。乙亥正月，流贼陷凤阳，良孺率厮役守庾，义不内顾。子正揆破垣匿母于署之左堂茅屋中。贼焚屋搜匿，傅额中刃，复截一指。三日贼去，正揆于灰烬中寻得之，衣肘间犹藏勅印，绝而复苏，出勅印付良孺而卒。事闻旌表。

舒氏，侍郎程正揆妻。随夫之凤阳省亲，城陷，死之。崇祯十五年，与姑傅同旌。

刘氏，程正遇妻。明末流贼至，被获，趣之行，不从。贼曰：“吾将杀尔父母及子。”氏曰：“我自索死，父母奚罪？是呱呱者，我死彼亦死，又奚累也？”俯首授贼曰：“疾杀我。”贼怒，遂遇害。

丘氏，刘应景妻。为流贼所执，累逼不从。贼怒，积油满瓮，将熬之。氏哂曰：“等死耳，火与刃有间乎？官兵旦夕至，若求如我，得乎？”贼大怒，束于木而焚之，骂不绝口。

陈氏，生员唐烈妻。明末从夫避乱山寨，贼突至，夫与子俱奔散。氏独行山间，寨人曰：“非唐氏姬耶？可急入保。”氏泣曰：“我一妇人，失夫与子，诸君虽怜而生我，我何面安兹土乎？”少顷，贼大至，逼之去，不从，骂贼死。

沈氏，范允公妻。明末为乱兵所掠，强犯之，极口骂贼。贼降色诱之，骂益厉，被杀。

姚氏，贡生胡敬妻。崇祯癸未，流寇陷城，氏避乱南湖，独坐小舟泣不已。邻船妇慰之曰：“贼入城，从未杀妇人，何畏也？”氏曰：“我正畏其不杀耳。”明日，闻贼掠舟入湖。氏曰：“贼至必辱。辱而后死，晚矣。”遂携二女投水死。

陈氏，生员张声妻。明末，避贼万金湖，贼至，氏偕同难诸妇赴水。贼呼诸妇曰：“起则生。”氏独不起，贼往援之，骂曰：“死贼，何敢手吾衣。”贼怒击之，氏遂抱其子入深水中死之。

颜氏，生员鲁近逵妻。避乱武昌，崇祯癸未城破，与子之笔妻李氏同被执，俱骂贼死。

宋氏，举人丁之鸿妻。明末避乱湖滨，流贼将至，呼其姒刘与女甥、婢数人刺小艇于水阔处，从容诀曰：“吾等皆妇女，岂可为贼所污。”遂相率投水死。浹旬贼去，家人出尸水中，氏凜然如生，簪履密结，时人异之。

胡氏，贡生彭焱妻，烈妇姚氏女。明季，随夫避乱湖南之黔阳。会王进才作乱，



氏被执，强之渡河，不可，骂贼被磔，身无完肤。子女同死，黔阳人有《烈妇歌》。

黎氏，胡自圣妻。年十五归胡，孝事尊章。阅四载，夫亡，沐浴整衣，即扼吭欲殉。家人严护之，氏给曰：“我急迫，故如此，今当完节老耳。”其防少疏，氏遂扃户自经。事闻旌表。

郭氏，陈于王妻。未及笄归于王，于王蚤卒，郭痛不欲生，家人防之甚密。郭泣告曰：“我从夫，当死；有伯叔奉菽水，当死，何不爱我以德耶？”给言瘵疾不能饮食，绝粒而死。

夏氏，夏廷仕女。年二十二，赘云梦刘以勤于家，奉巾栉，进退以礼。逾年，刘病歿，无子。女括发毁面，绝粒七日，欲引刃自裁，其父母祖姑皆百计阻之。逾百日，以六月十六日给弟妹及家人他往，乘间自缢死。殓三日，面目如生。葬后，暴风拔屋侧古桑，撤所居室。里民惊告邑令，令诘其伪，忽旋风起案前。令乃亲制谀词往唁，旋风双起，导輿直达墓前。节烈所感如此。

烈女

明

万烈女，生员万宏女。许字杨洪柱，闻洪柱卒，给婢子尽去，入父书室，闭户自缢死。事闻，旌表。

易烈女，易体亨女，许聘沈时鳌。鳌死，女整衣入寝，欲自尽者数四，父母持之。明日，女谓父母曰：“儿知误矣，父母在，奚死乎。”是夜为六月二十二日之夕，防稍间，遂自经。争观者如市，酷暑未殓，蚊蝇不敢近。万历中旌。

夏烈女，夏太衡女。崇祯乙亥，贼执女，不从，得间，赴水死。贼义之，葬焉。血喷尺许，浣贼衣，贼终不敢近。

杨烈女，杨鸣桐女。明末为流寇所执，不屈，死于乱刃，骂不绝口。

唐烈女，生员唐鳌女。崇祯癸未，被贼执，掖之上马，不从，仆地。刃胁之，大骂见杀。

国朝

周媀姑，汉阳周□□女。受孝邑沈明照聘，沈以丁艰未娶，服将阕，病故。媀姑欲往吊，母坚阻，遂自经。乾隆六年旌。





贞女

明

姚贞女，生员姚正女。许字郑一德，郑卒，女服毒几死，复苏，遂请于父母归郑。置栅围其阃，非十岁女不许进，日蓬垢号哭。为置嗣子，历二十二年卒。事闻，旌表。

论曰：刘向传《列女》，而名媛闺淑始有闻于时。范氏因之，厥后史臣多纪诸简册。孟、桓、钟、郝，代不乏人矣。

第古者女子居室，保傅有训，女史有箴，而上之人又躬行率化，则其处常著贞静之美，遇变坚冰霜之操，岂非豫教于平日哉！若后世女子，生长闺闼，箴史不闻于耳，懿范未接于目，其教之未尝有素也。乃绳枢瓮牖、工贾市廛之子，往往能以劲节自著，盖其天性然也。至儒者之论，或咎殉夫为毁性，责贞女以失中，其说黠矣。然其足以厉廉耻而振颓风，有关于世道人心不小，又安得概从夫绳墨之见耶？昔欧阳子作《冯道传》，引王凝妻事，盖以愧人臣之事君怀二心者，彼“长乐老”，又乌足置齿颊也。

噫，今古须眉抱惭于巾幗者，比比皆是，今一郡中被旌淑媛，固已卓卓不朽，而潜节幽光，隐而待发者，又何可胜道，而令执笔者肃然起敬已。



《汉阳府志》卷之四十七 艺文

〔艺文〕目录

汉阳县

保伍奏	宋·黄 幹
申筑城略	黄 幹
申两司筑城略	黄 幹
回总帅筑城略	黄 幹
禁约官属违法出界略	黄 幹
马监奏	黄 幹
申省余(粮)〔桩〕积米略 ^①	黄 幹
申京湖置制司办余米略	黄 幹
申置制司乞援鄂州例给米略	黄 幹
提备贼情疏	宋·赵 鼎
勅赐汉阳大别禹庙碑附许公有任跋	元·林 元
府儒学文庙大成乐记	余(闕)〔阙〕 ^②
重修汉阳府学记	明·王 纪
重修汉阳府庙学记	戴 金
汉阳府重修本学门池记	戴 金
重建禹稷行宫碑记	张元芳
楚二社稷臣疏	李若愚
上刘太守议筑千湖泾书万历三十六年	李若愚
重建汉阳县儒学记	李若愚
祷雨文	王叔英
祷晴文	王叔英

①“粮”，当为“桩”之误，详见正文。

②“闕”，当为“阙”之误，详见正文。





王公堤记即今杨柳堤
八蜡庙碑记
建三城楼记
重修汉阳县学记
汉阳县新置学田记
重修汉阳府学记
鼎建汉阳县儒学记
重修汉阳县学记
重修杨柳堤碑记
重修晴川阁记
六先生祠记
重建汉阳府学记
讨猷贼檄
郡伯杨公重建汉阳府治碑记
重修汉阳县学碑记
四官殿碑记
汉口书论一则
裁府议
请改黄陂孝感二县隶汉阳府管辖疏
请修汉阳江岸奏
请添设汉阳营兵弁奏
太乙楼记

汉川县

汉川县儒学记
重建汉川县学记
郭中丞惠政记
迁汉川县学记
和公堤记
刘家隔记

郭正域
吴与言
朱 衣
萧良有
萧良有
李宗鲁
郭维贤
舒体震
丘俊孙
姚弘谟
陈凤梧
李昌祚
国朝·魏晋封
熊伯龙
熊伯龙
熊伯龙
唐裔潢
王世显
迈 柱
德 沛
德 沛
陶士楔

元·黄清老
冀应熊
李维楨

吴 节安城
黎 淳



汉川昌侯去思碑记
汉川县重建万魁台阁记
汉川安侯惠政碑记

尹大本
吴 翻
萧良有

黄陂县

修城原记
兴复带河记
赋役志序
均图米数序乙甲附
原序
赋役序
修建庙学议
改派钱粮议
建立社学议
王庄议
软抬公议
各宪批语
各台飭行软抬宪檄
乡约议
保甲议
乡约保甲合一议
驿役议
为父鸣忠疏
致安南王黎维禧书

王 霁
郑 佶邑人
杨廷蕴邑令
杨廷蕴
杨廷蕴
谭忠义邑人
杨 樑教谕
洪其道邑令
胡仲澜邑令
胡仲澜

杨廷蕴

杨廷蕴
张世祐
杨兆杰邑人

孝感县

言楚事疏
代编饶僻公移
条议罢矿公移
均赋公移

蒋以化
蒋以化
彭同魁
张擢士





筑流不通河碑
方田议
神鼎阁碑记
修董孝子墓碑记
正澨赋颂序
正澨赋录序
创建学宫碑记
清田正赋碑记
新修义仓碑记
西湖书院碑记
新建斗山驿馆碑记
二程祠碑记
新建三军台桥碑记
丰乐院王公新堤碑记
重修汉孝子董公祠碑记
孝感县宋明两朝所得古鼎考
董孝子墓碑

胡在恪江陵
明·胡克敬江陵
王世贞
黄 巩蒲田
熊赐履
李念滋
刘伯燮
武之享邑人
梁凤翔
梁凤翔
张擢士
张擢士
梁凤翔
彭始搏
王 梓
李 湘
王发祥太仓

《艺文志》序

山川清淑之气钟于贤俊，而贤俊清淑之气发为文章，则艺文固天地精英之所聚也。然漱六艺之芳润，渺众虑而为言，著述之家文繁理博，而要以根本经术、通达国体，乃有裨吏治民生之至计也。《书》云：“学于古训乃有获。”是故得失之林、是非之实，开卷了然，皆足以发挥其性情，而增长其才识，岂徒以登高作赋、侈金匱石室之藏已耶？

作《艺文志》。



〔艺文志〕

汉阳县

保伍奏

黄幹

知汉阳黄幹奏言：

国家比年以来，讲求边备，最为详密。然窃以为外侮固所当虑，而内患尤所当忧。今之内患，莫甚于人心涣散而无统。尝观成周比、闾、族、党、州、乡之法，上下相维，脉络相关，提防密而奸宄不生，法制严而驯服有素。夫是以人心有所统摄，而缓急不敢自肆。后世保伍之法，犹有成周之遗意。然州县之间，未尝举行，不过保正掌追胥、户长掌租税而已。以一家而总摄数十里之地，以一身而任数家之责，又每一二年而辄易，此岂足以总摄人心，使之久安而无变哉？

臣尝为临川令，当开禧用兵之后，隅官之法未尽废。其法以五家为一小甲，五小甲为一大甲，四大甲为团长；一里之内，总数团长为一里正；一乡之内，总数里正为一乡官；一县之内，分为四隅，每隅之内，总数乡官为一隅官。以察奸慝、以护乡井，行之三年，人以为便。

今者蒙恩假守汉阳，适值大旱，细民难食，修举荒政，遂推行保伍之法。户籍多寡、蓄积有无，皆可得而周知，然亦但为荒政举耳，不敢大有所更张也。向使熟议而力行之，则维持人心、防闲变故之道，无以易此。况湖右之地，五方杂处之民，土地广袤，奸盗伏藏，往来于境内，啸呼成群，剽劫闾里者，皆此曹也。使保伍之法既明，则人心素有统属，亦何至于肆行而莫之禁耶？故知保伍之法，所以总摄人心、防闲变故，而为缓急之虑也。苟法制素守，人心既孚，因其农隙，教以武事，则伍、两、卒、旅、军、师之制，可以渐复，而战攻守御之习，亦无不精，不惟不使至于为寇，而又足以御寇，亦何惮而不为乎？

臣所陈，果有可采，伏乞行下制置司，详议施行。

申筑城略

黄幹

汉阳为郡，民淳事简，一意抚摩，或可逃责，然既叨专城之任，则当思固





国之谋。访之故老，察之形势，则最关利害而不可不预图者，无城壁之可恃也。

考之图志，汉阳旧有偃月城，今踪迹皆无存者，则昔固尝有城矣。国家讲好息民，边陲宁静，固无他虞。然州郡之有城，犹人家之有墙壁。家无墙壁，虽无盗贼，无以为家，况设险守国，思患预防，当无事之日，不可不为有事之备。

本军地虽近江，旁亦多水，然齐安、江陵皆近江，皆有城，武昌、池阳皆在江南，亦有城，何独汉阳而无城？其旁固多水泽，然冬月水涸，亦不足恃，况其为地，虽非极边，而实则武昌唇齿，吴蜀咽喉，南人得之则恃为捍蔽，孙氏都武昌，使鲁肃守汉阳，是也；北人得之，则武昌不能自立，汉阳守臣李恕屡以舟师败鄂人，是也。

盖大江东下，虽若可恃，然东有阳逻，西有刘公州，最为浅狭，顷刻可渡，乃敌人必窥之地。古之为国，守在四邻，贼入吾腹，则无及矣。故筑汉阳之城，不惟可以守汉阳，而亦所以蔽武昌也。开禧丙寅，虏骑围安陆、破景陵，汉阳之民逃奔江南者大半，武昌之人日夜望汉阳之烽火以为安否，向非汉川之民结集义士，固守南河，与虏血战，则事未可知。使汉阳有城，虎视江渍，孰敢越吾境而为寇耶？

金口之有瓜州，所以通淮浙往来之道。武昌之视汉阳，犹金口之视瓜州也。瓜州有城，则师之出入皆有所恃。武昌之师自汉阳而济者，绝江之后，便无驻足之地，比其反也，前有长江之阻，后有敌人之虑，武昌之师不可久驻江北者，无城故也。使汉阳有城，卒有缓急，移武昌之屯数千人以守之，或出或入，从容整暇，察敌伺便，乘机应变，壮荆襄之声势，为诸郡之应援，计未有急于此者矣。瓜州非郡，尚不可无城，而况汉阳古之沔州冲要之地乎！此则城壁之不可以不筑也。

观其地势，他郡之城壁有难修筑者，有虽修筑而不足为险者，惟汉阳地势，其北依山，其南瞰江，东西有湖，皆自然之天堑，无湖无江之处十之一二耳。向使经理有方，虽郢之石城亦无以加。郡城之南，皆沿江堤岸。每岁修筑，率费二三千缗，而城居之民常凜然有为鱼之患。筑城之后，则每年可免修堤之费，而向忧垫溺者，可以安枕而无虑矣。是又一举而两利也。

又尝令壕寨官计其丈尺工料，则为城不过六七里，为费亦数十万缗。诸郡筑城，例役大军。大军一出，跋涉稍久，不无劳费。汉阳、武昌两郡相望，以武昌所屯之兵，筑汉阳之城，士卒无久出之劳，州郡减增募之费，与筑他郡之城，其难易大不侔矣。



朝廷近年以来留意守御，所守州郡修筑城壁，无非为坚固不可拔之谋。今筑汉阳之城，其关于利害甚切，其为势甚固，其为费甚省，亦何惮而久不为也！幹非敢生事喜功，有所饶覬，特以郡之长官，谓之守土，城壁不筑，则非所以守土，而旷其职矣。

申两司筑城略

黄幹

幹妄以本军筑城事申禀，蒙赐矜念，差壕寨官前来相度，乃与本军所欲修筑规模不同。本军但欲依郡治小山周围筑城保街，壕寨官又尝相度，却欲只筑西北一面及大别山一带，二说不同。

其一曰：大别山俯瞰城中，以高临下，遍受矢石。大别山去城中甚远，本军城之北又自有小山，足为捍蔽，城中人家尽在小山之下，大别之上岂能俯瞰城中？登大别之山，望汉阳之城，相去数百步，岂有矢石可以相及？试以强弩登山而射，果能射及城中，则其说为验，不然，则恐是思之未审。

其二曰：本军仓廩皆在城外，设遇缓急，反资敌寇。本军廩库皆在军衙之侧，自去年来，前任王知军方起一小仓在大别山之侧，举而移之，一反手耳，岂得便以为本军仓廩皆在城外，此亦恐是思之未审。

其三曰：形势褊隘，薪汲不便。军城之中有南湖、有道观湖，南有韩家湖，蓄水甚多，可以供汲。至于取薪，则例是烧荻，不过多积，可以足用。若筑大别，亦是童山，何薪之可采？此恐是思之未审。

其四曰：姚家湖、永济港皆是泥泛，不可筑城；沿堤江水冲激，不可筑城。湖港只是浅小藕池，四五十步之阔耳。目今干旱，土坚如石，何泥泛之可虑？沿江堤岸，因堤为城，去江尚一二丈，何冲激之足忧？苏秀之城皆在水中，不忧泥泛；钱塘之堤，可捍海涛，不忧冲激，此亦恐是思之未审。

又以为本军筑城，比之筑大别之城，又省所费三分之二。今以所开具细算，又只减得一半，即不曾省得三分之二。本军周围筑城，较之筑一面之城，自是多费一倍，但筑周围之城费虽倍，而却为有用；筑一面之城费虽省，而不足为固，况又于钥匙头旋置鹿角，又于沿江旋栽榆柳，旋防奸细，北而依山，既污漫而难守，南而临江，复旷荡而可忧，猥曰费省，不恤害深，此亦恐是思之未审。

至于都统、大尉台判以为新城规模仍受敌于堂隍之间，大别山所筑实拒盗于门墙之外，似此数句，语意峻洁而精到，有非常人所能及。窃以为堂隍周密，





则敌不可窥；门墙罅隙，则盗不可拒，此又不可不思深者也。

以幹愚见，汉阳之城不可不筑，不须彼此迭为异端，先筑内城，以固根本，次包外险，以为捍卫，如此则善之善者也。不筑大别，而专筑内城者，次之。若不筑内城，而徒欲以大别山为固，则缓急不足守，适以误国误民而已。

回总帅筑城略

黄幹

筑城之议，亦是世俗常谈。其所画城壁方向，亦是臆度己见。

今蒙台念，因得闻所未闻，遂帅郡僚陟降观览，形势雄壮，诚如台谕。

嘉定五年间，郡守赵朝奉亦尝借到壕寨李忠显相视计料，只亦欲筑向西一面，接连大别山为固。东南两面，下瞰大江，不筑城壁。其后制置司疏驳三事：其一以为铁监之侧有水坑，难修筑；其二以为大别山阔远，恐难用工；其三以为南面钥匙头之外既有空地，恐不足御敌。赵知军遂不敢复请。今同壕监官相视，前一项铁监之侧即无水坑，但后面两项亦有可疑。

今以鄙见与赵知军所请规模较之。赵知军所请，即今使所示之图也，乃是鄂州大军中元立规模如此。幹所请，只欲依郡治后小山向西筑至朝天门，即自朝天门斜取壕东门，过水军寨，至南纪门，沿堤包筑，后接郡治后山，周回不满七里，则四面皆有城壁。一城之民知有城壁，则人心可安，城之四面皆可相望，厢禁军及吊兵以至义武民兵亦可固守。但以形势论之，则城不若并包大别山之为壮也。然欲筑四面一带接连大别山为固，则形势虽是雄壮，顾其间亦有可疑者。

面西向南钥匙头之外有地数十丈，既无城壁，则敌人必窥，恐难守御。合肥之城可谓雄壮，只有水门可入。贼人攻城，径趋水门。合肥之人危如累卵，其可疑者一也。

自铁监之侧向南至江，并是依山创筑城壁，诚为险要，但去民居遥远，如大别山相去又且高远，缓急之际，欲帅市民以守城，则其声援委不相及，其可疑者二也。

筑城虽以御敌，然两军相向，奸民四起，东南两面既无城壁，奸人窥伺，官难稽考，安知舟中人不为敌国，向日守城几于不免者，无城壁以讥察奸盗耳，其可疑者三也。

四向皆有城壁，人心皆有所恃，则固其室家，不忍迁徙，官司亦可与民守之，效死勿去。东南两面既无城壁，则人心不安，皆相率而渡江矣。虽有大别之山，



将谁与守？其可疑者四也。

大别山一带，其上平阔，其两旁险峻诚为可恃，但其下若不划削，其上若不筑城，则形势凌迟亦可扳援而至，若欲划削，则其山多石，难以施工，若欲筑城，则其山无土，亦难用力，费多漫广，功役难成，其可疑者五也。

如幹之说，方为城郭。如赵知军之说，则特为一关隘耳，非城郭之谓也。然大别天险，委是雄壮，若欲守御，亦不可废。为今之计，莫若两利而俱存之。先如幹之说，筑为周围可恃之城，令其坚固而不可拔，然后于西北隅接连创筑低城以至大别之上。大别之巔，或累石，或用木为栏障，要使内城坚固，而其外恃以之为护卫耳。如合肥之城亦然，使外城可守，则用以却敌，不可守，则退守内城。内城既固，孰敢顿兵其下，久而不去哉！

大抵建功立事，须是思其始而图其终，考其利而究其害，务求其实而不求其名。每观世道日降，人心日薄，士大夫之为国谋者，必不如其家，为民计者，必不如其身，但图一时之名，但思一己之利，异日之可恃与否，皆不论也。

区区之愚，更望台慈聚三司属官而通议之，如或有未当，亦望疏驳行下，往复诘难，务求至当之策，使早有定论。目下计度，便行烧砖买木，成就于岁月之间，不胜吏民之幸。

禁约官属违法出界略

黄幹

“畔官离次”，《夏书》所戒。境外之交，《春秋》讥之。本郡距鄂州虽一苇可航，然系是别郡，自有疆界。守土之臣，自当各守其土。其他官僚不应差出者，虽本界地方，亦不应辄出。可以差出者，亦须有公事、有文移，方许出界。国家成法俱存，官吏所当遵守。今年本军官属动辄往来鄂州，不以为怪，甚至郡守亦或一往。窃详其意，不过欲奔走诸台，以求知己，其次则谒亲旧、事宴游，抑不思事上之礼，止以奉公守职为先，若失职违法，乃监司之所当按治，又何以望其知己？

轻弃职守，违蔑宪典，事体非轻！帖诸厅，今后不许辄违法出界。

马监奏

黄幹

理宗时，守汉阳黄幹奏曰：





国家所用之马，西取于蜀，南取于广，皆在数千里之外。博易之费，道里之费，一马之入，动数百千，其所得甚艰，所费甚巨，一有缓急，无马可用。开禧年间，贼骑压境，旋行收买，驽骀下乘，亦以备数。平居暇日，可不思所以处之乎？

窃见汉阳管内有马监一所，马之自蜀来者，憩息于此，五日而后行，守臣亦预典检之责。臣尝亲至其地，见马监之前有所谓孳生监者，乃鄂州大军昔日所创。方其盛时，马之蕃息，可以足军中之用，今监皆颓败，不复有马矣。汉阳为郡，土壤甚广，风气甚劲，水草甚饶，若委之守臣，使之兴复旧监，以为牧马之地，给降本钱，收买江北所产之马而蕃息之，差拨兵卒，使任牧养之责，数年之间，生息蕃盛，猝有缓急，即可为用，与夫求之于至远之地，买之于仓卒之际，其利害相去远矣。更乞行下总领所同鄂州都统司相度施行。

申省余(粮)[桩]积米略

黄幹

本军前任知军孙承议、王朝奉两任之内，各余下(粮)[桩]积米一万硕，已备申朝省讫。幹自去年十一月交割以后，窃见粒米狼戾，颇亦伤农，而备边急务，以食为重。古人三年必有一年之蓄，九年必有三年之蓄，则守土之官，任任相承，皆当以储蓄为念，遂急(文)[支]拨钱二万五千贯会(同)[子]^②，委本军知录郑从政、司法梅从政、汉阳知县陈儒林多方收余，务要春前收余数足。

照得上项余米，初非自为经画，乃为循袭前两政已成规模，其钱亦非别有措置，乃是冬月郡计稍办，今来所余，通前(正)[政]其计三(为)[万]硕^③，本是州郡合行之事，但恐岁月漫久，贪官污吏妄有移用，欲乞钧慈照孙承议、王朝奉例，札下本军遵守施行。

申京湖置制司办余米略

黄幹

制置使司备(藩)[潘]制属^④，申本军余到修城米两项三千九十余石，令本军于后项所余一千三百九十二石并客米二千六十五石发过鄂州。又以本军已余

①“粮积”，嘉靖《汉阳府志》作“桩积”，是。

②“文”、“同”，嘉靖《汉阳府志》作“支”、“子”，是。

③“正”，嘉靖《汉阳府志》作“政”，是。“为”当作“万”。

④“藩”，嘉靖《汉阳府志》作“潘”，下文亦作“潘”，“潘”是。



米四万石，(合)[今]后尽将客船米发过鄂州中(余)[糴]者^①。

照得本军元申乞修城米，不蒙朝廷施行，已尝申乞住罢。即不曾收余修城米，不知潘制属所申凭何文书？有何仓廩专一收贮修城使用？本军城内外户口不下三千人家，又有船居四百只，每日尽是余食之人，岂有客船到岸？本军收余粮备修城，百姓于何处收余食用？两项客船，本军只是逐日收余，赈(余)[糴]人户^②，即不曾有修城之米，其余并是船户、人户逐日收余食用，目今何缘更有存在。所准发[米]过鄂州指挥^③，委是无米可发。

照得本军于二三月间欲旱之际，尝出郡帑余到米六千石，已而不雨，种不入土，细民嗷嗷，本军又逐急节次收余，得米一万四千石。然所余之米尽是长江上流诸处客米，其余于汉口者无几也。以六千石准备十个月军粮，以一万四千石准备赈(余)[糴]人户^④。本军城下并汉口共三千家，除能自食者约千家，尚有二千余家皆贫乏余食之人。米铺户乘此贵余，日增米价，以困贫民，本军遂将前项收余之米(历给)[给历]与贫乏之家^⑤，使就设厅收余食用。

今且以每家五口约之，家食五升，是二千家每日合食一百硕，本军只得量行赈(余)[糴]^⑥，约度此米只可(余)[糴]至来年二月^⑦，已无以(继)[断]其后^⑧。本军两县乡村共二万户，且以一家五口计之，共十万口。自今并无一粒之米可以准备(余)[糴]济^⑨。数日来，已闻有掘草根而食，挈妻子以博米麦者矣。每一念之，只有对僚属涕泣而已。

朝廷如天、监司如神，列郡小吏哀鸣无地，尚有前政两知军(曰)[申]朝廷[桩]积米二万石^⑩，非本军所敢辄专，正欲申朝廷每发此米以给乡下之细民。便使真得此米，二县二万家亦不过家得一石，其能使之不饿死乎？今欲本军自此不余客米，则是坐视百姓之饿死也。本军官吏军民日夜仰望诸司哀怜小

①“合”、“余”，嘉靖《汉阳府志》作“今”、“糴”，是。

②“余”，嘉靖《汉阳府志》作“糴”，是。

③“发”下，嘉靖《汉阳府志》有“米”字，是。

④“余”，嘉靖《汉阳府志》作“糴”，是。

⑤“历给”，嘉靖《汉阳府志》作“给历”，是。

⑥“余”，嘉靖《汉阳府志》作“糴”，是。

⑦“余”，嘉靖《汉阳府志》作“糴”，是。

⑧“继”，嘉靖《汉阳府志》作“断”，是。

⑨“余”，嘉靖《汉阳府志》作“糴”，是。

⑩“曰”，据嘉靖《汉阳府志》，为“申”之误。又，“积米”上脱“桩”字。





军^①，痛赐赈恤，今乃反欲移本军之粟，而(收)[禁]本军之粟^②，不知置一郡军民于何地？制置大卿威如雷霆，明如蓍龟，不知何人乃敢欺诳如此？加以本军斗大之郡，交割到公使库、军资库钱物共有十万贯，准湖会六万贯，目今米价四贯以上官会可籴一石，则四万石之米何处得钱可以收籴？此理甚明，而可以肆欺制置大卿之前耶？今鄂州人口繁伙，为汉阳三十余倍，便使尽竭汉阳之米，尽饿死汉阳之民，以资鄂州，亦不过得鄂州十日之食。汉阳百姓固饿死，而鄂州之民亦不免饿死矣。

幹愚不肖，奉朝廷之命专守此土，亦止得竭力日夜救此垂死百姓。今以鄂州无米，而必欲困汉阳，则是左臂既病而又欲移之右臂。今有米无米皆不敢辨，虽家置一喙，亦无以自解。欲乞使司就委潘承信，并帖鄂州差官一员前来本军(监)[盘]粮^③，除六千石支军粮，一万四千石赈(籴)[糴]在城百姓^④及朝廷(春)[桩]积(外)[前]政所籴米二万石外^⑤，有一斗一升以上，并请鄂州径自差人搬去支用，本军不惟不敢占吝，亦且不敢请领价钱。又欲后来米船到岸，本军不得收籴，不知两县百姓便得朝廷肯发(春)[桩]积之米^⑥，家得一石，果能救其饿死乎？

自今以后，流离饿莩，非郡守之责而何？幹一介孤寒，违上司之命，固当罢，坐视百姓之饿死，亦当罢，罢等耳，宁为百姓而罢也。幹自知衰老无用，未尝有仕进之念，朝廷拔擢，畀以郡符，于六月间亦尝遣人哀恳朝廷，乞归故里，不蒙俞允。近以兴国赵知军除本路提举，幹与之妻党至亲，亦已陈乞回避，所有札本军所籴之米发过鄂州及不许收籴，乞候幹罢命至，然后施行，庶几使幹不见百姓之饿死，不负朝廷差委牧养小民之责，则幹亦可得老死山林而无恨矣。

申制置司乞援鄂州例给米略

黄幹

幹窃闻之：当天下之大任与立天下之大业者，要当有公平广大之心。今天下之人，其所谓当大任、立大业，以公平广大为心，未有如制置大卿也。幹也

①“军”，嘉靖《汉阳府志》作“郡”。

②“收”，嘉靖《汉阳府志》作“禁”，是。

③“监”，嘉靖《汉阳府志》作“盘”，是。

④“籴”，嘉靖《汉阳府志》作“糴”。

⑤“春积”，嘉靖《汉阳府志》作“桩积”，是。又“外”，作“前”。

⑥“春积”当作“桩积”。



庸谬衰晚之一夫，朝廷过听，畀此专城之寄。

岁适大旱，种不入土，野无青草，湖北一路，未有汉阳之甚者也。复州、德安皆产米之地，鄂州诸邑亦有山源之田，间得半熟。汉阳为郡，皆平原旷野，民无盖藏，一经旱暵，四野如焚，老稚累累，（云）〔去〕死如发^①，稍涉冬寒，枕藉沟壑，诚为可伤也。本军交割铁钱七八万贯，收籴米谷仅可及城之内外千余家耳。四郊之外，实无（方）〔力〕以及之^②，徒有忧叹而已。近闻江东一路请于朝廷，得米三十万石。又有常平米三十万石，又和籴米十万石，朝廷又以三监司各分州俾任赈济之责。独湖北一路荒旱如此，未有监司过而问之者，亦未有捐一粒以救州郡之匮乏者，岂湖北百姓非朝廷之赤子乎？方切惊愕，以为本路无贤监司，则若是也固宜，今皆朝廷遴选以为大贤，则奚为若是？

数日以来，忽有相传以制使司捐米四万石以济鄂州所总之乏，市井乡村饥羸小民，莫不扶杖而起，以为吾亦将有更生之赐也。或者乃曰总领运使皆大官，故制置使司特以济之，汝蕞尔小郡，谁复尔怜哉！是不然。制置大使之发粟为百姓也，岂为总领运使哉！东西两州相望，使东人饱、西人瘠，东人喜、西人愁，岂制置大使之心哉！或曰鄂州地大人伙，故捐粟以赈之，非汉阳比也。鄂州人固众矣，汉阳亦当十分之一。鄂州可给二万，则汉阳亦当给以二千石。制置大使不当赈其大而（贻）〔遗〕其细民也^③。今一路监司既皆不问，而制置大使亦不问，则此郡之生灵枕藉而死，亦命也哉！百姓既不当言，而郡守又不为之言，则是坐视其死也。

夫子常以周而不比为君子，在《易》之《比》，亦以“显比”为吉，“同人于野”为亨，“同人于宗”则吝。制置大使公平广大为心，何爱米二千石而不以慰汉阳百姓之心哉！

提备贼情疏

宋·赵鼎

昨据本路制置使岳飞申请处探报，李成、刘麟会合金寇，有直趋蕲黄渡江之计。臣以本路正当要冲，控扼江湖，实系行省利害。今李成尚留汉上，虽未闻追袭之耗，而经营襄邓，用意不浅。盖轻兵追袭为患速而小，占据上流为患

①“云”，嘉靖《汉阳府志》作“去”，是。

②“方”，嘉靖《汉阳府志》作“力”，是。

③“贻”，嘉靖《汉阳府志》作“遗”，是。





缓而大。上流一失，即自汉阳而下，沿江诸郡皆顺流可至之地，不可一日弛备，非特防秋而已。所有汉阳、沔口系汉江下流，湖北帅司所隶，更望降旨，严切戒约，过为堤防，庶免意外不虞之患。

勅赐汉阳大别山禹庙碑附许公有王跋

元·林元

大德八年冬十有一月，中书省奏湖广行省言，昔禹治水有功，旧立庙于大别江滨，久废，重建，乞赐庙碑以崇明祀。制曰：可。命翰林述其事。

钦惟圣朝混一海宇，天下名山大川，古帝先王有功德于民者，莫不秩祀。稽诸《祭法》，“能御大灾则祀之，能捍大患则祀之。”且载禹能修鲧之功，其治洪水，岂非捍御灾患之大者欤？故舜称之曰：“地平天成，六府三事允治，万世永赖，时乃功。”则庙而祀之宜也。

荆州之域，江、汉为重。汉鄂之山，大别为表。禹乘四载，随山刊木，导水至于大别。西则岷蜀、襄沔之众流聚焉，南则衡湘、洞庭之巨浸汇焉，疏凿排决，亦云劳矣。至于江浒两矶对峙，顺流东注，朝贡舟航，浮于海、入于淮、逾于河，达于帝都，此其故也。

曩岁我世祖皇帝六(飞)[龙]南巡^①，渡江次鄂，驻蹕于黄鹤山。时大别形胜，正当睿览，(当)[尝]问父老曰^②：“山头石矶何名吕公？”对曰：“闻唐时有道人吕姓者吹笛其上。”又问：“唐前何名？”不能对。再三问，有对曰：“闻诸古语云：是‘禹功’字音讹传。”大称圣意，嘉奖久之。盖以拯溺平水之功，默契于拯民水火之心也。

今上皇帝嗣承丕绪，孝思祖武，以鹄山乃黄屋临御之地，诏就压云亭故址创建大元兴寺，阐世尊慈悲之旨，以演世祖慈仁之恩。中书右丞相哈剌哈孙答剌罕时以平章政事开省湖广，承制鼎建，不扰而办。丞相又以鹄山、大别夹江屏蔽，为鄂汉唇齿重势，皆世祖亲见而留念者，汉阳尝拨属江北，奏请仍隶湖广，就大别禹庙旧基经营缔构，以寄禹功之思。今告落成，非常祠所可同语。

钦想先帝神游，风(马)[驾]云车之所至^③，一统阜康，百神受职，诚足以慰在天之灵也。然公朝许树丰碑者，岂徒侈金石之观而已哉！思昔天王使刘

①“飞”，嘉靖《汉阳府志》作“龙”，是。

②“当”，嘉靖《汉阳府志》作“尝”，是。

③“马”，嘉靖《汉阳府志》作“驾”，是。



定公劳赵孟于洛汭，刘子曰：“美哉禹功，明德远矣。微禹，吾其鱼乎。吾与子弁冕端委以治民、临诸侯，禹之力也。”盖亦远续禹功而大庇民乎。今之江、汉，犹河、洛也，岳牧可无纘续之思乎？禹亦有言：“德惟善政，政在养民。水火金木土谷惟修，正德、利用、厚生惟和，九叙惟歌，劝之勿坏^①。”意谓水土既平之后，天下国家之治常修和而勿至于坏，俾政得其叙，德可以歌，而人有劝则善也。尽力千载之上，垂念万世之下，其用心果何如哉。是心也，即世祖燕翼贻谋之心也。于是作迎神颂功降福之章，使典礼者岁时歌而祀之，以扬圣天子之嘉命。

其一曰：新庙翼翼兮，汉水之阳。题榜翬飞兮，昭宣宠光。霓旌来下兮，神明洋洋。玄圭黻冕兮，德冠百王。来世瞻仰兮，何时弭忘。

其二曰：浚川随山兮，大别堂堂。乘载莅止兮，胼胝度荒。拯民昏垫兮，功参彼苍。皇武六龙兮，江汉是航。念此疏凿兮，心包混茫。不有清问兮，禹功曷彰。民而思禹兮，其思世皇。

其三曰：天下统一兮，今归圣皇。九州耕桑兮，暨于荆扬。禹贡穰穰兮，悉登职方。山川神气兮，若时雨暘。万世永赖兮，斯言允臧。崇德报功兮，纪于太常。筮豆荐嘉兮，歌此乐章。神之格思兮，降福无疆。

禹功在天地，亘万世不坏，大别表表，有庙立焉。大德间，平章答刺罕重修，请碑于朝，词臣有文，而其碑未立。至顺癸酉，知府梁彦义等得其文，民间始买石以刻，属臣有壬书。

臣有壬顿首伏读，获覩始末，书不敢辞，而但未悉其未立之故。彦义等访之耆旧，莫得其说，索之掌故，岁久无征。且禹功童稚所知，祠宇既设，碑特一簣。况奏请出中书，而文实奉诏笔也，因循乃尔，废格孰甚焉。岂庙之修皆答刺罕，既入朝，继者不遑，以至于是耶？是亦有司之过也。大德八年距今三十年，凡历几政，无一人及之者。彦义等乃能举于已坠，知为政已。抑庙与碑于禹何有，而我国家拳拳于是者，所以思禹功在养民之意深矣。於戏！列圣功德纘服有加焉。臣有壬既书之，且记其概，庶继者知承流之重，而一事之成，不易若是，则凡可以举于未坠者，可不勉乎？

是岁九月，臣有壬顿首谨书。

^①“九叙惟歌，劝之勿坏”，《尚书·大禹谟》作“九叙惟歌，……劝之以九歌，俾勿坏。”





府儒学文庙大成乐记

元·余阙

礼乐出于天而备于人。卑高以陈者，礼也；絪縕而化者，乐也。故礼者，天地之大节；乐者，天地之大和。其体极乎天、蟠乎地，其用行乎阴阳而通乎鬼神。夫人者，天地、阴阳、鬼神之会；而礼乐者，观会通以行其道者也。其君臣、上下、宾主之有其方，升降揖让、缀兆清浊之有其度，礼以著节，乐以为和，节以别同，和以合异，是皆天之所畀，而非人之所为也。

然道心，天命也；欲心，人生也。欲炽而无以治之，则心〔牾〕〔梏〕亡矣^①。礼乐者，先王用之以迪民心^②，而定天命者也。是故朝觐、会同，礼乐以接；郊庙、享祀，礼乐以成；军旅、宾客，礼乐以治。用之于天而天神格，用之于人而人鬼享，用之于民而民事治，故习俗美而侵侮荡淫之心无自而生，天下之大政，岂有出于此者哉！

洪荒之道藐矣，尧舜以还，历夏、商、周，礼乐之用始备，而天下称为极治。成、康之后，寝以就弛，至春秋而坏乱极矣。汉之时，礼虽略具于经，而散亡者亦已甚，乐之道荡然，雅、颂所存，特其文而已矣。是故其礼失者其俗污，其乐滥者其教衰，天下之治，所以不及于三代者，礼乐不足之故也。

皇元之兴，诸事未遑，即定著孔子庙祀之礼，既又〔合〕〔令〕天下庙祀用大成乐^③。令虽著，而吏亦鲜能应诏制，春秋奠荐，以鼓吹行事。夫礼乐者，先王以之习民，使饱闻而〔沃〕〔饴〕见之^④，然后人人深而成功大。

孔子庙者，卿大夫属民敷教之地，而民幸有礼可以略见先王之道，而乐又不备，由吏之为政不知本末先后也〔如此〕^⑤。汉阳府孔子庙〔祀〕旧亦循用俗乐^⑥，河东谭君知府事，乃率其同官，相与出俸金作雅乐器，教授余时献以其事来请，宰臣是之，为遗一封传作之平江。数月而乐至，琴、瑟、笛、埙、篪各二，特钟、特磬、祝敔、鞀鼓各一，箫八，编钟、磬各十六，择诸生肄习之。

八月丁丑，有事于学宫，人声在上，乐奏在下，翕如纯如，疾徐以度。礼仪既举，

①“牾”，为“梏”之误。

②“先王用之”，嘉靖《汉阳府志》作“先王用心”。

③“合”，嘉靖《汉阳府志》作“令”，是。

④“沃”，嘉靖《汉阳府志》作“饴”，是。

⑤“先后也”下，嘉靖《汉阳府志》有“如此”二字。

⑥“庙”下，嘉靖《汉阳府志》有“祀”字。



观者或作而叹曰：礼乐之用大哉！若夫子监于四代，乐取《韶（武）〔舞〕》^①，其治所先，在放郑声，钦若彝教，以迪民性。夫礼乐之存，有如飨羊荐于明灵，永永是享。〔于〕是州之士^②，相与乐谭君之政，而喜民复见先王之乐也，咸愿刻石（祠）〔树〕之庙廷^③，余为之书，而使归刻焉。

重修汉阳府学记

明·王（纪）〔纯〕

弘治壬子冬，（纪）〔纯〕拜湖南提学之命。明年春，始莅任。

是夏巡汉阳，循故事，谒先圣庙。谛视庙庑、堂斋、号饌诸屋，日就圯坏，规模且狭隘，非所以妥神灵、育人才地也，议欲重修。署学士训导曾谦、牛祯等且请于钦差巡抚湖广等处、兼理军务、都察院右副都御史洪洞韩公文，暨巡按湖广、监察御史洛川田君大渊。二君子惓惓以作兴学校为心，宪长莆田林君俊又从而赞之，皆允其请，发公帑白金若干，为木植、灰石、砖瓦、工匠之费^⑤。知府秦阳张锐欣然从事。未几，锐官满去，命安陆州学正林岱董其役。

又明年甲寅，扶风张文质来视府篆，为之益力，委训导李洪、诸生赵亢、柳中伦、陈珏、彭楚豪，耆民任政、舒凤分理其事，而稽其成，集材鸠工，先圣庙，次明伦堂，次两庑斋，又其次号饌、庖溷及诸廨宇。腐者易之，脱者整之，狭隘者拓之，规制焕然，过旧观远甚。郡之旄倪聿观厥成，皆啧啧叹曰：“百年之废，一朝而复。上之人所以化柔吾人者，德何厚也。”曾谦具巵末，偕教授聂球等请记。按《汉阳志》，儒学在郡城凤栖山之阳，创自宋庆历中。我朝洪武初鼎建焉。正统癸亥，革汉阳县学并入之。成化戊戌，知府何淡修葺之，始备师生之数。视各郡，其间废而修者屡矣。虽莫之悉，大抵皆不能及今日也。

呜呼，圣贤道在万世，固不系于学之修与否，然百工居肆以成其事，士子非学，

①“武”，嘉靖《汉阳府志》作“舞”，是。

②“是”上，嘉靖《汉阳府志》有“于”字。

③“祠”，嘉靖《汉阳府志》作“树”，是。

④“王纪”，嘉靖《汉阳府志》作“王纯”，万历《汉阳府志》作“王纪”。据《明史·汪奎列传附卢瑀列传》载“工部主事王纯……仙居人。成化十七年进士，贬思南推官。弘治中，屡迁湖广提学金事。”此记云“弘治壬子冬，纪拜湖南提学之命”，第二年夏始巡汉阳。“弘治壬子”略当“弘治中”，故当以“王纯”为是。

⑤“帑白金”下，嘉靖《汉阳府志》作“为木土灰瓦工匠志费。”





何以精其业哉。(纪)[纯](剪)[翦]薄被命^①，恒惧弗称，寝食靡宁，语寮案曰：“环视吾之中，无可足以称学政、陶范俊髦者，况湖南隶地甚广，学校甚多，惟勤以补拙。”乃冲暑毒、冒风雪，昼夜兼程，期月余，荒州僻邑，巡历粗遍。凡学校倾坏，辄命有司修之。韩公察其无他，请辄报许。兹学已告成，而桂阳、彝陵等州，蕲水、武昌、大冶、黄冈、蒲圻、平江、郧西等县学，或迁、或拓、或修，皆渐就绪。士习虽未丕变，假以二三年，一再巡历而督责之，或庶几矣。第衰病迫人，归志已决，固因请记，书于贞石，以俟后之君子共成之。如曰“我躬不阅，遑恤我后”，则吾岂敢。

谨记。

重修汉阳府庙学记

戴金

嘉靖十二祀，岁在癸巳之暮，予东观于吴省，宅龙霓，(竭)[谒]于学宫^②，谛瞻庙庑，修饰整然，次及号舍，地若改辟，私窃叹曰：“良有司之克政若是也。”濒行，学之长贰董君威、方君田(君)、李君孟盈偕庠生田万钟辈请记于予^③。予辞以荒陋者再，董君辈曰：“载事以言，纪事以实，风传者漫，经视者审。兹郡长宋侯作事兴学，必欲记言于耳目之及者，欲录其实而信其传也，宜勿多逊。”弗已，勉为之记。郡学自成化中改创，垂四十年，规制宏敞。修敞之功艰于费。暨久，日益就于颓圯。嘉靖壬辰，宋侯莅止，省于学，顾殿庑之就圯，询于众，僉曰：“栋桡瓦毁，已及楹柱，风催雨蚀，凋落于后，后难图也。”次视号舍，颓朽莫支。进多士语曰：“儒业以专志而成，志专则业精。今身无所止，则志弗专矣，其何以为学？况皇上崇文重道，新制《敬一箴》，释程子《四箴》，颁立学宫，以诏多士，勤恳于学，至矣。专为入敬之门，敬则一，一则可久，而为大且远之基矣。使上无以为教，下无以为学，不亦重有负耶？”遂白巡台余公铨取给罚鍰，经画以次，大成两庑，则葺旧为新，圯者正之，缺者补之，晦者饰之，费省于创始而功侔焉。号舍[弗]可葺也^④，则鼎新之，凡若干间，具离(响)[向]

①“被命”上，嘉靖《汉阳府志》无“剪薄”二字。又，“剪”当为“翦”之误。

②“竭”，当为“谒”之误。

③嘉靖《汉阳府志》此句作“学之长贰董君威，方君田托记于予。”

④“舍”下，嘉靖《汉阳府志》有“弗”字，是。



以象文明^①。经始于癸巳之春，不期年而讫工。

哲人于事，每在幾先。令(候)[侯]是举^②，其见孔夙，其力孔毅，而其本则又廉以肃、信以孚，无扰无闻，而事遂举矣。

先是，门池既饰若美矣，而犹缺然，庙庑匪匹也。今内以外卫，外以内观，其屹如山，其竦如翼，上以安妥神灵，下以联属衣冠，厥功惟允。侯慎重其事也。

视成之日，申告于诸生者曰：“爰自画野奠方，以郡县止民，郡县以形胜而居，形胜以人物而耀。学校者，人物之萃也。郡居汉水之阳，内枕凤山，外罗大别，汉水西流，岷江南下，其见于经曰‘江汉朝宗于海’，曰‘内方至大别’，曰‘滔滔江汉，南国之纪’，是楚控秦蜀吴越之冲，而形胜大观，曰惟江汉。形胜丽矣，而学校匪匹，固典司者之责也。形胜丽矣，学校饰矣，而儒业匪光，责其有归乎？”诸士曰：“是诚在我，请益。”侯曰：“学宫创始，其完固犹夫今也，垂久而敝且废者，风窳雨隙，累寸而尺，累尺而丈，遂滋蔓矣。善图者，于其寸而葺之，虽终焉永臧，奚庸滋费乎？士之于学也亦然，累德而诣夫高明者，固自夫微渐始；失德而入于幽暗者，亦自夫微渐始。古人惟日兢兢于觴豆户牖，动罔弗铭、罔弗戒者，虑夫渐也。诸士学古修文，饰功端本，以一身而计天下，以一时而计万世，何大且远矣！其幾则自夫小者、迓者敬慎之，则微而渐，渐而著，著而盛，盛焉乃有底绩。”诸士诺而服之，庄诵于予，并识之以诏后来。

侯讳沂，字某，由进士历兵、户二部郎，陟汉郡云。

汉阳府重修本学门池记

戴金

事有感于孚而成于敏者，必信立而义起，倡之者金(诣)[谐]^③，从之者实应，斯举难于易，而功日懋矣。《传》曰：“未有上好仁，而下不好义者，未有好义，其事不终者。”即事以验言，今之俗有古遗意焉。况学校虽先务(事)^④，有司薄视而缓图者居多。

嘉靖丙戌，东牟孔公凤莅政，省于学，自棖星而泮池，自戟门而殿庑，慨颓朽渐以曼，欲锐意兴修，计费不贲，乃召郡下湘阴之邓幹、周陂之刘大本，谕曰：

①“响”，嘉靖《汉阳府志》作“向”，是。

②“候”，当为“侯”字误。

③诣”，嘉靖《汉阳府志》作“谐”，是。

④“事”，嘉靖《汉阳府志》无，是。





“赀富者润屋，德厚者立身。建修门池，协力乃可，盍亦有义举乎？”二(民)[氏]毅然承之^①。幹之宅里有山曰东至，富坚珉，遂捐费取材，得巨石六楹，首建棂星，为门者三，躬亲督役，水运陆挽，劳倍于私植。大本购木兴役，治事戟门，其規制广狭，取匹于殿庑，既益大其门，仍列名宦、乡贤祀于两垂，置神库、庖湍于池之两旁。不数月而二门告成，民罔闻(知)[之]^②。

越三年己丑，予巡蜀还，庠士田万钟辈托记于予，予以泮池未举，辞。嗣是幹治事泮池，陶甃伐石，甃如环围，中为桥道，饰以雕栏，联以流洞，方广益加如旧。既讫工，东牟解组，予以羁于官，而勒石中辍者。

越八年戊戌，在泉刘公汝松莅任，崇儒视学，阅询往绩，闻义举之悉，慨然曰：“作泮宫，鲁人颂之。桓楹之丹，《春秋》书之。今肃肃具瞻，门其伉且丽矣。淳涵半壁，池其浚且固矣。东牟茂兹伟烈，而二(民)[氏]踊跃効成^③，为费不赀。清议既艰之，宜有琬琰以诏后来、示奖劝也。郡博董子威偕庠士辈以夙请予记白之。适予叨被畿抚之命还桑梓，在泉属请于学，磬石以待。予益嘉之。

东牟没且久矣，功遗地方。而在泉勒成于十年之后，其设心盖公矣，均之为可录，遂述其实，兼以告于乡之士曰：“天下事有难易，工役之举，匪赀弗克，匪画弗臧。图大者益艰。惟兹庙学，无病民，无亟取，上以信孚，下以义从，不疾不徐，居然改观，是诚举难于易矣。况率吾性以淑诸身，万物我备，匪由外铄，求则得之，是诚易之易矣。顾每病其难者维何？《易》曰：‘天行，健，君子以自强不息。’愿服兹训，与诸同志者勖之。瞻庙貌以弘其容受之宅，挹泮泉以(擢)[濯]其炳曜之灵^④，践礼门、由义路以绳身于轨度，养正于蒙，具用于体，居则饰躬表俗，达则翊世泽民。俾士版之书、郡乘之载重，而鼎彝之铭与棂星之丽、戟门之伟争辉而并彩，则庙学之新，固斯道之昌也，斯无憾于作兴者之意焉。”诸士曰：然，此邦人士之责也。庙学鼎新，当共伊始。

重建禹稷行宫碑记

明·张元芳

江汉故古今隩区，经神禹手决而奠之，亦藉后稷躬艺而粒之，六府三事，

①“民”，嘉靖《汉阳府志》作“氏”。

②“知”，嘉靖《汉阳府志》作“之”。

③“民”，嘉靖《汉阳府志》作“氏”。

④“擢”，当作“濯”之误。



功施烂然，即欲畸重不得也。

乙丑之秋，汉阳令王君谒予而言曰：“大别山旧祠召康公、穆公，岁久就圯，春秋登豆亡所托，愿微灵以鼎新之。”予曰：“唯唯。”寻渡江而凭吊焉，登大别，梯晴川一望，龟蛇相对，山川绣错，人烟鳞集，洵洋洋大观也哉！俯而视之，庙貌颓然，有怆于中。问之，曰：“禹王宫也。”随屏息下，拜见巍然在上者，惟我神禹。夫禹首辟洪荒，平成聿奏，万世实永赖之。采江汉之苹，以酬明德，殊未足以殚厥报也。惟是叩之左曰伯益，叩之右曰后稷，递而下之，拱立如生者曰八元。

八元不具论，即益司火政，以佐司空，功在禹下，侍坐宜也。稷何如功而可，亦侍坐乎哉？稷生履上帝之武，长播下土之种，辨五方燥湿，俾黍稷咸登，烝民用是粒食，万世而下，罔有转瘠沟中，与凿龙门、排伊穴，脱生灵于鱼鳖者，并堪不朽。此而抑之，拱手禹侧，禹亦未能安也。即臣不佞，亦未敢王禹而不禘稷也。王禹者，以天下王也。禘稷者，克配上帝，厥后以天下祀也。故仲尼曰：“禹、稷躬稼而有天下。”^①明乎以有天下属稼者，禹不独有也。子舆氏亦曰：禹思天下有溺者由己溺之，稷思天下有饥者由己饥之。未见民饥不危于民溺者，则未见救民饥不重于救民溺者，禹、稷政未可轩轻也。彼江汉之民尸祝之，众食其德，思报其功，又可以正、陪分乎哉！方今淫雨弥春，田卒汙莱，望之如泽水之不可涯涘，愧不得一由溺者奠之。继而旱魃为虐，黍苗立槁，农夫将盼盼终岁而不足以糊其入口，愧不得一由饥者粒之。繇今之世，溯禹、稷之功，即孔、孟同声贤之不能，既而谓祀可以正、陪分，臣未之闻也。若夫益封唐，康公、穆公封燕伯与公，名爵差相等，即左右翼之，与八元肩随以侍，无不可者，独奈何以配天之稷抑之使不得配禹，此典礼之阙漏，神人所未快也。爰鼎新其宫，而并祠之。

是役也，鸠材庀工，有王明府良相；率作省成，有侯司李加乘；而主其议、捐微俸以首事者，臣元芳也。并得书。

楚二社稷臣疏

明·李若愚

为社稷之大功未明，纪年之史牒不光，祷慰忠魂，以光信史，以正告万世事。

^①此语见《论语·宪问》，为南宫适问孔子语，而非“仲尼曰”。





臣楚人也。楚世传三闾大夫忠义，宁玉碎，毋瓦全，宁烈死，毋佞生，其俗然也。臣窃迹近事，则有张居正、杨涟其人，焜耀相望于数十年间，足可并千秋不朽。而一以负谤没世，一以击贼陨身。臣尝从里中父老与海内士大夫及仕壬午以前者称，居正辅神庙，十年间事甚确。居正死四十余年，莫敢言其功烈，今礼臣罗喻义始言之托孤始末，具载喻议疏中。皇上亦既怜而察之矣。若杨涟，其社稷诸大功正不在居正下，言者只陈其忠烈惨死状，而未一及其定策戡乱始末，是后死者之罪也。

长安曾谊传李若愚系杨涟死友一语，今朝士咸指臣曰杨涟友矣。臣实未与涟友也，臣之友陈愚友之。陈愚于涟，有程婴、杵臼义方，困于公车不能言也，臣宜代之言。何者？知涟之深者莫如臣，臣而不言，谁当言者？皇上已恤涟矣，已知涟矣，臣复何言？但当年一腔热血，未经说明，国史、野乘所传异辞，涟目不瞑于地下也。涟受光宗遗诏，犹居正之受穆庙顾命也。晏婴有言：“为社稷死则死之，为社稷亡则亡之。”涟之谓矣。

嗟乎，逆珰谋移社稷矣，是欲为操、莽所为者也。崔呈秀一辈亦非上官、子兰比，皇上不见其俨然九锡欤？不见其越五等封爵而上之欤？不见其布诸腹心大珰于漕运咽喉也欤？不遣诸珰遍握兵、户两当事欤？其谋已定于甲子以前，其后三王同出，九鼎一线，皇上在潜邸，若辈不啻举玉玦以示者三。由今思之，假设非杨（涟）〔涟〕《二十四罪》一疏^①，瞻乌爰止于谁之屋？只因有此博浪一椎，激发天下忠臣义士气，贼望愿莫支，迁延以至数年，圣人一出，百灵拥护，神器不震，钟纽亡恙，是鬼神实不逞于逆珰，而假手于涟也。涟可不谓社稷臣欤？

臣更列其两朝登极时事，一数于我皇上，且以告后之秉董狐笔者。当神庙不豫，光宗不得入侍疾，事急矣。涟时为给事中，率百官问疾，请辅臣宿阁中，引文彦博河史志聪故事为例，力请入侍，夜无轻出。光宗谅闇，奉遗诏，下考选，撤奄税，出诸章奏留中者，皆涟主之也。封后议起，天下事益岌岌矣。涟上疏力争，且请遗诏中首举册立。涟又同诸大臣疏，乞愿谨内臣，奉皇长子居慈庆宫，有《机在防微，事贵慎始》一疏，今在御府可按也。光宗闻奏，语太子：“此汝忠臣。”特召涟同各部大臣入对，详在庚申《实录》中。是日，上目属涟等者再。涟盖简在帝心矣。光宗宾天，涟趣阁部大臣伏乾清宫，阉人格不令人。涟攘臂大诟曰：“皇帝晏驾，太子安在？汝曹隔大臣宫外，欲何为？”阉人却，涟与诸大臣得入，恸哭，

^①“涟”，当为“涟”之误。



急请见太子三四始出，诸臣呼万岁。涟促阁臣刘一燝、韩爌奉熹宗左右手出乾清宫，时内竖尚有大呼“小王转”者，涟且格且呵之，群臣咋舌，因奉熹宗入慈庆宫。冢臣周嘉谟奏“殿下，天地神人，（主）〔所托〕朝夕祀奠，必臣等至，方启行。”^①涟指王安曰：“先帝选择使汝。须察上饮食，动定必以告，其不共命，国有常刑。”涟因自宿宫门外，伺察非常，五日，须尽白，举国僉谓涟于此日功难堪矣。《移宫》一疏，千古大义也。而奸辈反以为口实，涟亦自是引疾归矣。癸亥，起涟内台，涟力引诸正人满要津，而旁观者亦侧目云。会逆珰恣横，日横一日，将危社稷。涟恐负光宗顾命，誓以死报，而《二十四罪》疏入，是时涟已义不顾身矣。忠贤既杀涟，白气亘天者三日。

臣考正统间监国残储事，部郎章纶以死争之，身备五刑，沉犴狴数年，复辟后，升礼部侍郎。纶死，特赠礼部尚书，谥恭毅，全录其子。是时御史钟同亦以废储争，杖死朝廷，后录其二子。皆为京朝官，涟之功、之死，不与二臣同欤？而赠官且吝一尚书衔，即荫一子入监，亦仅视三品官老死牖下者例，如社稷诸大功何？恐亦未惬我皇上怜恤忠节意也。臣为社稷言尔，非为一人言也。今张居正功已明，原赠原谥俱在，无事更议矣。其诸孙被褐负薪，令人酸楚，闻其才多可录者，合查当年荫典尽还之，犹未足偿其社稷功也。居正亦可含笑入地矣。独涟大功未明，赠恤未称，不嫌续诸臣后，一哀诉我皇上之前也，伏望皇上推怜居正德意，将涟始末细赐电察，下部照章纶例，赠尚书，加录其子，得比钟同，勿令止于老死牖下者等，则史册有余光，而忠臣无覆盆矣。

上刘太守议筑千湖泾书

李若愚

公下车以来，百度俱新，士民相见，莫不欣欣色喜，而庠校诸生尤以夫子宫墙得中兴为贺。某居也贱，不敢妄有所开说。窃闻诸长老言，以为学宫受病，在龙脉掘凿，而墙运次之，则敝社友吴毅铭所切切陈渎左右者。今日议修学一节，未免费县官镪，虽诸生颀望，然公德意尚有待，若筑千湖泾口，及禁止沌口三里坡三处窑，则旦晚可传檄定，不烦再计。而千湖泾为郡龙脉脊，旧本无河，挖自万历十五年，祸且日蔓，所关利害，不止学宫，语俱在诸生条陈单中。此

^①“天地神人”，据《四库全书·东林列传·附熹宗本记上》“社稷神人所托”，去“主”，补“所托”。





节某与吴毅铭为青衿时，曾请之王太公祖已经施行，豪民有阴害其成，欲截府脉以为己一家受用者，又会愚等应省试，事遂寝，而郡内数年光景，愈不忍言矣。

愚与毅铭既始之，敢不终之，欲面布本末，恐执事之未得间，请复申其词。伏惟老公祖念合郡士民请命，趁岁晚务间民力可用，仍查丙午在案原卷，早赐批委，其土石略有所费，则通郡大姓自办，不敢损公帑也。但委官须得幹敏如王典史，委督里老须得忠信如周珽、李良、张世顺等，且令珽等详开一手本，假以便宜从事，刻期考成，不半月结局矣。若仍落巡检辈手，则豪贿一行，是复丙午之役也。百姓望此举如望岁焉，日日以几。若愚敬竭鄙虑，惟公留意。

按：此地去东至山仅里许，旧无泾河，浚之自万历十五年始，缘近地势家以渔为利，罔顾通郡之害，故先正激切言之。续奉上宪谕令筑塞，勒碑永禁。乃岁久渐弛，开浚如故。不惟府脉受伤，而内地数十里居民春夏取草粪田，秋冬装载稻豆等项，俱苦浅涸难运。三年前，李大理曾申请之，卒为所格。今若许其照前筑塞，不烦指麾，但下一符于内地居民，不逾年而其事办矣。

重建汉阳县儒学记

李若愚

夫圣人之道，譬之庶人，则宗祖也，家祀而户祝；譬之帝王，则天地也，南郊而北社。至其间运会推移，光灵不改，而主张斯文者，兴衰起敝，懋建大猷，播弘誉于一时，昭景化于千祀，则又存乎其人矣。

汉阳府之有学，兴贤育才，科名鹊起，名巨相望，即今鼎甲高魁，亦复云蒸霞蔚，盖于今已三百年。迺以兵火焚余，遂至燕寝忘处，断琴故履，零落莫追。郡伯傅公，来莅兹土，敬仰如在永言，声烈实惟恹息，兼以恺悌作人，一时士风丕变，春咏夏弦，载颺淑声，而属以公事先驱修复之志，时故妨道，事未克就。

岁己丑夏六月，按台陈涪翁先生来按楚，甫下车，谒文庙，悯学宫倾圯状，毅然以兴复为己任。维时聚邦伯司长，暨郡伯、暨邑宁侯、暨邑师儒百执事之人，相与谋曰：“元裔緇流，尚尔不忘所自，而学圃盈蔬，崇文不继，此吾儒之责也。谁执其咎者？”遂慨然捐助，以为诸绅衿倡，而一时有事兹土者，各捐俸以勸厥美。又选公忠之儒，及老成有幹材者，相与庀材鸠工，不数月而学宫成，药房榱栋，咸令轮奂一新，师生有赖。泠泠乎，琴瑟之奏也；芊芊乎，菁莪之茂也；济济乎，俎豆之列也。盖欲挽邹鲁之风，不啻为文翁之化，斯亦一时盛事云。

于时傅公邮书于余曰：“涪水先生之按楚也，实闾阎，空囹圄，息盗贼，戢贪暴，



练什伍，固其表表者矣。乃若敦《诗》说《书》，文思浹宇，使数仞宫墙丕扬鸿烈也，而不铭考父之鼎，纪奚斯之功，则何以示后之君子？”余曰：“此于潞水也何有？汉为禹明德之乡。文王行南国，先及江汉。昔游定夫、黄勉斋两先生守汉土，登坛讲学，蒸变士类。汉固多士毓德之区，则夫建学崇教，以无失禹、文之遗，以直追游、黄之范，于以劝子臣而作忠孝，距邪讹而正人心，斯前以接孔孟之传，而后以新潞水先生教化之泽，庶德行文学有兼举，而采兰擷苢皆可为国华矣。多士勉乎哉。”

是为记。

祷雨文

明·王叔英

天不施霈泽于兹土，殆三越月矣。斯土之民，实以官多役众大困于差徭，固有得雨而不暇耕者，况失雨而使之不得耕乎。固有已耕而不暇种者，况失雨而不得种乎。且今时将夏半矣，及今而雨，则秧未老者犹可种，已老者犹可再育，过此不雨，则秧既老者不可种，欲再育而时已失。夫种而不获者有矣，孰有不种而获者乎？民于此时固有乏食已久，而屡窘于饥馁者矣，况至于秋而无获，其何以为生乎？是则民命生死之机，实决于此。

为官而禄食于是土者，视民失所而不能救，固为官者之耻也。为神而血食于是土者，视其民失所而不之救，岂非亦神之差乎？借使为县令者徒有爱民之心，而未有仁民之政，徒有忧民之意，而未有能去民之疾，或以是而警之，或以是而罚之，则斯民何罪而被此波及之祸乎？

今叔英谨斋洁以告于神，如或者以县令莅事未久，终能苏息是民而姑待之、姑恕之，则亦即赐之雨，以慰斯民之望；或者以令终无能为、或反有病于斯民，则宜亟罚之、亟诛之，止及其身足矣，不当使斯民亦蒙滋滥罚也。叔英今谨待罪于坛埴之次，自今日至于三日不雨，至四日则自减一食；至五日不雨，则减二食；六日不雨，则当绝食饮水，以俟神之显戮，诚不忍见斯民失种至饥以死。惟神其鉴之，惟神其哀之。

祷晴文

王叔英

叔英今月二十三日祷雨于神，神于是日及夕即大降之雨。次日之晨，以神





之施惠未已，不敢自休以褻神灵，谨造神以俟命于斋宿之所，至于今日，雨意有加未已。窃以即今惠泽既已厌足，不可有加。盖雨三日为霖，过则为灾，况今田麦尚未有收获者，多雨则腐不可食，而禾田雨多则水溢而秧不可种，已种者亦浸荡而不可活，过则为灾，其实如此，神不可以不鉴而悯之。

自今日以前之雨，神如果悯斯民之病，从其县令之请而降也，则乞神之大惠止于今日。今既告于神，宜还俟命于坛次，必待神之敛惠，天色霁朗，然后敢辞谢而退。如至明日雨复不止，是必神有罪于县令也，亦不敢复谒之神矣。当自二十七日始，如前日之誓，日减一食，如不得命，必至于绝食，以俟神之显戮。惟神察之。

王公堤记即今杨柳堤

郭正域

记曰：由汉城而北，抵汉口龙家湖，水出焉，相去几里余，舟楫不到，水涨为巨浸，汉口几万家朝夕于城，莫利往来。

先是，守兹土者蔡公、盛公、孙公创为堤，岁久尽圯。王公抵任之年，政理民和，问民疾苦，慨然曰：“是诚在我。夫因财于官，官帑竭；因力于民，民力疲；即人劝而户募之，民且不应，我其用人乎！”于是廉得省祭官熊士奇等可使也，召之庭下，酌酒劳之，簪花束彩。阶下大作乐，导之中门而行，名之曰：“善人，太守不以相苦，与若等共功德事，尔子孙且食报。”于是大众踊跃出曰：“我等何敢负公。”

不期月，堤成，长二百七十丈，横袤二丈，中为石桥。桥一孔。桥之上翼以石栏，覆以瓮。堤左右累石为基，如桥之长，高二丈有奇。桥旁为祠宇者三，堤曰“王公堤”，桥曰“王公桥”，祠曰“王公祠”，志不忘王公也。

王公捐餐钱若干，凡募得银若干两。工始于乙巳岁仲冬月，落成于丙午岁仲冬月。而诸生熊士章，余友也，属余记之。余曰：“王公以善养人矣。以善与人，人莫不为善。善人有为善之名，地方受为善之利，王公之善莫大焉。”堤成之日，其直如矢，荡荡平平；乘车荷担，昼(住)[往]宵行^①，风雨晴霁，渡涛靡惊。夫宁独一堤，以治天下，可也。

王公讳宗本，字世端，徽之休宁人。诸善人有功者，各勒名于碑阴。

^①“住”，万历《汉阳府志》作“往”，是。



八蜡庙碑记

明·吴与言

古有八蜡，伊耆氏始为之，相沿迄今，然独盛行于北。余僚河滨刘君，素志古礼，下车辄署府事，时水旱荐臻，诚祷罔有不应，遂锐意于是庙之建，盖亦务民之义而以敬鬼神者也。经始于隆庆二年七月，越二月而工告就。寅长龙川孙君至，复嘉是举，拓地鳩工，增置屋于两厢。其各材力，悉行设募。自府载诸祀典，时敬祭之。神之灵翼翼然，民亦惟神是依，水旱真有所仗而免者。乃以记命余。

余曰：有其举之，莫敢废也，记何为哉？且工费，民罔秋毫与，制作则昭然在人目也。其礼，则仁之至、义之尽，《郊特牲》阐之详。匪于神，抑于人，柳宗元更有以发其隐焉，又何记哉！虽然，立庙（向）〔飨〕神^①，以为民也，亦必飨而后能有飨也，故曰惟贤者能祭。言内自尽而外顺于道也。吾侪思受国厚，职司民牧，其间尽心与否？即尽矣，诚与否？诚矣，久与否？人虽莫测，鬼神实鉴临之，所谓对越之本也，可无豫乎？乃若其道，则兹郡襟江带汉，渚泄难施，固天下之至大坊也，水庸也，盖无所事事者，不有感格存也。省刑罚、薄税敛，使得尽力耕耨，以待有秋，先穡、司穡之灵鉴在也^②。赈民饥寒，时助其种，争讼质成者，立剖归田，不绳以纸，得非司农之大“邮表啜”之遗与？积胥黠算之玩法种害，猾竖悍卒之倚文播虐，刁排顽里熟揽惯役之诬财蔓祸，其为毒民昆虫，奚翅害稼者？如弗之职，是又不捕之猫，而苛政之猛如虎也，可乎？果能利与兴焉，害与除焉，则民心悦，天意得，将见国有圣政，海不扬波，虽兹坊也、水庸也，以江汉也，亦海属也，能无知乎？由是而祭，斯飨、飨斯，受福矣。其不然者，神不吐之与？

二君前今莅治，其实心实政，舆论在民。本庙有赫斯飨久矣。余叨寅末，岁惟奔走于斯民也，殊其心而无政，特未与祭，祭有余愧矣。神其可欺乎？兹记之也，尚推愧心之言，以俟后之君子。

建三城楼记

朱衣

太守真定贾公守郡未期，百废咸举，乃复先事防守。以西、南楼各圯坠，援朝宗故事，请于巡抚侑溪中丞姜公、巡按南山侍御高公，咸允之。抡委同知

①“向”，当为“飨”之误。

②“穡”，《郊特牲》作“耒”。





张子天衢指挥，沈子永督楼工。落成，贾君曰：“闻先生记东楼，欲附西、南，以无忘二公之功。”曰：“唯唯。”

汉阳在楚郡为小。其形势所关，与荆襄并，而武昌诸郡，或出其下。何尚之云：“通接梁雍。”旧《志》云：“三国前皆要地。盖长江带其东南，沌沔环其西广，汉出其北，上接岷蜀，下通吴越，后受申梁之冲，前引匡蠡之险。”勉斋云：“武昌唇齿，吴越咽喉，南人得之，则恃为悍蔽，孙氏都武昌，使鲁肃守汉阳是也；北人得之，则武昌不能自立，守臣李恕以舟师败鄂人是也。”由是观之，尚之所云、三国所守、黄先生所申请，固自有见。后世以承平忘先事之策，视经国为迂缓之图，怡然处堂之燕雀，而不知煦煦者之非真乐也。

正德辛未，流盗刘六、刘七攻城，当时赖通判徐弼市买竹木，倚城瞰江，为梁以守。时盗舟十三，飓风偶作，七舟不得近，五舟为风损溺，惟一舟东楼下。此一舟者，并六舟之人，人皆骁悍，金衣削发，自江边发矢如雨，楼栋受矢如猬。守者深避。高者眺楼上以占盗虚实，下者候楼中以下矢石。已而土兵至，相与战于城下，盗矢尽，扬沙扑我军。风反沙扑盗，我军以药矢、长枪环攻之，盗溃，乘胜追逐，戮死沉江相半。七舟在洲外，后奔瓜州，为边军所败。

夫设险守国，先王之法。而楼橹者，法制之一也。郡之所遭，乃目击若是，相赖以全城若是，而可以法制少之乎？苟吏于土者曰：“兹法制之一也，奚以先伏戎而后固圉。”诚处堂之燕雀以煦煦为真乐者。三公一君之功，曷其可忘！后之登楼者，于东怀朝宗之义，于南思江汉之纪，于西期鸣鸟之闻焉。审如是，宁为不忘今日之功已也。

重修汉阳县学记

萧良有

汉阳县之续有学也，盖肇于万历乙酉，语在《学田记》中，然而规制虽创，未备也。又十五年，岁在己亥，南安傅使君来守是邦，甫下车，谒孔庙，徘徊久之，作而慨然命博士及弟子员具阙状以请。是时福州陈学谕适至，拜命唯唯，退而具牋上曰：“大哉孔子，畴钟厥灵，实为启圣，煌煌笃生。不祠之务葺，而湮没榛莽，缺孰甚焉。”则又曰：“学畔氓庐，隔不数武，霖霖为虐，涨及堂宇，不以此时筑垣浚渠，用防水患，于计得乎？”则又曰：“礼门义路，由兹升堂，不有具瞻，孰是周行，而门故距南关才十数武，而近仅用栅蔽，市器喧沓，非所以严礼貌、肃听睹也。诸琐细不具举，举其巨者。”使君览牋，复慨然起曰：“于



建是乎何有？常俸之盈，吾何爱焉？”谋于冯别驾、殷司理两大夫暨黄邑侯，金曰“善。”

乃命幕张经历董厥事，议经费，鸠匠作，以次受功。于是垒土为基，创启圣祠于堂左腋。亡何，祠成。于是凿涧为渠，以通水道，深二尺有咫，阔称是。自明伦堂上直下折而会于大成门前渠，从东入江。复筑垣，垣高九尺，长倍之。附垣为堤，树以木，而污涨无复如昔患者。于是伐木治坊堂前，坊以龙门名，撤故所治栅而蔽以墙，行李市廛，俨然外望矣。盖至是，负者、行者过而趋者，（巾）〔士〕绅而鼓篋者^①，靡不啧啧，谓是役也，虽重修乎，何啻鼎建。然而又工则公胥，民无与；值则公廩，民无与，前此未睹也。

既竣役，使君则命博士暨二三弟子员诣不佞丐记，以示来者。不佞乐观厥成也，不敢以不敏辞。记曰：往圣天子广厉学官，申功令，责成郡邑长吏甚具，然大率创所未有，不得不尔则然，苟可因陋，宁议更新？征之，辄以时诮为口实，其孰有加意学校而又不烦役、不淹期，如使君之为孳孳者哉！所加惠后学，意良殷且厚尔。诸生幸甚。虽然，弗可弗勉矣。夫学舍维新，良吏责也。君子以日新其德，而旧染夺之甘心焉，士能无恶颜乎哉！今夫修之业，后传注而先《老》、《庄》；著之文，卑平正而尚奇诡；持之论，崇玄渺而忽彝常；提之躬，艳跌宕而遗悖笃。彼固自谓能新，似之而非者也。书则六经，事则六行，养则喜怒哀乐，用则均、齐、治、平，是万古常新之道也。两者若（盈）〔楹〕与筵^②，而世顾为彼不为此者，俗渐靡使然尔。今江汉间人士，谓尽不染于旧，吾不敢知，其尚袪濯藻雪，自今伊始，而使学校有真儒，国家得实用，所裨益匪浅。不然，而第徼利禄、猎声华，负贤使君所为作新至意，岂可哉！诸生知勉矣。

工肇于二十七年闰四月二十八日。傅使君名道统，闽人，万历丙戌进士。顷岁中珰出榷，多方悍御，焦劳特甚，当别有纪。冯别驾名胤，蜀人，选贡。殷司理（多）〔名〕才^③，蜀人，乡进士。黄邑令名思新，闽人，乡进士。张经历名懋中，梁人，岁贡。陈学谕名阳和，闽人，乡进士。解司训名鹤龄，黔人，岁贡。而弟子员随博士来丐文者，朱宇、袁楫也。始陈学谕至，斋舍就圯，分守陈少参公命葺之，黄邑侯佐之，并捐俸，皆义举可风也，得附书。

余既记之，复系以辞。辞曰：惟素王之故宫兮，属规恢而未理。勤使君之顾瞻兮，

①“巾”：万历《汉阳府志》作“市”，“市”或当为“士”之误。

②“盈”，万历《汉阳府志》作“楹”，是。

③“多”，万历《汉阳府志》作“名”，是。





容戚然而有泚。订先甲于三日兮，缔旁午于百垒。斥公廩之(羸)[羸]羨兮^①，匪閭閻之脂髓。迈蜀郡之骏声兮，轶鲁侯之燕喜。诂先圣式宠灵兮，乃循良其遐轨。愿多士之勉旃兮，曰瞿然而奋起。戈一挥而回光兮，革三就而更始。罔静言以庸违兮，爰释回而增美。江、汉流而尝新兮，鼎彝著而不毁。余作辞以诏来兮，繁斯文之在此。

汉阳县新置学田记

萧良有

今方以内，府卫州县各有学，而吾汉阳县独以正统末祀毁，因循百年，未议修复，良阙典也。万历岁甲申，御史任公来按部，访因革事宜，(概)[慨]然曰^②：“务无有急于此者。”疏于朝，以重建请。事下礼部，大宗伯沈公廉其状曰：“御史言是。”趋所司连日夜具草，报曰“可”。当是时，不佞叨史馆，并得与闻未议，而汉阳县于是乎有学矣。

会邑令管侯、陈侯相继先后来，拮据不皇者屡岁月，用告成事，而侯一旦复抚然曰：“邑不可无学，学独可无田乎？无田即士而贫者，一切外内吉凶之役安所给万一？”则以其间行求不税之田若干亩，置其人于法，以其田归诸学，而量定其租税，视常额杀三之一，役尽免。寻治文书上所司，金议称允，而汉阳学于是乎有田矣。

事甫集，陈侯迁郡丞去，黄侯来代，偕邑学博士长貳何君、解君率弟子员造不佞，请曰：“邑之复有学田也，微先生之力不及此，忍靳一言以示来者。”

余唯唯，乃特书曰：“黠哉！陈侯斯举。盖于情协、于势便，而于体得焉者也。”粤考三代盛时，规恢宇内者甚备，至《周礼》益加详，而上庠、下庠自国老、庶老之外不少概见，何也？岂非以无恒产而有恒心者惟士为能，而责之以固穷之守乎？其用意良厚。虽然，有司所为养士，则必有道矣。今夫比閭之儿不敌兄子，乡邻之斗无取纓冠，言情异耳。有司之视诸生，譬父母，然父母抚其子弟，帡幪堂构，莫厥攸居矣。脱令其黄馘槁项、捉襟见肘，顾复之谓，何非情也。今夫登高而招，见者加远，顺风而呼，闻者加疾，言势异耳。余尝滥竽为国师矣，彼其萃四方、群六馆之士，肩摩踵接，犹且鳃鳃然计口而饬之，而又转输之，

①“羸”，当作“羸”。万历《汉阳府志》亦误。

②“概”，当为“慨”之误。



难相百也。孰与夫税不离阡陌，粟不烦飞挽，其于势易易乎！今夫桔槔之能仅胜焦火，升斗之水不活枯鱼，言体异耳。世宁无家给人赐，沾沾为惠者，曷若以地利利人，无人德我之迹；以岁资资用，无我予人之形，若是乎博大而有体也，故曰：“黠哉！斯举于情协、于势便，而于体得焉者也。”

余又窃谓弊有伏于法之中，利有加于额之外者，不可不究也。夫田业以学为名矣，乃敛散出纳，复自有司为政，干没浸入，吏胥得有藉以为奸，则其势不可久而法必废。今田之儋石者无几，以合学取足，则其势不能支，而法亦必废。谓宜即付邑博士，清闲之署，侵冒易稽，师弟之间，痛痒最切，使一得专其责，而邑特以岁时省成，焉不便乎？今有司或以新庙貌、饰传厨，俄倾呵咤，不难斥罚锲数百十金为观美，而忍于子弟，惜此戈戈者耶？至夫日积累月增益，使田谷丰于居积，而子弟兴于礼义，是又在继今贤有司图之也。嗟嗟，有司所以养士备矣，乃若严不取于一介，辨非道于万钟，素餐之戒，当殷口腹之累，无溺淑慝臧否，自今日始，则存乎士自养焉。士勉乎哉！

田亩隶山一图三甲，为石者一十二有奇，税额具在粮册。大宗伯沈公名鲤，河南人，嘉靖乙丑进士。御史任公名养心，山西人，万历甲戌进士。管侯名宗泰，江西人。陈侯名尧钦，福建人。黄侯名世修，四川人。俱乡贡士。两邑博士，何君名冀孟，江西人；解君名鹤龄，陕西人；俱岁贡庠生。始事者，陈明德、朱宇、袁楫。而申命来请文，则易孔学、杨师绶也。例得并书。

重修汉阳府学记

明·李宗鲁

府有学，今二百余年于兹矣。本郡治西行百里许有山九真者，其祖龙云。龙东迤而来，至城址为凤凰山，巉岩耸秀，据其中学焉。江流环拖，别岭屏围，形胜斯奇矣。从来名公巨卿，蝉联鹊起，第时移序改，成坏相因，守土者惮于修葺之费，遂视为传舍而不问，即稍稍修葺，亦仅丹雘其垣墉止矣。渐仍渐废，倾圯已极，殿庑不足待风雨，门堂不足备讲习，附近居民侵逼师舍，使云路壅塞，学运中蹇，而英豪困屈，作人者耻之。

甲辰秋，诸生乃力请于学宪窦公。公嘉其义，捐各府刻书银数十金，檄郡邑长重修之。会宗子构孽，有大艰于楚。武、汉间摘发无宁日，议暂寝。是岁嘉平既望，王府君来守兹土。至之日，谒夫子庙，悯学宫阙状，谓根本重地，岂其阙略以貽职事羞。命诸生复申前请问，有请度支院道者，公曰：“恐损上不





便。”有请罚醵给用者，公曰：“恐瘠下不便。”又有称良贾富民好行义者，公曰：“文学事借资若属，尤不便。”乃自捐年俸之半，逮贰佐有差。檄下，而邑长吏黎君与诸青衿有志者翕然输俸与饩若干金，相期共成盛举，移文学师者总之。又择公忠之儒相度便宜，遴民间老成有干材者，俾核石木之多寡，鸠匠役之勤惰。首圣殿，次东西庑，次堂门亭祠，及斋舍庖廩，一一庀饰之。学前旧有云路通于城南，太学生王书楼适碍之，公晓以诸生之义，旋即拆卸，本学二十年淫郁之气，殊觉顿舒矣。学中原少尊经阁，诸生请毁淫祠木植议创焉。说者谓逼县之右，公命无(适)[过]高^①，额以“乐育堂”，董师儒课艺其中。

始事乙巳正月，至丙午春王工竣。甫一年耳，轮奂尽美，宫墙聿新，而民力、民财两无所伤，任劳、任怨两无所恤。公之培植厚矣。

予获观厥成，揖多士而进曰：斯举也，上所以彰教，下所以兴行也。今天下正道虽明，人心易邪，佛宫梵宇，雕甍绣柱，而黉校殊阙然。乃府君首政独惓惓，庸诂侈弘文之义以壮观乎？盖以教化百年而后兴，纲常万古以为治。在《周礼》，大司徒掌成均之法，建邦之五典。孟子曰：“学则三代共之，皆所以明人伦也。”孔子《春秋》一书，因鲁史之文，表章忠孝，使乱臣贼子知所惧。即大禹明德垂江汉间，多士习耳而目者，缅想当年，亦惟忧君之忧，盖父之愆，故曰：“圣人，人伦之至也。”多士列名胶庠，景仰禹、孔，何身无伦？何伦无可自尽？苟妄自菲薄，甘心暴弃，甚者左袒二氏，浸淫于异端曲说之归，是负罪名教，学之所不容也。昔游定夫、黄勉斋两先生知汉阳日，讨其子弟，相与究孝弟之理，诏德义之行，绌左道之倡，士习翕然丕变。至今尸而祝之。今府君雅意育材，教化有人矣。今之多士，昔之多士也，其何以酬明德万一？愿多士思奉教化，先谨德行，而欲端德行，先笃伦理，期于家为孝友，于学为真儒，于国为名臣，以无愧祗台之传，以直接孔孟之统，以勉追游、黄之义，以不负江汉之灵、凤凰之秀，以不负宾学使、王府君之明德，我乡国实嘉赖之，尔多士勛旃！若乃裘筌蹄兢风云，以举子业自雄，使菁华蔚起，甲第云蒸，亦地灵则人杰，自有尔学以来固然。今大振之耳，予何赘。

是役也，兼理则教授陈以姬，规画则生员汪时跃、杨如杰，督工则善人杨彬、文应举，例得并书。

^①“无适高”，据上下文义，或作“无过高”。



收集各处稿本，非在一时，故县学之记，有在府学之前者。^①

鼎建汉阳县儒学记

郭维贤

万历壬辰，余奉命抚三楚。时当旱魃余烈，予蒿目愁肠，拮据以授饥殍，惧无方救也。亡几何，汉阳守令、众博士诸生状上，汉隔会城，盈盈一水，台司教化所先被者，而邑学久灾毁。先是，戊子岁，汉冲萧太史公谋诸楚当事者，以请礼部上其事，帝曰：“可。”遂创建之。惟时规模经始，堂庙未构，教廸无所。兹欲陶冶眚窳而成翹秀，计当一鼎饰之，置樽候酌，县钟待扣，学校亦诸士之（尊）〔樽〕、钟也^②。予曰：固也。救火之家，岂暇先言（夫）〔大〕人^③，生死礼义，缓急之辨也，时诎而（羸）〔羸〕是务举乎^④，二三子姑少待焉。

明年，年稍顺成，民萌渐辑。牧守令、众博士诸生复申前请，且曰：“公帑之藏，诚不足贍，汉之乡先生为子弟故，将施于宜，邑有富人子颇壅财守义而说之，可卒办一二也。”予曰：“葵犹能卫其足，予不能卫土，致烦里中长者，予耻焉。而下逮富人子，富人子辛苦（年）〔牟〕十一^⑤，斂以訾士，非所以训士廉，不可。”乃命守藏按籍会稽醵金如干、榷金如干、无名（错）〔钱〕如干^⑥，会诸司帑、会诸郡帑、又会诸县帑。金既具，乃命护作料日月、程土物、计徒庸、虑材用、平板翰、设垣槩、书候粮，故可缮，缮之，其未构者，构之，务式于度。始事于癸巳八月，已事于甲午七月。明伦疏堂，上接凤栖，尊经峣榭，俯窥沧浪，文庙绮寮，光映黄鹄，戟门軫轩，（执）〔势〕凌大别^⑦，下及亭圃、庠垣、号舍、井庖，靡不一一庀。

既落成矣，守令、众博士诸生复状上，句予一言，以为多士鹄。予谢不敏，请益力。予进多士前而语曰：若知汉阳之学所自来乎？自有汉以来，官师其地者，不知几千百人，顾民所讴吟而思慕之，社稷而尸祝之，惟夏后氏及游定夫、黄直卿二先生。禹王之砥，专祠文命。凤栖之后，并祀二贤。盖亦谓禹见知于尧舜，

①此句为原书作者编辑此书时，因未能划一体例所加之按语。

②“尊”，据上文，当作“樽”。

③“夫”，万历《汉阳府志》作“大”，义长。

④“羸”，当为“羸”之误。万历“汉阳府志”亦误。

⑤“年”，万历《汉阳府志》作“牟”，是。

⑥“错”，万历《汉阳府志》作“钱”，是。

⑦“执”，万历《汉阳府志》作“势”，是。





上绍精一之传；游与黄受业于程、朱，而远翼孔氏之宗也。则汉人士与闻此学也，渊源所从来远矣。《禹贡》曰：“惟荆州，江汉朝宗于海”，“导嶓冢至荆山，内方至于大别。”禹往来于汉亦勤矣。《志》称定夫知汉阳军，召郡中士子讲明理学，一郡风俗醇美。直卿知汉阳军，郡治后为屋馆四方士，有勉斋《政教录》。则二贤所以教汉人士，亦靡矣。予与汉守令维新邑校，州处多士之秀而薪樵之也。即不敢望于一圣二贤，而其迹之靡良亦相肖，予何以勸多士？

孟子曰：“学则三代共之。皆所以明人伦也。”宇内学宫，堂名明伦，以此。舍伦无学，舍明伦无讲学。大禹克盖父愆，励力虞廷，略无一毫怨讎其主之意。始勤于国，不顾涂山之娶、呱呱之子，〔经〕〔终〕之地平天成^①，与予以定万世。克勤克俭，不矜不伐，其于五伦之际，至矣、尽矣。定夫事亲无违，交朋友有信，莅官遇僚吏有恩，惠政在民，戴之如父母。直卿有言：君臣、父子、夫妇、长幼，一失其序，天典不立，人道夷狄，朋友道绝，则此四者虽欲各居其分，其势焉得。由是言之，禹之所以学于夏，游、黄之所以学于宋者，明此伦也。汉人士所尊且信者在三圣贤，尊信其名，而不尊信其学，是叶公之好伪形，睹真龙而失色也。多士之春秋俎豆于三圣贤也，岂不慨然慕祗台之风，侈游、黄之义，顾其行具在，而就之若渴，去之若热，以曾、史之词，售其竖匠之心，则亦异乎向之尊信者矣。

予故就汉人士平日所尊且信者近言之，以冀其尊且信之易也，而亦愿汉人士以平日所尊且信者躬行之，以求其尊且信之实也。不然，剑缕七星，绯图五岳，邑校即饰，何以异是？

是役也，综理则汉阳府知府胡笃卿，通判秦从周、刘兆文，推官毛一公，分理则汉阳县知县陈尧钦，董工则经历郭维屏，法得具书。

重修汉阳县学记

舒体震

自昔谭治理者先教化，学校固有司第一急务也。汉阳介邻省会，实楚名区，安可缓图而不以急务视乎？按《志》，县自国初即有学，永乐间征名儒雪航赵先生职教谕，理学赖以讲明，人文渐著。迨正统初厄火，悉鞠为煨烬，嗣后艰再造。正统癸亥，议裁革诸弟子员，并莅郡庠旧址，改为右千户所。有识者恒惋惜之，久未有计恢复者。万历乙酉，汉冲萧太史公以人才寝盛，淹抑莫可，疏谋按台

^①“经”，万历《汉阳府志》作“终”，是。



任公上其事于朝，报“可”，乃即旧址改创焉。时规模粗具，而堂庑、棣星门、泮池咸属乌有。岁癸巳，众力请于抚宪郭公，始获为未备，稍宏敞壮观，而启圣祠、礼门、义路坊，暨垣墉、渠道犹然尚缺。己亥秋，博士弟子员仍疏所缺状，请于郡邑长吏，始克以次受役而臻厥成。其详具载前两《修学记》。

夫积岁历有十五，为役者三，乃仅克称成事，何缔造之艰也？近岁戊申，值稽天之浸，瓿窳数亩宫复荡没几尽。呜呼，又何厄之甚也！意者气运之潜移，不郁塞则不发舒，厄之甚，必发之勃，将异材辈出，大宣泄人文于后日也。予始窃悯恻，已且释然为汉士幸。于是捐俸重修，而卿士大夫各以义助，遂商厥费，庀材鸠工，圯者缮之，倾者构之，存者仍而饰之，斧斤版筑，暨茨丹雘，以时毕举，而殿宇、祠舍、坊亭、墙圃尽复其故，僉乃喜而谋曰“是大有造于汉士也，盍图所以垂久远”，而属予记。

予非能文者，逊谢不获，乃纪其颠末，申之一言曰：今所修学，特士所游息区也。学之实不在是也。起废兴坠，可假人为，省躬克治，宁由人力。故学非有司能新之难，士能自新其所学之难；亦非徒知所学之难，能明所以学之实而身造之难。何者？士称民之俊秀，当以圣贤待其身。惟雅志向往，不甘下同齐民，务日新学业，以求明体适用，为孳孳，即未必遽入圣贤域，要亦君子路上人已。由是居乡，则不失为太丘、彦方也，乡之表率攸存；立朝，则不失为长孺、稚圭、希文也，朝廷之严惮、莫安攸赖。隐显一致，用舍咸宜，圣贤实学，庶可几及。不然者，虽矻矻穷年，蠹鱼乎简编，浚发巧心，醲郁文藻，足以〔衡〕〔衙〕官景、宋^①，命仆班、马，奴隶曹、刘，于真儒实用奚当？无为贵学矣。譬之木然，体验其根柢也、实也，词章其枝叶也、华也。实也弗立，华恶能茂？即茂亦的然易〔稿〕〔槁〕^②，则深造之说尚也。李太白记袁州学，后世独称其有关于世教，得非谓是与？汉人士尝闻雪航理学之训，渊源有自，以制科名德显者彬彬，代不乏人，兹必景行思奋，使后来者愈出愈奇，褒然特盛于曩昔，斯克应地灵方昌之气运而无负今日修学意也。予不敏，滥有作人责，属望于诸士者诚厚，故言不以美而以规，愿相与共勉焉。尔诸生果以予言合喙，而取为他山之错，唯听；其以辱大方而等之敝帚，亦唯听。

至田以贍学所资，为养士藉，尤不可不加之意。本学一市山阳乡祝受田，

①“衡”，当为“衙”之误。

②“稿”，当为“槁”之误。





计租为石者一十五，岁与佃均分，则癸巳郭抚台命置也。一市吴文学田，计租为石者五十，计租为额者三镪，则癸卯寔学宪置也。一市杨廷四等麦地草场，共计为亩者五百有奇，岁所出产与郡学均所入，则戊申刘邑令置也。萧太史公曾记而勒之碑，随以侵牟者乘学圯去其碑以灭迹，后将何考？并附见于此。

工肇于己酉冬，成于庚戌秋。同予综其事者，林别驾君梦鼎，宋君司理万略；分其事者，章汉阳令铨；董其役者，邢学博倬、朱学博时荣；而邢君朝夕拮据，区画周详，于翼成之功居多，可谓殚〔心〕厥职^①；至陈经历治安，陈照磨于阶，典史黄堂，皆与有助勤劳。例得并书。

重修杨柳堤碑记

丘俊孙

夫桥梁道路，王政所先，修理堤防，失时有咎。汉郡治之东北隅有杨柳堤者，踞龟山之左偏，傍月湖之右臂，东滨长江，北通冀阙，西达景沔，南极潇湘，为士民九达之通途，舟车四集之胜地也。往时垂杨夹岸，高柳覆堤，暑月游人憩息其下，观风帆之来往，闻菱芡之芳香，顿忘烦热，毂击肩摩，水环山映，诚此堤之胜概也哉。往亦就圯，得前守王公宗本倡义修复，顿改旧观，致汉上至今犹啧啧王公不去口。亡何，而岁月滋久，蹂躏时甚，洪涛巨浪又复与土木为仇，故蓊蔚者日渐凋耗，而坚好者日渐倾卸矣。行者苦之。

余莅汉之明年，见闻所及，诸务维新，而此堤独溃然不整。每过上台，商诸故老，为捐资鸠工、庀材、斲石，乃至乃营，乃左乃右，乃高原下隤，陆挽水输，而堤用是成矣。《诗》云：“周道如砥，其直如矢。君子所履，小人所视。”于以大复古而号康衢，不是之由乎！

是堤也，绵亘则二百丈有奇，高则一丈三尺，阔则一丈八尺，费则一千五百金有奇。始工于顺治十二年冬月，告成于十四年之三月也。

重修晴川阁记

姚弘谟

沔口，重镇也。环荆郡以千计，而汉阳要；环汉而峙以百计，而大别奇。压大别而庙者禹王，肘禹王而阁者晴川。雄据上游，实与会城望江诸楼相表里，

^①“殚”下，万历《汉阳府志》有“心”字，是。



异时创者盖容有〔召〕〔石〕画焉^①。岁多而圯，久不事修葺，郡典大缺。粤岁壬申，中丞汝南赵公，侍御江右舒公继至，驯振方夏，百废具兴。明年，上初颁元，两公宣德意，采民风，辄车周览，始遍湖湘间矣。暇则相与登黄鹤之楼，吟白云之什，遥望阁址，鞠为丘莽，爰命下执事图之。会楚有大豪犯法，赍入县官，甲第云构，命撤而从事。太守新安陈侯肩其任，不费官帑，不烦民力，三阅月成。飞甍绮疏，层轩曲楹，弘敞騫峙，盖三楚巨丽之观也。

程侯以举坠弘美征记，以诏来者。予少读崔君诗，窃尝寤寐其间，寻抱铅槧，陆沉史局，无因入楚，以舒眺听，古今景物，同异未悉。嗣客零陵，领湖南郡，岁时以职事走会同，酬应仓卒，倏来旋往，则武、汉之胜亦莫得而恣其观游焉。已奉命督全楚学，挈家鄂渚守官盖三年所，历历之树，萋萋之洲，凡诸景物，揽擷几尽，而束发读诗，遂赫赫若昨日事，岂非快哉！若乃眇瞰城闉，襟咽江汉，左蟠冢，右洞庭，云梦沧浪，渚湘汇焉。引秦梁，枕吴蜀，江、黄、蕲、郢罗焉；俯瞩则鸚鹄出没惊湍，黄鹤回翔于矶渚。而金沙南浦绮错于漾灏汭潏之间。旅客居人，毂击肩摩。负者、行者、浣者、渡者、网而渔者，若在几舄之下。神览则下薄日月，傍摘星辰。南眺衡岳，北盼匡庐。偃仰赤壁，上下天门。浮光袭人，万顷澄练。信生平大观也。方其风雨晦冥，八极混合。波涛汹涌而江水立，鱼龙啸而帆樯摧，使人魂悸魄动，长叹太息。悼风波于世路，思道岸之先登。少焉，浓云收，晴景出。兀坐观化，纾幽思于大圜，托冥契于元宰。此身若与烟波相吐纳，而不复问其乡关之何在也。

嗟夫！江山临眺则信美矣，乃两公惓惓于兹阁也，独无意乎？夫辅车相依则维藩之势固，桑土预设则折冲之谋远。汉之为郡，以全楚较之，何啻弹丸？然会城非汉即靡所依，屏蔽孤矣，矧楚固多寇。寇之生也，恒起自洞庭。讫于彭蠡连艘饱帆，逡者睥睨，莫敢谁何。一出九江，如鱼纵鸥没，踪迹不可究诘，往往为畿辅患。顾其从洞庭来也，鹄矶则一隘也。自兹阁重建，若增高于山，浚深于川，金汤之胜于是乎在。且华阁相峙，重关并巩，崤函百二，庶足拟其雄也。即有寇从西来，桓桓之臣，倚飞楼、临伟阁，谈笑樽俎，可使徼卒截流，坐殄狐鼠，不即声势联络，彼不逞輩，业不能飞渡，已先褫魄夺气，敢扬帆东下如曩时哉！

今国运鼎盛，江不扬波，如川之方晴，景物明媚，无足忧矣。夫阴晴何常

^①“召”，当为“石”之误。





之有？脱无知赤子弄兵潢池，会城所恃为屏辅者惟汉阳，汉阳所恃以隘塞者惟沔口，则兹阁也，谓若中流一(壺)[壺]^①，非欤？两公重建，意盖在此。若美亭榭，纵观游，与子墨客卿流连赋诗而已，则非两公长虑却顾、同心共济本谋也。两公弘美，独举坠一节已哉！其可以无记，又敢以不文辞。

是阁也，始创者为前守范侯之箴，若干年而废，废若干年，而两公命今守程侯金再成之，规制视旧宏丽盖十之七云。

六先生祠记

陈凤梧

汉阳为郡，居江汉之会，地狭而民贫，然先贤名儒往往宦游其邦，而流风余韵有存焉者。若宋游定夫先生，以程门高弟，尝知军事，临政之余，日召群弟子讲明道德性命之说，于是人知好学而有士君子之风。其后考亭高弟，勉斋黄先生来守是邦，则益推而大之。郡旧无城堡，力请于朝宁，及达于制司，欲筑城以备南北之冲。其经画精详，可传诸久远。既而岁大饥，余客米、发常平以赈之，分遣官属，亲诣都鄙，劳来备至，远近之民咸归心焉。暇则亲诣于庠，为诸生讲论，有《孟子要旨》二十条，皆示人以为学之关键；又于凤栖山为屋，以馆四方之士，立周、程、游、朱四先生祠以风励之。盖二程先生家于黄陂，与郡为邻。溯其源，则濂溪先生实家营道，究其派，则考亭先生尝游石鼓、岳麓，皆湖南之地有不可遗者，而定夫先生则所谓(常)[尝]游宦者也^②。

世变既久，祠宇荡然。弘治甲子，余姚蔡君钦以工部郎中来知郡事。又明年为正德丙寅，政务就绪，乃按图志求祠故址，适在郡治之后，遂复为祠，而益以勉斋先生、(杨先生)，名曰“六先生祠”^③。

丁卯春，凤梧适以巡学至郡，晋谒祠上下，叹慕者久之，嘉蔡君之留心风化，而诸生之有所瞻依也。蔡君因以记为请属，时校阅方殷，未暇缔思。已已

①“壺”，当为“壺”之误。

②“常”，嘉靖《汉阳府志》作“尝”，是。

③《六先生祠记》之“益以勉斋先生、杨先生”，明嘉靖、万历《汉阳府志》同，《四库全书》中《大清一统志》、《湖广通志》亦同。民国汉阳余家旌所著《新辑汉阳识略·附录文征》载《六先生祠记》碑原文，无“杨先生”三字。清末张行简著有《汉阳县识略》，他在抄录该碑记时指出：“宋立周、程、游、朱四先生祠，据姓称也。明益祀黄勉斋先生，名曰‘六先生祠’，据人数算也。不知何人妄于此记‘益以勉斋先生’下增入‘杨先生’三字”。据此，‘杨先生’三字当为后人不明“四先生”、“六先生”之义而妄增。



秋，知县段钦、训导郝朝元、谭文、余鸿、文炯辈复申前请。凤梧窃惟孔孟而后，斯道失传者千有余年，至周、程、游、朱四先生始昌大休明，有以续其不传之绪，而游、黄二先生则嗣程、朱之的派，皆有功于天下万世不可诬者。今四先生已通祀于天下，列于学宫，而复有专祠，固不为黷，若二先生则尚未有以通祀之典请于朝者，此而祀之，得非为他日之张本耶？近得《勉斋先生文集》，间令诸生录其文移书义有关于郡者，汇成一编，名《汉阳政教录》。俾藏诸学宫，以垂示将来。夫记六先生祠，而特详于勉斋先生者，本其所自也。若夫希圣希贤之方，则先生之〔详记〕〔记详〕矣^①，诸生其试思之。

重建汉阳府学记

李昌祚

汉阳府学治至府治之西，形家言为别山、沔水之所凝汇，而此地独钟其秀。府辖仅二县耳，其间理学、节义、功业、名贤辈出。即今科名之盛，上第高科，世家名族，自卿贰、翰苑清要诸路以及府、州、县专城之属，甲于他郡，或果人杰地灵相应而然乎。

粤稽旧《志》，明万历丙午增修时，乡之大夫、士饮助之费甚巨，先中宪为之记。厥后寇江兵乱，殿庑委诸草莽，祠署鞠为马肆。过其地者未尝不歔歔感泣，而因伤其力之不逮也。本朝建官以来，二三有司沿加葺除，曾有来真山乞言于先文介者，卒以取财浩繁，功遂中辍。今三韩杨公来守土，政行民畏，百废具兴，至谒孔庙，乃周视咨嗟，毅然以修复为任，捐俸斥赎，量工计日，不数月而焕然一新。

告庙之日，释菜礼成，即走书顾余而请曰“愿有记也”。余少游于斯学矣，两世先公且有言，余虽养病林间，其何敢辞。

嗟乎，学校之设，所关于人心风俗岂不大哉。古先王之教人也，礼乐以养其志，器数以习其节；其用人也，九年而后视其成，四十而后试之任。故其士日有事于俎豆筐篚、雅颂声歌，而其志常有。以自下速成躁进之气除之既尽，即终其身抱道而处，与其生徒揖让啸咏于山泽之间，沂沂侃侃，未尝一日驰（骛）〔骛〕乎外也^②。苟出而图吾君，临民而切如伤之怀，赴义而有恐后之羞，其所渐积

^① “详记”，嘉靖《汉阳府志》作“记详”，是。

^② “骛”，为“骛”之误。





者然矣。若一旦当国家疆场之事，戡乱定危，受成于庙，文事修而武功备，煌煌史册，无不共奉为伟人间气，而孰知先王之寓其意于庠序，使人乐其学之大成而养之有素，固如此其深远而无穷乎。后世学校之权不重，礼崩而乐坏，器弛而教失，士子朝夕之所诵习者章句而已矣，所揣摩者势利而已矣。上之所求者在彼，而下之所应者在此，侥幸取效于有司，则为大丈夫得志于时者之所为也，平生志尚如是而止耳。怵之以威而色变，诱之以喜而心动者，何也？中无主也。不自咎其教之不率，而复怨其用之不早，骄语岩穴，讪笑杂出，内多可欲之实，而外施傲戾之色，甚至指重道尊贤者为迂腐，病贵尚齿者为谄谀，人心之坏，酿为风俗，有识者颺颺焉忧之，又何怪乎？叹学校之空名，讥子衿于城阙，几别议所以取士之途，而特不欲越孔子之道，以垂法天下后世也。

今圣天子在上，励精图治，务崇实力，乃严其途于进取，仍专留一师以为表率。汉俗素称淳庞，理学、节义、功业、名贤之流风未坠，诸士多才，砥砺躬行，一返于古，我知其无难，无徒使人谓汉阳之盛，独在科名，以仰答朝廷岂弟作人之化。杨公今日修复学宫之意，其于为政也，诚知所先哉。

杨公名必达，号振声，中宪大夫知汉阳府事。

讨猷贼檄

国朝·魏晋封

逆贼张猷忠者，榆林逋戍，秦陇无良。始舞角于河中，爰狃牙于关内，焰逞襄樊之变，毒穷黄、蘄之间。比以奸抚包藏祸心，而俾怨民构成隙志。金根晚出，玉叶风飞。戕亿计之苍生，殒四朝之黄耆。舳舻尽水，载罪犹沉；钓戟齐山，磔凶莫殚。而方肆谑殿上，如狙骇衣冠；敢藉寝门，似蔡居山藻。诱婪衿以为职，劫佣贩以淫威，而岂意猢猻依晃，犬不吠跖。

兴言及此，能不填膺走也。枕灵姑铎而涕零，望沧浪根而血继。土风可操，空戴南冠。非种当锄，宁孤左袒。嗟乎，某也甚也，犹存共济之心；叔兮伯兮，忍负如充之耳。爰申昭告，用播同盟，无后义旗，率先仁路。方今援剿云集，王子兴师；尚其赴愬雷奔，我能复楚。凡百君子，无恩黄三贼子之恩；不亿健儿，当义南八男儿之义。城借一而必克，户虽三而可兴。则王气黯然，公孙应斩落星处；而屈指定计，杨么合擒八日中矣。



郡伯杨公重建汉阳府治碑记

熊伯龙

汉阳府治在凤栖山南麓，建于有明洪武二十三年，而毁于崇祯之季。我国家始清蠹贼，出民汤火，设官分治，十有余载。枪攘之际，尚僦民舍以居。卑隘偏湫，吏抱书而无所措手。昔所云前枕蜀江，北带汉水，睇吴楚之会，揽荆襄之胜者，杳乎无有。今太守杨公慨焉念之，曰：“吾受事三载，与民休息，兴利整衰，既以其间树丽樵城睥睨而巍然，府治犹独听其久于棘砾乎。”乃捐俸资，躬图画，戒僚属，集板干，量工命日，一规旧制，申请督抚暨藩臬诸监司言状，咸奖谕有加。邦之荐绅士民，以至舆隶，莫不乐公兹举，以亟襄焉。不烦公赋，不扰市廛，不侵工作，而成有日矣。公曰：“是宜记。”属予为辞。

予观汉阳之为郡也，曾不足当一大县，然翼蔽鄂省，受上流之委，黄鹄、禹矶夹江如锁，昔人号活城。是无汉则无鄂，无鄂则无楚，郡虽小，固天下要区也。曩者滇黔阻乱，岁有南师更番迭出，汉为孔道。我邦伯邑侯奔走供给，方馆谷蒟蒻之不暇，而暇问堂皇缔构之事乎？蛮方稽首，虎皮怀甲，兵渐休，役渐减，江汉间之城郭人民渐复其旧，而我公适以政流恩洽，得从容次第修其听事，极轮奂之美，以为太平之观焉。

盖至于郡治成，而汉阳之为乐土始可信也。汉阳之宇宇，而全楚之免于骚困顿始可知也。全楚之肩息，而天下之无复杞忧，而壘耻抑又可决也。则公之皇皇于是役者，所系岂其微乎？予之生晚矣，然犹涉历启、祯之际，睹旧治之巍然，如别山余阜，未几而兵火浸淫，劫灰触目。遭逢盛世，置身禁林，请恩归里，跻我公堂，乃获再见崇薨高栋，与先朝熙攘之时争新比焕，真有如景差所谓观楚山之碧，心眼顿明，又如见故人闲心日足者矣。其私怀愉快，而拜公之赐也，岂后予邦之士民哉。

抑考明高帝以甲辰定武昌，降陈理，汉阳时已安集矣。乃府治之建，迟之几三十年。我朝定鼎十八载，而能埽土而新之，其迟速难易较然若此，则宜以得人如公之故也。《书》记“梓材”，《诗》咏“楚室”，百世之君子来莅兹土者，将无不颂祷公，而予言乌足以当蒿矢乎？

役始于八月初二日，而成于十二月内。凡有事者姓名，各具于碑阴。





重修汉阳县学碑记

熊伯龙

古今祀典，不可以时之盛衰为隆替、运之鼎革论废兴者惟孔子。历览英君谊辟贤牧良守，摧陷廓清之甫定，首焉修举者惟是，因而郡邑奉之，释奠、养老、兴贤、育材，一如京国之鼓钟，而后孝秀之升于京师者，始有一道同风之盛。

皇清御宇，特崇文教。我汉阳不及他中邑，而分疆画界者，必郡之、邑之，诚以晴川为荆鄂之辅，固江北教化所自始也。先是，兵燹，一切圯毁。迟数年而府学修，独县庠废址颓然，在灌莽间莫识也。所存砖石法物，又为鼠窃殆尽。县学师凌与邑生徒怆然感怀者久之。一日，大集郡邑诸生，酹酒先圣之灵，谋卜筑之时。太守丘公祖善其举，用是袒呼绅士并及里之好义者，敛募归官，择吉庀事，又遴乡老之公忠有能者，俾核木石之多寡，鸠工役之怠勤，乃经乃营，乃暨乃涂。丘公祖及凌学师拮据劳瘁，渐有成绪，而役侈费广，又几中辍，幸直指望石李公祖捐助落成，且日至而筹画尽焉。兼方岳黄老师台、守台杨公祖、学台狄公祖咸解俸以襄盛典。适又严学师至任，协力左右之。凡庙堂、门庑以及官署，靡不次第完好。芊芊乎，菁莪之茂也。炳炳乎，尊俎之列也。汉邑虽小，名公巨卿，代有传人。睹斯鼎新之盛，瞻仰有所，讲习有堂，益自奋兴，相与修孝弟，崇德行，明经术，处为真儒，出为名世，其在兹乎！

是役也，始于丁酉岁，成于戊戌，先后间郡守杨公，别驾徐公，司李邹公、姚公，邑侯范公、金公、曲公及龚学师同事相协，例得寿诸琬琰，用光俎豆云。

四官殿碑记

熊伯龙

五行皆生人之资，独火烈，民望而畏之，盖有神焉，不可度思矣。苟祝融煽祸，而当事者漫不经心，吉凶同患之谓何？何燹理之为也。楚介南服，火德居旺，而汉镇又适当五达之衢，黔庐赭垣，何时蔑有？人共知其为竹篱茅舍之所致，而卒莫敢有建议毁易者，盖凡民可与乐成，而难与虑始，自非有实心任事之监司主持于上，奉行唯谨之守令劝勉于下，求其能任德任怨也，戛戛难之。

天佑南国，萃此吉人，方伯刘公，臬司陈公，监司饶公、王公、朱公，都阉钱公，商同守宪程公，毅然下诛茅之禁，檄行郡县，易以瓦甍。维时太守杨公、邑侯侯公实左右之，下逮县尉李君、镇司王君亦骏奔恐后，旬日之内，向之黄茅、白苇，一望而百堵皆兴，苟非循良素著，何以得此于民哉？



乃公等犹谓人事之已尽，未必天数之常享，敬诣祝融，为民请命。爰是步自江浒，见有四官之旧庙在，辄然喜曰：有是哉，江汉合抱，洒沈淡灾，此真水火既济之乡，神灵凭依之所乎。各捐俸金若干，并及本郡绅衿商民量力资助，革故鼎新，而庙貌由是改观矣。乃或者不祭，徒以泛泛祈禳视之，不已过与？夫许不吊灾，君子恶之，谓其不近于仁耳。他若反风灭火，事涉不经者，皆吾儒所不道，曾大君子而出此乎？《春秋》书昭公十七年有星孛于大辰及汉，梓慎知其将火，郑裨灶又谓能弭火，不用吾言将复火。乃国侨卒不用灶言，而亦不火，非修德而灾不能侵之明验耶？

今乃以天道杳茫之故，徒乞灵于土木庄严之相，予固知公等之必不出此也。盖公等意念深矣，诛茅之禁，既有以尽人事之当然；庙貌之新，又有以回天意之或然，且以示后之接踵莅兹土者，（瞻）〔瞻〕宫庙之嵯峨^①，发晨钟之猛省，入庙思敬，固即焚香退舍之大本云。

汉口书论一则

国朝·唐裔潢

按汉阳府城龙脉，自九真发源，从西门入城，先结凤栖府基，后结大别北障，而大别山头从东抛下余气，自木场走南岸以为后托，直自月湖口方止，其上即有卧虎山、黑石山镇锁兜住，十分有力。是南岸为府城后托矣。汉口龙脉乃平洋龙也。平洋最宜坐空朝满，今汉口以大别为朝山，南岸为近案，后湖空旷，正合坐空朝满之局。从前未盛者，以水未绕也。

考襄河之水，郭司口黑山对岸有襄河口，水从此入，约长四十里，然后入江，《禹贡》所谓汉水“南入于江”也。明成化初，忽于郭司口下直通小河约长十里，汉水径东入江，后襄河遂淤，于是汉口有兴机矣。夫汉口，初亦芦洲耳。明洪武间，未有人住。至天顺年间，始有民人张天爵等祖父在此筑基盖屋。嘉靖四年，丈量上岸有张天爵等房屋六百三十间，下岸有徐文高等房屋六百五十一间。汉口渐盛，盖由小河水通，商贾可以泊船故。今为天下有名马头。经云：“行到平洋莫问踪，只观水绕是真龙。”又云：“风吹水激寿丁长，避水避风真绝地。”汉口之盛，所以由于小河也。然小河之水，实赖两岸夹住旋绕入江。

康熙二十年前，南岸两旁皆有房屋，中间街道可通车舆。自二十年后，日

^①“瞻”，为“瞻”之误。





渐崩颓，迺来竟不忍观。北岸亦有崩裂。揆其所由，总因汉镇水口之黑山凿石打伤，兜收无力，水无约束，故荡洗如此。是坏府城之后托，败汉口之近案也。盛可常保乎？无如盖造房屋者，只顾贱买蛮石以砌墙，不知实割己骨以补肉。古语云：“皮之不存，毛将安附？”倘风水既坏，水道他徙，虽有高堦厚墙，亦难独享也，昔之金沙洲可以鉴矣。

裁府议

国朝·王世显

请查繁简之殊用，酌截补之宜，以弘规制，以重永久事。

沿革损益，代有令典。指臂犄角，历多良规。故变古非云复古，而因时即为救时。伏读山西道傅疏内有归并简僻之府一议，此盖为裁冗员、省繁费，诚理财之石画，经国之远谟也。但台臣身立朝端，心轸民瘼，察汉阳、南雄、兴化三府所辖，止于二县，概疑简僻，理所应然，而未尝亲履楚地，确见汉阳之冲繁有十倍于他郡者。姑无远摭古昔，广征舆图，而以因府制宜之心，建久安长治之策，敢指称数端，为牖陈之。

汉阳之去省会，仅隔一江，计程不过十里，前代之特设府治者，原有深意。盖一以藉股肱之力，一以成辅车之势。自兴朝以来，俨然分江南、江北，与武昌屹然两雄镇矣。频年王师屡出，南征则驻武昌，北旋则驻汉阳，粮饷供应，两府共办，汉阳尚以属县本少，员役不多，每苦奔命不给。若复议裁，则武昌遂失左翼，汉阳更无宁晷矣。其不便者一。

汉阳既属冲繁，非同他郡外县去府稍远，输纳较易。若忽议裁，则必择隶于黄、安、德三属，俱在数百里外，钱粮之解运，既已道路远隔，虑有失脱，夫役之僉派，又以符檄缓下，恐致违误，况盐商为国课之所自出，府裁则形势单弱，商贾将有溃散之忧矣。其不便者二。

自古重地须置重臣。本省湖南有偏沅之抚，郧阳有抚治之院，以暨他府除太守外，有分守、分巡之设，亦曰星罗棋布，臂指相使也。今汉阳为江北首府，巡方自出，巡外实驻节其地，一有缓急，与督、抚会议呼应甚灵，若忽议裁，则有鞭长不及之叹矣。其不便者三。

且通省皇粮，湖南则贮之武昌武府粮厅兑运，湖北则贮之汉阳汉府粮厅兑运，既取其边江便发，又使之各有典守。倘汉府裁，则粮厅汰，国储重大，将并责之县令乎？抑使远府遥制乎？其不便者四。



更可议者，府去则官可改选，而本府庠生盈千，学生数十，亦并之邻府乎？此在增附犹可酌寄他学，食饩临荐者遂弃之盛代乎？恐非所以育养人才之意也。其不便者五。

且汉阳汉口一镇，五方杂处，狱讼易兴。若议裁府，则必远隶数百里外，而奸宄之徒藉以拖累，行其诈骗，良善永无聊生之日矣。其不便者六。

即曰视户口之繁简为郡邑之升降，汉阳十数年来屡经编审，户口有增无减，按图可索也。信如前议，则汉阳当在议升之列矣。愚以为黄属之黄陂、德属之云梦、安属之沔阳，俱属汉邻封，势如错绣，若截此数县以益汉郡，在数县更乐附近之便，汉阳永壮金汤之固矣。至于裁一府之员役，樽节之费小，损全楚之形势流渐之害大，历历有据，凿凿不爽。恳祈祖台具由转详诸上台，查汉阳委系冲繁，万分难裁，更望俯怜冲疲，恩请截补，与台臣疏中所称本无刺谬，则全一郡之要会，而四方胥奠；弘一时之创制，而万世永赖矣。

请改黄陂、孝感二县隶汉阳府管辖疏

迈柱

题为酌改府辖，以均繁简，以便责成事。

该臣看得府辖之州县必相去密迩，凡起运钱粮、解审案件，及一切公务，俱属便捷，于地方庶有裨益。查湖北黄州府属之黄陂县，地当南北孔道，去黄州陆路二百四十里、水路三百余里，远涉大江，有风涛之险；其去汉阳府仅九十里。又德安府属之孝感县亦属南北冲途，与德安相距虽止百里，而前赴省城必须向北绕道，实属纡回，其去汉阳虽亦有百里之远，然系赴省必由之路，无庸绕道。先据布政司请，将黄陂、孝感二县改隶附近之汉阳府管辖，经臣批令飭行，该府县确查妥议去后，今据湖北武昌布政司徐鼎、湖北武昌按察司王肃章会详，据黄州府详称，确访舆情，咸以陂邑改辖汉郡实为官民两便，并称陂邑系水陆冲衢、东南孔道，在黄为边鄙之地，统辖难周，属汉称附近之区，管理甚易，益寡裒多，允宜改隶，酌繁就简，实便公私等情。

又据德安府详称，确访士民舆情，以孝邑改隶汉郡，则赴府为往省必由之路，凡起运钱粮、解审案件及一切公务，可免稽延，且士子应试、验看等事，俱属顺便。于地方形势调剂得宜等情，各由司详请题达前来，臣覆加核查无异，相应据详具题，请将黄陂、孝感二县改隶汉阳府统辖，以便治理，以顺舆情者也。

臣谨合辞具题，伏乞皇上睿鉴，勅部议覆施行。





请修汉阳江岸奏

德沛

奏为江岸坍塌日甚，城社民命攸关，亟请修筑，以资捍御事。

该臣看得汉阳一府与武昌省会仅隔一江，为数省通衢，两湖要地。其城之东南两面滨临大江，波浪冲激之势，亦与武昌相同。从前原有石堤以为保障，历年久远，未及加修，以致倾颓殆尽。臣同调任抚臣张亲往踏勘，由西关小马头起，至东门上马头止，岸高一丈二三尺至二丈内外不等，岸面紧贴城根之处颇多，进深即有宽者，亦仅丈余，至二三丈不等。岸上居民房间内贴城墙，外临江岸，至南门之西江岸尤为低洼，城垣亦即因势就下。询之居民，兼验水痕，每年江水(长)[涨]时^①，其高处水与岸齐，若稍低之地，居民亦多迁避，而聚洼之处，城根半在水中，向赖城南之鸚鹄洲以为外障，今洲已湮没，外无捍御，江水直洗堤脚，且城南之张王矶一处，岸陡河泄，适当江水冲刷之要地，虽居民较少，而逼近城身，尤关紧要，除东门大马头顺流而北，水势稍平，堤上居民稠密，岁事补修，尚属无虞，毋庸议修外，其自西关小马头起，至东门上马头，计应筑正护岸各二百六十七丈，又张王矶前应筑二层护岸三十丈，统计正护两岸共五百六十四丈，确估工料实需银三万一千二百八十八两零，请于司库征存乾隆三年地丁钱粮内动用，至兴修之期，应请勒限年半赶修工竣，据实造册报销。其承修、督修各员，即委汉阳同知王式淳、汉阳通判段烜明、汉阳县知县沈孟坚等分段承修，并令汉阳府知府胡学成就近督催。仍委署驿盐道朱总理其事，务令实力奉行。如蒙俞允，容臣飭定估册，另行具题。至临堤居民房屋，将来有碍兴修，不免迁(折)[拆]者^②，不及百间，其应如何给费给价之处，臣另行通融办理可也。

臣谨具奏，伏乞皇上睿鉴，勅部议覆施行。

请添设汉阳营兵弁奏

德沛

奏为请并营制，以靖盗贼，以安商民事。

该臣看得设立营汛乃国家经久之法，自不便辄议改隶。然地方紧要，不足以靖盗贼而卫商民者，亦不敢因循，使有鞭长莫及之虞。

①“长”，当作“涨”。

②“折”，当为“拆”之误。



查汉口一镇，为七省水陆通衢，五方杂处，洵为人烟稠密之区、奸宄易藏之地。向隶汉阳营管辖，驻扎汉阳府城，辖汉阳、汉川两县，及汉口一镇。原系参将额兵一千名，于康熙十九年改为守备管辖，仅把总一员，兵丁二百八十一名。至雍正九年，改为都司，弁兵如故，汛广兵单，员弁不能遍历，巡查兵丁不敷，差防殊多，顾此失彼，自宜添设官兵，以收实效。但兵额有定，岂敢另增！查有武昌水师一营，额设守备一员，千总一员，把总二员，制兵二百八十一名，向隶武昌城守管辖。第武昌省会之地，标营员弁足资缉防。若将武昌水师归并汉阳营，移驻汉口，不惟城池、仓库及汉口防守无虞，且陆路地方得以分布周备，即大江、襄河亦得以巡缉严密。合之汉阳营原设制兵，共有五百六十二名，应须大员管辖，请将汉阳都司改为游击，即以水师守备驻扎汉口为该营中军，仍管理水师船只事务，兵不加添，于地方营伍均有裨益。

如蒙俞允，游击一员例应另补。查现任汉阳营都司范廷卫系江南人，由武进士出身。该员弓马熟娴，谙练营务，留心地方，洵为称职之员，即以之升补该营游击，驾轻就熟，该员益加奋勉，而收地方缉防之实效。至添设守备衙署，及派汛防弁兵，容臣另行办理。臣札商提臣颜意见相同，是否可行，恭请圣训。

臣谨具奏，伏乞皇上睿鉴施行。

重建太乙楼记

治署之东南隅，旧有楼曰“太乙”，雄视江汉，称杰构焉。日久就倾，荡然乌有。今天子丁卯岁之仲春，余承乏兹郡，始下车，周视垣舍，询问向时层楼故址，悉为瓦砾蓬蒿，亦莫稽创自何稔，或曰前守郝公士鐸造也，而颓覆则在五六年前矣。于是有言修举废坠，责在官司，而振作显庸，当自近始，盍亟捐貲重葺，以昭示初政。余谢未遑。又有言楼未圯时，眺望殊胜，盖左江右汉，两郡之波光岚翠，驿树风帆，胥呈眉睫，景与鹤楼、晴川不异。若还复旧观，时时与宾从登临，把酒赋诗，亦醉翁、丰乐之遗意也。余谢不敏。又有言署基形类栖凤，而东南势陷如垂翅，建楼所以傅之翼也，翼张斯举矣。前此若郡伯某某，皆蒙显擢，迨某君遂以落职去，则斯楼兴废之故，予姑“唯唯”，犹心疑未然。数阅月，而父老绅士有籍籍议于巷者曰：此非独署以内也，吾一郡之人材运会实攸关焉。往者汉上人文号称极盛，自斯楼废而士气稍衰。青乌家数数言之，使君得不为一郡计乎？





噫嘻，夫《诗》、《书》教泽，俾文治光昭，守斯土者之任也。诸父老绅士言岂无征欤？闻之太乙主文章，东南为巽位，昔汉武祀太乙于甘泉，见诸《礼乐志》，而刘向校书天禄，乃下降燃藜，其在《易》曰“齐乎巽”，又曰“巽以申命”，今将置轮奂于万物洁齐之地，以邀燃藜之灵爽，而崇祀之，是不啻启东壁图书，谆谆聚多士告语，安知青藜老人不日陟降兹楼以焜耀吾士？且余既不若文翁、子厚起学都市，以文章法度指授后进，第令为一楼而可不振人材，扶掖运会，事莫易于此者，尚安得因循谄谢，无以塞众人之愿望也乎！此则太乙楼所由重建也。时甫落成，适宾兴晓揭，郡内之士获俊者，遂倍多曩昔，统计四邑，甲于九郡，形胜之助，非明效大验欤？

是举也，役工九百有八十，为楼三级，檐桷翬飞，高三十五尺，下横广十九尺，纵如之。凡工作材用之费，二百有余缗，捐自薄俸。窗楹壁户，有涂墍而罔丹雘，取朴坚而去雕镂，所谓无侈前人，无废后观也。

时乾隆十二年重九日

知汉阳府事长沙陶士楔撰



《汉阳府志》卷之四十八 艺文

艺文志

汉川县

汉川县儒学记

元·黄清老

汉川县在大江北，汉水经县治南〔北〕流〔百〕六十里^①，至大别山，合江朝宗于海，地平衍，数罹怀襄，不常厥邑，四迁至长城而〔止〕^②，庙学从之。至元中，监邑五麻儿怀义始营表奠基^③，以闲田一十三顷有奇在大赤渚者供学舍之米。大德丁酉，前尹惠政肇创礼殿西庑，几五十年，屋宇滋坏。后至元己卯冬，江南湖北道金宪王公朝烈、按部最博士陈士臣理而〔备〕〔修〕之^④，他故弗能及也。

越〔明〕〔二〕年辛巳^⑤，杨使观自词臣出宰，政行讼清，百废咸举，将有事于庠宫，首会廩粟多寡，学籍漫不足稽，则征耕者所授地约正之，得隐田〔百〕顷有七十亩^⑥，岁增谷一百七十石有奇，曰是足养矣。乃阅生徒有力役在官者，檄所司弛之。

监邑月列铁木儿是其议，俾〔复〕役以输凡学之用^⑦，且与之约曰：七十二子仪像，学者瞻其德容，皆可兴起，旧有阙，绘之可乎？〔问〕〔门〕故所有^⑧，风雨若不支，非所以尊严宫庙，新之可乎？太学有斋，肄业者居之，今无其所，是微教养也，予欲作之可乎？众咸曰“唯”。

已而斋既落矣，学无师，譬无相，奚其可？乃遣使奉币礼名儒主其席。士闻之，

①据嘉靖《汉阳府志》，“北”为衍文，“流”下有“百”字。

②“而”下，嘉靖《汉阳府志》有“止”字，是。

③“怀”，嘉靖《汉阳府志》作“进”字。

④“备”，嘉靖《汉阳府志》作“修”，是。

⑤“明”，嘉靖《汉阳府志》作“二”字，是。

⑥“田”下，嘉靖《汉阳府志》有“百”字。

⑦“俾”下，嘉靖《汉阳府志》有“复”字。

⑧“问”，嘉靖《汉阳府志》作“门”，是。





咸相与负笈担簦，自远而至，曰：“愿亲弦歌之化。”因辟地于堂北，筑室四楹，扁曰“文会”。疏以轩牖，缭以垣墉，嘉植荫之，高明静虚。公退日一至，与诸生问辨进善，而海不能，众益用懋。博士弟子咸德侯用心，具本末，来请记。

因谕于众曰：“邑侯修学训诸生，何居？知之矣。天生兆民，作之君师，养而教之，天子俯广轮画疆理，以天命分寄于司〔徒〕〔牧〕^①。尧、舜、禹、汤、文、武治天下，道在六经，昭昭较著。武城小邑，子游以是教其民，夫子喜之，岂以小大二其用哉！父子、君臣、夫妇、长幼、朋友，在人为大伦，天以与我，日用不可须臾离。其践行谓之合天，反是谓之弃天。有君子焉，悯其失而道之，求其从则乐而与其进，其弗顺则惩而加之威，所以祇奉上命，而行其治于一邑者也。今杨侯于汉川敦本务农，轻徭薄赋，以休养生息，复兴教崇化，俾人人求其德而力践之，盖欲与斯民同归于君子，措刑于不用，是即武城弦歌之心也。子亦尝思之乎？”众曰：“既承教矣，敢不加勉，以无负吾邑侯之德，愿授而刻之，以励其后人。”

于是乎记。

重建汉川县学记

冀应熊

皇帝八年春，薄海内外，罔不宾服，乃考图稽贡，莅政于紫宸之居，纳廷臣请，有云“兴学校，以励人心”。大哉言乎！应熊不敏，切奉宣治斯邑，既父母之兼师保之。惟是根本之地，匪第乐成，且有厚期焉。当吁俊宾兴之年，圣天子侧席傍求兰芷之文，日星并耀，芝检之封，函笈争徽。望气者金谓川庠郁郁葱葱，定有吉人伟士，霞举云蒸，用昭文明炳蔚之盛。应熊与有荣施焉，谨拜手颺言曰：事关一邑之风尚，则举而无疑，其敦崇学宫之谓乎！

古成均之设，取立三不朽于当代者，以为乐祖，祀诸瞽宗，上庠无成祠也。其有帝后斯儒功德在人耳目者，如天老、高密、咎由、百虫将军辈，江汉人像祀不绝，惟我至圣先师，自明嘉靖中易像为主，尤为得体。至纪传所载钟离意之怀璧，鲁恭王之坏宅，灵爽式凭或有然者，然其事近诬，不足多述。乃尊崇令典，自汉唐以来统更数代，年历数千，见之大书特书者，具煌煌史册，且不独太学为然。即下逮郡邑，大昕鼓征，较若画一。川邑，古安陆谿水地，南抵

^①“徒”，嘉靖《汉阳府志》作“牧”，是。



沔口，东控临障，西北错于云梦、鄢、潏之交。学宫旧址在伏龙山开天观之上，明兴始改今处。其庙寝陋而圯，其规置阔而隘。余初治邑时，以春秋刚日适饬省牲，厘举大典，与邑人士扼腕移时，止以军役繁兴，物用告诎，未敢侈言改作也。粤两期时和年丰，邑之绅士合词以请，正符余向来厚期必举之意，遂勉捐薄俸百金，力新首事，虽愧尘鞅仆仆，未足为都人士倡，第思古人节以制度，说以使民，必有其本原焉。不治斯邑矣，而忍令大成之丹雘削色乎？两庑肴杂可无稽乎？戟门尘渍可无清乎？且棂门当复子午之向，泮水当在戟棂之间。启圣合食，宜奉高寝。明伦砥士，宜肃闲楹。仪门，黉门文范之所由也，宜节进止。数者一之弗度，是委至教于草莽矣。内度〔诣〕〔诸〕志^①，外稽诸谋，用财几何，用役几何，土石材苇于何取之，脂胶黝垩于何给之，若是者数月。孜孜然如子弟为父兄营室，一椽一瓦，一牀一闼，盍欲远去鸟鼠风雨之患，而后即安。绅士人庶，亦如子弟率父兄之指，肯父兄之堂。几阅月而报成，不动正供，不妨农务，鼙鼓不俟五鸠，咸曰：作大事必顺天时，洵有然也。然所以为是者，欲使乡人、邑士瞻仰棂星之易乡，知为黉宫之门也；游憩璧水之环恤，知为黉宫之水也。旅进戟门，双柏阴森，密干叠翠，莫不洗心涤志于晃昱之中者。

知予起事动众，凡为俊秀观厥成也，藉芹香藻采之旨，写都人髦士之光，倘不俎豆其间，焉用陈说为？故愿与邑人士交勉之。由是而榱栋穹窿，几筵熠耀，笾豆奕奕，钟鼓煌煌，礼在罍罍，义在康庄，莫不鱼鱼雅雅矣。执经问难，圜桥观听，将为吾皇庆厥猷之多士焉。至于襄流滢洄，飞举秀拔，形胜之势，应在人文，江州固称才薮也。然健翮凌霄，往亦数见，自兹黉序鼎新，联辉四美，则宣圣之灵，呼吸可通，行且见威凤祥麟羽翼盛世矣。余即不敢贪天为功，亦庶几补偏救弊之一助尔。

昔范阳祖君知袁州，严治庙寝，盱江李觐亟为之记，柳河东书之，章京兆摹之，迄今昭诸简册，赫赫不朽。时为川庠改观，乌可无一言以记其事！顾金石云陞，讴吟垌野，则以俟后之文明炳蔚者。

郭中丞惠政记

李维祯

汉水至大别东而入江，其上百里而远为汉川县，水无所归，弥漫四布，转

^①“诣”，当为“诸”之误。





徙无常，田可耕者方十之一。邑故有沉、安二所征渔课五百金有奇，自归景邸而加赋三倍之。又归潞邸而加赋十倍之。诸阉寺奉王命来，倚势作威，自租挈外，所掊剋攘夺更无算，又当舟车馆穀供亿，蒸仍民力，靡有孑遗，耗矣。诸阉寺拥蔽王，莫以闻，即疏于朝，往往重亲亲之义，报闻辄罢。

御史中丞郭公心哀之，失今不为计，民不走四方，则力槁尔，是无汉川也。于是捐长沙岁征、安庐二仓，供公督府军兴之费，凡一千三百余金，代汉川输正赋，以解倒悬剥床之困。而公方奉诏佐台事，行经汉川，邑缙绅逢掖父老妇孺无虑数千人，遮留公车不得发，更虑公行后或生得失，不能久徼惠。公曰：“是不难。”下檄所司著为命，而中丞李公自楚左丞代公，守公法顚若画一，不为群议所夺，行之两岁，汉川民稍息肩。而其长者谓三孝廉李君、龙君、萧君：此吾邑百万生灵之命也，何不勒之石以垂永远。而三孝廉辞曰：“有卿大夫在。”则以属周观察明卿，明卿则又以不文辞，而属不佞。不佞先世家竟陵之皂角市，在汉川境土，而先大夫亦尝置不腆之田于其邑，今诸弟实占藉，为利害，固不得秦越视也。乃按孝廉观察尺牍，记其大概如此，而更申其指曰：昔周公制礼，司徒以天下土地之图，周知九州地域广轮之数，山林、川泽、丘陵、坟衍、原隰之名，制邦国都鄙畿疆而沟封之，以土会、土宜、土均之法辨物名，制地征。少司徒建国正封，地讼以图正之，而太宰分九职九赋，少宰、司会、司书各有版图，闾师、县师、遂人、川衡、泽虞、川师、原师任土作贡，各异其物。司险掌九州图，周知其阻，职方氏为尤详。盖六官之中，而疆理之事、版图之藏，十居其一。岁会、月要、日成，互相廉察，人不得为奸，故封国累千，而天下（密）〔审〕如^①。假令《周礼》至今存，汉川地高下延袤可按图而知，王邸安得以汙莱为督亢而倍其征？诸侯恶其害己而去其籍，《周礼》之亡久矣，矧于季世齿路马而忌投鼠，莫如藩王，据城社而为釜鬻，莫如阉寺。中丞公郡国大臣，欲以田野细氓之故达于君门，万里之远，必无幸矣。上不欲伤天子肺腑恩，且亏国赋，下欲佐百姓之急，耻与刑余人争口舌。不得已而去，先去兵，故损军兴以活此一方民。民为贵，君为轻，瘠民以肥宗藩，犹割肉而救馁也。中丞公此举备有孔孟家法矣。昔楚康王时，（为）〔芳〕掩书土田、度山林、鸠薮泽、辨京陵、表淳卤、数疆潦、规偃渚、町原防、牧隰皋、井衍沃^②，量入修赋。君子以为礼，

① “密”，万历《汉阳府志》作“审”。

② “为”，为“芳”之误。下同。



得周公遗意，纪之《春秋》，名声流而不泯。

然楚非有牵制如今藩王、阉寺之难，而〔为〕〔芳〕掩因势利导，亦未尝损上益下、若公卓犖可纪之政，汉川士民尸祝不忘，固其所也。不佞抗颜而受笔札之役，岂曰能文，要以存其故〔贵〕〔实〕^①，比于《周礼》图藉，使后之人有所考镜云尔。邑令王学礼、郡守胡笃卿与闻其事者，得并记焉。

迁汉川县学记

朱衣

汉川县儒学，元至元乙酉自大赤与县同迁今治，可考者六迁矣。乃岁甲午，诸生雷鉴、胡宗〔周〕相与以请于中丞侑溪姜公^②、侍御南山高公，遂议于守巡一山邹公、银所米公^③，勘议于郡守贾公，通会用金一千八百四两，时効义而助者七百六十六两，市地四百一十五两，数有余羨，民无征取。乃卜地高氏伏龙之阳，厥既得卜，则经营。越三月功成。鉴等相率请记于守，守以属〔于予〕。

〔予坐二子而语之曰：“嗟乎！予何吉哉？”曰：“以言学也。”曰：“学何先？”曰：“明伦为先。”曰：“子知夫伦乎？其分：君臣、父子、夫妇、长幼、朋友；其理：亲、义、序、别、信。理原于性，则于心，分则日用所不能外。此童子之所知，而白首不能尽焉者也。夫以日用所不能外之分，而各具夫心性同得之理，随分以尽理，则分为实分；因理以足分，则理为实理。分安理得，则伦无不明，民无不亲，国无不治，天下无不平。尧、舜、禹、汤、文、武、周公、孔子之所以为治为教，后世之所以不古若者，一得一失也。子之言学也，曰明伦为先，是非子之说也，三代而上，未之有改也。子诸子之出入是学也，词章功利之外，有复及子之说者乎？是非子诸子之罪也。三代而下，未之有改也。子诸子当词章功利之习，而其言乃必先于明伦，是必有见于明伦之为是，而未尝不以词章功利为非。苟舍其非，以求其是，随吾日用所不能外之分，以尽吾心性同得之理，则德性以尊，问学以道，广大以致，精微以尽，推而行之，始于一邑，而倡之天下，使君臣、父子、夫妇、长幼、朋友各尽其理，各安其分，则治平之业不可成乎？”二子起而问曰：“吾固已知其是非矣，吾不能决是非而为趋舍也，终言之可乎？”曰：“坐，请以学譬。子之学今七迁矣，知其不善则迁之，不善又迁之，又不善

①“贵”，万历《汉阳府志》作“实”，是。

②“胡宗”下，嘉靖《汉阳府志》有“周”字，是。

③“银”，嘉靖《汉阳府志》作“艮”。





屡迁之，以卒至于善，使非屡知之屡迁之。伏龙虽善，孰从而止之哉？子之出入是学也，必曰莫先于明伦也，则随其日用所不能外之分，以尽其心性所同得之理。而或未安焉，曰未善也，不然，何本然之良知未满足也？从而迁之，而又未安焉，曰未善也，又从而迁之。迁之不已，而必求至于安，使吾之良知有以各满其本然之量，日新月异，无少欠缺，是之谓止至善。故迁其不善，以止于善者，舍其非以求是也，是之谓能决。子如是予言也，子力行之；如以为非也，非予所知也。”]

〔二子以复于守。守曰：予志也。是举也，中为先师庙，后为明伦堂，又后为敬一亭；前为戟门，又前为棖星门；东为东斋，为官署；西为西斋，为启圣祠；东南为东庠；西南为西庠；又东南为射圃，为号舍；又西南为神厨，为名宦乡贤祠。〕

〔力任其事，图而授之者，太守也。董其事者，县丞罗环也。〕^①

堪輿家曰：汉阳之山，显阳台，尽于大别。伏龙者，阳台东支也。主势耸拔则开天，观县治反跨龙背，旧学在偏薄无气处，皆未善。今学已卜吉，意者县治其有待乎！

和公堤记

安城吴节

汉川，汉阳属邑也。西有甌山，途行之人至河口一十里，又自和公城陆走至刘家隔一十六里，皆要路所经。凡星使之往来，邮传之递送，与四民之经行，恒络绎不绝。每春夏之交，汉水泛涨，道路淹没，则阻隔行者，虽有舟楫，然待渡者蚁聚，不胜纷兢，且嘉禾漂溺，民甚病之。成化庚寅，抚台繁昌吴公巡历至兹，询民疾苦，咸以是堤为言。公慨然起役，首委布、按二司，专任本郡通判沈选、知县陈德督其役。辛卯启土，先筑甌山堤。越明年壬辰孟冬而功成。（已）〔次〕筑和公城堤^②，沿堤遍植杨柳。越明年癸巳而毕役。

功成，邑民老稚相与号其堤曰“吴公堤”，来征言。予为书其建筑之岁月于石，并系之以辞，俾行者咏颂焉。辞曰：“吴公堤兮传四方，千秋万岁不能忘。”

①“于予予坐二子”以下至“县丞罗环也”以上文字为乾隆《汉阳府志》脱落文字，今据明嘉靖《汉阳府志》补足。

②“已”，嘉靖《汉阳府志》作“次”，是。



刘家隔记

黎淳

刘家隔为汉川县旧址，距今县三十里。相传宋知军事刘谊隔岸种荻，因名。或云楚人称水滨为隔，土业为刘氏也。

地卑下，每岁春涨，逮秋始涸，榛芜沮洳，人鲜居之。然地脉来自应城，蜿蜒起伏，衍为平原，〔用〕〔周〕广四十里^①，而襄水、〔汉水〕、郢水、郢水、白水五派合流^②，环为一区。其初始居民十数家。宣德、正统间，商贾占集者亿万计，生齿益繁，贸迁益众，卒成巨镇。今编民八里，驻节有馆，送使有舟，可见其人民之盛。（巡抚南昌白公）〔岁己酉，藩臬群卿〕请于朝^③，设巡司。都宪繁昌吴公檄巡司高俊、刘伯刚经营改作。辛卯三月讫功。都宪吴公再登焉，叹曰：“昔九州为壑，匪仗禹功，江汉何平？小别、大别，春秋、战国为必争之地，中间贤豪整顿不知几更化矣。未有留心斯土者，天岂藏灵秘奇，必待今日始发乎！”

汉川昌侯去思碑记

尹大本

川故云梦地也，江汉二水交汇之区，编户凡八里，地之高阜下湿者各居半焉，恒雨则下湿病，差旱则高阜病，岁不能以常稔也。岁越庚申辛酉，圯于垫溺，而壬戌曠旱，百谷鲜登。侯以是秋九月至自枣强，曰：“民病极矣，承乏如之何？”蚤夜以思，就其巨且急者而汲汲为之所。适留都纲运趣发，里胥告匱，至举贐产莫之售，〔日〕〔曰〕：“威用榜笞，终罔攸济。”^④乃下令闾右之率义者便宜劝贷，而复捐金以先之，不涉月日，宿逋毕偿。会景藩得请推民川泽之淤坏，调取其羨而已。

然川泽淤而成壤，鱼不得畜，而赋载赤历，额输户、工二部者，责之壤地，犹逋以年积，拷禁殍死，不可胜纪，而〔推〕〔榷〕使之〔虐〕〔虚〕^⑤，穷搜汗莱之外，悉计亩而概加之算，守土者不与闻焉。是故赋额浮于其旧不啻数十倍，视之旁县为尤。既而督赋使来按图取盈，而唤呼、而繫系，淫刑以逞，惨于噬啗，其力拙莫能应者，谋及转徙，宁自经沟渎而不知悔。侯曰：“政在安民。境内颠

①“用”，嘉靖《汉阳府志》作“周”，是。

②嘉靖《汉阳府志》“襄水”下有“汉水”，是。

③此处文字，原作者删录时有误，兹据嘉靖《汉阳府志》删正。

④“日”，据万历《汉阳府志》作“曰”，是。

⑤“推”、“虐”，万历《汉阳府志》作“榷”、“虚”，是。





蹶若此，奚有于官？”矢以祸福自任，语使恤下缓刑，而义形于色，不但以去就争。使因恐之曰：“民，所爱也，赋，所重也，重所爱以缓其所重，责在尔矣。”乃退而孚号群姓，晓以上下相维之故，各竭力匍匐倍偿。倍偿不足，继以称贷；称贷不足，继以市鬻。日有所输，皆不能以如算报盈也。一日，使持牍来，展省未竟，忽大风撼树，火起飞然民屋。曰：“弗闵于天，咎在政也。”且拜且泣，徒步往救，不数扑而灭。明日，郭外警报有暴寇至，曰：“弗恤于人，咎在躬也，犯我廩藏，将不知其所终。”奋不顾身，倡邑中勇敢追奔巨泽之傍，手刃勅寇一人而还，误中流矢，几于不起。士民修祷之衷，窃有子弟之于父兄者。上嘉捍御之劳，有曰岂从井以求仁，有曰非时辈之可及，兼遗之金，以速需药之喜。夫皆谅其惘素而甄别以优之也。创愈视事，益忌之，曰：“赋之后时，罪在有司。”驰上于朝，下部院勒臬司而平讞之。侯率逮治之。众呜咽求理，赋额多所改正。因中暑疾作，七日勺水不濡口，苏而讞成，议更于官，曰：“民席其佚，没齿无憾，去留弗计也。然政滞于偏，志有逮而未臻于理，其大有三，不敢诿之今日。”

爰昭之士，曰：“庙学，材贤所关。卜吉，仍旧址之阳。”请之当涂，厥有成议。若其相诸耆民而落成之，彼栋楹瓦甍不改其故，昨移徙之需，有先日议助羨金者存，不必取之帑也。遂諏日庀工，三阅月而工讫。责之胥吏者，曰：“兹版籍更编之期，多影射为奸。愚给于智，弱陵于强，率此之由。”乃参伍其弊，取而厘正丁亩之欺者，无虑数百户。故事，县驿供亿官程日而责之民，或中人百金之产，荡于一朝之冗。曰：“民之厉也久矣，更而张之，夫何俟乎！”乃酌为官司出纳之条，缕析不遗，请之两院诸司，咸久其议，而严为之令，民称便焉。顷有谗之逐寇来窥，桴鼓解严，啸聚群丑约四百有奇，〔郤〕〔部〕障〔雀〕〔萑〕泽^①，去县仅三舍许。居人劫于杀僇之酷，公行入市，不敢问此，其变之伏也。侯闻之曰：“川难未歇，变将滋矣。”手状告警于上，檄兵环捕，渠首就擒，余丑始溃，而里井晏然。逾月，部檄至，戒行有日。

人士相与走告曰：“侯之未莅，四境多故。十一在堂，十九在途。天不佑川，夺我父母之速，永怀奚所归耶？”乃谋立祠肖像，以志去思，而属予为之记。予惟君子之政，导利而布之下曰惠，惠之未能，何有于思？思之未能，何有于祠？尝闻子产从郑国之政，一年而舆人毁之，至不容于位。三年而后诵之，至欲为之嗣。嗣者，祠也。思而祠之，不解于其心也。侯以用世之才，小试一邑，其诸廉守称介，

^①“郤”，当为部之误；“雀”，当为“萑”之误。



听讼称平，断决称敏，无以议为也。乃若盘错之遇，周旋其间，而以道徇身，濒于危而不弃，虽去之日，不敢以秦越视其民焉。斯君子之政而惠之所以为大也。盖作人以需治曰〔终〕〔忠〕^①，劝贷以纾急曰达，议法以宜人曰义，矢正以济变曰断，烛微以剔奸曰察，攘寇以缓众曰武。忠者，政之质也；达者，政之权也；义者，政之制也；断者，政之节也；察者，政之辨也；武者，政之威也。道以出政，政以广惠，则惠非私以利之，思非私以庸之，君子可继之政也。政继惠思，其继于祠乎，况卓异之纪，行见媿休，古之循良，则民思之继，不独专之祠矣。

载稽川令之有惠政者，弘治中得侯之同邑林侯堪，业已祠之。嘉靖初长宁周侯正蕃、睢宁胡侯仲锡，先后相师，政颇类林，民亦诵之不衰。今之祠侯，适继林侯之后，民之惠侯，而溯林之所以为惠，文献济美之先，皆川之永怀也。祠而祀之，夫何后于子产之嗣之者乎？金曰：“然。”遂以之书诸石。

侯，闽人，庚子乡举，字廷英。应会，其名云。

汉川县重建万魁台阁记

吴翱

汉川县之有台阁，肇自前令郑君文龙。揽邑治之形胜，于城北之隅得隙地焉，纵横数十弓，畚土为基，筑台其上，高馆层楼，宏壮观深，颜曰“万魁台阁”。

先是，邑东郭数患火，乡村多恶疾，岁荐饥，民不聊生。学宫子弟科目寥寥。自阁建而诸患屏绝，岁亦有秋，多士振兴登朝者相继执国政。盖至今尸郑君之功不衰。

岁戊申，余获宰斯邑，去郑君仅数十年，颓垣败瓦，无复旧观。邑亦迭罹兵荒，户口仅存。邑之废兴与阁相终始，有以修复之说来告者，余颌其言，而尚未有以应也。会大中丞抚宪林公履亩阅荒，历谔、沔而旋休于是阁，朝邑人而问之，具得其实，爰解橐中装授余，曰：“尔其斥而新之。”遂经始于是年十月，再阅月而告成。计费金九百余两，官、绅、士相与欣助者，具载碑记。前堂后阁，累土叠砌，视前制有加焉。缙绅、学士大夫验前之废，睹今之兴，交口啧啧，以为公之独厚于川邑也。

夫公再奉天子命，秉钺于楚，凡八州之内，一夫不获，一物失所，无不引为已咎。单车就道，一薪一粒，不以累下。邑邮亭传舍若罔闻知，所至访民疾

^①“终”，万历《汉阳府志》作“忠”，是。





苦，儿童走卒皆得至其前，劳苦如家人父子。岁潦大侵，士民环公而泣曰：“公活我。”遮道邀至其境，公弗之迁，具言其状于朝，蠲本年本、折数十万。立捐俸囊，遣官赈济，全活实亿万计。是岂独汉川一邑为然乎？虽然，公之仁心惠政，凡十五国之家兹而户祝者，真不啻子文之思也。而独于憩茆之顷，更不憚拔毛布发，乞灵于鬼神异物以相之，则不可谓非独厚于川邑也。

南丰为欧文忠记醒心亭，取义于昌黎《北湖》之诗，而推原文忠之意，以为一山之隅，一泉之傍，非公乐也，吾君优游而无为于上，吾民给足而无憾于下，天下之学者皆为材，且良鸟兽草木之生者皆得其宜，公乐也。若公之志，岂有异于文忠也哉。余故乐得而书之，为叙其本末若此。

汉川安侯惠政碑记

萧良有

盖汉川之为邑也，为里者仅八，而当水陆孔道，其以条鞭银入邑藏者，不满七千有奇，而践更之役不与焉。即居恒民贫赋重，业不堪命是惧。先是，潞藩之国^①，奏请景藩故业，则其中贵人更藉倚淤洲波及粮地，割邑之红粮田归诸藩府，名曰“王田”，有司莫能抗，而势不得不以所未归诸府者补偿税额正数。

於乎，一田也既取此以与彼，复割甲以偿乙，理与法奚当焉。邑孝廉用是不胜愤，而会大司农会议，请得将拨过潞庄田粮量派通省饶僻州县，彼此通融，于势便。有诏曰：“可。”诸孝廉大喜，率其耆老子弟诣藩司核焉，而衡州府原给景藩月粮名德安仓米今作两司支用者，其数实称是而赢。诸孝廉益大喜，以闻安侯。侯仰天叹曰：“嗟嗟，此守土之臣所日夜拊心而未有路者也，今若此，幸甚。虽然，监司隔绝，九阍万里，必欲诣县官请命，若等能任乎？”卿士大夫故观察使周嘉谟、学博本滋邑佐向良弼等金唯唯^②，复集诸耆老子弟诣城隍庙之神而矢之曰：“所不同心戮力以共济其事者，有如此日。”侯乃亟治文书，身诣于郡伯及司理以上诸藩臬使者并两台使者，具状闻下大司农。大司农曰：“与原议合，覆疏上报，可著为令。”汉川邑之得移它郡粮偿原额，自兹始也。

是役也，改派衡州府德安仓米银共二千六百两有奇，所抵邑割去田地湖洲共二千五百八十五顷三十三亩，其原摊红粮计一千九百一十石，而所称赢者，

①“潞”，明万历《汉阳府志》作“景”。

②万历《汉阳府志》载此文，“滋”作“兹”。



另补江夏、沔阳等州县，不具论。

萧伯子曰：志有之，众建宗支，藩屏王室。其意盖俾之厚下安宅，为本支卫尔，非令其自封殖也。当潞藩之出封也，不佞从班行中窃睹天子厚懿亲甚渥，而潞殿下又贤明，万恒等彼东南其亩，势稍侵渔，责在奉行者万，非藩邸意，明甚。顾业已献之邸，不能说而惟正供又不能省，独有通融一节，庶几裒益，然非贤有司力持主德，庸距浅鲜，斯又不止造命一邑已尔。

先是，诸孝廉请为记，勒之石。不佞许诺，而方亟会典，不果。又明年，得请归里，又抱病，不果。会新修郡《志》，将登诸册，示永远。诸孝廉复申前请，乃力疾为次第纪之。

安侯名其善，贵州普定人，由举人令沅江，以才调繁，后历官府别驾；而台使大中丞为李公，名祯，秦人；直指为崔公，名景荣，燕人；左辖为王公，名庭诗；观察为薛公，名亨，俱秦人；郡邑则龙襄、萧云际、李时畅，所谓诸孝廉者也。余在碑阴。



《汉阳府志》卷之四十九 艺文

艺文志

黄陂县

修城原记

王霁

皇建极二年，岁在甲戌，冬十月朔，黄陂县城成，周九百八十三丈九尺有奇、高一丈八尺、横一丈二尺。六门各楼，楼各有郭，水闸四座，冷铺十座，昼夜侦逻，铃柝是节，外奸潜夺，内犬靡聒，巍然一巨镇也。士民欣欣，奠厥居邑。大夫刘侯命予纪事昭实以垂远。

余闲旷日久，诚惧不文，继思父老相传，正德六年，刘贼南驱越关，直略陂邑。陂无城，不攻自陷，民以之荼。当时官民莫不仰天切叹，以为无险可守。信无城无县，无县无民，不能苟安于一日也。及事平，上之人安于无事，下之人恐其劳已，城工之议遂寝。矧陂邑虽微，去中州界不出百里，南至会城止八十里，诚为楚之北门。有识者谓陂邑无城，盗寇之人，直驱江汉，是楚无门户，楚不克全矣。惜太平日久，无以是议上言者。

兹圣天子嗣统之初，纪元万历，相臣极臯、夔、伊、傅之选，以天下为己任，简贤进良，敷求治理，环海内外，罔非正人，兴废补敝，百度维贞。维时我大中丞赵公奉命来抚吾楚，怀经国远虑，以楚北空虚，欲筑城以保障，与天地相为悠久，国运其永清矣。岂止保障一二世已哉！是役也，纲纪于上，昭宪酌情，务得民心。又我大中丞汝泉赵公、先巡按监察御史念庭舒公、后巡按监察御史石龙李公、清理戎政巡按监察御史梅岩李公，皆訏谟定命，远猷辰告者也。综理于中，酌权应务，随宜处分，求不拂乎民情者，分守武昌道文冈郑公、分巡武昌道大梁刘公、江防兵备道金溪戢公，皆深切民隐，赞画多劳者也。至于错综斟酌，动中机宜，不苛不弛，俾费罔官损、役匪农妨，则我太公祖潘公、邑大夫刘侯尤为劳瘁。潘公讳允哲，直隶上海人。刘侯讳起鹏，江西太和人。其宽明仁恕、德洽人心者，俱难尽述，兹因纪其悦以使民之一端云。其忠爱勤事、夙夜匪懈，则署印蕲州同知陈汶、县丞吴崇儒、主簿陈生春、典史黄朝正，于





例得书，以纪劳焉。若夫给发区处钱粮，一毫无预于民，悉俸诸碑阴以俟考云尔。是为记。

兴复带河记

郑佶邑人

黄自宋人即夫子庙为学，今学宫其遗址云。学有带河一道，蜿蜒余三里，发源于东坂，而西抵黄婆桥之隩，濠支渗漉，引流积润，深阔可舟，层气萦纤，吐纳潏河，达于江、汉。县《志》所谓西汇七泽之雄，是已。诚山川之委会，而元淑之所钟也。天圣中，程明道、伊川氏诞生焉，遂继濂溪之统，为是邦重，信有地灵然哉！

国朝文教载熙，侏优益圣。吾黄士每大比，登省试辄四三人，少亦不失一二，雅称多士焉。嗣后豪民浸塞，河流遂失故道。堪輿家率谓非宜，以致科第寢啬于旧，士论愤惋久之。然民恬其奸，而官难其请，未有以兴复言者。隆庆改元，苏大夫由谏议来视邑事，廉平懋著，明断兼资，厘弊剔奸，百度振举，士民甚亲之。尤加意学校，授文发藪，士习一新。乃诸士偕诸文学金君洋、杨君正蒙、朱君天启遂定兴复带河之议，进白于大夫。大夫曰：“此吾责也。”命急复之。于是计家受力，骈力赴工，会不逾旬，河乃用复。

诸生谓是举也，俾百年晦蚀，得还故吾，人文昭焉，风气萃焉，是可无纪乎？相率而请记于予。维予曩为诸生时，顾瞻斯地，每为不平。逮占仕籍，过故里展谒庙下，屡白于有司，不果复。乃今不劳余力，一朝有之，予之喜与诸士均也，敢以不文辞。窃维国家望治于士，群士于学，设守令以提调之，然而劝率曲成于常格之外者，尝艰其人。今大夫归百年已失之地，以兴起后学，可谓达风教之本矣，固宜诸生欲勒诸石以志不忘也。虽然，是岂足为大夫报哉！所望于诸士子者，盍于带河乎观乎！观于盈科后进之序，以定其志；达于及泉学海之喻，以要其成；明于泽润生民之术，以扩其用，斯所得于伊洛渊源者深矣，则将为东序之珍，奋迹明时，绳绳继耀，不有殿前及第、经筵说书如明道、伊川者乎！是足昭大夫以人事君之义，乃所以为报也。予既以是复诸生之请，并系之诗，被之歌颂，以鸣盛德云。

大夫名景和，癸丑进士，蜀之泸州人。

诗曰：

庙学肇自宋、元中，国朝承运文教崇。山川排秀辉王宫，有湾浩淼源于东。





中淳淤积何恢弘，一方淑气兹攸钟。誉髦继出功业丰，豪猾那复知山从。
宅围侵塞带河淙，蠹兹敢尔闯章缝。沧池蛇珠售未终，百年谁任恢复功？
川西夫子斯文宗，黄扉抗疏万夫雄。蛾眉绝世忌兴戎，赤壁来游迈往踪。
视邑一载力匪躬，惠流百世如春融。顾瞻学地心则恫，文运当兴机适逢。
一朝下令还旧封，环维真与潞河通。静影闪玉映碧空，灵光千斗骞长虹。
双川伊洛衍派洪，五星奎井启文隆。蜀中教化颂文翁，议荐溪毛报在公。
我愿士子养益充，尘襟一洗开颿蒙。弼成真才为世庸，四海大振菁莪风。
以人事君志则忠，拟与河洛禹功同。请看带水春溶溶，恩波浩淼思无穷。

赋役志序原邑《志》

杨廷蕴

清隐漏、杜那移，有司职也。然非贤士大夫不为功，何则？有司所稽核者，现在之文册耳。奸胥馥法，每乘版户新更之际，以窜移为增减，以飞宕为浮沉，恶其害己，取故籍而匿之。有司纵严追搜抉，而害端已滋，曷若此邦之贤士大夫详明故实，据往测来，軫念民艰，同休共戚，为能详理棼丝、立法肤剥哉！

陂邑国初有平图之举，较额缺米多肩派银赔补，公填私壑，众液独肥，长此厉阶，伊于胡底？子衿傅可楷诸里耆清算足额，刊为成书，似可永久。未几，接任者方怀厘正，美绩未终。代庖者再奉平图，缺额踵见，不几坠前绪而滋后弊乎？蕴以元年秋承乏兹土，蠹积猬毛，奸逾鬼蜮，不憚两月辛苦，历任交盘澈底澄剔。报可上台，又值蠲免扣抵，纤悉毕清，均沾浩淼，急者先治，次及其余，而荐绅先生谭、姚诸公适以傅子衿续核米册示予。盖虽原本前规，而又奉教荐绅先生，为之裁鉴审定，故其布算更精，向所未出者，至此尽出，其立法更简，止立米而不及丁，以丁有加汰，未可概胶也。米亦止开秋粮，而不载南漕，以秋粮既定，南漕可准而知也。条分总结，观者一目了然，隐漏、那移无所施其伎俩矣。

先是，以崇祯十五年为旧管，以顺治十七年为新收。兹则以十七年为旧管，以康熙元年为新收。由是推之，虽累十百年，成法具在，所谓苟求其故，可坐而致也。雅与予彻底澄剔之初心若针芥合。是举也，岂非贤士大夫之为功于有司者哉。而有司亦因是以告于贤士大夫也。方今民生利弊繁多，或强弱之宜调，或贫富之宜酌，或猝至之差徭宜有成法，或意外之赔补宜有变通，种种兴除，难以悉数。此皆有司之职，而幽隐委曲，早夜图维，未敢刻置，所冀揆人情、



量物力、参新旧、便公私，不仅仅清隐漏、杜那移者，更源源而教之，以匡予不逮。陂邑尚亦有幸矣哉！从刊布所及，以逮所不及，端有赖于贤士大夫云。

均图米数序乙甲附

国家所最重者，莫赋役若也。赋制于田，役起于户，户之多寡不一，田之肥饶亦殊，因肥饶以定赋额，因多寡以定丁役，《全书》所载，固井井如也。然其间条目纷繁，即《全书》有不及备详者。如丝绢税之于粮，户钞出之于丁，复有丁粮均派者，粮七丁三分科者，苟志其大，不及其细，则异日奸胥积吏弊窦滋生，有司不克烛其奸，小民不尽晓其数，上扰催科，下苦赔累，良由赋役之数，间有淆杂致之也。

今陂邑四乡，计编四十里，其间田有高下，丁有多寡，腴赋上上，瘠赋下下，腴瘠相半者赋中中，而徭之起于丁者，亦惟户之多寡是视，其初亦甚明也。迨鼎革后，版籍散逸，上下相蒙者数十年，今皆一一精核，勒为合甲，余若外派之门摊、麻铁、匠班等项，亦条分缕析，疏其定额，俾一邑之人知何者赋若干，何者税若干，何款于何年增，何款于何年裁，何项起于粮，何项派于丁，何者起运，何者存留，较若画一，指掌了然，庶胥吏不得影射飞洒，藉端科敛矣。由是而赋法清、均徭定，上有所守，下有所遵，既不病国，亦不病民，尚何有歌蓑楚、哀鸿雁者乎？故从来赋役弊藪也、怨府也，一有不清，害无底止。兹特备核《全书》，并《全书》所不载者，纤悉毕详，汇成一帙，使莅兹土者直溯源流，与陂民相永守，所厚望焉。

原序

国之养民，与民之自养也，若挹注然。陂乡称蕃息矣，而版籍日耗，岂内者尽伪增欤？抑六民之中独抑本业，逃而匿之伍者耶？此计口算〔绵〕〔缙〕^①，已不能取盈成数也，矧地经两割，而户与田又两为别隶，亡论改聚，即潞藩请地，举一邑林木材用所出，及鹿虎雉兔之囿，尽烈而分之，所求土辟民繁之初，莫能返矣。顷今方田之后，计亩均赋，期足正供，亦画一之规也。禁弊防奸，中古而下，不能无取焉。

^①“绵”，或应作“缙”。





赋役序

谭忠义邑人

陂邑租赋原额田粮正米一万六千四十八石五斗八升四合七勺，内有孔甲学田米七石五斗二升，外有潞租田米一千四百二十四石九斗三升九合五勺。又原额人丁一万三千九百五十七丁，潞丁一千三百八十五丁在内，此皆属在正供，具载版图者也。明季兵燹频仍，赋疲于征，差困于徭，奸猾之吏，上下其手，飞诡百端，豪强者恣情隐漏，以至额米缺至二十七石，每年户书于正项外派加补额银一百八十两。莅兹土者，因陋就简，不行觉察，各里咸苦积弊，莫敢谁何。上下相蒙者数十年。乡先生李公潏水者，起而忧之，以溯流莫先穷源，而正标尤贵端本。于国初公议软抬良法，平图清理，而飞诡之弊始消。李公功在王国，利在桑梓矣。

无何，缺额一项未获遽清，幸余友傅可楷、耆老张士达者抱先忧之心，踵前人之武，毅然任之。爰集邑之里老里书，遵照各里各户老册，彻底清查。按节推算，以崇祯十五年为旧管，以顺治十七年为新收，研究那移，细详隐漏，条分缕（晰）〔析〕^①，三阅月而米清额足，汇定一书，以昭画一，厥功当不在李公下。

乃以今上之初年奉旨编审，概动收除，而额米复乱，按图详察，又缺十石有奇。两君子一片血忱，几沦枯废，忠于此颯颯焉虑之，虑其源之弗清，流之将无极也，虑其王国之利未兴，桑梓之忧方大也。幸兹邑侯简庵杨公下车，美绩累累，涤弊搜奸，勤心抚字，而且虚怀下问，不啻再三。忠膺国恩数年矣，既不克勇进图君，又不克强自振拔，兴利福众，乃复徇私隐弊，使前功废失，民膏国计毫无所赖，其若之何？因集耆旧里书毖局清算，期与傅君汇定之书相符。旬有余日，而额足米清，颇无差谬，爰是正之邑侯，订为一书，以垂永久。斯则两君子之功，而合邑诸君子之意也。忠亦或可藉此以无罪于前人，无负于邑侯云。

修建庙学议

杨樑教谕

为修建学宫事。

切照本学文庙，岁久物蠹，先于弘治十八年五月内，淫雨浹旬，栋宇将压，暂以小木撑支，东西斋庑暨棂星、戟门亦各倾圯，已经具由通申，俱蒙准修外，

^① “晰”，当为“析”之误。



缘本县钱粮无措，未遽兴工。

近蒙知县徐琰多方设法，及历蒙各台批发赎罪、卖地等银，仅得百余两。工费浩繁，难以济事，况本官入觐在途，更无责成。卑职目击庙貌大势岌乎寝危，万一倾压，震惊圣贤塑像，则虽拊心洒泪，于事何益？用是兢惕弗任，退而自维，念吾夫子道在天下，万世其飨，祀于一方，所以崇一方之化。今妥灵之所弗治，若此叨学其道，以司其化，顾诿以责在有司，坐视其弊，此圣门之罪人也。爰销内人首饰镯钏等项，共计银四十五两，又岁支俸米、斋夫柴薪，除给衣食之外，每存〔赢〕〔赢〕余^①，以备非常，银一十五两。近蒙考准民生曾岳等二十余人入学，类进礼币以准束修，内除徐倬、彭子寿二人贫难不受外，其余家道颇殷，交接以礼，于义不敢固辞，计各人所进贽仪又共得四十两。三项通银一百两，蓄之囊篋以自润，吾夫子之宫弗治，而卑职之家独肥，有人心者宜不若是，情愿罄将前银以备修建；及本府通判黄寿公廉有为，素能留意学校；本县义民陈万富、李茂，富而好礼，干办克勤，合无乞委黄寿专总监督之任，而以陈万富、李茂管工，其或用度不敷，黄寿随宜劝助。此外或军民赎罪银两，或问发充徒人犯，或别项堪动官钱，俱乞量赐分给，仰委收掌支销，庶几民不告劳，事获归一。数年不就之功可成，诸士渴仰之心以慰，备文转申云云。

改派钱粮议

邑令洪其道

为酌议改派钱粮以苏民困事。

本职到任以来，查得庄田一节。王田与民搀杂，不成片段。切照前田原系先年景府奏讨，多有奸民投献，隐有民田在内。王租民差两闪，虑恐奸民投献争端，事非经久，昼夜焦思。呈详总割一区略内地塘随田拨给，题石立界，佃民百姓允服，造册报部讫，仍照前项田土原载正米一千四百一十二石八斗九升七合五勺，其米遵照《全书》起派，条编正赋南兑折银一千三百四十八两七钱九厘五毫三丝，惟照陂之田地塘山拨归潞府办租，而陂之钱粮如故，累赔困苦，民不堪命，合无将《全书》协济外属银两，酌议改派无王田饶僻州县，以运粮官军月粮银二百九十三两二钱八分三厘一毫派麻城县，江西运粮银三百一十七两九钱一分四厘三毫派蕲水县，阳逻马价银一百一十四两七钱一分九厘八毫、站船水夫

^①“赢”，当为“赢”之误。





银六两七钱七分四厘五毫派黄冈县，协济襄阳各驿马价银一百六十六两四钱四分二厘六毫派罗田、广济二县，通共银六十六两四钱四分二厘六毫，派罗田、广济二县，通计该减银八百九十九两一钱三分四厘三毫。盖本县之改派者虽多，而除改派外，尚剩银四百四十九两五钱七分五厘二毫三丝加派本县，则本县亦非独享其逸，而赋税似乎适得其平也。

各院皆报可。

建立社学议

胡仲瀾

窃意近附城郭与衣冠文物之乡，彼其耳濡目染，不待教而易善者，若深山穷谷，声教之所不及，尤宜破格鼓舞，加意作兴，庶使梗化之民薰蒸为善，即尼父之与进互乡，将命阙党，意念深矣。

本县淝源乡土名老山一带，西属本县，东属黄安，连界两省七州县，相去各二三百里。地既穷僻，人习刁顽，逋负国课，藏匿亡命，聚众拒捕，率以为常，恃强凌弱，（怙）〔怙〕不为怪^①，出入鸣金挟办，睚眦持挺杀人，或冒籍而越告官司，或驾诬而拖害良善，畏虚则抗避不结，案牘则积滞难销，伤败伦理，尤不忍言，见节孝醇谨之人，群聚而姗消之，摈而不与语，其俗可概矣。近且拨入潞府，势倚王庄，譬则负嵎之虎，有司益莫谁何，数年后，将为盗贼（忘）〔亡〕命之藪^②。其乡间有一二子弟粗习章句，出而应试，究必不胜衣冠文物之乡，进无希覬，旋即弃去，群而搏猛虎、逐狡兔，臂鹰走马，以自嬉娱，甚至窥人墙户，嫖褻宣淫，尚可绳之以法哉？则建立社学诚不可已。

计两县人户无虑万家，通共习章句者仅仅十余人，若止令肄业乡社，耳目无所闻见，即有社师，不知隆重，即有教规，不知听从。合于十余人中择其资质稍秀、文义稍通者，分隶两县社学，岁时令时亲师习礼，俾知感发。每遇岁考，比照福建汀州等处，另立向化生名色，以便量材进退，间有假冒希进者，许本地子弟呈首。教其子弟，则父兄愉悦；荣以巾舄，则众庶改观。观摩师友，使自变其乡俗；浇灌诗书，使自剔其肠腑；系籍宫墙，使不得借口化外。移风易俗，莫善于此。职非有所私，为青衿另开一径窠，不过惩征输勾摄之苦，虑转移化

①“怙”，当为“怙”之误。

②“忘”，当为“亡”之误。



导之难，仰体本道作人之盛心，为本乡百年之远计尔。

王庄议

胡仲瀾邑令

本县庄田，起于景府奏讨潞源乡株木岭烧炭备用。后因本地奸民意图自利，将田投献，如有十石租田，止献二三石，余皆隐蔽，既不纳王租，又不当国税，是所纳者少而欺隐者多也。奸民以为得计。后景王薨，田归民间。万历九年，通县丈量，前者欺隐之田悉入版籍。十七年，潞王奏讨景府遗业。院司道府准户部抄出景府庄田等项各数目，转行本县，丈勘定界，议处应纳钱粮缴报。始皆升任萧知县遵依，讫后洪知县因见王田与民田相杂，恐争竞不息，故仍于潞源乡近株木岭查照部额，采割租田六百七顷一亩七分八厘，松柴茅山四百二块，遵照景府收租龙票旧则，除地塘外，每田一石派银四钱三分九厘一毫，山每块派银一钱，共足二千七百五两六钱一分零。

至万历十八年，佃民见得租重，遂皆逃走。洪知县设法招抚复业。查得《大明汇典》成化六年钦定王府庄田则例，每亩纳银三分，每田一石，总计十亩纳银三钱，除地塘山另则俱遵照纳银外，本县两年那移别项钱粮，代为凑完七百一十三两有奇，在佃民已遂得陇之愿矣。近佃民恐事不能经久，又见《全书》开载民粮轻于佃租，又萌望蜀之念，妄行告扰。不知《全书》开载止系正赋。正赋之外，民间远水解头、走递夫马等项，及无名差徭难以枚举者，不知有几也。今佃民等苦于租重所争疆界七十里，不知七十里之内有民田数十顷亩，景府原额不过六百七顷，岂得界七十里之多。在佃民多欲增田以减租，在百姓又不欲割地以重差，数年以来，此其所以纷纷难定也。

二十一年三月间，本县到任，即阅议田文卷，已经五载，尚未归一。蚤夜焦思，背有芒刺。且见佃民告扰抗纳，官民不便，随蒙院道行委武昌府李通判、都司赵经历公同亲临本县，拘集合县士民、乡约里老，并佃户人等从长商议，将佃租三钱又减去五分，令百姓代纳前后加派共一钱八分有奇，名为协济，彼此各服审具，两愿甘结在卷，庶王税不致逋外，佃民不生异论也。二十年，前项租税已经张典膳亲自征完，但本县代为凑足共一千有余之数，尚未蒙编入《全书》，不敢擅行加派，且库积空虚，并无一毫可措，切恐久违睿限，有触威严。又于五月二十八日蒙乾伴读到县催急，事在燃眉，只得将二十一年编银设法处置，旬日之间，代百姓足其完数，权为抵补。职宁请于上司，不敢获罪于哲王也。





但本县钱粮有额，佃租既减，民差必重。况黄陂古额四十八里，黄安藩封已采割三分之一。曩时人丁十万，频岁灾疫，今止一万有奇，疲困已极。若如前佃民之横议，民将重足而立，不得不为杞人之忧也。割地之说，百姓断不肯从，而职忝在民牧，恐一拂民之欲，不惟邦本不固，而藩王养膳之典亦难以刻期早完矣。伏惟转达，为藩封至计，为陂民造福，俯采輿情，尽力主张，卑职与民情得从容遵守，则生灵感戴，社稷永赖矣。

软抬公议

明初钱粮征解在官，及流弊金解里长始有粮差，每石丁米索帮贴银四五十两^①；又马差归里排，而五年一帮贴；夫差归里排，而三年一帮贴，是十年有三大差矣。乡民畏怯房保包当，今日折粮贴费，明日倒马议加，又明日停夫索补。房保、里差接踵沓至，鸡犬不宁，甚至卖此米之田不足帮此田之米，东奔西窜，难避饕餮之锋；鬻女质儿，莫满贪暴之壑。胥役千般苛索，杂差百倍正供，所以富户家产尽倾，穷民性命垂死，流离载道，逋负盈庭，不独系赤子于囹圄，亦每羁青衿于捕署。乡愚以丁粮为苦，势家受产免差，僥巧以诡寄为能，里书飞米致富。

本朝新恩已宽，明末夙弊未改，士民哀控，院司道批准仿例软抬，酌费乐输，用一省百，费有定数，则中饱无虞，逃者归农，则终事可必。但在官市众觉少生涯，而过客提差辄多觖望，假公快私，借名巧诋，前此见膏血消尽，则高闭户之风；今也闻输费些须，偏持筑舍之论。不知急需三项，原无与正供之分毫，况此公费数钱曾不当私帮之万一，逐年抽给，无伤终岁之勤；私索全消，何须称贷之益。事属通融，法堪久远，兴此法，则生曷任焚祝；废此法，则死实抱杞忧。上台好生如天，申飭倍至，兼邑侯爱民如子，厘剔维周。请烦院司道牌示批款，如读《豳风》之诗、《无逸》之书云。

勒石颁行软抬条款：顺治□□年二月，前令弓省奉行周剂。

一、钱粮，官征官解，革除里长当年名目公输，软抬银两收银起解，责之经承，永杜招保认状、押差催差临门打扫、房保侵欺、纳户帮帖等弊，惟给户繇单，责令三百六十排年各催花户完纳。

^①此句原文如此，然“每石丁米索帮贴银四五十两”似与理不合。



一、脚马，官募承走，革除马里当年名目，原额工食外，公输软抬银两给发募户，永杜私帮及情面应付、势索、恤马轻鞍等弊。

一、排夫，革除夫里当年名目，额载工食外，公输软抬银两、官募城中富户家丁承役，免其保甲火夫等差，实称两便，小民不受私帮之苦。

一、南槽二粮，旧例官征官解，今输软抬公费，革除粮里征收起运，专责粮官，着各排平催，督照制斗。今自纳户上仓交兑，不许侵渔摊派。

一、北绢，仍用官织官解，革除里役。《全书》开销买丝织造、骡脚铺垫等费出自软抬积书，不许额外派征。

一、钱粮，禁止提差骚扰，各衙门止用风火雷牌下县，应期起解，不许借军饷题目，仍蹈前辙，需索供应打发，徒费小民膏血。

一、解银，止用空文报府，陂邑最近省城，去黄州甚远，携宝远行，干系重大，且羁延时日。今后钱粮径解藩司，路近费省，法简民便。

一、均平各排年米，石米有多寡，则金解有重轻，遂致赔累偏枯，合就各排年米数拨除增加，注为定例，以杜飞洒、诡寄之奸，以破避重就轻之计，画一以顺舆情，永垂不朽。

各宪批语

抚院高批：仰布政司秉公酌议，革弊惩差，以苏民累，速报。又批：准如议行，但须详酌妥当，务使经远。缴。

按院曹批：仰黄刑官酌妥报。又批：准如议行。缴。

按院王批：软抬之法，最为便民。仰县力行，除另示外，即照批款，勒石永遵。缴。如有私索包揽等弊，申究。

按院陈批：仰黄陂县惩包揽、勤查核，力全前院勒石之良法，以顺士民之情。缴。

布政司齐批：从来善政不外遵朝廷之经费，宜人情而合土俗。据呈，以亲睦之仁，效终事之义，甚为美举，但须通融无弊，公私上下皆免偏枯，方可久行。仰黄陂县议妥报。

按察司马批：仰该县酌议妥夺。

驿盐道郑批：据呈，赋役取平，众情乐均，具见齐心急公，但通融行之，必求上下无弊。仰黄陂县详细议确，妥报。又批：据详诸款，众情乐于均输，





繁差皆归有司，则免递年金报包揽、推就抑勒等弊。无艺之费，所省实多。缙绅士庶既合词称便，似画一可守。即夫马二项，尤为目前急著之权宜也。仰候藩司汇详。行缴。

守道黑批：夫马之差，帮帖之累，其不公平处，本道久熟知之，准照孝感软抬，苦乐均当。仰该县酌议回详，以便转申，永久遵守。此缴。又批：候详三院。缴。

粮道白批：仰黄陂县纠众酌议，速报。

督学道王批：此极有便于贫民者，本道諷之乡绅士庶，无不称便。黄刑厅议妥，申详各上台，如诸邑皆仿而行之，小民受泽无穷矣。速报。

各台飭行软抬宪檄

抚院高宪牌为飭行软抬，以舒民困，以除积害事。

照得楚地频遭寇祸，洊遇灾荒，幸存孑遗，皆汤火余生。为民上者，即百计抚绥，尚不能转颠连于衽席，忍不聚所欲，以困吾民哉。

查明季之害政，莫甚于里役、夫马等事。本院莅任时，各属咸以此称苦，正谋所以兴革之术，而未有当也。偶去冬黄陂县以软抬之举控阅之，颇觉便民，批行去后，及今裘葛已易，而未据遵报。细询其故，皆由衙蠹积保以里排为奇货，恐软抬一行，不得遂其剥噬，互相排沮，而贪墨之官，私仿加耗扣克之利，又恋不忍舍，故即本院批允、南北按院严飭，终成道旁之议也。

且既云软抬而包当者，闻又外索私帮，豪猾者仍复钻营情免，不几拒虎而进之狼耶？于民终何济乎？合行痛为严飭，为此牌仰本县官吏，即便查照绅士公呈软抬事理力为举行，嗣后如有积年市棍包当外里夫马，里役私索外帮权蔽，衙蠹朦胧金票，勒索小民，拨唆耗克，并钻营情免等弊，印官题参积蠹，拿究文到之后取具，士民遵行印结报查。该县仍将本牌责令书役抄誊，张挂各门晓谕，俾村落乡愚咸知奉行，勿仍托之空言也。

按院王宪示为申飭，革里役、苏民困，勒石以垂永久事。

照得软抬之法，期以便民，而反贻民害者，岂尽作法之不良，亦有司奉行之不力，以致积书奸棍踵弊射利，相沿莫察，受害滋生。嗟嗟！以刀斧之余黎，能有几许骨肉，而堪此剥削哉！合行出示严禁晓谕，为此示仰诸士民人等知悉。

除该县绅衿乡耆公呈条款发县勒石外，敢有积里仍前私索帮贴，积保包揽肥己，积书通同扣克剥民，嗔不利于己，而百计挠毁，藉里长而仍开私帮，甚



且相沿日久，将软抬尽入正供，有加无已，而民不堪命者，许该县查实，指名密揭报院，士绅实指其里，于软抬外私索帮贴，某人经收软抬银两，外加火耗，公呈出首，被害之人击鼓伸告，本院定行重处，断不姑贷。

如有司知而不举，互相容隐，或访出、或告发，本院定不宽假，以贻地方之害，惟有以白简从事也。慎之，慎之！须至示者。

乡约议

邑令杨廷蕴武进人

乡约之设，原以宣扬圣谕，劝诫一方民，俾善者有所兴起，不肖者有所严惮，法至善也。

鼎革来寝不复举，间有行之，尽失古意。约正、约副，先非其人，即约讲声说一番，于开导劝惩本旨毫无关切。方今举行，必推齿德兼优、素履无玷者二人以为约正、约副，朔望开讲日即立善恶二〔部〕〔簿〕存约正处^①，一方有某人行某善事，某人行某恶事，从公分注簿内，徐俟长吏行查赏罚。诸凡地方利病，通约恒得直陈之。如是者一年，约正、副公平方正，果无只鸡壶酒之私，则隆以礼貌，给与顶带，以风通里，使儿童妇女咸晓六谕之应遵，绝域穷乡皆识为善之可乐，辘轳问俗所至，良多可观也。

保甲议

安民之道，无他谬巧，惟使外盗不能入，内奸不能作斯已尔，效求可立臻者，止在严行保甲。

今通颁格式，凡在城市关厢、乡村集镇地方，概行编入，不许遗漏一人，即乡绅、举贡、生员，止免本身，其疏远亲族以及家人、奴仆，不准影射混免，令其自行填写，挨序入册，赍县考核钤印。然后每乡公议二人以为会长，百家之内再议一人以为保长，十户之内再择一人以为甲长。各家自备器械一件，十家各置铜锣一面，交于甲长；逐户编完，照册每家给牌一纸，各贴小板之上，悬挂本家门首；每甲给大牌一纸，贴高柄牌上，竖立甲长门首。凡一处有盗，甲长鸣锣，九家并力救援。一甲有盗，九甲鸣锣，各甲并力救援。一保如之，一乡亦如之，

^①“部”，当为“簿”之误。





到处跟追，待至天明，料无腾空之术，成擒必矣。此外盗不能入也。

又严以连坐之法，如各保甲内有一家踪迹可疑，并窝藏奸宄，隐匿匪类，同甲九家连名出首；一甲所行不端，九甲连名检举，以凭官法究治。如有容隐，别经访闻一人为盗，定坐同甲九家；一甲有盗，定坐同保九甲。此内奸不敢作也。

推之以迄县郡，亦岂有不同风合辙、环至立效者哉！保甲之制虽善，每多格格难行者，多由绅衿之家先有优免一说横于胸中，再则亲族、佃仆利其包荒，又以体面二字耸动于后，县官不得已勉从其请。殊不知此法之行，全以护卫大家富户，若各借优免规避，反责一二穷民代为防守，情何以堪，法何以施耶？诸绅衿各免正身外，咸自体谅，而不以情挠法，则通县永受其赐矣。

乡约保甲合一议

乡约、保甲虽属二事，乃乡约之所约者此民，保甲之所保者亦此民，但约主劝善以化导为先，保主惩恶以究诘为重，教无殊旨，治有同归，盖可举而一之也。

今议将乡约、保甲合为综理，凡一邑居民毋论在城在乡，以百家为率，孤庄村落以一里为率，各立约正、约副二人以统一约之人，外设约讲一人、约史一人，以办一约之事。十家中推一人为甲长，每一家又以前后左右所居者为四邻，一人有过，四邻劝化，不从则告于甲长，转告于约正；一人有善，四邻查访的实，则告于甲长，转告于约正，其轻事小事许本约处和以息讼端，大善大恶仍令季终开报，以凭奖戒。如恶有显迹，或于开讲日，或于开讲前，据实报鸣。如四邻知而不报者，甲长举之，罪坐四邻。四邻举之，而甲长不报者，罪坐甲长。甲长举之，而约正、副不书，别经发觉，罪坐约正、副。如此严行，则一人犯罪，九十九家之责也。合九十九家耳目环视一人，则妖术奸民何所容其身？外贼内窝何所遁其迹哉？

按此，他不俱论。明道先生生长于陂者也，其〔今〕〔令〕晋城^①，先度一邑乡村远近立为伍保，使之力役相恤，其有孤茕残废者，责之亲戚乡党，使无失所。乡必有校，择子弟之秀者聚而教之。乡民为社会立科条旌其善恶，咸令知劝知耻。

凡此正与乡约、保甲诸说后先合。揆昔治昔效，今治亦今效，固断断如也。兹故特以程先生之福晋城者，还引之以福陂民，不识有当否耶？

^①“今”，当为“令”之误。



驿役议

杨廷蕴

驿递之苦，水陆略同，而陆为甚。全楚水陆之冲，各邑略同，而陂为甚。南达省会，北连河南，上入盛京，下及滇黔两粤，无不由此。各宪会议，列为上冲，特添设驿马、夫役，軫念至矣。但年来军兴旁午，羽檄交驰，银鞘护送，动以百计；勘合火牌，一时踵至，稍稽未敢，立遣无能；况又役叹职劳、马时倒毙，供亿既苦，赔补益艰。额编有定，浮费多端，真陂邑一大掣肘事。廷蕴自下车来，竭力补苴，仅堪支应，然而心力为已殫矣。《诗》云“我马瘠矣，我仆痡矣”，陂邑之谓欤？

为父鸣忠疏

张世祐

生员某奏为臣父骂贼缴尸，孤臣痛父断指，昧死呼天，泣恳恩例以慰忠魂、以励臣节事。

伏读《大明会典》一款，凡以死勤事，若抗节不屈、身死纲常者，开具实迹，恤典取自上裁。

臣父张国勋，苦志寒窗，九科未第，蒙恩除授本省德安府应城县儒学训导。自六年到任，即值献贼入楚。虽职无民社，而满腔热血，每誓不与死贼共生。贼陆犯应境，臣父先同死难。知县张绍登百计守御，幸获安堵。

至九年十二月初四日，死贼蚁聚攻城，知县张绍登守中城，众官守西南城，臣父分守东北城，躬冒矢石，设略堵截。死贼环攻六昼夜，不敢窥伺。诇意西南一带人多溃散，贼乘暇入。臣父方指挥如意，而全城老幼猝焉叫号奔走。是时门斗雷兴龙、家丁张升在其侧，急告父以去诸，而臣父正色发声，乃肃衣冠回孔庙，从容誓死。贼群至拥之，诱其投降。臣父抗骂不绝口，贼举火焚学宫，臣父奔抱先师木主悲号，而风起火灭，学宫仅存。贼遂剜臣父右手，燃指炮炙，而臣父骂贼愈急，至死不屈。贼复支解臣父，身首异处，散投烈焰之中。

臣以生员派守黄陂城，隔离烽火。迨家丁张升逃归，臣始知臣父一身灰烬，与胞弟张世补，及家丁张德等一十二口尽膏贼刃矣。臣甫十五岁，茕茕孤幼，不得见父永诀，又不得觅父残骸，两地殒亡，呼吁无路，故当日应城、黄陂两邑士民代呈死难情形，已蒙府道批详，止未遽经题奏。

臣伏思臣父生为圣明臣，没为圣朝鬼，犬马微躯，深愧一死，无裨于应城，臣复何颜代父叩阍。但念臣父三十年忠义之志，一旦泣磷荒野，臣欲哭而无棺可抚，





饮血而有灵莫慰，漂泊异乡，几经一载，臣亦何爱此余生，惟我皇上旌别炳如日星，劝激不遗微贱。伏按应城殉难知县张绍登、副总郑祖禹俱得名达御览，即郢襄房县、郢西有死难教职马应奎、王纯卿，俱奉明旨赠恤，独臣父守城骂贼一段公案未达天聪，臣又何颜对死父于地下？此臣之所以寸肠九断，痛心截指，不得不昧死冒陈也。况当死贼殄歼未尽，如臣父以教官守城，复挺身骂贼，皆皇上之神威远振，寿考作人。伏望圣明垂怜臣父死城之惨，并臣代父鸣忠之苦，恳敕抚按查例，俾得与马、王等并录，不致名归湮没。臣甘冒越之诛，以事臣父于九泉，臣愿足矣。

为此具本亲赍，谨具奏闻。

致安南王黎维禔书

杨兆杰黄陂

诏安南王将高平土地人民退还元清。王复书，力图报复，坚引“襄公九世报仇”之说。胡文定已辟《公羊》之妄，而《公羊》亦曰：上有明主，则襄公不得复私仇。今天子圣神仁武，一言之失，铁钺随之。况敌怨不在后嗣，柯之盟，《春秋》善之，僖、成取济汶之田，《春秋》著其擅兵，曰：苟不请于天王以正疆理，虽取故地，与夺人无异。比类以观，抑何读经不求正解，而偏执谬说构祸也。

夫莫氏为王臣子，高平为王土地，此嘉靖十九年前事也。迄今各守其土，各长其民。王之不臣莫氏，百有余年矣。王之先不尝臣陈日烺乎？不尝破占城国都、掳其王，并侵老挝地乎？倘相习寻仇，环起而报九世者不旋踵至，王何以自宽免也。

当本朝定鼎，元清首归命。高平土地，朝廷之土地也；高平民人，朝廷之民人也。元清受封都统，又朝廷守土臣也。王起兵擅有朝廷土地、人民，逐朝廷封爵臣。《春秋》大义，无能为王主臣宽者，故守边诸臣咸请旨发兵，而在廷会议咸曰问罪兴师。惟皇上宽仁大德，念王臣贡已久，不忍加兵，特简两使臣奉命宣谕。不图王诸臣桀（傲）〔鸷〕无礼^①，敢负朝廷仁爱至意，以此上闻必赫然震怒，而诸臣又得遂其用武之初议。使臣朝以入征讨之令，夕以下安南之祸，噬脐莫及矣。

夫各边重镇，兵不下百余万，各督提镇协诸军不在此数，皆一当十，十当

^①“傲”，当为“鸷”之误。



百，连年海氛靖尽，水西诸苗，扫荡西山，歼灭无遗，乌斯肉袒伏罪，何坚不摧？何敌不克？王独未之闻乎？诸将提百万之师，居无事之地。安南界在肘腋，无衅可乘，且欲上为朝廷立开疆辟土之功，下为士卒效奋臂莫当之勇，况王负大不韪之罪，撓莫可敌之锋，强弓劲卒，三省同勒，九道并进，吾见安南一块土终无噍类耳。

贪高平久弃之尺地，而坏安南全盛之社稷，彼误国诸臣之肉其堪食乎？且元清窜居南宁，费金钱粮糈几六千万。朝廷何私何利，于元清而必欲纳之耶？总之，诸侯失国，托于诸侯礼也。天子为天下主，而奉贡归服之臣，窜失乞哀，曾不为之托命乎？若谓王亦贡臣，元清又系仇逆，朝廷必无加诛之事，疑本部皆虚张夸大之言。试思朝廷已居元清内地，又遣使臣宣谕和好，王诸臣竟傲慢不顾，朝廷其肯漠然已乎？且终置元清于何地乎？

文德不喻，而誓旅兴师，不待智者而决之矣。今王惟将高平土地界址及掳掠人民，造册赍付本部存掌。本部一面具疏题报，一面押送元清赴高平以结。王今日遵旨之案，然后归奏王服命本章，达王恭顺美节。若终违抗，即拂衣去，惟痛心疾首，行见交南之灭绝而已矣。区区之心，体皇上如天好生之心，为王宗社生灵计，幸王熟察而行之。



《汉阳府志》卷之五十 艺文

艺文志

孝感县

言楚事疏

蒋以化

臣闻之书曰：“民为邦本，本固邦宁。”^①又曰：“百姓不足，君孰与足。”^②又曰：“人心悦，则天意得。”^③盖言君民一体，天人一心，下可以联属民心，则上可以转移天意。方今上天屡示变异，而君臣之修省，犹然一切文具，上既无以格天，则天益震怒，降殃于民，如应天、河南、湖广之水灾，一岁之中报灾者屡。此非徒一方水旱，而实天所降割，以儆动君心者也。苟徒照常议赈、议折、议缓，而不蠲恤以〔挽〕〔挽〕回垂毙之民^④，则不惟民变难测，而天益震怒，又不止河溢、火孽、地血、天雹、雷震、星隳、毛羽为祲已也。

臣本楚吏，稔知楚之苦，请以楚事为皇上陈之。楚本泽国，外滨大江，上接川汉，中无沟洫之停蓄，一遇大水，弥漫汪洋、滔天之状，势必破堤倒屋，冲城坏郭，不仅区区伤及禾稼者也。自万历十七年十月二十六日，臣领孝感县官之职入楚。此时旱暵之后，民多流亡，处处树皮草根剥掘已尽。不意十八年以后，转而大水岁岁相仍。职一县令耳，设法救援，小小补苴，无大裨益，全望来岁丰登，可以救积困积残之民。乃自十八年至二十二年，楚地无岁不罹水灾，今年水势比前更烈。据抚臣已报武昌、汉阳、黄州、承天、德安、荆州、岳州、长沙、郧阳等府地方皆遭大水，春无麦、秋无稼、行无路、栖无居，强者思跳梁，弱者转沟壑。臣虽离任半载，而所目击与今之耳闻者，全楚已成巨浸矣。

抚臣恳恳以赈、蠲二事为皇上陈乞，但庙堂之议以为东封、北讨，中且治河，为费无量，即皇上悯念灾黎，而一一蠲之，其何以足国而裕用乎？臣非不虑及此也，

①语见《尚书·五子之歌》，“为”作“惟”。

②语见《论语·颜渊》。

③语见《孟子·梁惠王下》宋孙奭疏。

④“挽”，当为“挽”之误。





但财赋之盈缩在宇内，而国用之剂量在朝廷，譬如作家翁然，业以耕百亩为一岁子姓婚姻、衣食、丧祭之费，而一旦水旱之灾，收无籽粒，则必约子姓节饮饌、俭丧葬、省婚礼，时绌不能举赢，即一室犹然，而况天下乎！倘皇上于诸所繁费中稍减彼以宽此，庶可以救一方之残喘，使民不生异谋、不离乡井、不弃本业，将来勤耕力作，丰登相继，可以裕国家万万年无穷之用也。

楚民所不堪命者，又有潞府庄田一事。夫一岁惟正之供，民所乐输，即被灾伤，皇上亦加赈恤。独潞府之租，以养赡为名，虽大荒极灾，原额不减一粒，且官校相临，额外加耗，征收之时比追苦楚，较官府之刑特甚。民不胜痛楚，且揭竿思逞，臣所目击而调停之者，往事可证也。夫当此积荒之时，加以横征之苦，又值洪水之灾，民虽铁石，犹堪此剥削乎？皇上不能全蠲，查州县有潞府庄田之处，于正征数内重加蠲免，不惟小民得蒙更生，即潞府所征之税犹可勉强支持，是一举而利实弘大，上可以回天变，下可以消民患，而中亦可以全皇上友于之爱矣。

且皇上端居静养，每事动法世宗。臣自童稚时忆父老传称：嘉靖三十三年江南大旱，时巡按御史周如斗疏请蠲本年钱粮，荷蒙世宗沛然下明诏，尽蠲江南漕粮百万石。比时百姓欢腾，无不举手加额，吁天称寿。一时全活灾民，不下万万数。至今谭说世宗遗恩，尚有相向涕泣者。夫皇上之心即世宗之心，曷不仿先代之令典而首法之，则楚民之歌颂欢跃者，当不下嘉靖年故事矣。

若复照常额、依原数，屯膏不降，民不聊生，势必群然而噪，貽皇上宵旰之忧，破国家无穷之费，当不知所究竟，即权其利害轻重，而皇上之蠲，臣以为万万不容已也。伏乞皇上勅下户部，将全楚被灾及有潞府庄田州县查照灾伤事例，亟赐蠲免，灾民幸甚。

代编饶僻公移

蒋以化

奉巡按御史甘批，据本县里民刘玉等呈称，本县二十九里，地当五路之冲，差有百邑之扰。先年贡纳荣府庄田银八百余两、协济城北吕堰驿马价、支应馆夫、江济水夫等银共二千四百余两。今奉潞王奏讨采去九里，遗粮五千七百余石，派压二十里，共驼差重，民难输纳，恳乞掣回协济、存留、残里等情行道，备行本府转本县并议。该知县蒋以化遵照即奉详文，查得东山沦原设河泊所官一员，先年奉文裁革，无容别议。为照县设五乡二十九里，白云乡该十里，本县近以出赈，亲履其地，见得本处山深土肥，其地沃，其民殷，其钱粮易于完纳，





白云一乡可以当一县之半，白云一里又可当别乡一半。既遵旨拨去白云乡之腴土与潞王自行管业，且无论设庄之后，逋逃为之渊藪，顽梗为之城社，丁匠为之规避，又如拘掇之不便，批发之难完，有司之令不行，抗制之凶易逞，甚之强盗军徒得以行贿而徇其窝藏，征收官校得以纵肆而任其剥削，官府莫之谁何，地方由兹多事。

（俟）〔似〕此种种隐忧^①，其伏于未发，而关于本县者且不暇枚举。姑以前项应征钱粮言之，既系岁额定数，毫不可缺，则必加派于本县所存二十三里之民，取足全额。然一乡膏腴已经拨去，所存者沙瘠耳。此虽减去旧税，尚恐地薄民穷，一时难于完纳，如复再行加派本折粮银，是犹负重之人，一羽已多，而欲加以车薪也。故概县百姓前犹希冀通融均派，及闻拨给之命，凡有知识者莫不惊骇忧惶，变色相顾，人心汹汹，为患叵测。

职又窃计之，迩年岁每不登，饥谨交迫，若复加派本县，则旧额为之改造，户丁为之移易，地土为之割据，分田之界另变一番，经野定规，动摇通邑，此其所系，又不止一年之饥谨，而实千百年之巨害也。事干重大，可不一为之议处乎！令吊先年丈量卷册，并经知人役到官细查，得本县东山沦河泊所湖课该存留府钞银四十六两四钱一分，小河溪商税门摊银四两六钱五分三厘，议豁外，尚余起运麻铁料银四十三两五钱九分。及查本沦淤洲草地原铺民粮，水涨洲则成湖，水落洲则为地，初非获利有常之区。其始公家止科鱼课柴薪，其既业主择将高阜去处量种麦草，少充赋役。万历九年奉文清丈，共铺载米六百五十八石一斗三勺。当事前官欲宽民力，即将概县二十九里钱粮通融均减前数，是所铺东山沦之民米，即二十九里田上之额米也。合无将东山沦之前项民米除白云等六里，既铺庄田外，相应归于实在二十三里。田粮加复旧额不必改派抵补，再照白云等六里拨去田地，遗存民粮二千四百二十七石一斗五升三合七勺，每年应派起运兑军本色米六百四十四石二斗三升九合五勺，解京仓本色米六百六十四石二斗八升一勺，二项共本色米一千三百八石八斗四升七合六勺。席竹等银一十两二钱四分六丝。又该起存钱粮折色银一千三十一两九钱二分八厘八毫，四差银一千六十二两二钱一分九厘七毫，俱系岁额，毫不可亏。合无将本色米、席竹银并前项解京，干鱼、麻铁银改派通省饶僻州县，又起存四差银内原编楚府禄银五百七十一两四钱二分八厘五毫，辽府禄银六百一十九两六

^①俟”，当为“似”之误。



钱七分六厘八毫八丝五忽，派剩辰州兵饷米银六十九两六钱七分八厘，并于练兵饷银五百七十一两四钱二分八厘五毫内摘改一百四十两。四项共银一千四百两三钱八分三厘三毫七丝五忽，乞改派于别府饶僻州县之无庄田者，或通省均摊。

又四差内原编协吕堰驿马价银四百四两六钱三分四厘，楚、辽二府民校银四十八两，承天太監府皂隶工食银一十二两二钱，辰州民壮军饷银二百二十三两二钱，石城驿馆夫银四两六分六厘六毫。五项共银六百九十二两一钱六分，乞改各该附近州县，余扣存练兵军饷、城北驿支应、馆夫工食三项，共银五百五十七两二钱七分八厘五毫，并扣存本色米三百五十四石八斗二升一合四勺，席竹银二十两七钱九分一厘九毫四丝，仍于二十三里田上派征，俱属妥当，俾钱粮易于完纳，而小民不致独困矣。

条议罢矿公移

彭同魁

奉钦差御马监陈信牌，责令孝感县将合用器具预先备办，即委贤能佐领将阴二崖、小河司矿洞预先督率人夫，将洞前开挖者。

窃照阴二崖系河南罗山地方，不属县界，惟小河司黄家山旧有二洞，俱在深崖险峻之区，虎狼出没，荆棘丛杂，不惟马不可策，抑亦步不能移。职亲攀荆棘，用随从一人挟走十余里，方至洞前。其洞崖之内，空虚有窍，俯伏可入，疑前代幽人凿为隐穴者。中间水泥深陷，以石击之，沉响有声。职目不识矿，但以愚见揣之，索矿于此，譬之纵〔擢〕〔棹〕于陆^①，而发轫于川也。至于岚瘴侵人，动关千命，供应繁费，莫展一筹，此皆关系重大，非职可以勉强支吾、苟且塞责者。谨举亲所见闻，列为六款：

一曰逼近承天陵寝。显陵根本重地，五百里地不许开采，此重禁也。德安接壤承天，尚在三百里之内，一行开采，异日恐有禁犯。是信奸徒一时之妄语，摇宗社万年之厚福。彼观风望气者，引绳批根，从中一语，则圣意追求，天威莫测，祸有不可胜言者。今即不为地方计，当为显陵计；即不为显陵计，当为显陵以自为计。一也。

一曰荒芜潞府庄佃。本县所治二十九里，其上六里原奉潞王奏讨，该租银五千余两。今小河司黄家山正在六里地内，离县治二百余里，深山穷谷之民，

^①“擢”，当为“櫂”之误。今通作“棹”。





一闻开采，扶老挈幼，臂负肩摩，昼夜逃窜，如麋鹿惊顾，草木皆兵，去之惟恐不速，逃之惟恐不远也。职晓谕不及、禁止无从，六七十里之内，鸡〔大〕〔犬〕寥寂^①，烟火萧然，目不忍见。昨奉《矿务条议》，内有“靖地方”一款，践踏丘亩，照给花利，意岂不善，今逃亡若此，即与之，无受之者。且本年六里钱粮正当输纳，潞府官校已到本府，催征在即。壮户既亡，国课必负。即日事追求，遍加捶楚，难必全完。二也。

一曰景府故事可查。曩年景王分封，曾有奸徒将本洞指称投献。本府〔当〕〔尝〕委中官陈常亲临其地^②，遍山踏勘，并无金银矿砂，收回令旨。昨读《矿务条议》，内有“专职业”一款，旧有矿洞及通志可查，或昔有而今无，或脉衰而日少，难以一一取必。今查本县志书，并无矿洞。今之黄家山，乃奸民妄指，似难责于有无，又安得取多于寡？且风闻兴国等处矿砂俱无金银，虚费工本。倘此仍涉乌有，复滋繁费，不其委见有之财于无用之壑乎？民脂堪惜，民力堪怜。三也。

一曰矿贼窃发甚惨。本县陆路通衢，盗贼渊藪，狱讼繁兴，往往起无风之波，造无形之影，无事尚称难治，况矿洞一开，远方奸徒亡命蚁聚蜂屯、揭竿持〔挺〕〔挺〕^③，乘机可忧。盖此地界在罗山、信阳，父老传闻德靖间有河南矿贼，为阴二崖开矿，遂至毛葫芦数千越界作乱，杀戮防守知事河泊所官一员、及捕役人等。彼时赖应山岳知县练习武事，统领家丁及居民朱老虎等，素称骁勇，力行厮杀，稍能退贼。今正去黄家山不远，倘一闻开矿，奸民效尤，复如德靖故事，仓卒何支？四也。

一曰山岚涧瘴宜防。本山业主黄乔物故，黄道问拟永军，旋已死亡。今惟二三孀居老妇戢守故庐，以待余年，日与虎狼、麋鹿、山魃、石怪为伍，日未暮，已闭户不敢出，且层峦迭嶂，山川气积蕴隆蒸郁，人类稀少，气候薄弱，故岚气朝暮侵逼，涧水毒蛇往来，近山居民有感而生瘕者、生痞者，不分老幼男妇，往往多染异症，旋不可起。即此地可堪太府驻扎乎？即侨寓不久，而夫匠员役亦关生命，安得以此为常。五也。

一曰供应繁浩当议。本县二十三里，《全书》额载各项钱粮于二十七年外尽行征解支领，即答应过往官府承舍，屡苦不敷。若开采，必多夫马，动经

①“大”，或当为“犬”之误。

②“当”，或为“尝”之误。

③“挺”，当为“挺”之误。



千百，一切供应，前无令甲，其器具等物，何以备办？夫马往来，何以区处？口粮供亿，何以支吾？一奉按临，百费丛出，求之民而民无加派之理，求之官而官有噬脐之忧。且本县春季无麦，夏季愆暘，自二月至五月二十四日始得雨，止种晚稻，又苦虫火，目今收成无几，米价腾涌，每石至纹银七钱，闾井菜色，民不聊生。历冬而春，又不知作何景象？虽桑、孔、计然复生，百孔千疮，修补不及，况职绵力薄才，束手被罪，迁怒小民，貽忧不浅。六也。

此六者皆耳闻目击，焦心瘁虑，处之，莫得其方；默之，莫必其命者，万不获已，乃敢呈请。若上无关国本之轻重，下不切民瘼之艰难，前无故辙之可鉴，后无隐祸之当防，则以王土之所产，供王朝之所用，职何惮不为？况职能效丝毫，必蒙贤能之称，若少干隐漏，必取斥罚之罪。由前则有荣名，由后则有显祸，职又何见不为？皇天后土，照临此心。伏乞太府从长计议，得借单词挽回天听，则不过挥盈尺之纸，而造千万人之命，三湘七泽尸祝无涯，圣祖神宗安妥地下。如不然，亦望太府暂且停骖本省衙门，先遣识宝人员亲至本洞看验，以便设处供应，治办器具，庶民不空劳，财不妄费。不则坐竭脂膏，利无一有，而害且百至。荆襄固古战场，黄、德尤称慄悍，倘有继荆襄鼓噪者，祸不知安所税驾也。

均赋公移

张擢士

窃查孝邑大弊，多在里甲，偏苦冤累，相沿百年，有绘图难尽，而拊膺徒劳者。职自上年闰三月到任，目击心伤，愧无救正之能，实切清厘之志。随经申请各宪均役便民，俱蒙批允在案。因比时钱粮征解将半，未便遽更。待至今年按宪巡历后，竭两月之力，寝处隍庙，惟期拯救残黎，不暇自计劳怨。凡前此之米多反不当差，米少独顶重役，甚或无米寡丁而赔累者，职悉力均之。每里额米五百六十五石，每甲额米五十六石五斗。即偶难搭派，增减不过数升。每甲以十分为准，每分以大户装头，即偶有多寡，截数花户补足，或一姓而分为数十户，则仍叙列一处，或一户而米有数十石，则令竞顶十分，此均米之略也。

至优免一节，正赋虽经抽扣而杂徭亦累小民。每有数十青衿聚于一甲者，甚有一甲而全无绅衿者，窥其弊端，只因大差将临，各图改入，以免杂徭，不思大力愈多，则小民愈困。职酌定每甲不论当年空年额入，有免六丁或旧排老米难移他甲者，至七丁而止。绅衿画一，愚民自遵。凡清出浮冒丁数，尚俟另册申报。此均免之略也。





若夫条饷南漕共四大差，乃有因差及身而谋移下甲者；有此甲不承一差，彼甲并顶二差者；有今年既当此差，而明年复当此差者，册蠹殷豪，弊难殚述。职挨年顺序，凡十年一转，差轮某甲，二十三里俱同一例，不令参差，何从脱卸？此均差之略也。

更有册蠹包收殷户，自置田石，并不当差，妄捏诡名，栽人甲下，名曰无畴，令其暗赔，害归于人，利归于蠹。二十三里册书之不犯此者亦鲜矣。职严法剔其奸细，心清其源，即不敢云十分已明，庶几厘正过半，此清米之略也。

职初行此举，以为立法稍峻，怨尤易生。孰意绅倡而士从之，贫乐而富安之，征粮示出，争输恐后，季春方行开征条饷，今已解半。凡皆仰赖各宪神明清肃，饬吏庇民，使职得以尽心除弊，为民请命。此又下吏意外之幸，而孝邑顶沐高厚之时也。今已逐里均完，合将二十三里文册汇赍宪台查阅更正，转详各宪，以垂永久，孝邑里民幸甚。

筑流不通河碑记

胡在恪江陵

水与土相守，形势原出于自然。通与塞互衡，经权终归于由旧。因天之时，因地之利，因人之力，道以交济为功，而山川灵杰之气亦因以会萃焉。天其运乎，地其处乎，万物争托于其所乎。昔人谓崑崙天柱，万脉由起。故自北条、南条，大河、大江以下，举凡两山有水，百谷为川，莫不发源西北，归墟东南，而东流不溢，谁知其故？安其故而道其常，大约其他可无问也。

吾楚水之在江汉间者，支分派析，方折圆折，其奇在曲。渔人网集，估客船随，浮溯渚渚，通变宜民，皆用势而利导之。至其势有不必修者，则即以不通者为宜。盖禹之治水也，龙之而磬折，参伍以行，奠水大防，外弼广与崇等载在《周礼》者尚已。孝昌壤错申罗，广轮延袤，层嶂矗峰，盘纡岑崟，訇磕濂潏，宛淖滢洩，赭垩白垆，碧锡烂鳞，故钟秀毓英，瑰奇俶傥，麟炳见闻者，直吞七泽。

其水自信阳来，至天磨池入县境，受清风、大悟、淮水、磨陂诸水，支分为二后东播者，乃名潏河，其南播为白沙河，复分为三支，与西南别流又分为三支，合潏水入汉水者不具论，其一逆流绕至西南隅，合于西河，拢朱思白水、后湖诸水，东径郭潭、徐港，纳董家湖之水，自龙宫潭曲折东流。有堤曰“流不通”。夫堤以“流不通”为名，则义取于“不必通”者，有自来矣。足之于地也践，恃其有不践而后善搏也。水之于流也通，恃其有不通而后善演也。若夫由县以南镇压于



文昌阁侧，其寺曰“迎祥寺”，溯流寻源，义则取诸开也。乃疏捷径而注壑者有人，创佛刹而丛集者有僧。下流开，则开其所塞，将使渚渚之间不辨牛马；上流塞，则塞其所开，等于樵苏之径莫曳鸱龟，汨故道而昧地。据此，邑人士所以有请于大尹梁公也。梁公曰：“是余之责也夫。”有是哉！是言其利溥哉。夫信而有征，文献之遗也；明而能断，当事之柄也。公以太阿在手、盘错立剸之才，吏行冰上，雅肄泮中清赋，而鸿集于泽，祷神而蝗去其封。治绩未易更仆，盖琴鸣堂上，而且戴星出入于此者，多历年所，利病情伪，靡不鉴悬而烛照，故如议举行，不俟再计而决矣。

我皇上圣神文武，湛恩沦浹，地平天成，人文蔚起。猗欤休哉！诸君子生际昌期，欲以家修为国献，诚有如梁公所云：范文正公做秀才时，即以天下为己任者。况信美吾土，父老相传，某时不通，而澨之风气大振；某时既通，而澨之风气遂大坏，历历可指数也。虽衔标嗅土、夹宫绝流之谈，形家易索于罔，而营洛迁城，卜吉钻策，见诸经传，至重以核，匪直蔓茅莠蓐之纤悉。盖在天之象，转运不停；在地之位，一定不易。而前后左右，亦有四方十二辰之位，故星野所分，人物昆虫咸系命于万有一千五百二十之数。天一生水，结胎于坎，而东南多水，水之一行顺，而五行皆协。天降时雨，山川出云，缢罔磨荡，机祥相应，天地自然之理也。

今诸君子谓县治以为形势，而邑中气运颇亦视此为消长。宋祖微行，尚忆西村之酿；谪仙偶憩，犹思白兆之花。覆载宇宙之内，生长粉榆之社。俯仰之间，陈迹了然，安得如夜半之壑，任其自藏自走；步仞之丘，听其为孽为祥。而不言之炎炎凿凿乎！伐山之，木以为宫室。木则毁矣，而木无所基于宫室也。取干相筋，以为弓，干与筋则毁矣，而干与筋无所譬于弓也。春雨时至，铍锯始修，草木之到置者过半，草木则毁矣，而草木无所怒于铍锯也。物之相物，是非虽恶乎正之，顾用之不正，则成者适所以为毁；用之于正，则毁者乃所以为成也。是以万福庵之水道宜纤，文昌楼城门宜闭之说，议中又连类而并及之。莫为之前，虽美弗彰；莫为之后，虽盛弗传。凡事类然。

严司徒公谋始于前，诸君子图终于后，若垣墉之涂暨茨，若朴凿之涂丹雘，岂斤斤取便目前，以为己私分者。稍沟三十里而广倍，遏其源而挾其流，江河可竭。贪耿圯之饶者，害在一时；披郑国之渠者，利在万世。惟人情多忌，幸一簣于垂成；而地道流谦，历百折而善下。禹强未扑，巨鳌仙山，飞漾庚辰，才锁支祈，淮水停澄，则兹通与塞之异地而势同也，今与昔之相戾而宜返也。此固梁公所言





土反其宅、水归其壑。成大功者务谋于众，建久业者必谐于俗，非一手一足之烈也。虽然，集腋成裘，而挈裘者振领。穷、变、通、久，正待人而行之，会比阡塾党皆从公于迈之年，新筑沙堤，云纡八伯，遥看玉潏，水击三千。民和咸播，輿诵同归，其为明德不亦远乎！蓑笠纶竿之下，诸公属余脱稿以纪其成。歟乃一声，窃自知其无当于捧土细流之数也，敢云为江山之一助哉！

方田议

明·胡克敏江陵

井田为万世之良法，而每穷于时变，则惟以方田之法辅而行之，使其穷者通而可久，庶不致以变法坏法，而良者受立法之仁，黠者亦不致受骹法之累。此自汉董仲舒、师丹诸大儒以来议皆寝而不行者，而不妨略存一说，于今古之间约而易参，吾孟子所谓必正其经界始也。

古者三百步为里，名曰井田。井田者，九百亩，公田居一。范宁注：“以除公田八十亩，余八百二十亩，故井田之法，八家共一井，公田余二十亩，家居二亩半为庐舍。”杨士勋疏云：“何休又云：‘古者井田之法，一夫一妇受田百亩，身与父母妻子五口以为一户，公田十亩，又庐舍二亩半，凡为田一顷一十二亩半也。八家而有九顷，故曰井田。’”“若五口之外，名曰余夫。余夫率受田二十五亩半。”诂训稍异，而《司徒》“经土地而井牧其田野。自九夫为井。四井为邑”，推之至于丘、甸、县、都，历历可指数也。《左传》宣公十有五年“初税亩”，“公田之法，十取其一。今又收其余亩，复十收其一。哀公曰：‘二，吾犹不足。’遂以为常。故曰‘初’。”哀公十有二年春，用田赋。直书之者，以示改法重赋也。丘十六井，出战马一匹，牛三头，是赋之常法也。今以丘赋一乘为未足，又以田赋之也。田赋之也者，家一人。家一人，《管子·内政》之法也。

诸侯之益兵自秦始，晋次之，州兵是也。春秋之季，鲁亦行是也。是故作丘甲用田赋，不书“初”，逮至秦用商鞅，先王良法尽变无余。始皇三十一年，使黔首自实田，盖阡陌之弊至是出矣。井田不废，何患田之不实乎？汉成帝绥和二年，诏限民名田。不果行。新莽始建国之元年，禁不得买卖田。四年复令民得卖田。盖董子尚不能行之于汉者，以当时人主自为兼并，无以使民兴于廉也，况贼莽而能行乎？光武建武六年诏曰：“乡者司旅未解用度不足，故行十一之税。今粮储差积，其令郡国收见田租三十税一如旧制。”十五年诏州县检核垦田户口。晋孝武帝太元元年，诏除度田收租之制。南北朝乙丑年冬十月，魏诏均田，盖



因民多荫附，皆无官役，而豪强征敛，倍于公赋。给事中李安世以为虽桑井难复，宜更均量，使力业相称，由是始议均田。诸男夫十五以上受露田四十亩，妇人二十亩，奴婢依良。丁牛一头受田十亩，终身不还^①。恒计见口。诸宰民之官，各随近给公田有差。此亦祖周家授田之遗意。《纲目》书之予魏也，周甲山年，“令民十八受田输税租，二十充兵，六十免力役，六十六还田，免租调。一夫受露田八十亩，妇人四十亩，奴婢依良人，牛受六十亩”，“垦租送台，义租纳郡，以备水患”^②。唐武德七年，初定均田租庸调法，丁中之民给田一顷，笃疾减十之六，寡妻妾减七，皆以十之三为世业。百户为里，五里为乡，四家为邻，四邻为保。在城邑者为坊，田野者为村，食禄之家无得与民争利。十六为丁，六十为老。岁造计帐，三年造户籍。自井田废而贫富不均，后世未有制民之产，使之养生送死无憾者也。唐之法，盖庶几焉。周世宗荣显德五年，遣使均定境内田租，先以元稹《均田图》赐诸道。世宗既以图赐诸道，而紫阳夫子以未见此图为恨。是宋初或已失之矣。宋建隆二年春正月，宋度民田，分遣常参官诣诸州，盖周末使者多不称也。神宗熙宁五年，颁方田均税法。帝患田赋不均，诏司农重定方田及均税法，颁之天下。方田之法，以东西南北各千步当四十一顷六十六亩。一百六十步为一方，岁以九月，县令佐分地计量，随陂原平泽而定其地，因赤淤黑垆而辨其色。方量毕，以地及色参定肥瘠而分五等，以定其税则。至明年三月毕，揭以示民，一季无讼，即书户帖，连庄帐付之，以为地符。均税之法，县各以其租额税数为限，旧尝收蹙奇零，如米不及十合而收为升，绢不满十分而收为寸之类，今不得用其数。均摊增展，致溢旧额。凡越额增数皆禁。若瘠卤不毛及众所食利山林、陂塘、沟路、坟墓，皆不立税。凡田方之角，立土为峰，植其野之所宜木，以封表之。有方帐、有庄帐、有甲帐、有户帖。其分烟析产、典卖割移，官给契，县置簿，皆以今所方之田为正。今既具，乃以巨野县尉王雱为指教官，先自京东路行，诸路仿焉。历稽古昔，各有初终，利病之可见。总之自恒产不授之于上，贫富多寡各以其所有为世业，历千数百年于兹，则富者田连阡陌，贫者无立锥之地，亦其势之不得不然者。

议者必曰豪强务为兼并，然所谓兼并，亦犹是赵括为将，遇良田宅可买者买之，而卢从愿之为多田翁等耳。若所谓病国蛊贼者，固难概以贫富多寡之间也。

^①据《魏书·食货志》，“丁牛一头受田三十亩，限四牛”，并无“终身不还”之制。

^②周甲山年，指一六十甲子年，“山”疑为衍文，或为“之”字。此段引文为《资治通鉴》原文。





盖田布肘以为弓，由弓以为亩，推而至于无算，尺寸皆士井税系焉。使田多而富者经界正，输纳平，上无所负于官，下无所累于民，虽大良也，岂可谓之兼并？使田少而贫者经界不正，输纳不正，上有所负于官，下有所累于民，虽小奸也，岂可谓之不兼并？而况大者不正不平，则所负所累者不可穷诘，势非嫁祸于他人之田，则岂复有积于空虚无用之处，以为其尾闾之泄、鬼神之输者，其小者之嫁祸于他人之田者亦然矣。其间飞诡移易，吏胥、里役表里为奸，千疮百孔，如鬼如蜮，大约规之以方田之法，则治其大正，而小不正者，可无问也；治其大平，而小不平者，可无问也。非不问也，无所事乎问而已。正矣、平矣，夫野外之田，不无美恶肥硇之差，岂必尽如指掌之平、棋局之画哉！

《周礼》司徒所掌衍沃之地为井，隰膏之地为牧，比折而行，乃是井田之活法。而楚芳掩所为画土田、度山林、鸠薮泽、辨京陵、表淳卤、薮疆潦、规偃渚、町原防、牧隰皋、井衍沃，即成周之遗法也。

今请于各郡县有若干里者，各画为若干区，相厥山林、川泽、丘陵、坟衍、原隰之宜，广轮长狭，凸凹曲直，一以本田地形之所遇而为计度，正其封沟所表、田主所树，东南之亩，不混于西北，高燥之壤，不侧于卑湿，爰以详核其世业所籍，旧额所税，皆无铢黍舛错，而后即安，非以求益税也，亦不至于减额。间有参差不等者，则复仿佛不易之地家百亩，一易之地家二百亩，再易之地家三百亩之意，酌其地力，而令贡赋，庶汙莱不治者皆有所归，而不得用三壤之牵制。如是，则以一定不可移易之形势，而综乎万难整齐之情伪，任其高下在手，而絜裘振领，纲举目张，表准一树，繁丝三断。室庐丘园服先畴者各长子孙，而山林原隰、水旱丰凶，按册而求，履亩以稽。体国经野，了若指掌矣。有王者起，访大儒而咨询之，有治人而举治法，以实心而行实政，厚生正德，次第施行，安见通变宜民者之不可措天下于三代之隆也。有仁民之心而养贤及民，进退用舍之间，其要尤在能断哉！

凤翔曰：万世田制，总不出《孟子》“正经界”三字。三代后，井田固不可行，而经界不可不正。《方田议》画疆分区，准井田之规，而通井田之变，维井田之穷者也，诚为千古良法。然宋熙宁、元丰间，累诏修举，宽延十年，观成者仅六路，旋复辄罢。岂方田之不可行与？总缘奉行者之无实心实政耳。宣和间，臣僚上言曰：方量官惮于跋履，缠拍峰验，一任之胥吏。故其时瑞金、会昌等处弊窦丛生，此其明较也。

予丈量之役，虽不敢上拟方田，然亦窃其意而仿之，如切界分会，犹分地



区方也；树之墩牌，犹田角立峰也；五乡别则，犹五等定税也；家给知单，犹户帖也；鳞册、块册，即方帐、甲帐也；柴藿折算，即一易、再易之例也。而其蚤夜曳遑者，惟是必躬必亲，不敢假手胥役，幸得不至陨越，以迄于成。阅荆《志》，见孟常胡先生《方田议》，诂谟硕画，旷代相感，乃叹古人之先获我心也。及读至“治人治法、实心实政”之论，则又若诏予而启佑之矣。因附记于此。

神鼎阁碑记

王世贞

鼎何以阁也？以庋鼎也。何以庋之？志神鼎也。何以称神鼎？盖万历之甲戌九月，御史中丞赵公抚楚，议城孝感。其明年乙亥正月城成，而少参王君议城当有所据险，因拓其西北陲即湖隍焉。方就筑而地中铿然鸣，众怪而掘之若干丈，得一函，遇风则为烬。函烬而古鼎出，蟠腹篆口，三足两耳，周围端严，体被五色，空青结绿，与天并莹，中有识，皆古籀籀文，大小凡六十字，其不可辨者仅十。鼎甫出，而有紫云盖之，三青鸟时时回翔其上。夜所置处辄有光，光上属天。

于是王君与佥宪邓君、德安马守相顾异之，以询邑三老，对曰：“鼎，养也。夫兹邑曰孝感，而千户所曰孝昌，其出也，殆圣主孝养两宫之祥乎！”参军任梦榛等翼如而前曰：“鼎，三公承君象也。”《易》有之：“鼎玉铉，大吉，无不利。”大夫拱己而听，师保以恬养万类，即雉膏无弗食焉，庶几哉，其征乎？”博士诸生曰：“均有之，即不读永平王雒之诏，以公卿大夫得其理耶？而赐三公帛五十疋，九卿二千石半之，且以初祭之日，陈之于祖庙，以示孝养也。今胡以异是？”于是二君乃为阁以庋其鼎，而郡三老、中丞曾公某等以书来谓世贞其记之。

世贞故有藏薛尚功《钟鼎款》，摹其识读之，皆合，盖周仲父鼎也。当周之时，南宫仲为卿士，以王（锡）〔锡〕作鼎三^①，而此其第一。其言“惟十有三月”者，月之闰也。“王在寒师”，寒师，地也。“（锡）〔锡〕于琖玉”，琖，杯之小者也。“作乃采，对王休命”，言集事告成也。鼎也，而谓之“鬯父乙尊”，鬯，煮鼎也，父乙者，周初接商器也。“惟臣尚中臣赫赫”者，取“赫赫师尹”义也。

夫此周鼎耳，而谓之神，何居？昔者汉得汾阴鼎，而帝嘉之。群臣上寿贺陛下得周鼎，吾丘寿王独谓非周鼎，而对上曰：“周德始后稷，成文、武，其报

^①“锡”，当为“锡”之误。下同。





祯应，鼎为周出，名曰周鼎。今汉自高祖继周，至于陛下，功德愈盛，天宝并至，宝鼎自出，非周鼎也。”夫周鼎而汉则汉，今而明不为明哉！

若记所称神鼎不炊而沸，不汲而盈，氤氲之气，自然而生。今固未能尔，然其恬阒于未洽之候，而勃发于明休之代，先之以铿鸣，翼之以云气，而显之以光怪，此不亦几于神哉！

天子方与公卿辅弼之臣日夜讲明文、武、成、康之所以治，取其道而略其器，而公车虎尊所受法得言异而不言祥^①，以故灵显赫奕若兹鼎者。三老、博士诸生仅得拊手加额于州里而已。岳修贡、川效珍、吐金景、歆浮云，非班孟坚之所致颂于东都者乎？夫末世之颂音不在下，而治世之颂音不在上。二大夫业观兹休瑞，然不敢以闻，姑阁以度之，而吾姑为之记之，明德固出汉万万上也。

赵公贤、王君璇，俱周人；邓君林乔，蜀人；马守文炜，齐人。

修董孝子墓碑记

黄巩蒲田

孝感县旧为汉安陆地，后置县，以孝子董永名。按图志及杂记小说，皆云孝子千乘人，丧母，汉季奉父避兵来居。家贫，佣耕为养。父亡，以身贷钱，始克葬。天降织女，为丝以偿所贷，既腾空去。今县之董家湖有董父墓，盖即孝子贷身所营者。右稍南为孝子墓。与小说合，其殆信然也。

巩少盖习闻，异其事，今来德安，适以事行县，躬访求之，使一老兵前导，自东门出，迢迢六七里，丘阜隆起，林木蔽翳，老兵指曰：“是也。”双冢累累，鞠为榛莽，狐兔走其上。断碑残刻，苔蚀雨剥，殆不可读。俯仰踌躇者久之。遂节缩官钱，命义官刘福寿重修，覆以(杯)[杯]土^②，增为马鬣，树石表，题志其上。中为飧堂，四周为垣，前为甬道，复使近傍居民汤氏守之。

呜呼！永之于亲生而佣耕为养，死而贷身为葬，可谓孝矣。区区织女之有无，不与焉。至于其父之行，虽不概见，然居贫能使其子安于耕稼，身死之日，至于无所谋窀穸，将不可为固穷守义之君子与？巩故俱表其墓，使邑之人有所考，且有所劝也。

君子曰：永事，汉史失载，岂偶遗耶？抑以织女事涉渺茫弗录耶？以永之孝，

①“法”，《四库全书·弇州四部稿》作“发”字。

②“杯”，当为“抔”之误。



曾不得列于史，则夫山林寂寞之士，德成而名不闻者亦多矣，岂独永哉！然永幸而托小说至今以有传，遂大显于世，则稗官野史之作，又岂可少哉！

正濃賦頌序

熊賜履

从来养民，莫先于治产，而制产莫重于平赋。是则均田定税，固为政之首务，而邦大夫之当尽心者也。

濃邑土田有额，赋税有规，所从来旧矣。自有明之季，一时豪强势宦，恣为并兼，税粮多所欺隐，而国初兵燹之余，版籍荡灭，奸人猾胥又从而逞飞诡之术，于是弊窦丛生，科程废坏，富者日隐占，贫者日包赔，官民交病，莫可穷诘者，且数十年所矣。前此莅任兹土者，未尝不思有以正之，而宿蠹交盘，动多挠阻，往往束手坐视，付之长太息而已。

丙寅岁，关中梁侯来，下车甫匝月，洞烛其弊，乃不畏强御，不恤浮言，毅然以厘剔为任。于是力请于上司，举行丈量之法，正经界，稽簿书，清逃亡，核脱漏，区画井然，遴里正之贤者董其事。侯仍单骑只从循行乡鄙，躬履丘亩而勘视之。勾股有制，圭撮有纪，图册有式，那移、贿嘱有禁，悬奖劳之格，严馈遗之罚。三载之间，田畴归额，租调返经，积困以苏，恒业以奠，五乡之众治犹出汤火而登之衽席也。而又为度其山川，科其土物，第其肥硇高下，而差等之，务俾苦乐均沾，凶荒无害。用是勒为典则，垂诸永久，良法美意，盖不啻家喻户晓，而向之所为奸猾豪右者，亦罔弗俯首听命，莫敢腾舌。呜呼！此古循良吏之所难能者，而侯出之裕如，斯其措注顾不伟欤？

且夫田赋亦綦重矣，阡陌既开，而后限田计口诸法无益，生灵徒滋纷扰，即杨炎“两税”舍户丁而问资产，科等缺如，亦难云尽善。此李渤所以陈摊逃之弊，而李翱复作平赋之书也。今侯之为此钩稽核实，一准于《周礼》土均之法，与县师、遂人之所掌，而其间剂量周详，则又不失《禹贡》所称任土则壤之大道焉。况乎令出惟行，民不劳而功以集，侯之所以臻此，亦岂易易也哉！国家赋式之经，早已颁诸令甲，而财贿锡错与敛施盈绌之间，尚不无烦司农之计目。今赋役一编，特敕中外所司集议而详辑之矣，倘得精敏干练如侯者，膺简命而综理之，吾知其规画、敷陈、经纬悉具，定有以佐圣天子底慎节爱之盛心，将足国裕民之至计即于是乎在。若区区如元和、景德诸会录仅胪列其金仓出入之分数，而略无关于体国经野之大端，此则非侯之所屑为者也。





侯登癸丑进士，与予有一日之雅，生平抱负瑰玮，予固已素习之。今年春，自金陵扶(襯)[櫟]归葬于澧^①，襄事之后，乃得拜侯于棠下，而益亲炙其为人。举凡侯之所以力行善政于吾澧者，父老子弟且交口称颂之弗置也。予特就正赋一语颺言，于兹录之首，以少附于輿人之义云。

正澧赋录序

李念慈

凡官职之切于民，而能为朝廷培邦本者，惟牧民是赖。顾国用在赋，赋出惟民。民散则田荒赋逋，虽有善者，不能向弃土而征课也。古来称民牧者，罔不以催科、抚字并重。今则不然，苟征解及额，谁复问鞭扑之外有非其正供者哉？郡司各计考成，有司迫于檄帖、簿书期会，日不暇给，有能察胥役厘赋籍者，斯能吏矣，至于履亩而正经界，相土以定科则，千百无一二焉。

楚孝感为古澧洲，其地错壤申、罗，山高水下，兵燹以来，人户逃亡，所遗地亩多为豪强兼并、胥役侵隐中饱，赋不足额，有所谓无畴米者，多至四五百石，延累里甲，岁无定数。吏胥得移甲换乙，择殷而食。民不堪命，催征不易。为令者往往因而受过，不但不暇为国民计永利，即拮据自拔，亦戛戛乎难之。长安梁梧斋来任兹邑，即毅然以厘剔自任。于是履亩清丈，先正其经界，次权其科则，又次定其赋籍，不啻初置郡邑而则壤之也。三年之中，单骑裹粮，食宿田间，无纤毫扰于民，而田赋各正，浮粮毕豁，哀鸿尽归，输纳及时，举数十年重累官民之积弊，一时顿除，赋额无减，而万民乐土，相与输租食力以长其子孙。盖其明足以烛奸，法足以厘弊，廉足以肃下，故豪强不能挠，奸猾不能欺，又诚能获上，得无肘掣纷扰于其间。仁而且毅，以成此国民永利之效，岂非其才分绝人欤？

澧民思其功德，歌颂多有，而梧斋亦自叙其经理始卒，复不自以为功，归美于上司之能成其事，为古近体诗若干首，盖不独歌咏勤苦，亦欲令后之人即此而知其前政之所以弊，后事之所以立，相与保守补救，以毋紊失也。诸篇功力安稳，意思深厚，其区画之周详，任事之坚定，悉于是乎见。凡得其诗而读之者，皆可以兴矣，况澧之人以及继梧斋而为澧令者乎？昔宋钱忠定公在临安，凡邑民转徙，豪右冒垦其田，官不能直者，悉脱还之。流移复业，又为蠲除二税，临安民永赖之。与梧斋此举颇相类。梧斋以良吏之仁心，兼健吏之能事，他日

^① “襯”，当为“櫟”之误。



均安天下，媲美忠定可知，岂但与元次山并垂不朽也哉！

创建学宫碑记

刘伯燮

圣人之学，日新而已矣。羲皇以前二世之学未兴，亦无以儒名者。三代以来，杨、墨起，佛、老兴，吾儒之道，世习闻而忘其益，虽儒者争辟杨、墨，攻佛、老，如唐韩愈氏亟欲火其书、庐其居，人其人，然二氏之琼函玉轴、琳宫梵宇，巍然照耀，孰能去之？而其人且等四民之一，则其书何能火？居何能庐？人何能人哉？毋抑转移化导之有机，而非可以口舌争与？

明兴二百余年，其书犹昔，其居且与吾儒之学并立，乃吾邑孝昌之学，尤属未安。邑之中为会真观以奉老氏。学宫僻居东偏，湫溢殊甚。先是，拟易之者屡，卒不果。岂吾道之新，固必有待哉！隆庆戊辰秋，万安刘侯至，一意崇正学以作人心。明年，道行治理，睹学宫之偏且隘，慨然叹曰：“吾必有以新之！”为告于诸生，谋于学宫郭君惟叙、江君鼎、李君上达、蔺君朝臣，白于当道，请即会真观为学（官）〔宫〕^①。于是更三清殿为至圣殿，而殿新矣；更玉皇阁为尊经阁，而阁新矣；更真观堂为两庑，而庑新矣；余若敬一亭、启圣、乡贤、名宦，或取诸隙地，或仍其旧宇，而规模赫弈咸新矣。易羽衣为青衿，化鼎炉为簠簋。嗟乎！昔固老氏居也，今以之藏圣人之书，妥圣人之灵，群圣人之人，则彼其书虽存，其人不齿，所谓庐其居者，庶其见之哉！

邑博沈君闻政、胡君继矩率诸生汤生聘、祝生文明、魏生秉直、刘生某碑记之。夫诸士知学之新矣，抑知人心之无溺于旧乎？口《诗》、《书》而心侦利，是不啻二氏之荒吾道也。名为圣学，而思清静以为宗，假锻炼以为旨，是不啻二氏之窃吾道也。谭生理、指真机，而当应感纷纭之际，卒不免舛迁谬盭，是不啻二氏之蠹吾道也。惟内有所主，外不能夺，一切声臭，若天风之驱浮云，是所以新其荒者。惟旨归脉络，一以圣人为宗，确乎天理人心之正，二氏之学整不能乱，是所以新其窃者。天则在我，灵炯虚明，投之繁剧，纳之嶮巇，吾心之真常在焉，是所以新其蠹者。盖圣人之学不在宫墙，以是为学，亘万古而常新者也。诸士其知之哉？

学宫延袤，仍观旧址，前稍拓民居，易以旧学之隙，省牲有房，祭器有库，观德有亭，致斋有所，凡若干楹，傍为铺舍若干间，岁收其租，以供课业费。

^①“官”，当为“宫”之误。





是举也，侯首捐俸以倡，人心乐输，士民相助有差，并未敛一赋焉，役募贫民以庸之。创始于己巳冬，落成于庚午夏，曾不逾时，工作迄成，是侯作新人心之有道也。

侯名崑，别号敬亭，起家嘉靖丙午科。其为政，表节孝，兴社学，立社仓，诸不尽述。其言学以求仁为要，尤严二氏之辨云。

清田正赋碑记

邑人武之享

窃闻治国之大经，莫重于授田，而授田之要务，莫先于正赋。《周礼》大司徒“掌建邦土地之图与其人民之数，以佐王安抚邦国”，法至详矣。盖以有土然后有农，有农然后有赋，自古及今，未有井地不均、赋式无纪，而能阜民生、固邦本者也。

秦汉以来，古制寢湮，兼并日炽，忧时之士每思有以救之。乃庸人规近效，欲夺豪右之业；儒者好远谋，期复井田之旧，而情屈势阻，泥古为愆。呜呼！民生至今日，亦孔棘矣，引领而望解悬者，宁第蕞尔之孝邑欤？而孝邑为最。邑固汉东边地也，左襟申、黄，右带潜、汉，山陬水涯，沮洳斥卤，绣错其间，地势如此，其难均也。去万历丈量逾百年，迭罹兵燹，版籍散佚，讯之故家遗老，无征不信，成籍如此，其难考也。至于势豪吞并，奸猾飞诡，藩卫影射，交易虚括，积弊多端，即蒿目为忧，而智穷于综核，法格于鬼蜮，弊窦如此，其难清也。相沿既久，微弱者绝产而税，舞文者去籍而耕，胥吏长子孙，素封鲜王土，以致累及里甲，牟蚀额赋，遗害如此，其难安也。

历来当事多因循陋辙，不思厘正。有以清丈告者，鲜不攒眉蹙额，畏难弗顾。前任张公讳擢士者，深悉其弊，而曰：册籍不可清查，丈量亦难究诘，愿言革之，非廉洁之令不可也，非正直之令不可也，非明敏之令不可也，非上司相亲相爱之令不可也。四德兼备，始可与议丈量。少一于此，必至中馁。

岁丙寅，关西梁公来任兹土，辄諏民间疾苦，得悉无畴之害，不胜怆然，谓隐粮由于匿田，均赋专在经界，欲蠲其弊，策无善于丈量者。立据绅衿、里民公呈，转为详请，词旨淳切，荷上宪赉念，民依力赞其成。侯于是分野授任，布令陈教，画其界以防奸，辨其壤以定则，会其众以同好恶，精其术以广耳目，壹之于神明以拔心志，而犹时单骑履亩而往验之，盖宵旦区画，餐眠不遑。阅三载矣，乃比其一乡丘亩之主名及四至，图厥形，齿厥力，汇为册曰“鱼鳞”，



以立其经，且深惧乎久或纷更，而赋役无准也。以户为主，就一乡之田各归本户，以布其纬，曰“田粮归户册”，又深惧乎交易靡定，收除那移也。每户遵照经册给发印纸，名曰“知单”。凡有市鬻收除之数，岁终更换，不容越都图以紊成轨，其为疲邑计久远，至慎密详切也。

自今以始，闾阎之民互相劝勉，按册赴匭，躬自输纳，既不苦于践更，又不迫于追呼，而起运供亿，责之公家，解扛有纪，津贴永祛，彼在官之黠吏与凭杜之豪猾，冀如昔时之夤缘为奸，蚕食我子遗若不足者，敛手绝迹，智无复施。然则是举也，国赋无亏，万民永赖，以报上宪，有不嘉侯廉洁之操、正直明敏之才，而愈相信相爱者哉！立我蒸民，莫非尔极。峻山如砺，潞河如带，我公高厚，从此千秋矣。况今圣天子励精图治，日讲求于康功、田功，察吏安民之效，必将甄计课最，取侯所以为孝邑兴利除害者，上佐盛治，又安海宇，端有厚赖矣。邑士民咸谓良规，必垂永久。

大德匪可言喻，谋勒之贞珉，用志不朽。以予居乡时曾与末议，寓书告成，且俾纪其崖略。予甚喜我潞民子子孙孙食侯之德于无穷也，故踊跃而为之记。

新修义仓碑记

梁凤翔

积贮者，天下之大命系焉。记曰：“国无九年之蓄曰不足，无六年之蓄曰急，无三年之蓄曰国非其国。”盖惟天地生万物，圣贤养万民，故古后之理天下也，若天时、别土宜、导利布于邦国，而好生厚下、节舒优养之德行乎其中。我国家庶征协应丰亨豫大之象，屡占大有，间有雨暘失若，罢税捐租，赈救多方，致廛圣虑，而犹无不关心民（膜）〔瘼〕^①，思患豫防，颁劝民输粟之诏，以备不虞，盖欲其奉行之力。而一旦金粟衰旺，长吏按册行赈，直取诸其寄也。

夫土均地征之法，皆掌于大司徒，下至遗人、旋师，有县郡之委积，以待凶荒，锄粟、屋粟、间粟，皆待调乏。后世常平、社仓要皆祖其遗意而通变，各因乎其时。即于潞邑南漕二粮载《全书》者，征有定额，支有定数。国初因无厩可贮，民苦于羁延，官难于考核，胥吏丛奸蠹好、私敛积逋者无算，官民交困。矧积谷乃劝民所输，听其乐从而自纳者，若无汇聚之所，保无有壮哉之雀鼠乎？今为之建义仓，使归画一，爰割俸钱以襄是役，无亏公帑，罔算民缗。丰或除陈

^①“膜”，当为“瘼”之误。





以易新，凶则衰益而救济，用以佐耕三之有余，补二黼之不足，是亦先事之虑也。然以积贮之区而建置于远不及经之地，锐入凿出，窞何从塞？乃于治之右旧主簿裁署所，度以寻步，卜吉肇造，俾公得阅视而便于收纳，私无守候而利于交卸。事有规画，义实相维。长此时和年丰，则斯仓斯箱其储无穷矣。

经始于庚午年仲秋月，计用木若干章，瓴甋甃甃若干万，佣匠人、涂人若干日，佣版筑、刈棘若干工，为堂若干础，厩若干间，例得并记。

西湖书院碑记

梁凤翔

古昔圣王育人才、正风俗，必先于教学，诚以致治之原在善俗，而善俗之机在教化，非徒博右文之誉已也。我国家崇儒重道，卓越千古，而大昕征鼓，盛典类举，至于杏坛之宫重加缮治，五子之间不废表章，其为化民成俗计，至倦切也。故自朝廷以逮郡邑，百司莫不凛凛奉职，务以秉道循法为多士型。

余不敏，筮仕濠邑，夙闻其土厚民秀，而多士蒸蒸，无忝乔林珠藪，庶几遵轨向风，駉駉大雅之路。近其习亦稍漓矣，间有偈背师说，轶而之典常之外者，众相慕好，标榜竞奇，则跃冶为良金，而众驾为良骥，毋乃非国家重士意乎？

余窃以为士之所重于国家者二：曰学术也，事功也。语学术则曰儒，而儒非守一家之言已也，其用可以章三光而综庶类。语事功则曰才，而才非负尺寸之长已也，其原由于泽道德而阐性灵。乃世之无才者恒托为儒以自逃，是糝儒也；非儒者恒矫为才以自张，是诡儒也。则教学之无具实甚。

今欲为濠土他山之助，诚见夫抱关之微，官不易方；挈瓶之智，守不假器。居肆成事，学以致道，有明训矣。而邑之鼓篋操缦、藏修游息之域，阙如未备，师帅之谓何？于是征诸邑乘，询之三老，始知邑故有旧书院云。然壤地褊小，而又僻居梵宇之侧，恐不足以表观瞻、迪誉髦。乃令相土者构得吉壤于治之西北陲，峻山为枕，沦河为带，形势宏敞，气象轩豁，洵陶淑人伦、光昌文治之胜区也。遂取期捐贲，肇启尔宇。自壬申冬迄癸酉春，经营告成焉。凡竹木之需、埏埴之用、佣工之贲，丝毫弗以烦民。为堂若干楹，为厅事若干楹，为学校若干间。濒湖为楼，前为门、为棹楔，颜曰“西湖书院”，而垣墉涂茨，靡不周致。

爰肃诸士而训之曰：有周之隆教始于比闾，而广之于家塾、党庠、州序，以达于王国。当是时，盖无人而不学，亦无地不建之学也。士之肄其中者，飭以六德，齐以五行，典、坟、丘、索之悉探，而礼容、乐律、名物、度数之悉察，



童而习之，长而安焉，使小子有造，成人有德，居则称先生，出则毗天子，其盛如此。迨其后也，惟专训诂、攻〔占〕〔佔〕〔倅〕〔毕〕^①，取之也狭，教之也简，虽有抗颜侈口而谈性命，夸经济者不相为用，而适相为病，人将谓古之成才易，而今独难。兹者文教醲蔚，熙洽有年，尔澠士亦既彬彬，质有其文矣，则所以自勉者耻不修，不耻不闻；耻不能，不耻不达。升斯堂也，入斯室也，行谊相规，敬业乐群，不必畏城阙之讥，而克副薪樗之化，此亦澠士还淳返正、趫然振兴之会也。异日者尔诸士服习渐涵，以需宅俊之用，学术事功必卓然有所表见，冀以安上治民、移风易俗，咸取足于是。

余知圭璋之德纲纪四方，与卷阿之士辉映后先，视成周又奚多让焉？若云有启而兴、有兆而合，如文翁、胡安定、朱紫阳辈克副以人事君之谊，余则岂敢。

新建斗山驿馆碑记

张擢士

孝感距黄陂百二十里，而斗山居其半。星轺之过我者，于此置顿焉。先明建邮亭，行则授半日之餐，居则备一夕之卫。斗山之人亦以行李繁多，贸迁颇盛。经乱邮亭毁矣，高轩贵客辱在下里者，为之除馆于居民之舍、市廛稍爽垆，与过客分日而居，民自视其家犹逆旅也。居人日以罢，间架日以少，客亦无敢安枕。勾摄市民，为之干掇，于是乎民虑宾，宾虑驿，而咎乃交集于令。余每以送迎至辄内愧，盖扰，愧民，褻，愧客也。

受事之明年，邑废坠既稍举，因山溪之涨，贮竹〔本〕〔木〕其地^②，予陶人资而期以货皆备，乃大召匠役，抡斗山之干，使董厥事，粪除其故墟，前建堂，后建寝，左建庖，右建庖，堂寝之际，屋有如弄，有大门、有仪门，垣之、堊之、髹之、绘之，既壮且丽矣。今而后承奉齐牺，瞻过客之马首而税其驾，其无虞中露乎！计用木若干章，用甃甃甃甃若干万，佣匠人、涂人若干日，佣畚鍤、板筑若干工，再阅月告成，而公帑无亏，里缙罔算。

凡予营建孝感诸役，一砖片瓦皆捐俸为之，类若此耳。役〔峻〕〔竣〕^③，往落成焉。父老欢呼，以贺以谢，进而言曰：“斗山之不得宁居者三十有余年，室庐，客寓之；孳蓄，客饌之；子弟，客挹之。前令之见此者，亦常哀之而议馆

①“占”，当为“佔”之误。倅，当为“毕”之误。

②“本”，当作“木”。

③“峻”，当为“竣”之误。





矣，然暂耳，归辄忘。惟公无忘我，（为）〔惟〕公克馆厥驿以安堵我斗山^①，公自是不愧民矣。晋庠其垣，子产毁之。陈国道葦单，襄公知其将亡。邮亭之设，由来重矣。斗山者，轮蹄之冲也，恐冠盖之不时，而湫隘以干贵客之怒。兹者有堂巍如，有廊翼如，车廡缮修，巾车脂辖，牧圉趋事，宾至如归，不畏寇盗，而亦不患燥湿。公自是不愧客也。先是，行李之至于斗山者，官辄勤民选刍糗，行酒炙劳之。今者饬牵禀醴悉官为供，不以烦间左也，斗山民如释重负焉。公自是不愧令也。今兹之役，盖一举而三善备也，愿得公一言勒诸石以永恩，施于不朽。”予曰：“微父老言，予初不知此馆之便若是。”予重违父老意，而纪其相告之语如此。

二程祠碑记

张擢士

二程祠者，祠明道、伊川二夫子也。二夫子之父曰大中大夫珣。珣之父曰黄陂令通。通令黄陂时，娶于孝感张氏，是生太中。以太中贵，张赠孝感县太君，荣所产也。通之卒于西陵也，家人未克北归，以故孝感有二夫子读书处，今程子台盖其地也。厥后返洛，而其裔孙有以孝感为张太君所产之乡，特自英山来从，云仍繁衍，麟凤辈出，蔚为贤裔，不啻颜、孟之表邹、鲁。先明有二程祠在邑东郭。万历中，钱塘郭公寅亮督楚北学政，行部德安下教修葺，而署程氏之当户者一人为侍祠生奉祀事。

〔崇〕祜之季^②，祠毁于兵。予手披旧图，躬访遗址，茂菅宿莽，一望荡然，想象明烟，凄怆而已。虽然，二夫子配学宫，千秋为烈，而区区濠祠之兴废，何足为有无？顾既有其举之矣。今夫先贤先儒之列坐配殿者，仍指一木主焉，遥想而心存之，皆足动人慨慕。然而世之相去也，或周、秦、汉、唐之远；地之相距也，或南海、北海之遥，所以为慨且慕者，不过诵其诗、读其书焉已耳。若夫藏修游息之所垂留，遗人故老之所称说，服习遗训，披拂流风，固未有如濠人之于二程之亲且切者。即其所游所寓之地而兴，见羹见墙之怀则尊，祠特祀又乌能已？明道北返之后，亦尝曰：“吾梦寐犹在西陵。”夫既梦寐在西陵，其能忘我濠上乎？

① “为”，当为“惟”之误。

② “祜”上，当脱“崇”字。



予令潯三载，百废粗兴，乃以辛丑之九月丁酉告吉，庀工、捐俸、虑材，讫用竣事。虽不敢侈丹雘榱桷之盛，而妥侑之有其地，瞻礼之有其像，庶以彰后学矜式之志，而且以慰二夫子睠顾旧游之意于不衰，揆之于理，其亦弗畔矣。自今潯人之教于斯、学于斯者，庶几二夫子修业之地以求其所修之业，因以上探颜、曾、思、孟相传之心法，而于以奉若宣尼之微言绪论，无或悖焉，则夫潯人士之造就，从此优入圣域无难矣。后之君子，其尚嗣而无替也哉！

新建三军台桥碑记

梁凤翔

潯百里之邑而寄之令，地无论远迩、事无论巨细，皆令之一身相为贯通。朝廷，吾元首也；僚属，吾股肱也；田畴、学校，吾脏腑也；城池、仓庾，吾四体也；山川之流峙、舟车之往来，吾血气腠理也。

周之兴也，造舟于渭。陈之亡也，川泽无梁。古也杜倚之制与井田学校并传，岂非以设险利济之用，同为国恤民依之所必资也哉！予丙寅春来令兹邑，视夫城池颓矣，宫墙圯矣，田地之浮粮逋赋叠叠见告矣，子矜寻讥城阙仓廩虚而无备矣。如处败屋，如抱乱丝，荆棘盘错，解割不遑，又遑问川原舟车之所及乎？夫一肢委顿，谓之不仁；全体伤残，其何能国用。是悼心怵志，手口卒瘁，废寢眠、栉风露，拮据经营，六载于兹：修理堞楼，金汤固焉；整造胶庠，俎豆新焉；取我田畴而正之，沟洫井然；取我誉髦而庀之，人文蔚然；社学设而育材有师也；义仓建而赈施有储也。缓急按节，标本互治，纲举目张，渐次就理，一如六经之得其冲和，而五官之效其健顺矣。然而荣卫不滋，伤及经络；腠理不密，或延肢体，则水涸成梁之制，不可不亟讲也。

潯治自双峰、九峻迤邐以至于邑，三面皆泽国，济川作楫，桥居其一。邑东北递黄有理丝桥，西通云梦有仁寿桥，两桥费繁工倍，数十年不一举者，今已采石庀材，计期可就，而西北之气通矣。独是三军台一桥，为邑东障，出董湖之水，流孝子之芳，春夏泛涨，势最汹涌。前者屡兴屡溃，卒鲜成功。余喟然曰：“岂周身血气至此少顿乎！”爰捐贳鸠工，子来趋事，不数月而落成。人乏褰裳，车不濡轨，行李之往来，商贾之络绎，咸不病涉焉，而东南之气通矣。

然则桥非细事乎！实与田畴、学校、仓庾、城垣相为终始，同报效于朝廷者也，岂曰川原舟车之利，不与予身之痛痒相关也哉！因思东方为出震之地，厥功长育，厥征文明，朝阳有栖矣，文昌有阁矣，高下鼎峙，郁郁蒸蒸，不啻山辉川媚，





其有造于濠者又岂可意计欤？是役也，藉费于众，董其成，不敢以为功，惟期邑无废事，以尽予身之事而已。

是为记。

丰乐里王公新堤碑记

彭始搏

养民之道，农务为急。农之有防者，曰旱、曰水，而水为甚。治水之法有二：《书》曰“九（州）〔川〕涂源”^①，所谓疏濬以导之也；又曰“九泽既陂”，所谓筑防以障之也。

水利不讲，农事日弛，相沿亦已久已。浚阳王公治濠之三年，百废俱兴，独邑治西北土名枯河垸，地势低下，旧有堤埝，废自前代。百余年来，被水独剧，居人每虚其地以供鱼鳖，历时既久，人心转懈。吾族暨众姓聚庐托处于此，家弟卉倡于众曰：“举事贵乘时，邑有贤侯，岁不大俭，修废举坠，斯其时欤？”于是群〔诉〕〔诉〕于庭^②，合词出力，愿筑长堤。公毅然俯从，单骑勘验，询其旧迹，度其形势。盖孝邑濠河水发源申罗，其始滥觞耳，一遇积雨，汇山溪诸水，瀑涨弥漫，数百里颓波委浪，莫可砥柱，则修筑诚不可缓。于是力诣各宪，悉荷俞允。爰集乡耆士庶，堤之丈尺，视其田亩，工之盈缩，视其丈尺。公以合众敏以集事，欢声雷动，畚鍤云兴，不弥月而数十里金堤告成。

堤高丈有咫，厚如之，积弓二万有奇，用民三万有奇。易以今名“丰乐”云。此一役也，盖公之实心实政，不惑群言，不诎民力，故能调一乡之众，建百世之利。白渠、苏堤，今古同声，非偶然而已也。群情爱戴，复谋创生祠，属予记德政，垂永祀焉。公闻之，蹙然曰：“吏能养人，谓之胜任；野多旷土，是谓溺职。告无罪于兹土，幸矣，乌用祠为？”无已，则塑壮缪侯像于中，以镇金汤，而父老犹欲飭公銜位焉。夫壮缪大节，英风昭著，简册封王封帝，历代尊崇，巍楼杰阁，遍满寰宇，曷藉此区区僻陋？盖公之意，让善不居，加以民情难遏，故复捐俸助工，赖神庥以垂永久。上梁之日，童叟聚观，一闻斯举，无不称叹，以为得未曾有。嗟乎！紫芝眉宇，千秋而下，尚思想像其丰采，瞻仰其魁岸，低回流连而不忍释，而况于亲炙之者乎？

^① “州”，当为“川”之误。

^② “诉”，当为“诉”之误。



戊寅，家中郎寓书促文。盖公仁声溢于輦下，值兹盛举，安敢以不文（词）〔辞〕^①，且纳风谣、载循良，史氏所有事。勉缀始末，以复澧中诸兄弟。虽不颂扬美政，抑欲俾后之为牧者急所先务，毋替前贤之功云尔。

重修汉孝子董公祠碑记

王梓

予既治澧之三年，年谷幸登，灾沴不作，学宫告成，乃谋葺汉孝子董公永祠而新之。崇祀先贤，风励后人，守土者所有事也。

按孝之名不载于史，而儿童妇女莫不艳称其事者，其言盖出于稗官，毋亦近于幻渺不经，为儒者所不乐道乎？予于造物福善之理，未敢执以为训，盖虑人之责望于天，而怀二心，以为善则为善，有时而穷，故董公感织女之事，亦尝疑之。虽然，要不可断以为必无也。夫孝弟之道通于神明，《孝经》之成，天示灵异，则是孝必能格天，如古所称卧冰致鲤、哭竹得笋者，乃理之常，而孝之不获其报者，皆属事之变也。

永之事父也，耕以营菽水，贷身而谋窀穸，本亦寻常无奇，自夫人不能尽其常，而永乃有其名焉，天独异其报焉，织女之事，予于是益信以为必有。今吾民当兹时和年丰，不思滫瀡是谋，往往不忍一朝之忿，亏体以辱其亲者，比比也，甚者惑于形家之言，淹亲柩而不葬，历年久远，至不可问，此其人视永为何如也？

邑东十里董家湖有永父墓，稍南即永墓。前司李莆田黄公巩、学使太仓王公发祥皆有碑记之。予以去年冬谒其墓，则荒烟蔓草，狐兔上下，碑皆无存，其文仅见于《志》。乃命修其颓垣，赋诗纪之。其祠则始于明正统中，建于北门外，易者屡矣。顺治中，前令张公擢士移建于治东会贞观前，即今祠也。岁月既久，将就倾圯，无以肃观瞻、寄爱慕。予惧其久而遂泯也，乃捐俸修之。栋础、梁桷、瓦石、墙壁，折者易、缺者增、倾者筑、漫漶者加垩饰，像施金碧加庄严，因仍旧制治之，则已不敢侈前人也。工既讫功，与邑之父老子弟落其成，因书于丽牲之石，而以谒墓诗附焉。

呜呼！自今以往，我父老子弟登斯祠也，仰斯像也，人人感触而兴于孝，知发肤身体之不可毁伤，一举足、一出言，而不敢忘其亲，将见狱讼不兴，礼让成俗，造物者亦将以丰稔安乐报之，安见福善之理不可信也耶？

是为记。

^①“词”，当为“辞”之误。





孝感县宋明两朝所得古鼎考

李湘

鼎盖出自前万历二年甲戌九月。孝感以议城拓地即湖为隍，方就筑而地中铿然鸣，怪而掘之，得一函，遇风则烬，烬尽而古鼎出焉。蟠腹参口，三足两耳，周圆端严，体被五色，上有识，皆古籀篆文，大小凡六十字。鼎甫出而有紫云盖之，三青鸟时时回翔其上，夜所置处有光烛天。中丞以下诸公相与叹异，令所司者就其处构阁度焉，颜曰“神鼎阁”，仍请太仓大司寇王公弇州为记。王时以节钺镇抚郢阳，云所记缘起甚详，且摹宋薛尚功《历代钟鼎款识》皆合，始知为商末周初南宫仲父方鼎也。

乃《一统志》云：宋徽宗时，孝感县东湖村夜有光烛天，农人闻于官，掘地得周时九鼎，贡于朝。以予读《宋史》，宣和元年己亥三月庚戌，安州进所得商六鼎，计方鼎三、圆鼎二、甗一，合之薛尚功纂《历代钟鼎彝器款识》，云六器皆得于安陆之孝感县，耕地得之，其铭字著在法帖之九卷、十卷、十六卷，而第一方鼎则南宫仲所作。

观此《一统志》九鼎之说，殊不足据。予惟宣和所贡，历靖康之难，三馆四库所藏诸法物悉已辇之而北，六器不知转落谁何处矣。而万历甲戌相去四百七十余年，南官方鼎复出于孝感，果神物不可终閤耶？弇州王公纂《神鼎阁记》，谓当周之时南宫仲为卿士，以王（锡）〔锡〕作鼎三^①，而此其第一，大小凡六十字，其不可辨者仅十。但薛所摹第一款识止五十八字，无不可辨者。抑鼎各有副，其词增损不必尽合耶？予独惜曩年无有授之铁史，镌之贞珉，俾得与夏之琬戈钩带、商之象尊虎彝、岫嵎之碑、岐阳之鼓以永其传者，一方掌故不泯泯无传与。欧阳文忠公《集古录》云：刘源父官长安所得先秦古器内，有周张仲簠铭四，其文皆同，而转注偏傍左右少异。至于他所获彝器，往往类然。甚矣，古之人为虑深远也，知夫物必有敝百世之后埋没零落，幸其一在，尚冀后之君子见而传之。不然，何叮咛重复，不厌其烦也。方仲之作斯簠也，奚必期源父藏其器与录其文哉！亦以久而必有相得者，物之恒理，故君子之于道不汲汲，而志常存乎远大也。

文忠才识冠绝有宋，而好学深思，虽三代秦汉之遗迹，构求不让余力，单词只字，宝若拱璧，经史讹谬，藉以折衷是非，尚友论世之士而能然乎？薛又载以方宝甗一一铭，词与圆鼎同，又曾侯钟二，并云出于安陆之孝感，未详何时？


^①“锡”，当为“锡”之误。下同。



然宣和所献六器虽无方宝甗、曾侯钟，统而观之，鼎之出于吾邑者，宋、明共得其九矣。属在后起，忍令其无传焉，因参互考订，以与博雅缀古者质之。


神鼎释文如左：

南宫中鼎一



惟十有三月庚寅，王在寒师。王命太史括怀土。王日中兹怀人内史〔锡〕〔锡〕于琰〔王〕〔玉〕^①，作臣今括里汝怀土作乃采，中对王休命。烹父乙尊，惟巨尚中臣赫赫。

南宫中鼎二




^①据前王世贞《神鼎阁碑记》，“琰王”当作“琰玉”。





惟王命南宫伐反虎方之年，王命中先召南国贯行执。王位在射圃真山中，呼归生原刊王。执刊宝彝。

南宮中鼎三




惟王命南宫伐反虎方之年，王命中先召南国贯行执。王位在射圃真山中，呼归生原刊王。执刊宝彝。

右三器皆南宫所作。南宫，其氏也。中，其名也。南宫为氏，在周有之，如《书》所谓“南宫括”、“南宫毛”是也。前一鼎曰“(锡)[锡]于琖玉”。《集韵》云：“玉琖，小杯也。”又言“作乃采”者，盖采，事也。命以立事，故因为此鼎而刻之铭也。此鼎也，而谓之“鬯父乙尊”，何也？“鬯”者，大鼎也。曰“父乙”者，周初接商之器也。后云“惟臣尚中臣苏苏”者，如“赫赫师尹”之义。第二、第三鼎曰“伐虎方”者，虎方犹鬼方也。虎，西方之兽，是必因征伐而昭其功，以铭之耳。又“王位在射圃”，而“射”字极古，如《宰辟父敦》“射”字，明正作挽弓之形，而此鼎“射”作□^①，如今之世俗所谓床子弩者，岂三代之遗法耶？

① “此鼎射作□”，末字为金文，原书漫漶，不易描摹。



父乙甗



王命中先见南国贯行蕝
宜在庙史□至以王命曰
余命汝史小大邦乃有舍
汝邦量至刊汝唐小多□
十召自方长□□邲□□
以师百寮故□□故人在
汉中州曰辱曰□□故人君
曰夫乃□□言曰□□贝
曰对扬王□休□名父对
余□□承用作父乙宝彝^①

右铭重和戊戌岁出于安陆之孝感县，耕地得之，自言于州，州以献诸朝。凡方鼎三、圆鼎二、甗一，共六器，皆南官中所作也。形制精妙，款识奇古。曰“父乙”者，盖商末周初之器耳。

^①铭文残佚不全，故句读阙如。





圆宝鼎一



惟十有三月，用吉金自作宝鼎。其子子孙孙永用享。

圆宝鼎二



同前。

右二铭一同得于安陆之孝感县。上一字乃“十有三月”合成一字。不显其名，而曰“用吉金自作宝鼎”者，乃周之君自作此鼎而用之耳。




方宝甗



惟十有三月，用吉金自作宝甗，其子子孙孙永用享。

此铭与前二员鼎同出于安陆之孝感县，铭识悉同，“惟十有三月”合作一字，“甗”字尤极奇古，左右上下，不拘边傍位置耳。


曾侯钟一





唯王五十有六祀，徙自西陽，楚王韵章作曾侯乙宗彝，置之于西陽，其永時用享。

穆
商 商
曾侯钟二



作曾侯乙宗彝，置之于西陽，其永時用享。

卜掇反 官反



右二钟，前一器藏方城范氏，皆得之安陆。古器物铭云：“惟王五十六祀”，“楚王韵章”。按：楚惟惠王在位五十七年，又其名为“章”，然则此钟为惠王作无疑也。前一钟背又有一“穆”字、两“商”字，后一钟背有“卜弭反宫反”五字，其义未晓，然恐“宫”、“商”乃二钟所中之声律云。

凤翔曰：横说之，则以《诗》、《书》、《礼》、《乐》；从说之，则以《金版六弢》。枝辞琢正，纷紊纠射，正获之于监市履豨也，每下愈况矣。陶隐居读书万余卷，一事不知，深以为耻。顾阮孝绪始集《七录》，牛里仁详陈“五厄”，虽富埒沈任，文用新事，而古今书籍，读不可遍。送疑取难，代逞叩尔。

夫家有敝帚，享之千金；干将之剑，（桺）〔匣〕而藏之^①，宝之至也。至于见舞剑而善草书，始因剑而悟之，既悟，则剑为送者矣。读书亦资送者也。卵有毛，鸡三足，黄马骊牛，火不热而山出日，皆与白鸩婴菴、灵蛇吐象同一骀荡、形影之竞走。

然别而言之，则须眉异名，合而说之，则体之一毛。故指山之一草而问曰“山乎”？曰山，则不可也，而山有草木鸟兽，皆举之矣。故凡恢奇俶诡之说，皆山之草木鸟兽也。神仕无数，占梦献吉，委蛇輶然于齐桓，鱼服见困于豫且，幕孟氏之庙，奉豎牛之雉，不冯其子，铭在沙丘，灵之为灵也久矣。是则张宽之知浴女，卢植之出幽婚，和宫声于牛铎，应蕤宾于池铁，魏侯乐工召于汉文，班固真本得自北僧。力则任鄙，智则樗里。追豚得妇，书版索金。巢处知风，穴处知雨。师偃美人之招，伯昏无人之射。古之有也，非吾有也。

若乃东汉杨震辈，皆尚譏纬，张平子非之，而平子风角鸟占，又何愈于譏纬？此又朱子所云：南、北《史》除《通鉴》所记者，其余只是一部绝好笑的小说，则其他可知矣。建道场之幡，击甘露之鼓，兰室旃崖净照，相得愚夫愚妇，身盗贼而口素食，即云销孽灭过，率皆祖白衣断肉、黄羸菜味之术。秦皇汉武，穷山讨海，髦期不遇神仙，子房可慕，而少君亦可羞也。六合之外，存而不论，惟圣人则无所不知。其道虽有而未之知，有其道而不以教人，仁与知且不能，又乌足以为圣人乎？不然，则神仙之说妄矣。至于浚阳陶潜，宋之逸民，梁昭明为之立传特叙，以万乘元良恣论山泽，若有同心，是则古今之凡有所待而传者，独何蕃欤？

记《考工》以补《冬官》之阙，可也，谓《冬官》散见于“五官”中，而黜《考工》，

^①“桺”，当为“匣”之误。





不可也。楮小者不可以怀大，绠短者不可以汲深。先正成书，飞潜动植，方言殊俗，傍搜兼录，荟萃丛集，庙偃寢室，各有异名，椎轮、大路，不废雕几，脱略穿凿，皆致谨焉。

夫文不雅驯，荐绅难言，事或传疑，本末相戾，《禹贡》三邦，尚属未详，江上丈人，更归何处？不虑而应，益之以怪，不几等于黄繚之对乎？而鸡次资为故实，於菟原属方言；黄琼、黄琬，两地可考，梦南、云北，二泽同称；蒙谷迹见磨山，董城名缘永墓。若神鼎之出西湖，在明万历之甲戌，今花甲再周，乃得鼎所传商周遗文于书院垂成之日，则又机有适叶，事非偶然者矣。因旧所约略，聊为剽缀，尝一啻于全鼎，集众腋而成裘，唐勒太史之策，市南宜僚之丸，敢云闻大国之风烈者，尽出先生之余论欤？

皇清董孝子墓碑

王发祥^{太仓}

汉孝子董永墓在孝感县东，去城七里，黄公之《记》详矣。予视学楚北，例行郡，不及县，不得一拜其墓，乃属所司致祭，而树碑表之，以传黄公之后，俾邑之人得以览焉。

呜呼。曾子回车于胜母，墨翟停辔于朝歌^①，恶其名也。名之不臧，君子犹恶之，而况其实乎！吾吴以泰伯名其乡，越以严陵名其乡，而楚以孝子名其邑，地不能重人，而人能重地，闻其风者可以兴哉！

^①此次整理底本自“墨翟停辔”以下脱62字，兹据武汉大学藏乾隆《汉阳府志》手抄本补足。



后 记

此次《汉阳府志》的整理工作，我们聘请了湖北省文史馆馆员、湖北大学彭忠德教授和彭善德老师对乾隆十二年《汉阳府志》刻本进行点校，按国家最新实颁布的《标点符号用法》施加新式标点。同时，聘请林波对全书进行校核。

在整理过程中，我们发现，乾隆《汉阳府志》在编纂时存在一些失误，如卷四十八《迁汉川县学记》“守以属堪輿家”一句文意不通，经与嘉靖《汉阳府志》对勘，发现系此本中间缺少了八百字左右，于是根据嘉靖《汉阳府志》补足“守以属”下缺失的文字，以通文气。

又如卷三十四《仕迹志·孝感县》“程大毕”条，原书六十一页与六十二页之间插入“又六十一页”，将程大毕传分为两段，导致三页文字错简。本次校点，将“六十二页”前四行文字移接六十一页“转广东盐运使”之后。

其他如原书卷三十七第二十页“间阙”，显为“间关”之误；卷四十三第一页“不事王侯，高尚其志”，“志”为“事”之误。此类错误及所补正脱字、漫漶字若干，均出校记，以便读者覆按。

全书整理成稿后，华中师范大学博士生导师严昌洪教授审订了全稿，湖北人民出版社编辑尉侯凯审读了全稿，提出了一些有益的修改意见，并与本书的整理人员对整理中的重点、难点及规范性等问题进行了查证、协商与论定，在此一并表示感谢！

汉阳区方志办开展古籍旧志的整理出版工作，相关方面还缺少经验，加上时间仓促，本书难免存在一些疏漏与失误，尚祈读者不吝指正。

武汉市汉阳区地方志办公室

2013年11月



